

23383
23384

894.35

U-20

207

0

2h 8



2011

ԿԻՒՋԻՏԷ ՍԱՊՐԻ

ՆԷՏՐԷԹ

ԹԱՐԳՄ.

Ա. ՏԷՐ-ՄԱՐԳԱՐԵԱՆ



Տպագր. Պենիսեան
Կ. ՊՈԼԻՍ
1932

Ն Է Տ Ր Է Թ

Առտուն կանուխ, երբ երիտասարդ փաստաբանը
գրասենեակը մտաւ, իր միտքը շատ զբաղուած էր
նոր դատով մը:

Սեղանի վրայ դիզուած թուղթերէն մաս մը զա-
տեց ու սկսաւ քննել: Կալուածական, աւելի ճիշդը
արժէքաւոր ազարակի մը դատն էր: Կողմերէն մէկը
դեռատի ու անոքաղջիկ մըն էր, որու գէմ ժառանգա-
կան դատ բացած էին երկու այլ ազգականներ:

Փաստաբանը, ձեռքը ծնօտին, հոգեկան անօրի-
նակ կացութեան մը մատնուած, կ'ուսուճնասիրէր
դատական թուղթերը: Թուղթե՛ր... ամբողջ անցեալ
մը յիշեցնող այս խնդրով շատ տարուած էր:

Մոռացութեան անդունդը թաղուած օրերը վեր-
յիշելու առիթը տուող այդ սեւ գիծերուն՝ աչքերը
սեւեռած, վերադարձած էր տասնըվեց տարի առաջ-
ուան կեանքի մը. երեւակայութեան մէջ ընկղմած էր:

Ի՛նչ քաղցր յիշատակներ կ'արթնցնէր այս ազա-
րակը. աչքին առջեւ կուգային իր մանկական կեան-
քի անմոռանալի պահերը, հոն, իր ապրած օրերու
հաճելի տեսարանները:

Անտառներու, արտերու մէջ վազվզելը, խաղերն



111384-Ա 2

906-2011

ու պտոյտները, կենդանիներ հեծնելը, կառք նստելով գիւղեր շրջագայիլը, այս անդարձ պահերու քաղցրութիւնը. հապա, հորմէն շատ յարգուած ու մօրը՝ «քեռկին» անուանած սեւաչուի կնոջ մը կողմէ իրեն ընծայուած մեծարանքները, անոր աշխոյժ ու գրաւիչ դէմքը, քաղցր ու գուրգուրալից նայուածքները. բոլոր ասոնք շարժանկարային արագութեամբ մը կը տողանցէին իր երեւակայութեան առջեւէն:

Բազմաթիւ դիպուածներէ յետոյ, այդ երիտասարդ կնոջ դժնդակ մահը իր հօրը երկարատեւ հիւանդութեանը հետ ի՞նչ առնչութիւն կրնար ունեցած ըլլալ. ինչո՞ւ համար իր դժբախտ հայրը երկար ու տառապազին տարիներ եւրոպական երկիրներու հիւանդանոցները զգայազուրկ ու դատողութիւնը կորսնցուցած, կը յիշէր նաեւ իր մէկ այցելութիւնը նուազկոտ ու վշտազին հայեացքով իր հօրը, օտար երկրի մը մէջ, կը յիշէր այդ փիճակին ի տես իր կրած սարսուռն ու սրտակեղէք վիճակը:

Իրերայաջորդ այս դէպքերու յիշողութենէն ընկճուած՝ փաստաբանը մերթ ջղայնօրէն իր մազերը կը խառնշտկէր, մերթ ճակատը շփելով սեղմուած շըրթունքներէն կը մօլտար.

— Ե՛ս տարօրինակ, շատ տարօրինակ զուգադիպութիւն:

Կ'ըմբռնէր թէ՛ այս դեռատի փոխանորդեային այն սեւաչուի կնոջ ազջիկը և Սայիտ պէյի միակ ժառանգորդ ըլլալը ու իր մօրն ալ ասոնց շատ մօտ ազգական ըլլալը պարզ զուգադիպութիւն մը չէր, այլ իրարու հետ շատ սերտօրէն կապուած իրողութիւններ, որոնք այժմ իրենց գոյութիւնը կը պարտադրէին: Վեց տարի առաջ մեռած իր մայրը եթէ այսօր ողջ ըլլար, հաւանաբար պիտի կրնար այս ժառանգորդի մասին ստոյգ տեղեկութիւններ տալ:

Յանկարծ իր հայրը յիշելով.

— Ո՞վ գիտէ, որչա՛փ պիտի զարմանայ, ըսաւ: Երիտասարդ փաստաբանը, իր միտքը տանջող անցեալի երեւակայութիւններէն ազատուելու համար, թուղթերով ծանրաբեռնուած գրասեղանին առջեւէն դանդաղօրէն ելած միջոցին, դուռը մեղմօրէն բախելէ յետոյ ներս մտաւ պատկառազու մօրուսաւոր մարդ մը ու ըսաւ.

— Նիհատ պէյ էֆէնտի, կրնա՞նք քիչ մը տեսակցիլ:

— Հրամեցէ՛ք, Վէյսէլ էֆէնտի, ճիշդ հիմա ձեր թուղթերը կ'ուսուցնասիրէի. շատ գոհ եմ որ եկաք: Փաստաբանը դարձեալ իր տեղը նստաւ, իսկ հիւրը մարօֆէն թիկնաթոռի մը մէջ տեղաւորուեցաւ ու իրեն հրամցուած սիկարը վառելով ըսաւ.

— Երէկ, Նէտրէթ հանրմը ագարակ մեկնեցաւ, պարտաւորուած եմ երկար ատեն առանձին ձգել զինքը, հետեւաբար քանի մը օրէն ես ալ պիտի երթամ. այս պարագան ձեզի տեղեկացնելու եկայ. այս առաւօտ ձեզ անհանգիստ ընելուս պատճառը այս է անա:

— Ձեր ներկայութիւնը հաճոյք մըն է ինձի համար, կրնաք ձեր ուզած օրը մեկնիլ. հաւանաբար քննիչ մարմնի մը հետ քննութեան գանք հոն: Ագարակը կուգամ. այս մասին տրուած վճիռը կը հազորդեմ ձեզի. հոն կը գտնեմ ձեզ, և Նէտրէթ հանրմն ալ տեսնելու պատիւը կ'ունենամ: Անհող եղէք, Վէյսէլ էֆէնտի:

Վէյսէլ էֆէնտի գոհունակ արտայայտութիւնով մը պատասխանեց.

— Իսկապէս ձեր խօսքերը շատ ուրախացուցին զիս. թէեւ Նէտրէթ առանձին չէ հոն, մեր քոյրն ու կարգ մը վստահելի անձեր կ'ընկերանան իրեն, սակայն չեմ կրնար երկար ատեն անկէ հեռու մնալ:

— Կարծեմ, Նէտրէթ հանրմին հետ ազգակա-
նութիւն ունիք:

— Ո՛չ... ո՛չ... ես անոր հօրը, յարգելի Սայիտ
պէյի երախտապարտ ծառան եմ. Նէտրէթ իմ թեւե-
րուս մէջ մեծցած է:

Խորունկ հառաչանքէ մը յետոյ շարունակեց.

— Մայրը շատ երիտասարդ տարիքին մէջ, կնան-
քին հրաժեշտ տուող դժբախտ մը եղած է. իսկ հայրը՝
... շատ ազիտալի վախճան ունեցող արգահատելի
մը: Այն ատեն, ես ազարակին մատակարարն էի.
հանգուցեալ տէրս զիս շատ կը սիրէր: Ձիւնոտ օր
մը... բնաւ չեմ կրնար մոռնալ, միասին որսի ելած
էինք. հիանալի ձիավար մըն էր. երբ ձի հեծնէր,
գլուխը ուղիղ ու ինքնավստահ երեւոյթ մը կ'առնէր:
Այն օրը, յօնքերը պոստած ու գոյնը դեփ դեղին
կտրած էր. անտառի եզերքի գահավէժ գառիթափէն
իջնել ուզեց. ջանացի զինքը արգիլել, մտիկ չըրաւ
ու մէկէն ձին քշեց. թաւալգլոր ինչալը ու արիւն-
շաղախ ձիւներու վրայ փոռելը ակնթարթի մը մէջ
տեղի ունեցան: Վազեցի, գրկեցի, գլուխէն հոսող
արիւնովը ես ալ ներկուեցայ: Սեղմուած շրթունք-
ներէն մրմունջի ձեւով բառեր մը կ'արտասանէր:
Մտիկ ըրի. «Ի՞նչ պարկեշտ ու պատուաւոր մարդ
մըն ես. աղջիկս քեզի կը վստահիմ. ամէն կերպով
պաշտպանէ՛ղայն»:

Վէյսէլ էֆէնտի աչքերը տամկացած էին:

— Ներեցէք. հոս անգամ, չպատմուելիք նիւ-
թերու մասին կը խօսիմ:

Փաստաբանը շատ ազդուած՝ ըսաւ.

— Ընդհակառակն, կը փափաքիմ աւելի բացա-
տրութիւն ստանալ ձեզմէ, օտարի մը առջեւ չէք
գտնուիր:

Վէյսէլ էֆէնտի տարօրինակ զարմացումով մը
փաստաբանին նայելով.

— Ի՞նչպէս, դո՛ւք...

Նիհատ պէյ շարունակեց անյողդողդ ձայնով մը.

— Այո... Վէյսէլ էֆէնտի, բարեբախտ զուգա-
դիպութեան մը շնորհին արժանացանք. թուղթերու
քննութենէն հասկցայ թէ Նէտրէթ հանրմի հայրը,
Սայիտ պէյ, մօրս մօրեղբայրն է եղեր: Ծա՛տ տարի-
ներ անցած են. Սայիտ պէյը մեռած միջոցին ես
տասը տարեկան էի: Հօրս երկարատեւ հիւանդու-
թիւնը, Եւրոպայի մէջ իմ ուսանողութեանս շրջանն
ու վերագարծիս՝ մօրս անդառնալի կորուստը մեր
ընտանիքը մեծ աղէտի մը մատնած էին. այս պատ-
ճառներով մեր մերձաւորներն անգամ մոռցած
էինք:

— Աստուած իմ, ինչե՞ր կը լսեմ. ըսել է դուք
Նէտրէթին ազգակա՞ն էք:

Փաստաբանը գլուխը շարժեց ու թեթեւակի ժրպ-
տելով.

— Այո՛, այնպէս է եղեր... ես ալ կը զարմա-
նամ...

Վէյսէլ էֆէնտին յուզուած յարեց.

— Խեղճ աղջիկ, յաճախ իր անպաշտպան վի-
ճակէն գանդատելով դառնօրէն կուլայ: Հիմա կը
հասկնամ թէ ո՛րքան շիտակ գործ կատարած ենք
մեր դատը ձեզի յանձնելով. իբր շատ կարող փաս-
տաբան, ազնիւ ու բարեսիրտ մարդ մը ներկայացու-
ցին ձեզ. չենք խաբուած: Աստուծոյ շնորհիւ գա-
տերնիս կը շահիք և կ'ուրախացնէք խեղճ Նէտրէթը,
որովհետեւ ան՝ բացարձակապէս որ և է միջամտու-
թիւն չուզեր ազարակին համար, համոզուած ըլլալով
որ հոն պահուած են իր ծնողքին ամենաթանկագին
յիշատակները: Ան միշտ իր մայրը կ'երազէ:

— Նէտրէթ հանրմը ուրիշ ազգական չունի՞:

— Ունէր... իր վրայ գուրգուրացող ու զինքը

խնամող իր գիրկին մէջ պաշտպանող շատ ազնիւ կին մը կար, զոր նէտրէթ իր իրական մայրը կը կարծէր մինչեւ իր ութը տարեկան եղած միջոցին: Աւա՛ղ, օր մը սակայն մահուան դաժան թաթը զրկեց դժբախտ աղջիկը իր միակ ապաւէնէն ու զինքը կրկին որբացուց: Սուտա հանրմ ծանր հիւանդ էր, երբ օր մը զիս կանչելով ըսաւ. «Վէյսէլ էֆէնտի, քեզի կը յանձնեմ քոյրս՝ Ֆիքրէթ հանրմէն մնացած միակ յիշատակն եղող այս մանկիկը: Սուտա հանրմի կտակն էր այս, աս էր եղած նաեւ իմ բարերարիս ալ վերջին բաղձանքը: Մօր մը գիրկին փոխարինեցին իմ թեւերս. առի աս անտէր որբուկը, և աշխատեցայ կեանքի դառնութիւնները չզգացնել իրեն: Արդէն իրեն ինկած ժառանգութիւնովը իր ապրուստը ապահովուած էր և ինծի կը մնար այդ ժառանգութիւնը խղճամիտ կերպով մատակարարելու պաշտօնը: Իր փափաքին համաձայն՝ Պէպէքի ամերիկեան վարժարանը գրի զինքը. այս տարի, վերջապէս, ուսումը աւարտելով դպրոցական կեանքին հրաժեշտ տուաւ ու այսօր, իր մեծագոյն բաղձանքը ազարակը երթալն է. այս մասին զինքը տարհամոզելը անկարելի եղաւ:

Անոր անկեղծ արտայայտութիւնը, յարգանքի արժանի իր ճերմակ մազերը, մաքուր ու թափանցիկ հոգին ցոլացնող աչքերը իր ազնիւ սրտի անսուտ գրաւականներն էին արդէն:

Երիտասարդ փաստաբանը իր ակնոցները ուղղելով.

— Վէյսէլ էֆէնտի, մեր մերձաւոր մէկ որբուկին հանդէպ ձեր ցոյց տուած շիրոյն և զոհողութեանց համար, յանուն մեր գերդաստանին, շնորհակալութիւնս կը յայտնեմ: Աստուծոյ այս երեկոյ իսկ պիտի պատմեմ հօրս ու քրոջս: Մասնաւոր յարգանք-

ներս հաղորդեցէք նէտրէթ հանրմին. շատ բարեբախտ եմ քանի որ մօտերս պիտի կրնամ տեսնել զինքը:

Վէյսէլ էֆէնտին մեկնած էր, իսկ փաստաբանը խոր մտածումներու մէջ թաղուած:

Կարգ մը խորհրդաւոր դէպքեր տարիներէ ի վեր իր հօրը սիրտը վիշտերով խարանած էին. բոլոր այս դէպքերու կենդանի յիշատակը ահա այսօր կը յայտնուէր: Սրտին վրայ ծանր ճնշում մը զգաց. իր հոգեկան վրդովումը մեղմելու համար սկսաւ միւս դատական թուղթերով զբաղիլ:

Իրիկունը, երբ Շիշլիի իր բնակարանը կը վերադառնար, քոյրը զինքը ղիմաւորելով ըսաւ.

— Ա՛հ, եղբա՛յր, այսօր շա՛տ ուշ մնացիք:

— Ա՛յո՛, քոյրս, երբեմն այսպէս կ'ուշանամ:

Հայրը, սովորականին պէս, զբասեղանի առջեւ նստած գիրք կը կարդար:

Ելեքտրակտն լոյսերու մէջ, գունատ դէմքով այս մարդը դանդաղօրէն բարձրացուց իր գլուխը և զաւկին գալուստը ողջունելով ըսաւ.

— Կ'երեւի թէ այսօր շա՛տ աշխատած ես:

Նիհատ, հօրը դիմաց, բազկաթոռին վրայ նըստելով յարեց.

— Նորէն գուք շատ կը զբաղիք, հայրիկ:

— Ա՛յո՛, միշտ այսպէս:

— Բայց շա՛տ կը յոգնիք, հայրիկ:

Սրահը մտնող քոյրը խօսակցութեան մասնակցելով ըսաւ.

— Ա՛խ, եղբա՛յրս, ձեզի պէս ես ալ միշտ կը գանգատիմ, բայց հայրս կարեւորութիւն չի տար: Այսօր շատ հիւանդներ ունէր, շարունակ անոնցմով զբաղեցաւ:

Դառն ժպիտ մը դէմքին, բժիշկը երկու երիտասարդներուն նայեցաւ ու ըսաւ.

— Մի՛ վախնաք, զաւակներս, ես աշխատելով առողջութիւնս կը գտնեմ. զբազումներս կեանք կուտան ինձի... այլապէս ինչո՞վ պիտի խաբենք կեանքը...

— Իրաւունք ունիք, բայց չյոգնելու պայմանով...

Յետոյ քրոջը դառնալով.

— Նիհա՛լ, արդարեւ այսօր շատ յոգնած եմ... անակնկալ դէպքերը երբեմն ցնցող տպաւորութիւն կը գործեն մարդուս ուղեղին վրայ...

— Անակնկալ դէ՞պք, կրնա՞մ հասկնալ եղբայրս: Բժիշկը որ իր զաւակներու խօսակցութեան կը հետեւէր, թիկնաթոռին մէջ տեղաւորուեցաւ և խընդալով ըսաւ.

— Երիտասարդութիւնը միշտ իր անակնկալներն ունի, այնպէս չէ՞, Նիհատ պէյ:

Փաստաբանը սիրայօժար պատասխանեց իր հօրը հարցումին.

— Տակաւին չհանդիպեցայ այն անակնկալին, որուն կը բաղձամ:

— Մի՛ բաղձար, տղա՛ս, ապահով եղիր որ շատ դժբախտ կ'ըլլաս:

— Սակայն այդպիսի դժբախտութեան մը դառնութիւնն ալ իր հաճոյքները ունի կարծեմ:

— Հաճո՞յք... ո՞վ գիտէ:

Նիհալ ընդմիջելով.

— Հետաքրքրութիւնս զրգոեցիր, եղբայրս:

Բժիշկը խորատուզուած, հանդարտ նայուածք մը ուղղեց իր զաւակին ու յարեց.

— Բա՞ն մը պիտի ըսէիք Նիհալին:

— Քիչ առաջ, անակնկալներու մասին չէ՞ր իր ակնարկութիւնը:

Բժիշկը անտարբեր «այո» ըսաւ, սեղանին վրայի

լրագիրներէն հատ մը առաւ, ակնոցները շտկեց ու սկսաւ կարդալ: Նիհալի անվերջ հարցումներուն փաստաբանը... ժպտելով պատասխանեց.

— Նստէ՛, պիտի պատմեմ:

Նիհալ գոհ էր. եղբայրը կը պատմէր.

— Մարդկային ի՛նչ տարօրինակութիւններ կան... անցած օրերու մոռցուած յուշերը յանկարծ կը վերազարթնուն, մեր մտածումները տատնելինք քսան տարի ետ կ'երթան ու հոն ի՛նչ գեղեցիկ օրեր, որքա՛ն քաղցր պահեր կը գտնեն: Մեր ալ մանկութեան յուշերը որչա՛փ հաճելի են, այնպէս չէ՞: Այս յիշատակները որպիսի արտասովոր իրողութիւններ կը բովանդակեն. տօնական օրերու ուրախութիւն, դաշտային կեանք, հեռաւոր տեղեր կատարուած զբօսապտոյտներ... չեմ գիտեր թէ կը յիշէ՞ք, օր մը մեզի տարած էին ագարակ մը. դուն այն ատեն աշխոյժ և չարածճի աղջիկ մըն էիր...

Նիհալ խորատուզուած.

— Այո, ըսաւ, կը յիշեմ. երեւակայութեանս առջեւ կը պատկերանան կանաչ աշխարհ մը, համատարած ծաղիկներ, մթաստուեր անտառներ, բարձր լեռներ...

Բժիշկը լրագիրը ձգած ու թրթռուն ձայնով մը.

— Ագարակի՞ մը մասին կը խօսիք, ըսաւ:

— Այո, շատ հին յիշատակներս...

— Ի՞նչ յիշատակ:

— Մանկական յիշատակներս. ագարակի մը մէջ մեր անցուցած հին օրերու մասին...

Բժիշկը գլուխը կախած մտածել սկսաւ ու յետոյ ըսաւ.

— Նիհա՛տ, մոռացումի դատապարտուած այն երազային օրերը մոռցած չե՞ս տակաւին: Անոնք երկար տարիներով հեռացած օրեր են. անոնց վերադարձը անկարելի է այլեւս...

Նէժատ, ակնարկը կէտի մը յառած, անցած օրերու, հին դէպքերու տողանցը կը դիտէր կարծես, իր լազազ դիմագիծերուն վրայ դառն ազդեցութեան մը հետքերը կը յայտնուէին:

Փաստաբանը խօսքը քրոջը ուղղելով.

— Ստանձնած դատերուս մէջ ազարակի մը վերաբերեալ դատ մը կայ, որ միտքս տասնըհինգ քսան տարի ետ կը տանի:

— Յամենայն դէպս, զուգարկուած թիւնը տարօրինակ է, եղբայր:

— Այո, այսքան տարիներ յետո՛յ...

Բժիշկը աւելի տժգոյն և յուզուած ձայնով մը ըսաւ.

— Դատախազները որո՞նք են:

— Կարգ մը անձանօթներ ժառանգական դատ կը բանան միակ և դեռատի ժառանգորդուհի մը դէմ:

— Այդ ժառանգորդուհին այժմ ո՞ւր է:

— Երկու օրէ ի վեր ազարակն է:

— Ազարա՞կը:

— Այո՛:

Նիհալ ընդմիջելով.

— Ուրեմն մեզի նոր ազգական մը մէջտեղ կ'ելլէ...

— Այո՛, մեր մայրիկին մօրեղբօրը, հանգուցեալ Սայիտ պէյի միակ աղջիկը...

Խեղճ Նէժատ, բոլորովին անակնկալ այս լուրի ազդեցութեան ներքեւ կքած, գլուխը երկու ձեռքերուն մէջ առած էր: Ծանր լուութիւն մը կը խեղդէր սենեակը. ամէն ինչ թախիծով համակուած էր: Քոյր ու եղբայր, սիրարկածի մը յիշատակին ի յարգանս ստեղծուած այս լուութիւնը, առանց խանգարել համարձակելու, նայեցան իրարու: Նիհատ, զգաց որ անցեալի տակաւին չսպիացած վէրքերէն ամենա-

վտանգաւոր պատուուածքի մը դպած էր. իր փութկոտութեանը զղջացած ու շուարած էր, որովհետեւ իրեն անձանօթ կը մնար այս մարդուն վիշտը ու անոր հետեւանքը եղող մեղամաղձոտութիւնը:

Բժիշկը վեր առաւ գլուխը և ըսաւ.

— Դուք տեսա՞ք այդ աղջիկը:

— Ո՛չ... բայց իր անձնական կեանքի մասին կարգ մը տեղեկութիւններ ստացայ:

— Ինձի քիչ մը բացատրութիւն կուտա՞ք այս մասին:

— Աղջիկը իրենց հին աշխատաւորներէն մաքուր և բարեսիրտ մարդու մը հսկողութեան տակ առանձին կ'ապրի:

— Խեղճ փոքրիկ...

— Կը տեսնե՞մ որ այս խնդրով շատ կը հետաքրքրուիք. եթէ ձեր այսքան ազդուիլը գիտնայի, այս մասին չպիտի համարձակէի ակնարկութիւն մը ընել:

Բժիշկը գլուխը երեքցնելով.

— Ընդհակառակն, ըսաւ, շատ լաւ ըրիք... տարիներէ ի վեր սիրտս գալարող անքակտելի հանգոյցի մը կապերը քակեցիք: Ապարդիւն պրպտուածներէ յուսաւրէպ ու լքուած, երկար ու տառապազին շրջանէ մը յետոյ երբ յաւիտենապէս անյոյս ու ղեկը կորուսած կեանքիս անդունդի եզրը հասած էի, ահա դուք դարձեալ ապրելու հնարաւորութիւն կուտաք ինձի: Դուք այդ դժբախտ կնոջ խեղճ որբուկի մասին յայտնութիւններ կ'ընէք, յոյսեր կը բերէք... մինչդեռ ես՝ զայն գտնելու, տեսնելու յոյսէն բացարձակապէս զրկուած էի:

Նիհալ, ապշահար մտիկ կ'ընէր ու կ'ըմբռնէր առաջին անգամ ըլլալով հօրմէն լսած այս խօսքերու զառնութեան ներքեւ թաքնուած վիշտը, որ ան-

զուսպ կը յորդէր այսպէս և ուրկէ կաթիլ կաթիլ ծո-
րող թոյնը կը ծծէր, ակնարկը եղբօրը դարձուց:
Փաստաբանը իր պաղարիւնութիւնը ամբողջովին կը
պահէր, մինչ նէժատ, իր զաւկին այս հանդարտ
նայուածքէն ընկճուած, ըսաւ.

— Զաւակներս, այս յանկարծական յուզումիս,
ներեցէք:

Իր ձայնին մէջ վիրաւոր սրտի մը հեծեծանքը
կար: Նիհալ, նոյն վայրկեանին շատ կը կարեկցէր
իր հօրը, կ'ուզէր սեղմել զայն իր գուրգուրոտ կուրծ-
քին վրայ: Անոր խոհուն նայուածքներուն մէջ յայտ-
նուող, անոր տոգոյն շրթունքներուն վրայ հազուա-
դէպօրէն նշմարուող ժպիտի մը փոխարէն իր ամբողջ
երջանկութիւնը զոհող այս զգայուն կինը, մոլին էր
իր հօրը, անով տարուած էր:

Բժիշկն եւս իր աղջկայ հանդէպ նոյն զգացում-
ները կը տածէր: Անոր երջանկութեանն ու բախտա-
ւորութեանը համար շշխատած, իր սուգն ու կսկիծը
անկէ պահած, անոր կեանքի գարունը վիշտի կաթի-
լով մը իսկ չազարտելու նպատակով, իր արցունքը
կաթիլ կաթիլ սիրտէն ներս հոսեցնելու վար-
ժուած էր:

Նիհալ, այս չարագուշակ լուութիւնը խզելով
ըսաւ.

— Հայրիկ, ձեր այսքան յուզուելը ցարդ տեսած
չէի. եթէ պրպտելու համարձակութիւն ունենայի
պիտի հարցնէի թէ...

Իր գաւակներու կասկածոտ ակնարկներու ներ-
քեւ, նէժատ, գլուխը բարձրացուց. անոր աչքերուն
խորը գաղտնի վիշտ մը կուլար:

— Աղջիկս, չէի ուզեր կեանքիս անմոռանալի
ու դառն յիշատակի մը մասին խօսիլ. սակայն զու-
գաղիպութիւնը առիթ մը եղաւ անցեալը վերջնէ-

լու... Ահուելի ձմեռ գիշեր մը, երբ ձիւնամբրիկը կը
տիրապետէր ու ցուրտը բրտօրէն կը մտրակէր մարդ-
կային մարմինը. ահա այսպէս օդի մը, կոչումիս
բերուամովը պարտաւորուած էի պատասխանել հիւանդի
մը հրաւերին...

Ուշագրութիւնը լարած Նիհալ սրտագողով մը
հարցուց.

— Գացի՞ք:

— Բնականաբար, աղջիկս, գացի. բայց այս
երթալս շատ ողբերգական, ճակատագրական եղաւ:
Հիւանդը երիտասարդ ու գեղեցիկ կին մըն էր որ իր
կեանքի վերջին վայրկեանները կ'ապրէր: Երբ զինքը
տեսայ, գիտութեան անզօրութիւնը ըմբռնեցի: Ափիս
մէջ էին անոր սառած ձեռքերը. իր սեւ աչքերու
փայլը կ'աղօտանար:

Բժիշկին ձայնը կը կերկերար և սակայն ճիգով
մը շարունակեց.

— Նոյն միջոցին, վերէն մանկիկի մը սուր ճիչը
լսուեցաւ, որուն յաջորդեց մօրմէ մը տարբեր, օտար
կնոջ մը օրրերգը. այս ձայներու արձագանգը հիւան-
դին մէջ յանկարծական յեղաշրջում մը կատարեց.
Մարելու մօտ եղող իր աչքերը դէպի վեր ուղղուե-
ցան: Որբանալու դատապարտուած այդ ողորմելի,
դժբախտ մանկիկին ձայնը լսող այս խեղճ մայրը
մահուան անողոք ճիրաններու մէջ պրկուած, իր
անյոյս ու վատուժ ակնարկը աչքերուս ուղղեց...
Ա՛խ, աղջիկս, այն վայրկեանին, այդ ակնարկները
ինչե՞ր ըսին ինծի... Իսկ ես չեմ գիտեր թէ ի՞նչ պա-
տասխանեցի կամ ի՞նչ խոստացայ: Այդ լացող փոք-
րիկը... Նէտրէթն էր, իսկ մեռնող մայրը՝ դժբախտ
Ֆիքրէթ: Ահաւասիկ զաւակս, եղբօրդ պատմած այն
պարմանուհին այս ողբերգական գիշերուան կենդանի
յիշատակն է: Հիմա հասկցա՞ք ճշմարտութիւնը: Հի-

ւանդութեանս պատճառով երկար ատեն Եւրոպա
գտնուելիս, վերադարձիս՝ զանոնք ակնկալած տեղս
չգտնելիս և երկար տարիներու տեւողութիւնը բոլոր
յոյսերս մեռցուցած էին:

Նիհալ բոլորովին ընկճուած էր: Փաստաբանը
մտածկոտ երեւոյթով մը, խօսքը հօրը ուղղելով
ըսաւ.

— Չափազանց կը ցաւիմ յայս լուրը ձեզի հա-
ղորդելուս. կը փափաքէի անցեալի առթած ծանր
վէրքերէն բուժուած տեսնել ձեզ. քանի որ անոնք
կը քայքայեն ձեր առողջութիւնն ու միանգամայն
կ'արիւնեն մեր սիրտերը:

Բժիշկը անյողդողդ ձայնով մը.

— Ընդհակառակն, ձեզ կ'ապահովցնեմ թէ աւելի
խաղաղ կեանք մը պիտի կրնամ ապրել եթէ այդ
աղջիկը տեսնեմ: Միայն ըսէք թէ ո՛ր կրնամ տես-
նել զինքը:

— Այս օրերս անկարելի է զինքը տեսնել. ինչպէս
ըսի, ան երկու օրէ ի վեր ազարակը կը գտնուի:

Բժիշկը սրտակեղէք հառաչանքէ մը յետոյ յա-
րեց.

— Խեղճ կնոջ ամայի աքսորավայրը եղող այդ
վիշտի ու արցունքի բոյնը տեսնելու գացած է:

Քանի մը վայրկեան մտածեց. յանկարծ գլուխը
վերցուց ու շեշտակի նայելով Նիհատին, ըսաւ.

— Ինչո՞ւ համար, այս օրերը, անկարելի է զին-
քը տեսնելս. չե՞մ կրնար ազարակը երթալ:

Նիհատ քիչ մը սրտնեղած.

— Ի՞նչ նպատակով պիտի երթաք և իբր ո՞վ
պիտի ներկայանաք:

— Այդ իմ գործս է:

Փաստաբանը համոզուած էր որ իր հօրը այս
վճռականութեանը դէմ որ և է առարկութիւն անօ-

գուտ ու զայն համոզելը անկարելի էր, հետեւաբար
ձգձգումի միջոցներուն զիմելով.

— Ուրեմն ես վաղը վէյսէլ էֆէնտին կը տես-
նեմ, պէտք եղածը կը լսօսիմ. բայց ամէն պարա-
գայի մէջ ձեր մեկնումը քանի մը օր պէտք է յետա-
ձգել, հաւանաբար կարգ մը գործերու կարգադրու-
թեան համար ես ալ երթամ հոն:

Նիհատ տագնապալի դրութեան մը մատնուած՝
քրոջը կը նայէր. այս նայուածքովը ըսել կ'ուզէր.
«Պէտք է անոր այս անտեղի որոշման գործադրու-
թիւնը արգիլել. քանի որ ան՝ աղջիկը տեսնելով իր
վէրքերը պիտի բորբոքին, պիտի թարմանան ու պիտի
արիւնին: Այլեւս նոր ցնցումի մը չկրնար տոկալ,
պէտք է առաջքը առնել այս աղէտին»:

Նիհատ սարսափով համակուած՝ կը գողար:

* * *

906-2011

Տասնըութը տարիներէ ի վեր լքուած «Չամլը»
ազարակին պուրակներու մէջ թաղուած քարաշէն
մեծ շէնքը, իր վանդակափեղկերովն ու գոց պատու-
հաններովը ամայի հիւանդանոցի մը տպաւորութիւնը
կը թողուր: Հինգ վեց տարի վարձակալներու տըր-
ուելէ յետոյ վէյսէլ էֆէնտին յանձնուած էր: Այս
մարդը, տարիներով հոն գտնուելով, մեծ ազդեցու-
թեան տիրացած էր. գլուխացիներու հետ շատ լաւ
կը վարուէր ու զանոնք օգտագործել գիտէր: Ազա-
րակի հսկողութիւնն ալ յանձնած էր իր ընկերներէն
վստահելի մատակարարի մը, որ իր ընտանիքովը,
շէնքին վարի յարկը գրաւած, տարիներով աննա-
խընթաց լքումի մը դատապարտուած այս մարած
օճախի ողբալի ամայութիւնը, գէթ մասամբ շէնցնե-
լու կ'աշխատէր:

ՆԻՏՐԻՔ



Օր մը սակայն, այստեղը, վերստին կենդանութիւն մը ստացաւ. գոց վանդակափեղկերը բացուեցան, սենեակները թարմ օդով ու լոյսով ողողուեցան:

Գիւղացիները չէին մոռցած իրենց հին տէրը, յարգանքով կը յիշատակէին անոր անուէնը. Գանտիլի ու Պայրամի գիշերները անվրէպ կ'այցելէին անոր անխնամ գերեզմանը...

Նէտրէթի ժամանումը զուարթութիւն ու կ'անք բերած էր ագարակի բնակիչներուն:

Ծաղկատի աղջիկը՝ իր վայելած սրտագին ընդունելութենէն ազդուած, արտասուելի աչքերով, ամէնքին զատ զատ մեծարանքներ ընելով, այդ անխարդախ մարդոց սրտերուն մէջ խոր ու տեւական սիրոյ մը զգացումը արթնցուցած էր:

Նէտրէթ, ագարակը հասած իրիկուն, իր կեանքին մէջ առաջին անգամ ըլլալով որոշապէս զգացած էր իր բացարձակ մենութիւնն ու որբութիւնը:

Մեռելաստանի մը տիրութիւնն ու մահարօյր լուսութիւնը կը տիրէին հոն: Իր հոգեկան դառնութիւններուն տակ թաղուած որբուհի մըն էր ան:

Անոր մայրը իր վերջին օրերը հոն անցուցած էր. այդ ամբողջ միջավայրը անոր յիշատակներովը տոգորուած էր: Այդ անթափանց պատերէն ներս կատարուած գէպքերու արձագանքը իր հոգին կը վրդովէր ու անոր պատճառած մղձաւանջը զինքը կը սոսկացնէր:

Զինքը հոս քաշող ուժը իր երբեք չտեսած մօրը հոգին էր արդեօք...: Մտավայտութիւն մը ընկճած էր իր հոգեկան կորովը: Այս սարսուղ գեցիկ ու մեռած սենեակին մէկ անկիւնը քաշուած, Նէտրէթի հոգին կուլար:

Ամէն գիշեր մինչեւ առաւօտ երազին մէջ տեսած

իւր մօրը հասնելու համար, անդիմադրելի կարօտով մը վազած, այս մոռցուած աշխարհը եկած էր ու հոն՝ ի. բացարձակ որբութիւնն ու անոր կսկիծը միայն գտած էր:

Մանկութենէն ի վեր «պաճի» կոչած Վէյսէլ էֆ. ի կինը, Ֆաթման, այդ գիշերուան անոր տաժանելի վիշտը մեղմելու համար իր ամբողջ ճարտասանութիւնը փորձած էր, սակայն չէր յաջողած փարատել զեռատի աղջկան խոշոր ու սեւ աչքերը մթազնոց մեղամաղձոտութիւնը:

Ֆաթմա «պաճի»ն, իր երիտասարդութիւնը ամբողջովին հոս անցուցած, Նէտրէթի ծնունդէն յետոյ երկարատեւ ֆիքրէթ հանրմին ծառայած, անոր համակրութիւնն ու հանգուցեալ Սայիտ պէյի վստահութիւնը գրաւած ըլլալով, ագարակին երիտասարդ ու ու գործունեայ կառավարիչին հետ ամուսնացած էր:

Նէտրէթ՝ իր մօրը անձնական կեանքի մասին տեղեկութիւններ ստանալու նպատակով, շարունակ հարցումներ կ'ուզէր Ֆաթմա «պաճի»ին, որ կը ջանար անոր հարցասիրութիւնը զոհացնել:

Իր մօրը կատարեալ նմանութիւն ունենալը, անոր բոլոր առաքինութիւններն ու հօրը պատկառազու շարժուձեւերը ժառանգած ըլլալը, մօրը քիչ մը տժգոյն դէմքով, կոր ու շքեղ արտեւանունքով, խորագննին, մեծ, սեւ աչքերով, զգայուն, շատ համակրելի ու գեղեցիկ կին մը եղած ըլլալը, գաղտնի վիշտով մը մշտապէս տառապիլը, սենեակը լքած մէկ անկիւնը միշտ քաշուած, առանձին ապրիլը, իր կեանքի վերջին օրերուն՝ ամուսնոյն հետ ունեցած խորհրդաւոր միջադէպերէն յետոյ հօրը՝ արկածի մը հետեւանքով մեռնիլը և այս աղէտէն երկու օր վերջնալ մօրը՝ կիսամեռ վիճակի մը մէջ ագարակէն հեռանալը, իրենց ամբողջ մանրամասնութեամբ Ֆաթմա պաճին պատմած էր Նէտրէթին:

Շատ տխուր անցեալի այս յուզումնաօրիթ իրա-
դարձութիւնները խոր ազդեցութիւն գործած էին
Նէտրէթի երեւակայութեան վրայ ու շարունակ գրա-
ւած էին իր միտքը:

Ագարակ եկած գիշերը, Ճաթմա պաճի կողմէ
իրեն յատկացուած ու յարգարուած սենեակ մը ա-
ռաջնորդուած ըլլալով, վերսկսած էր իր անվերջ
հարցումներուն:

— Պաճի՛, արդեօք մայրս որչա՛փ պտտած է այս
տեղերը:

Ճաթման հառաչելով կը պատասխանէր.

— Այո... սովորաբար առտունները, հոս, դաշ-
նակ կը նուագէր. բարեխիշատակ հայրդ ալ՝ այս ան-
կիւնը՝ բազմօցին վրայ նստած լրագիր կը կարդար:
Հիմա, երկուքն ալ աչքիս առջեւ կը պատկերանան...:
Օր մը, Պոլսէն, պէլին ազգականները եկած էին.
այն ատեն այս սրահը այսպէս չէր. տախտակամաճը
ամենաթանկագին գորգերով զարդարուն, բոլորտիքը
մետաքսահիւս թաւշապատ բազմօցներով շրջապատ-
ուած, ամէն կողմ աչք շլացնող գոյքերով ու կահե-
րով լեցուն էր: Այն օրը, մայրդ հիւրերը կապտա-
գոյն թաւիչէ հագուստով մը դիմաւորած էր. ես՝ այս
դուռին մօտ կեցած կը զիտէի, մայրդ այն օրուան
չափ գեղեցիկ տեսած չէի. ա՛յնպիսի նազելաճեմ
քալուածք մը, այնքա՛ն քաղցր խօսակցութիւն ու
խնդուածք մը, այնպէ՛ս ազդու նայուածք մը ունէր
որ ըսել կուտար որքա՛ն բախտաւոր է այս մարդը
որ այսքան հմայիչ կնոջ մը ամուսինն է...: Չեմ
գիտեր, ազջիկս... ձեր հօրը ազգականներն էին,
կարծեմ... գիրուկ, կապոյտ աչուի տիկին մը, իր
երկու զաւակներն ու ամուսինը... ամուսինը բժիշկ
էր կարծեմ... շիտակը մոռցայ, չեմ յիշեր թէ...
դուն այն ատեն փոքրիկ, սիրուն մանկիկ մըն էիր:

— Մայրս կը սիրէ՞ր զիս:

— Սիրե՞լ. ի՞նչ կ'ըսես... խեղճ կին, ամէն գի-
շեր սրտագողով, օրօր երգելով քեզ կը պտտցնէր ու
երբ քնանայիր կը տանէր, մեղմօրէն մահճակալիդ
վրայ կը պառկեցնէր քեզ. այս պարտականութիւնը
նոյն իսկ ստնտուին չէր յանձներ: Շատ հիւանդ եղած
ատենն իսկ, քեզ իր հիւանդ բազուկներուն վրայ
կ'առնէր:

Նէտրէթի աչքերէն արցունք կը հոսէր: Հառաչե-
լով ըսաւ.

— Ա՛խ, մայր իմ... ինչո՞ւ լքեցիր զիս...

Ճաթմա պաճին դժգոհ և յօնքերը պոստելով
ըսաւ.

— Ո՛չ... միշտ այսպէս անցած օրերու մասին
հարցում ուղղելով յուզուելու տեղը չկայ... Աստ-
ուած անոնց հանգիստ ու քեզի կեանք տայ: Հոս,
պտտելու, զուարճանալու և օգափոխութեան համար
եկած ես. վարժարանը աւարտելէդ յետոյ երկար
հանգիստի մը պէտք ունիս, գաւակս...

Նէտրէթ բան մը չէր լսեր:

— Պաճիս, ըսաւ, նախ հօրս գերեզմանը, վերջն
ալ մօրս առանձնասենեակը այցելենք, չըլլա՞ր...:

* * *

Յաջորդ օրը, կանաչագարդ գիւղի մը մէկ ան-
կիւնը ամփոփուած անշուք գերեզմանի մը մէջ յա-
ւիտենական լուութեան մը մոռացութեան խորը ննջող
իր հօրը այցելութենէն վերադարձող Նէտրէթ՝ տարի-
ներէ ի վեր չբացուած իր մօրը դրանը առջեւ կը
սպասէր: Ճաթմա պաճին բանալիներու տրցակ մը
ձեռքը դուռը բանալու կ'աշխատէր. իսկ երիտասարդ
ազջիկը խոր ազդեցութեան մը ներքեւ կը սարսուար

ու այս մգլտտած ու տժգոյն մթուփեանը մէջ իր մօրը տեսիլը կը փնտռէր:

Դուռը սուր ճոնչիւնով մը բացուեցաւ, Ֆաթմա պաճին քիչ մը ետ քաշուեցաւ, Նէտրէթ պատին կռթնած էր. տարիներով արգելափակուած, խոնաւութիւնով ու մգլտտութիւնով տոգորուած գարշահոտ օդ մը արձակուեցաւ ու տարածուեցաւ:

Երկարատեւ տարիներու ընթացքին հոն տիրող լուսութիւնը խանգարելէ զգուշանալու ձեւով մը անհամարձակ քայլերով ներս մտաւ Նէտրէթ: Վանդակափեղկերէն ներս մաղուող, իրիկնամուտի արեւուն դեղնած ու նուազկոտ շողերը կանաչ ծառերու ստուերներուն հետ խառնուելով աղօտ գոյնով, գաղտնապահ ու տխրատեսիլ նկարներու համադրութիւն մը կը կազմէին:

Աւերակ, լքուած գերեզմանի խոնաւ ու պազօդին մէջ պարփակուած անբարբառ լեզու մը անդեմականի իր տիրապետութիւնը կը տարածէր այս մերկ ու պարապ սենեակին ամէն կողմը: Թուռուներու քանդուած բոյներու խոտերը կը կախուէին պատերու անկիւններէն ու սարդի ցանցերը իրենց սեւ շղարչ թեւերը կը տարածէին անոնց վրայ: Դուռին հանդիպակաց կողմը գտնուող վառարանը մուխէն սեւցած էր ու փոշեխառն մուխերը հոն էր տակաւին: Նէտրէտ իր կարօտակէզ ու անյոյս աչքերը՝ ասոնց յառած էր: Փամանակին, իր մայրը տալքնող կրակին թողուցած այս հետքերը, կարծես թէ անոր արկածալից կեանքին յիշատակները կը խորհրդանշէին: Աչքերուն առջեւ մտածկոտ ու վշտադէմ կնոջ մը տեսիլը պատկերացաւ:

Գոյք ըլլալով, սենեակին մէջ կային փտած ու փոշոտ լալն նստարան մը, պատին գամուած ու այլեւս կանաչ գոյն ստացած ու ամբողջ կիտուածը

թափած մեծ հայելի մը: Դեռատի աղջիկը ծանրաքայլ պտտիլ սկսաւ. իր կեանքի մենութեան սարսուռը, այս պահուս համակած էր զինքը: Պատուհանին եզերքը ուղղուեցաւ. արեւը զիմացի կանաչ լերան ետին կը պահուէր. քամին հսկայ շագանակներիննրու ճիւղերը կ'օրօրէր ու վանդակափեղկերուն զարնելով մեռած կնոջ մը յիշատակներու գերեզմանը եղող այս վշտառիթ սենեակին պատերուն մէջ սուր ու անարեկիչ արձագանգ մը կուտար:

Նէտրէթ իր տեսլագրաւ թուխ աչքերը լսիտ տերեւներու մէջէն տեսնուող ձորակին ուղղեց. հեռուէն սրինգի ձայներ կը լսուէին. իրիկուն էր ու պանդըխտութեան կարաւանը լեռներէն կը գաղթէր գէպի դաշտ:

Այս դատարկ սենեակին մերկ պատերուն մէջտեղ, ուրուականի մը պէս անխօս թափառող Նէտրէթ, ստքի վրայ, յարգալից լուսութեան մը մէջ զինքը զիտող Ֆաթմա պաճի աչքին կրկնեբեւոյթի մը պատրանքը տուած էր. ան՝ կատարեալ մարմնացումն էր մեռածի մը՝ ուր այլեւս ամբողջովին հողի վերածուած էր:

Անցած տասնըութը տարիներու միջոցին տեղի ունեցած բոլոր ողբերգութիւններն ու տառապանքները անհետացած էին իր յիշողութենէն. անցեալի հարազատ նմանութիւնը ունեցող այս տեսարանին առջեւ դարձեալ իր նախկին տիրուհին ներկայութեանը կարծեց ինքզինքը. ամբողջովին մօրը նմանող Նէտրէթի շարժումները, նոյն միջավայրի, միևնոյն ազդեցութիւններու հետ համադրուած, երեւակայութիւնն ու իրականութիւնը զանազանելու անկարող զիրքի մը մասնածէն զինքը:

Նէտրէթ գլուխը դանդաղօրէն դարձուց. գունաթափ եղած էր ու թարթիչներու ծայրերէն արցունքի

կաթիլներ կախուած էին. իր գալարուող հոգիի խորերէն բխող դառն հեծեծանքները սենեակին մերկ պատերու մէջ կ'արձագանդէին.

— Մայրի՛կ... այս վայրկեանիս չափ քեզ երբեք կարօտցած չէի. ամէն ինչ, ողբագին շեշտով մը քու մահդ կը պատմէ, ամենուրեք, նոյն խկ հովը քեզ համար կուլայ: Այս պահուն՝ երբ անսահման կարօտիդ բոյրովը ես կ'այրիմ, արդեօք, քո՞վս ես գո՞ւն... խօսքերս կը լսե՞ս... մայրի՛կս...

Վէյսէլ էֆէնտիի կինը շուարած, յուզուած էր. յամբօրէն մօտեցաւ ու անոր ձեռքերը բռնեց: Երկուքն ալ ստուերներու պէս անձայն էին: Փաթմա պաճին տասնըութը տարիէ ի վեր գոց սենեակին դուռը դարձեալ անցեալի վրայ քաշեց, գոցեց...:

Երկու օր վերջ, Վէյսէլ էֆէնտիի ժամանումը մեծ ուրախութիւն պատճառեց Նէտրէթին: Առանձին ու անօք իր կեանքի միակ պաշտպանը ճանչցած այս բարեսիրտ ծերունին շատ կը սիրէր: Մօրաքոյր Սուատ հանրմի մահէն յետոյ, այս մարդն էր որ զինքը ընդունած էր իբր ժառանգորդ իր բարերարին. ամբողջովին նուիրուած էր զայն խնամելու և անոր կատարեալ դաստիարակութիւն մը տալու գործին. անոր հարստութիւնը խղճմտօրէն ու աջողապէս կը մատակարարէր: Այն օրը որ Նէտրէթ Գօլէճի վերջին կարգը աւարտելով հրաժեշտ տուած էր դպրոցական կեանքին՝ Վէյսէլ պապան զինքը առաջնորդած էր իրեն սեփական ու կահաւորուած սնակ մը որու դուռնէն ներս մտած միջոցին զարմանքով և ուրախութեամբ.

— Ասիկա ի՞մա է... ձեր մտածո՞ւմն է աս... ըսելով ձերունիին ձեռքերը համբուրած էր ու այդ միջոցին աչքերէն յորդող արցունքները թարգմանը եղած էին իր զգացումներուն: Հոս կ'ապրէր ան խաղաղ ու երջանիկ. Վէյսէլ էֆէնտին ու իր կինը անոր

քովն էին. այս կինը նախկին ստնտուի մը խանդաղատան քով Նէտրէթի հանգիտան ու գոհունակութիւնը ապահովել կը ջանար:

Հաճոյալի էր աս տուելը, ուր դեռատի աղջկայ մը անբիծ հոգին կ'ապրէր. անոր զարդարուն ննջասենեակը նեղուցի կապոյտ ջուրերուն վրայ կ'իշխէր. ունէր գեղեցիկ հիւրասրահ մը, փոքրիկ գրասենեակ մը, կուսաթաթիկներով (հանրմ-էլի) ու ձերմակ յասմիկներով շրջապատուած պարտէզ մը: Կեանքի տաժանքներէն ու տառապանքներէն հեռու կ'ապրէր: Երկարատեւ դպրոցական կեանքէն յետոյ այս ինքնամփոփ կենցաղը շատ հաճելի էր իրեն. Փաթմա պաճին հետ խօսակցելէ ու կատակելէ շատ կ'սիրօրէր: Խօսակցութիւնը՝ մեծ մասով իր ծնողքին շուրջ կը դառնար: Ազարակի մասին Փաթմա պաճի գիտցած առասպելները անհատուած էին. Նէտրէթ այս պատմութիւններէն թէ՛ հաճոյք կը զգար և թէ՛ կ'աղդուէր. շարունակ կրկնել կուտար. կը զգար թէ ասոնց մէջ անյայտ, գաղտնի, մթին և խորհրդաւոր դէպքեր խառնուած էին, սակայն զանոնք բնորոշելու անկարող եղած էր. ազարակը տեսնելու բաղձանքը այլեւս մտասեւեռումը եղած էր իրեն: Օր մը իր միտքը հասկցուց Վէյսէլ էֆէնտիին. ըսաւ թէ կը փափաքի այցելել հոն, ուր իր ծնողքը իրենց վերջին օրերը անցուցած էին ու մէկ երկու ամիս հոն անցընել: Այս միջոցին, կարգ մը անձանօթ ժառանգորդներ երեւան ելած էին ու կալուածներու մեծ մասին տիրանալ կ'ուզէին: Նէտրէթ՝ այս միջամտութենէն շատ նեղսրտած ամէն զոհողութիւն ստանձնելու և դատը փաստաբանի մը յանձնելու որոշումը տուաւ, քանի որ հօրմէն ժառանգած բոլոր կալուածներէն իրեն համար ամէնէն արժէքաւորը ազարակն էր ուրկէ թիւ մը հող անգամ զիջելը իր սիրական

ննջեցեալներու յիշատակը ոտնակոխ ընել պիտի նշա-
նակէր: Օր մը, Վէյսէլ էֆէնտին գալով շատ կարող
փաստաբան մը գտած ըլլալը հաղորդեց:

Նէտրէթ ալլեւս հանգիստ սիրտով ազարակ եր-
թալու վճռական որոշումը տուած էր: Հոն՝ քանի մը
ամիս ինքնամփոփ կեանք մը անցնելով մէկտեղ ա-
զատուած պիտի ըլլար զինքը անհանգստացնող կարգ
մը պահանջատէրերէն:

Ամուսնութեան մասին տակաւին չէր մտածած:
Երկարատեւ ուսման շրջանէն յետոյ, հանգիստի ու
կեանքը մօտէն ուսումնասիրելու պէտքը կը զգար.
ամէն անգամ որ Վէյսէլ էֆէնտին պահանջատէրերու
մասին կը խօսէր, Նէտրէթ արհամարհանքով մը իր
գլուխը կը դարձնէր. իսկ Ժաթմա պաճին, այս նա-
զանքոտ ու խրոխտ աղջկայ արհամարհանքը շատ
արդարացի գտնելով կ'ըսէր.

— Եթէ Նէտրէթի պէս հարուստ ու գեղեցիկ ըլ-
լայի, ես ալ անոր պէս գլուխս կը դարձնէի:...

* * *

Վէյսէլ էֆէնտին ազարակ վերագարձած օրը,
Նէտրէթ տառատով մը վրան առած պարտէզը ելած էր
և եղեւիններու շուքին մէջ կը պտտէր. ծերունին՝
զինքը տեսնելուն՝ ուրախացուցիչ լուրեր ունեցողի
մը գուարթ արտայայտութեամբ մը ըսաւ.

— Իմ սիրունիկ հանրմս, հոս՝ սիրտդ չնեղուե-
ցա՛ւ, չէ՛... Նէտրէթին հետ միշտ «սիրունիկ հա-
նրմ»ով կը խօսէր:

Աղջնակը, գէպի յարգելի ծերունին վազելով
ըսաւ.

— Ընդհակառակն, բնա՛ւ չնեղուեցայ. բայց ձեզի
շատ սպասեցի:...

Երկուքն ալ եղեւինի տակ նստեցան, Նէտրէթ
հետաքրքրութիւնով ու անհամբերութեամբ հարցուց.

— Ի՞նչ լուրեր Պոլիսէն, Վէյսէլ պապա:

— Շա՛տ լաւ, շա՛տ ուրախացնող լուրեր:...

— Ո՛հ, որքա՛ն ուրախ եմ:...

— Պատմէ նայիմ, այս քանի մը օրուան ըն-
թացքին, ի՞նչ ըրիր հոս:

Նէտրէթ վիզը ծռելով յարեց.

— Ե՛ս... մօրս մասնասնեակը, հօրս գերեզ-
մանը այցելեցի, շա՛տ ազդուեցայ. հոս՝ միշտ անոնց
մասին կը մտածեմ. ո՛ւր որ պտտիմ, ո՛ւր որ եր-
թամ, մի՛շտ երկու տեսիլներ կուգան աչքիս առջեւ,
մայրս ճանչցող պառաւ կիներ կան հոս, որոնք զիս
տեսնելով ապշեցան... ճի՛շդ է արդեօք, Վէյսէլ պա-
պա, ես շատ կը նմանիմ եղեր մօրս:

Ծերուկը գլուխը օրրելով ըսաւ.

— Այո՛, նոյնինքն:...

Երկուքն ալ լռած էին. թեթեւ հով մը եղեւին-
ներու տերեւները կը խշրտացնէր:... Վէյսէլ էֆէն-
տին՝ աղջնակը այս տխրառիթ մտածումներէն ազա-
տելու համար ըսաւ.

— Սիրունիկ հանրմս, քանի մը օրէն հիւրեր
պիտի գան հոս. քեզ տեսնեմ, պատրա՛ստ եղիր:...

Նէտրէթ զարմացած յարեց.

— Հո՞ս...:

— Այո՛...:

— Զարմանալի՛ բան:

— Արդարեւ զարմանալի՛:

— Ի՞նչ կ'ըսես, Վէյսէլ պապա:

— Բնա՛ւ միտքէդ չանցած բաներ:...

— Ձեր խօսքերէն բան մը չեմ հասկնար, Վէյ-
սէլ պապա. արդեօք դատերնի՛ս պիտի կորսնցնենք...
ի սէր Աստուծոյ, շիտակ ըսէ:

— Ձէ՛, հոգիս. ասկէ վերջ դատերնիս աւելի՛
լաւ, աւելի՛ սրտովին պիտի հետապնդուի... ամէն

ինչ կարգի պիտի մտնէ. քու կեանքդ պիտի փոխուի, կարգ մը նոր դէմքեր, նոր ազգականներ պիտի տեսնես...

— Այս թաքուն խօսքերէդ բան մը չեմ հասկընար... նոր դէմքեր, նոր ազգականներ կ'ըսէք. ես՝ ձեզմէ զատ աշխարհի մէջ ո՞վ ունիմ, վէյսէլ պապա. ես՝ ուրիշ մէկը չեմ ճանչնար որ...

— Ասկէ վերջ պիտի ճանչնաս, զաւակս. աւելի ճիշդ անոնք ինքզինքնին պիտի ճանչցնեն...

— Տարօրինակ բան... «անոնք» ըսածնիդ որո՞նք են... որո՞նց մասին կը խօսիք:

Վէյսէլ էֆէնտին սկսաւ պատմել փաստաբանին և իր միջեւ եղած ամբողջ խօսակցութիւնը. նէտորէթ, բերանաբաց մտիկ կ'ընէր և մերթ ընդ մերթ կ'ընդմիջէր «չա՛տ տարօրինակ զուգագիպութիւն» ըսելով:

Վէյսէլ պապան շարունակելով ըսաւ.

— Արդարեւ շատ ազնիւ, շատ քաղաքավար երիտասարդ մը... շատ մեծ հաճոյք զգացի իրմէ: Երէ՛կ, զբասնեակը հրաւիրած էր զիս. անմիջապէս գացի. «հրաման մը ունիք» ըսի: Իր հայրը, նէժատ պէյ, հոն էր. տեսնուեցանք. քու մասիդ շատ խօսեցանք. նէժատ պէյ շատ կը փափաքէր քեզ տեսնել. մասնաւորապէս զինքը հրաւիրեցի, խոստացաւ քանի մը օրէն գալ. տեսնես ի՛նչ ազնուաբարոյ, ի՛նչ համակրելի, որքան թախծադէմ մարդ մը... այնպէս կոտորուած կ'երեւի որ կարծես թէ երկա՛ր ատեն վիշտերով ու աղէտներով հարուածուած է:

«Քեզի հանդէպ, բացակայութեանդ իր ցոյց տուած չափազանց սիրոյն պատճառով, ես աս մարդը շա՛տ սիրեցի: Հօրդ ու մօրդ մասին խօսեցաւ. նոյն իսկ մօրդ վերջին վայրկեաններուն՝ անոր մօտ գտնուելը պատմած միջոցին՝ աչքերը արցունքով լեցուեցան, գոյնը դեփ գեղին կտրեցաւ»:

Նէտորէթ, յուզումէն դողալով յարեց.

— Վէյսէլ պապա, զարմանքի կը մատնէք զիս. կեանքիս մէջ բնաւ չակնկալուած գէպքերու մասին կը խօսիք... ես աշխարհի վրայ բոլորովին առանձին ապրելէն գոհ էի. ձեզմէ վայելած սէրս իմ հոգեկան ամբողջ կարիքներս կը գոհացնէին. ես կը կարծէի թէ փնտուռելիք, սիրուելիք մէկ անձ միայն կար և ան ալ դո՛ւք էիք. Վէյսէլ էֆէնտի, ձեզի սպասելու բաղձանքէս զատ որ և է մտածում մը չունէի, ամբողջ աշխարհի սէրը ձեր միակ սիրտէն բաղկացած կ'ընդունէի... տարբեր անձեր սիրելու, անոնց մասին մտածելու հաւանականութիւնը երբե՛ք միտքէս անցած չէր, որովհետեւ այն հաստ պատերուն մէջտեղ՝ զիս տեսնելու, զիս սիրելու համար՝ միայն դուք կուգայիք. որքան որ տարիքս կը յառաջանար այնքան աւելի կը համոզուէի թէ զիս՝ ձեզմէ զատ ուրիշ փնտուղ մը չկար... այս համոզումս՝ խիստ սրտակեղէք դառնութիւնով մը իմ բովանդակ գոյութիւնս կ'այրէր...:

Նէտորէթ խօսած միջոցին կուլար. Վէյսէլ էֆէնտին, անոր գլուխը փայփայելով ըսաւ.

— Ո՛չ... այսպէս յուզուելդ տեսնել չեմ ուզեր, այլեւս անցան այն օրերը. ասկէ վերջ քեզ սիրողներ, քեզ փնտուղներ կը շատնան. տես... երիտասարդ ես, գեղեցիկ ես, ո՞վ գիտէ, ապագան ի՛նչ գեղեցիկ օրեր, ինչե՛ր կը պատրաստէ քեզի, զաւակս...:

Նէտորէթ գլուխը ձօճելով ըսաւ.

— Ինչո՞ւս պէտք... այս նիւթի մասին ա՛լ չխօսինք... քիչ մըն ալ դատի մասին պատմէ... ի՛նչ եղաւ... ի՛նչ որոշում տրուեցաւ... ըսաւ ու խօսակցութեան ուղղութիւնը փոխեց:

— Տակաւին որոշում մը չկայ... կարծեմ թէ

Վիստաբան պէյը այս խնդրի մասին քեզի հետ տես-
նուելու պիտի գայ և կամ քննիչ մարմին մը պիտի
բերէ հոս: Ամէն պարագայի, պէտք եղածը կ'ընէ
ան. . . դուն, այլեւս, մտածումներդդ ինքզինքդ մի
տանջեր:

Մանկամարդ աղջիկը, Աստուծոյ ապաւինածի մը
ձեւով, գլուխը շարժեց ու աչքերը ուղղեց դէպի
բլուրը ուրկէ ոչխարներու հօտեր դանդաղօրէն իջնե-
լով իրենց գոմերը կը վերադառնային:

Այստեղի արեւամուտը, կանաչ ու թափանցիկ
լուսապսակի մը պէս, կը սկսէր լեռները ծածկել:

*
* *

Ագարակ երթալու մասին, իր հօրը վճռական
որոշմանը դէմ, Վիստաբանը, բռնով մը անգամ
չէր արտայայտուած, սակայն, քրօջը հետ կարծիքի
փոխանակութիւն ունեցած միջոցին, քիչ մը ջղայ-
նացած կ'երեւար:

— Մեռած կնոջ մը աղջկան նկատմամբ, ցոյց
տրուած այս համակրութեան արտայայտութիւնը,
չափազանցուած կը տեսնեմ: Երանի թէ անցեալի
փոթորիկը նոր վիշտեր չբերէր մեր տունը. . . :

Նիհալ մտիկ կ'ընէր. գայն արդարացնող անծա-
նօթ զգացումներէ զրգուած, անոր կարեկից իր սիրտի
քովանդակ սիրովը պատասխանեց.

— Սակայն, եղբայրս, հայրս մարդկային պար-
տականութիւն մը կը կատարէ պարզապէս, զինքը
քննադատելու իրաւունք չունիք. . . :

Նիհատ, քրօջը այս խօսքերուն վրայ բարկացած՝
ուսերը ցնցելով լսաւ.

— Աստուածդ կը սիրես, ձգէ՛:

Նիհալ, այս բարեսիրտ ու ազնիւ կինը, հայրը
առանձին չձգելու համար, դեսպանատան մը մէջ
պաշտօնավարող իր ամուսնոյն երթալու կը յապա-
ղէր: Բժիշկը իր աղջկայն զօհողութիւնները կը գնա-
հատէր, իր շարունակական պնդումներուն՝ Նիհալ
այս պատասխանը կուտար. «Եղբօրս ամուսնու-
թեանը կ'սպասեմ. ատեն մըն ալ քովդ կը կենամ ու
երբ ուզածիս պէս հարս մը գայ տուներնիս, այն
ատեն աւելի հանգիստ սիրտով կրնամ մեկնիլ:» Այս
համոզիչ գաղափարը բժիշկն ալ կ'իւրացնէր, սս-
կայն Նիհատի ցոյց տուած անփութութեանը հանդէպ՝
իր անյոյս և անկարող վիճակի մը մատնուած ըլլալը
տեսնելով շատ կ'ընկճուէր. . . «

Նիհալ, ամուսնոյն մեկնումէն յետոյ, երիտա-
սարդ ու զուարթ իր տալը քովը առած էր ու մինակ
մնացած պահերուն, անոր քրքիջներովը ինքզինքը
կը զբաղեցնէր: Մուսլլա, լաւ ընտանիքի մը աղջիկ,
մանկութենէն օտար դաստիարակներու յանձնուած,
ազգային իտէալներէ զուրկ ու հիմնական դաստիա-
րակութենէ հեռու մնացած էր: Ժամանակի մեծա-
գոյն մասը Բերայի վաճառատունները պրտե-
լով նորածեւութիւններով կը հետաքրքրուէր: Հո-
սանքէ տարուող մտայնութիւն մը ունէր ու անով
ալ կը պարծէր: Իր տեսակէտով, մարդկային բոլոր
առաքինութիւնները միմիայն գեղեցիկ հագուելու և
գեղեցիկ երեւալու մէջն էին:

Նիհալ վստահ էր թէ՛ այս աղջիկը չըջհայեաց
ու լուրջ այր մարդու մը հոգածու ձեռքին յանձնուե-
լով իր նկարագիրն ու վարքը կրնար շտկել. հետե-
ւաբար, գայն՝ իր կեանքին աւելի մօտ տեսնելու
փափաք մը ունէր ու իր այս գաղափարը, հօրը
յայտնելու համար, յարմար պատեհութեան մը կը
սպասէր:

Գալով Նիհատին, ան՝ Մուսալլայի բոլոր այս ունակութիւնները շատ բնական կը գտնէր ու կը մաղթէր որ, բոլոր աղջիկները անոր պէս նուրբ ու վայելուչ ըլլային. անոր կանաչ ու հմայիչ աչքերուն հանդէպ կը զգար թէ իր բովանդակ գոյութիւնը կը հալի, կ'անէանայ:

Այսուհանդերձ, արգարեւ փաստաբանը ո՛րքան զգայուն, այնքան ալ հպարտ էր. հեռատես էր ու տրամաբանող, որով միշտ ծանրագլուխ ու լուրջ կ'երեւար: Մինչդեռ Նէժատ պէյ, իր տղու մասին շատ խոր ու նուրբ գաղափարներ կը սնուցանէր. կ'ուզէր որ իր տղան կեանքի ընկերուհին ընտրէ, աղջիկ մը որ օժտուած ըլլայ մարդկային բոլոր առաքինութիւններովն ու կանացի ամէն առաւելութիւններովը. Մուսալլայի պէս նորոյթի խամաճիկի մը, իր տղայէն գնահատուելու և սիրուելու հաւանականութիւնը երբե՛ք միտքէն չէր անցուցած:

Խեղճ բժիշկ, այս օրերս, դարձեալ հին երեւակայութիւններու մէջ խորասուզուած, անցեալ վերջիշումը իր սրտի վէրքերը արիւնոտած ու ազարակ երթալու իր վճռական որոշումը ամրացուցած էին: Ի՞նչ պատրուակով ու ի՞նչ հանգամանքով պիտի երթար հոն, ուր քսան տարուան իր յիշատակները կը վերակենդանանային... Ինքզինքը ի՞նչպէս պիտի ներկայացնէր Նէտրէթին...

Ի՞նչ պատճառաբանութիւն ցոյց պիտի տար այս աղջկայ հանդէպ իր արտայայտելիք սիրոյն...: Խզճի ու սրտի այս հարցերը սաստկապէս կը հարուածէին իր ուղեղն ու հոգին և տառապալից վայրկեաններ կ'ապրեցնէին. միւս կողմէ, իր զաւակներուն կասկածոտ նայուածքներուն ներքեւ զգացած վիշտը, իր ջիղերը կը քայքայէր. անոնց կողմէ, իր հին ու սրբազան սիրոյն տրուելիք գէշ մեկնութիւնը, ամէն

բանէ աւելի կը ցնցէր իր գոյութիւնը. սակայն միշտ իր աչքին առջեւ կուգար նոյն տժգոյն տեսիլը որ՝ «գնա, աղջիկս տե՛ս» կ'ըսէր, կը հրամայէր...: Աս, իրեն համար, իր հին, նուիրական յիշատակին համար, խզճի պարտականութիւն մըն էր:

Նէժատ, ամբողջ գիշեր մը մտածած ու այն եզրակացութեան եկած էր թէ մարած, սրտառուչ անցեալի մը յիշատակին շառաւիղը եղող այս աղջկան հանդէպ իր անտարբեր ընթացքը՝ պիտի տառապեցնէր Ֆիքրէթի հոգին: Յաջորդ առաւօտ, Նէժատ, ձեռքը պայուսակ մը բռնած դուռնէն դուրս կ'նլլէր:

* * *

Վէյսէլ էֆէնտի լուր տուած օրէն ի վեր, Նէտրէթ ահնկառոյց կը սպասէր հիւրերուն. զինքը տեսնել ուզող այս նոր ազգականներու մասին գաղափար մը կազմած չէր, ցարգ անոնց մասին բան մը լսած չէր:

Երբ զինքը յիշող և սիրող կարեկից ակնարկի մը կարօտէն կ'այրէր իր հոգին, երբ անապատային ամայութեան մը մէջ, առանձնութեան վիշտով համակուած՝ լուռ արցունքներ կը թափէր, ո՞վ հարցուցած ու փնտռած էր զինքը:

Մանկութեան յիշատակները անհամ էին եղած ու տխուր իսկ ներկան՝ տժգոյն ու անյոյս գարուն մըն էր արեւազուրկ: Հոս եկած օրէն ի վեր, այս մտածութիւնները տեղւոյն լուրթեան ու իր մեծութեան հետ կը խառնուէին ու աւելի կը ճնշէին իր հոգին:

Խեղճ փոքրիկ, այս ամայի լեռներու մեռելաստանի, այս մութ անտառներու վեհաշուք վայրագութեանց ու պարապութեանց մէջ յոյսի բոյր մը, կեանքի լոյս մը կը փնտռէր:

Իրիկուն մը, Նէտրէթ, Ֆաթմա պաճիին հետ մօտակայ գիւղերէն կը վերադառնար: Այդ կանանչ աշխարհին մէջ ապրող գիւղացի թարմատի աղջիկները, իրենց միամտութիւնով, սրտի մաքրութիւնով ու ամբողջ էութեամբը գեղեցկութիւնն ու վսեմութիւնը կը մարմնացնէին, անւնց բոցավառ ու երազուն աչքերուն մէջ ալ, դեռաւորի աղջկայ մը հոգիի ըղձանքներով պճնուած, բանաստեղծական երեւակայութիւններ կ'ուրուագծուէին: Նէտրէթի մտերմութիւնը տօնական ուրախութիւն մը կը պատճառէր անոնց: Օրերու մեծագոյն մասը ասոնց հետ անցնող Նէտրէթ երբ ագարակ կը վերադառնար, հոգեկան խաղաղութիւն վայելողի մը զուարթ ու երջանիկ արտայայտութիւն մը ունէր:

Տաք օրուան մը յաջորդող այդ իրիկունը, ոսկեգոյն ցորենի գէգեր կը նշմարուէին ամէն կողմ. հովէն քշուած կալի յարդերը, թեթեւ մշուշի մը պէս վեր կը բարձրանային ու նորէն գետին կ'իջնէին. զուարթ, հաճելի գիւղական կեանքը վարդագոյն ջերմութեամբ մը ծաղկեցուցած էին Նէտրէթի այտերը ու խաւարամած գիշերներու մէջ վառուող աստղերուն պէս փայլուն անոր աչքերուն ճառագայթող թովչութիւնը կրկնապատկած էին:

Ծաղկատի աղջիկը սովորականէ: շատ աւելի զուարթ էր այն իրիկունը. ճամբուն եզերքը կեցած, կալերու մէջ ցատկրտող հորթուկներէն մէկը բռնել տուած էր և անոր ջերմաշունչ գլուխը իր կուրծքին սեղմելով անհանգարտ, չարաճճի մանուկի մը հոգին կրող ու երկար թարթիչներով եզերուած անոր խոշոր աչքերը կը համբուրէր:

Ֆաթմա պաճին, Վէյսէլ էֆէնտիի աճապարանքով դէպի իրենց կողմը գալը տեսնելով Նէտրէթին ըսաւ.

— Զաւակս, մեզ կը փնտռեն. աճապարէ', երթա՛նք:

— Աստուածդ կը սիրես, պաճի', քիչ մըն ալ սպասէ, անգամ մըն ալ համբուրեմ աս չարաճճին: Օ՛խ... որչա՛փ անուշ կը բուրէ:

Նոյն միջոցին Վէյսէլ էֆէնտին ձայնեց.

— Է՛յ, ո՛ւր էք, ձեզ կը փնտռեմ... Պոլսէն փաստարանին հայրը եկաւ:

Նէտրէթ սրտին մէջ թեթեւ բարախում մը զգաց, հովէն ցանուցիր եղած մազերը ամփոփեց, յարգարեց ու թրթռուն ձայնով մը հարցուց.

— Ե՞րբ եկաւ...

— Ժամէ մը աւելի է, աչքերնիս ճամբանիդ քնաց. վերջապէս զինքը առանձին ձգելով ձեզ փնտրուելու ելայ:

Երեքն ալ աճապարանքով քալել սկսան:

Այն մեծ շոճիին տակ, ուր սովորաբար Նէտրէթ կը նստէր, ծառի կոճղերէ շինուած նստարանի մը վրայ, ձեռքը ծնօտին, նստած էր բժիշկը. սովորականէն աւելի տժգոյն, աչքերուն մէջ լացող տրտմութիւնը այսօր աւելի զեղուն կայլակներով կը յորդէր: Տարիներ, տառապանքներ չէին կրցած մարեցնել իր երիտասարդական այն անմոռանալի սէրը, որ զինքը այսօր քաշած էր դէպի այս լքուած ու սիրոյ աշխարհը: Ամէն կողմ անցեալ օրերու յիշատակներու և կարօտի լոյսերով ողողուած էր: Հանդիպակաց լեռներու ստորոտը ապաստանած գիւղերը կը զիտէր: Օր մը, Ֆիքրէթին հետ պտտած էին այս տեղերը. անոր տեսլական աչքերէն իր գոյութեանը մէջ հոսած կրակէ հեղեղը քաղցը ջերմութեամբ մը տաքցուցած էր հոգին. բռնկելու, սիրելու, պոսթիկալու հաճոյք մը պատճառած էր և սակայն այս երջանկութեան վայելքը անբաւարար ու անկատար քնացած էր:

Հիմա... ծառերը՝ աւելի մեծցած, անտառը՝ աւելի մթաստուեր դարձած, վեհաշուք սեւութեան մը մէջ սգակիր տեսիլ մը կը պարուրեն, արտերը՝ մշակուած, դաշտերը՝ կանանչ, ամպերը երփներանգ են ու թռչունները կը դալալեն. սակայն, աւաղ... ո՞ւր է այստեղի սեւաչուի սիրահար կինը... Ե՞ւր է ան... : Իր կեանքը յաւիտենական սպառումին նուիրող... անյոյս, սակայն խաւարէն՝ աղօտ լոյս մը ակնկալող, անկարելիութենէն՝ մխիթարութիւն մը, փրկութեան միջոց մը մսւրացող... մարդկային ամենաանճար, ամենանկար կացութեան մը մատնուած Նէժատ՝ ստուերներու մէջէն, բարձրաբերձ լեռներու կողերէն, այս աւերակ տանը սեւ առաստաղներու տակէն փիքրէթի յանկարծական երեւումին սպասած միջոցին բանաստեղծական երաժշտութեան մը ձայնը.

— Կը ներէ՛ք... ձեզ առանձին ձգեցինք... կ'ըսէր:

Բժիշկը, կեանքի երազներուն մէջ տարուբեր, աչքերը ուժգնօրէն այրեցան, ցաւազին տազնապի մը վտանգաւոր այդ պահուն, իր ամբողջ կորսնցնելու մօտ՝ «Փիքրէ՛թ... Փիքրէ՛թ... դուն ո՞ղջ ես... անցեալի դառնակսկիծ օրերը անցա՞ն միթէ...» պռուալու վրայ էր՝ երբ հազիւ ինքզինքը զսպելով ձեռքը երկարեց դիմացը կեցած պարզօրէն վայելչազգեստ, ջերմ ու մտերմիկ նայուածքները իր վրայ սեւեռող Փիքրէթի այս որբացած աղջկան:

Այս վայրկեանին, այսքան անտարբերութիւն ցոյց տալը կարենալու համար, սրտի մը ի՛նչ հսկայ ուժ ունենալուն վրայ ապշած, հիացած էր Նէժատ:

Նէտրէթ՝ անոր մտացիր ու շուարած վիճակին հանդէպ՝ քիչ մը զգուշ ու զարմացկոտ ըսաւ.

— Յոգնած կ'երեւաք... քանի մը վայրկեան հանգիստ քրէք...

Այս խօսքը, իր ինքնախար բաղձանքներով կեանքէն վեր բարձրանալու ձգտումն ու իրականութենէն շատ հեռացած ըլլալը ազգարարող հրեշտակային ձայն մը թուեցաւ իրեն: Սուգի տարիներու ձերմկցուցած մազերուն ներքեւ գունաթափ ու վշտատեսիլ դէմքին վրայ խորտակուած ժպիտ մը կը դողար. շատ տառապահիւժ, անքուն գիշերներ անցուցած աչքերը անյուսութեան ու խռովքի մը ուժասպառութիւնովը խորասուզուած, Նէտրէթի երկարած ձեռքը բռնելով.

— Աղջի՛կս... ըսաւ:

Այս բառը իր կամքէն անկախօրէն արտասանուած էր: Խեղճ մարդ, իր ալեկոծ զգացումները չէր կրցած զսպել. փոխանակ աւելի պաշտօնական նախաբանի մը «աղջիկս...»ով սկսած էր խօսքի ու անոր տպաւորութիւնը մեղմել ջանալով, յուզումէն թրթռացող ձայնով մը շարունակեց.

— Այցելութիւնս անպատշաճ չէք գտներ կարծեմ... որովհետեւ դուք մեր գերդաստանի արժէքաւոր մէկ յիշատակն էք...

Նէտրէթ յարգալիր խոնարհութիւնով մը պատասխանեց.

— Այս վայրկեանիս, ձեր ներկայութեանը պարգեւած պատիւին համար անսահման գոհունակութիւն ու երջանկութիւն մը կը զգամ, զոր բացատրելու անկարողութիւնս կը խոստովանիմ և ձեր յանձն առած յոգնութեանց փոխարէն շնորհակալութիւններս կը յայտնեմ...

Բժիշկը, իր փոթորկած յուզումները ծածկելու համար, գլուխը կախած մտիկ կ'ընէր Նէտրէթի խօսքերը և հեռաւոր երազի մը բանաստեղծութիւնն ու ցանկութիւնը ապրեցնող այս ձայնը թաքուն ուրախութիւնով ու երջանկութիւնով մը կը գինովնար:

Մեղմորէն գլուխը բարձրացնելով ըսաւ.

— Ձեր գոյութեանը տեղեակ ըլլալէս յետոյ ձեզ տեսնելը խղճի պարտք մըն էր ինձ համար... որովհետեւ ձեր մօրը հանդէպ՝ խոր ու տեւական յարգանք մը ունէի...

Ձայնը խեղզուեցաւ...

Նէտրէթ միեւնոյն յուզումով պատասխանեց.

— Շատ խոր է սրտիս մէջ սնուցած սէրս հանդէպ անոնց, որոնք մօրս անիւններն ու անոր յիշատակը կը յարգեն. գիտնայիք մանաւանդ թէ զինքը մօտէն ճանչցողներու հետ գտնուիլս ո՞րչափ կը մխրթարէ զիս... կը խնդրեմ, ինձի միշտ իմ մօրս մասին խօսեցէք. անոր կեանքի վերջին պահերը պատմեցէք:

Նէժատ՝ զսպուած հառաչանքով մը յարեց.

— Հեռաւոր անցեալի մը շատ դառն յիշատակներ... ասոնք ձեր վրայ կ'ազդեն, աղջիկս... ձեզի աղջիկս ըսելով խօսք ուղղելով ներողամիտ կ'ըլլաք, չէ՞...

— Ա՛խ... պիտի փափաքէի որ միշտ այդ բառը գործածէիք ինձի, որովհետեւ, կեանքիս մէջ, ամէնէն աւելի այդ բառին կարօտն ունիմ:

Ծաղկատի աղջկայ աչքերը արցունքով լեցուեցան... բօխչիկն սիրտը կտոր կտոր կ'ըլլար. ուզեց անոր անտէր կեանքը պատսպարել իր հին սիրոյ ամենաձերմ գուրգուրանքներովը:

Նէժատի և Նէտրէթի այս վիճակը շատ ազդած էր Վէյսէլ էֆէնտի վրայ, որ սրտի կսկիծ մը կը զգար:

— Կ'աղաչեմ, ըսաւ, մէյմէկ սուրճ խմենք. այդ վշտառիթ խօսքերը ձգեցէք, քիչ մըն ալ ուրիշ նիւթերու մասին խօսեցէք, չըլլա՞ր... տեսէք, պէյ էֆէնտի, մեր լեռները գեղեցիկ չե՞ն միթէ:

— Շատ գեղեցիկ են, էֆէնտի՛մ... ասկէ շատ տարիներ առաջ անգամ մըն ալ հասկցած էի... այն ատեն Նէտրէթ հանրմը փոքրիկ պէպէք մըն էր. (Նէտրէթին դառնալով) ձեր ստնտունը զարգարուն կառքով մը ձեզ կը պտտցնէր զիմացի ճամբուն վրայ ու մենք ալ այս թմբենիներու ստուերներուն մէջ կը շրջագայէինք. այն ատեն, մանչս՝ Նիհատ տասնմէկ տարու էր, իսկ աղջիկս՝ Նիհալ, անկէ աւելի փոքր. ձեզ համբուրելու, գրկելու համար կը խենթենային. յետոյ ձեր մայրը անոնց վրայ ի՞նչ գուրգուրոտ, ի՞նչ քաղցր նայուածքներ ունէր. աղջկանս մազերը համբուրած ու մանչուս ուսերը շոյած միջոցին ձեզ իր դիրկին մէջ կը սեղմէր. այն ատեն, այս պաշտելի կնոջը դէմքին վրայ մայրութեան ամենաեռանդուն հպարտութիւն մը կը ճառագայթէր. այս վիճակին մէջ, սովորականէն շատ բարձր կը գտնէի զինքը...:

Նէտրէթ՝ ձաթմա պաճիկն նայելով.

— Անցածները, ձեր ըսած ազգականներն են կարծեմ:

Կինը խորասուզուած Նէժատին կը նայէր:

— Այո՛, ըսաւ, պէյ էֆէնտին ճանչնալ սկսայ. այն ատեն երիտասարդ էր: Յետոյ բօխչիկն դառնալով, ի՞նչ գեղեցիկ էր ձեր հանրմը... կապոյտաչուի՛, ճերմակ, գիրուկ... այն ատեն որքա՛ն կը հաւնէի իրեն... նոյն իսկ այս կարծիքս յայտնած էի հանգուցեալ պէյ էֆէնտիին, որ «ձաթմա՛, ըսել է հաւնեցար քեռորդիս, հապա եթէ քոյրս տեսած ըլլա՛յիր» ըսած էր:

Բօխչիկը առջեւը կը նայէր. այս վայրկեանիս իր կնոջ յիշատակութիւնը իր հոգւոյն մէջ տանջանքի, տառապանքի մը զգացումը արթնցուցած էր... կրտրուկ ճայնով մը.

— Ճակատագրի՛ր. անոնք մեզմէ առաջ աշխար-

հին հրաժեշտ տուին ու մենք ալ այսպէս զանոնք կ'ողբանք... ըսելով խօսքը կտրել ուզեց:

Երեքն ալ լռած էին... Նէտրէթի աչքերը բժիշկին դիմազոծները կը խուզարկէին. իրենց միջեւ եղած ազգականական կապերէն աւելի հոգեկան մերձաւորութիւն մը կը զգար անոր մէջ... ճակատին խոր ալիսները յոգնած հոգիի մը, զգայուն սրտի մը ուղեղին վրայ կատարած քայքայիչ ազդեցութեանց հետքերը կը յայտնէին... աչքերուն շատ խորերը թաքուն վիշտ մը կուլար...

Լայն ուսերուն վրայ բարձրացող անոր ծանրաբարոյ գլուխը շատ գրաւիչ էր. սակայն կեանքի ձմեռը, պէտք եղածէն աւելի ձիւն տեղացուցած էր անոր մազերուն վրայ...

Վէյսէլ էֆէնտին լռութիւնը խզելով, ըսաւ.

— Հանգուցեալ պէյ էֆէնտին շատ կը սիրէր այս տեղերը. միշտ կ'ըսէր թէ իր կեանքի լաւագոյն օրերը հոս անցուցած էր: Արդարեւ անոր շրջանին, ազարակը միշտ շէնչող կեանք մը ունէր. ջրաղացները կը դառնային, գիւղացիները կ'աշխատէին, հունձքը ատենին կ'առնուէր, գոմերու մէջ ոչխարներ, կովեր կը ծնէին, արտերը կը մշակուէին, առատ վառելիւփայտ կը կտրուէր... երանելի՛ օրեր...

Վէյսէլ էֆէնտիի աչքերը թրջուած էին անցեալի կարօտովը:

Նէտրէթ բոլորովին ընկճուած.

— Հօրս մահուան պարագան շատ ողբերգական է... ըսաւ:

Այս խօսքը բժիշկին դէմքին վրայ խոր հետք մը գծագրեց:

Աղջիկը կը շարունակէր.

— Տակաւին ինձ համար անլուծելի մնացած հօրս մահը արկածի մը հետեւանքն ըլլալը միտքս շատ կը զբաղեցնէ...

Նէժատ, ալամայ.

— Ի՞նչպէս, ըսաւ:

— Ինձի այնպէս կուզայ թէ հայրս արկածի մը զոհ ըլլալէն աւելի՛ անձնասպանութիւնով իր կեանքին վերջ տուած է:

— Ի՞նչպէս...

— Այո, իմ զգացումներս ինձի այսպէս ըսել կուտան. ո՞վ գիտէ, թերեւս կը խաբուիմ...

Բժիշկը, գլուխը կախած էր. Վէյսէլ էֆէնտին, վշտահար արտայայտութիւնով մը ըսաւ.

— Սիրունի՛կ հանրմս, երբ միտքդ տեղ մը մխրճուի, ա՛լ հոն գամուած կը մնաս. ըսէ՛ տեսնեմ, հանգուցեալը ինքնասպանութեան մղող ի՞նչ պատճառ կրնար գոյութիւն ունեցած ըլլալ:

— Չեմ գիտեր... ձեր տուած տեղեկութիւններէն կը հետեւցնեմ... հօրս՝ օրերով անյայտ վիշտով մը համակուած ըլլալը, այլեւս երբեք չի ժպտիլը, նոյնիսկ ազարակի գործերով ընա՛ւ չզբաղուիլը և... վերջին օրը դիտմամբ ձին գահավէժն ի վար քշելն ու քու այլալլած վիճակիդ մէջ «ամա՛ն, ամա՛ն... վտա՛նք կայ» պօռալուդ վրայ անոր՝ քեզի դառնալով յուսահատ ու ցաւազին ժպտով մը պատասխանելը. այս ամէնը, դո՛ւն ինձի մանրամասնօրէն պատմած չե՞ս...

Տարիներէ ի վեր իրեն անձանօթ մնացած ահռելի իրականութեան մը իրազեկ եղած այս վայրկեանին՝ Նէժատ՝ իղճահարութեան ճնշմանը տակ իր ջախջախուիլը կը զգար. իրիկուան խաւարի մէջէն, մոլեգնած ու վրէժխնդիր ուրուական մը ժանիքները կը ցուցնէր իրեն. տգեղ ու արհամարհոտ հեղնանքով մը իր բուռնցքը կ'երկարէր:

Նոյն միջոցին Նէտրէթ իրեն կ'ըսէր.

— Վաղը, ձեզի հետ միասին այս լքուած գե-
րեզմանը այցելենք...

Բժիշկը, ինքզինքէն ելած, այս խօսքերուն ինչ
պատասխան տալը չէր գիտեր... մօտէն հոսող գե-
տակի մը կարկաչը մտիկ կ'ընէր. ամէն կողմ ցրուած
ոչխարներու մայիւնը կը լսուէր. հեռուներէն եկող
շուններու հաջիւններն ու ոռնալու ձայները այս այ-
լանդակ ամայութեանց մէջ ահարկու արձագանգներ
կը ձգէին. այս անկոխ լեռներու գագաթները, հորի-
զոնի անյայտ անկիւններէն հաւաքուող ցանուցիր ու
մառախլապատ ամպերովը կը պատանքուէիս:

Բժիշկը, խօսակցութեան նիւթը փոխելով, իր
տղոց մասին կը խօսէր ալլեւս: Մանկամարգուհին՝
տխուր ու խորասուզուած՝ մտիկ կ'ընէր ու մերթ ընդ
մերթ կ'ըսէր.

— Ըսել է աղջիկնիդ շատ կը սիրէք, այնպէ՞ս է:
Նէժատ ալ.

— Պէտք է գիտնաք թէ ասկէ վերջ դուք, այս
սիրոյն անբաժան մասնակիցն էք, կը պատասխա-
նէր...

Այս պատասխանը, անոր հոգիին մէջ յոյսի շող
մը ծագեցուցած էր. իրեն երկարած այս բազուկները
թերեւս իր մենութեան տխրութիւնը մեղմացնող ու
զինքը մխիթարող գիրկ մը ըլլար: Գիշերուան սեւին
մէջ խորասուզուած աչքերը բժիշկի գէմքին ուղղելով
յանգիմանական ձայնով մը ըսաւ.

— Բայց ինչո՞ւ համար մինչեւ հիմա զիս փնտը-
ռելու պէտքը չզգացիք... ներեցէ՛ք, ձեր ցոյց տուած
սիրոյն յենլով է որ հարցումը կ'ընեմ...

Նէժատ, տարիներով զսպուած իր սուգի պոսթ-
կալէն վախցաւ. այս քաղցր, կշտամբող ձայնը,
կարծես թէ զինքը դառն երազի մը մղձաւանջային
տրտմութենէն ազատիլ կ'ուզէր...

Անյոյս տխրութեամբ համակուած իր աչքերուն
մէջ գոյացած արցունքը ծածկելու համար, առաջը
նայեցաւ ու վշտաբեկ ձայնով մը ըսաւ.

— Ա՛խ... փնտուցի՛ր, փնտուցի՛ր... սակայն
ամէն ինչ կորսուած, ամէն հետք ջնջուած էր...
ամէն կողմ սեւ մշուշի մը տակ թաղուած էր ինձ
համար... որովհետեւ, երկար ատեն հիւանդ ու
քայքայուած ապրած էի, աղջիկս...

Նէտրէթ զարմացումով մտիկ կ'ընէր այս խօս-
քերը, և բան մը չէր կրցած հասկնալ:

Նէժատ, յանկարծ սրտին մէջ բուռն, անդիմա-
դրելի փափաք մը զգաց. ամէն բան, բովանդակ
ճշմարտութիւնը, իր կրած բոլոր տառապանքները
անոր պատմել ուզեց. սակայն, քիչ առաջ իր հօրը
անձնասպանութիւնը պատմող այս աղջկան ամբաս-
տանութենէն վախնալով, համարձակութիւնը կորսն-
ցուց, անցեալի աղիտալի իրականութիւնը մարմնա-
ցաւ իր աչքերուն առջեւ. հեռաւոր... տարիներով
հեռաւոր օրերու պատահարները անցան իր միտքէն.
Իր բովանդակ հաստատակամութեան ուժը սրտակե-
ղէք սուգի մը քայքայիչ ձեռքին յանձնած պահը յի-
շեց. ան ինչ ահաւոր, ինչ անմոռանալի գիշեր մըն
էր... անկէ յետոյ, ալ չէր կրնար յիշել. նոյն իսկ
զայն յաւիտենապէս կորսնցնելէ յետոյ, կեանքի յոյսն
ու երեւակայութիւնն ալ կորսնցուցած՝ տարիներով
զգայազիրկ ու իմացականութենէ զրկուած՝ չէ՞ր ապ-
րած միթէ... :

* * *

Այլեւս նէտրէթ ու նէժատ տեղւոյն բանաստեղծական խաղաղութեանը մէջ կ'ապրէին. թէեւ առհասարակ անցեալի մասին կը խօսէին, սակայն երջանիկ ժամեր կ'անցնէին: Խեղճ նէժատ, կեանքի վերջին միւթարութիւնը հո՛ս գտած էր. մարած զիմագիծը քիչ մը կեանքի գոյն ստացած էր, շրթունքը ժպիտի կը վարժուէր, աչքերը սկսած էին ուրախութեան փայլ ստանալ:

Նէտրէթ, անոր վրայ կատարուած այս փոփոխութիւնը տեսնելով կ'ուրախանար. պատճառը առանց գիտնալու, թէ՛ շատ կը սիրէր այս մարդը և թէ կը կարեկցէր անոր. ի՛նչ պատճառի արդիւնքն էր այս կարեկցութեան զգացումը, անծանօթ կը մնար իրեն. այս տարօրինակ ու անթափանց գաղտնիքը, միշտ կը մղէր զինքը անոր հանդէպ կարեկցութիւն մը, որմէ անկարող էր ձերբազատուիլ: Մարդիկ իրարու միացնող զիպուածի ու ճակատագրի կապերուն, այսքան զօրաւոր, այսքան ազդու ըլլալը կը հիացնէր զինքը: Այս զիմագիծին, այս աչքերուն՝ անվախճան երեւակայութեան մը մէջ մտերմացած ու ճանչցած ըլլալ կը թուէր իրեն: Անոր հոգիին մէջ, մօրը ապրած օրերէն մնացած ծածուկ ստուերներ կը տեսնէր:

Անբացատրելի գաղտնիքներ կային հոն պահուած:

* * *

Նիհալ հանրմը հոս հրաւիրելու բուռն բաղձանք մը ունէր այլեւս նէտրէթ. կը փափաքէր որ բոլորը միասին պարզ ու խաղաղ գիւղական կեանք մը անցընէին. այս գաղափարը քանիցս յայտնած էր բժիշկին, որ շատ ուրախացած էր, բայց կը մտածէր թէ՛ Նիհալ իրեն հետ պիտի բերէ նաեւ իր պճնասէր տալը, այն խենդուկ աղջիկը որու միօրինակ քրքջոցներէ՛ պիտի զզուէին ու կարօտը քաշած այս օրերու հանգիստն ու խաղաղութիւնը պիտի վրդովուէին:

* * *

Նէժատ ու նէտրէթ, իրիկուն մը, պտոյտէ վերադարձին՝ երիտասարդ ու քիչ մը յաւակնոտ փաստաբանը, իրենց սովորաբար նստած տեղը, շոճիին ներքեւ նստած գտան. հլուրի և նէտրէթի միջեւ տեղի ունեցած տեսակցութիւնը քիչ մը ծանր, լուրջ եղած էր:

Բժիշկը տղան շատ դժգոհ գտաւ:

— Մտահոգութիւն պատճառեցիք մեզի... կ'ըսէր, քանի մը օրէն վերադառնալու էիք: Գիտէք թէ աղջիկնիւր որքան մտատանջ է ու որքան տարուած ձեզմով:

Նէտրէթ չէր լսած այս խօսքերը. անկեղծութեան ու ազգականութեան անհամապատասխան եղող փաստաբանի այս անտարբեր ընթացքէն շատ սրտնեղուած էր նէժատ: Նիհատի աչքերուն մէջ՝ գաղտնի ոխ մը, զայրոյթ մը կը յայտնուէր:

Նէտրէթ դեռ նոր տեսած այս երիտասարդի մասին լաւ կամ վատ գաղափար մը կազմած ըլլալով

մէկտեղ հպարտ կեցուածքով ու հանդարտ, ոտքի վրայ կը սպասէր. Նիհառ, ակամայ նայուածքով մը գազաթէն մինչեւ ոտքի մատները զննեց զայն, մանկամարդուհիին՝ այս խուզարկու ու գոռոզ նայուածքին ներքեւ, կատարեալ պաղարիւնով մը, նստարանը ցոյց տալով, իր ձայնի ամենագրաւիչ ներդաշնակութիւնով ու կիսաժպիտ՝ ըսաւ.

— Հո՛ս հրամեցէք... գիւղացիի մը ընդունելութեան սրահը ծառի մը շուքը միայն կրնայ ըլլալ:

— Արդարեւ ձեր սրահը շատ հաճելի, շատ բնական է... պատասխանեց Նիհատ:

Երեքն ալ նստեցան... տաք օրուան մը արեւամուտէն յետոյ կանաչագարգ լեռներէն եկող զովօդ մը, փրկարար շունչի մը պէս, անոնց դէմքերը շոյել սկսած էր:

Նիհատ, տարօրինակ հոգեկան կացութեան մը մատնուած, մերթ Նէտրէթին կը նայէր, շրջապատի տխուր ամայութեան ու անոր ինքնութեան միջեւ անըմբռնելի նմանութիւն մը կը գտնէր. անոր սեւ ու երազկոտ աչքերուն մէջ անբացատրելի տաղտուկ մը կը տեսնէր: Մինչ խեղճ բժիշկը այս անգամ ամբողջովին մոռցած իր ինքնութիւնը, դիմացը նստող այս համակրելի, գրաւիչ երիտասարդը՝ անցեալէն յանկարծակի ծագած արեւ մը, իսկ քովէն քաղցր ձայնով մը խօսող աղջիկը՝ այն տխրասարսուռ անցեալի կենդանի պատկեր մը իբր կ'ըմբռնէր ու պահիկ մը հեռացած կ'երեւար աշխարհէն ու կեանքէն:

Փաստաբանն ու Նէտրէթ շատ կարեւոր խնդիրներու մասին կը խօսակցէին. մանկամարդ աղջիկը բոլոր ուշադրութիւնը լարած կը հետեւէր Նիհատի բերնէն ելած ամէն մէկ բառին, երբ Նիհատ դատի մասնն բացատրութիւն կուտար:

Փաստաբանը անխուով ձայնով մը կ'ըսէր.

— Կարծեմ աւելորդ է ըսել թէ ձեր կալուածներէն բռնագրաւուած կարգ մը հողերը վերստանալու և ձեր իրաւունքը ապահովելու համար ջանք չպիտի ընայեմ. ասիկա թէ՛ իբր պարտականութիւն մը կ'ըմբռնեմ և թէ խոնարհաբար ձեզ ծառայութիւն մը ընելու պատիւը վայելել կ'ուզեմ...

Նէտրէթ, փոխան շնորհակալութեան ձեռքը երկարեց անոր:

Այս վայրկեանին, բժիշկին միտքին մէջ նոր աշխարհի մը նոր իղձիւր կ'արթննային... «Ծիբրէթին հետ, կեանքի հաճոյքները վայելելէ զրկուած մնացինք. բախտը պարտական է մեզի. արդարութիւնը կը պահանջէ որ ան՝ մեզմէ յափշտակած երջանկութեան պարտքը հատուցանէ ասոնց՝ մեր երկու բախտագուրկներուս ժառանգորդներուն: Ընչդ է որ ես այս կերպով Նէտրէթի իրական հայրը չեմ ըլլար, բայց գէթ անոր աւելի մօտ կ'ըլլամ. անոր կեսրայրը կ'ըլլամ. կեանքիս մէջ պաշտած կնոջս զաւակը բախտաւորուած կը տեսնեմ ու անկէ ծնելիք զաւակները կուրծքիս վրայ սեղմելով կեանքիս վերջին հաճոյքը կը վայելեմ. ասոնք՝ գոհունակութեամբ կ'ընդունիմ իբր վարձատրութիւն քաշած բոլոր տառապանքներուս և ո՛վ գիտէ, թերեւս փարատին վիշտերս...»:

Երեւակայութեան պարգեւած այս անսահման երջանկութիւնը ապրող Նէտատ, տղուն՝

— Շա՛տ խորասուզուած կ'երեւաք... հարցումին վրայ, խոր երօզէն արթնցնողի մը պէս, ցընցուեցաւ:

Այս մէկ երկու վայրկեանի երեւակայութեանը առթած քաղցր ու վսեմ հաճոյքներէն շատ ուժասպառ, յուսափրկեց վիճակի մը մէջ՝ դառն իրականութեանը վերագարծած էր:

Նէտրէթ ու Նիհատ, դատի մասին իրենց խօսակ-

ցութիւնը աւարտած էին. փաստաբանը իր պարտա-
կանութեան վերաբերեալ տեղեկութիւնները տուած,
իւր ըսելիքը ըսած էր: Անոր լուրջ վերաբերումին
մէջ, հօրը հանդէպ զայրոյթ մը կար. անոր կնճռոտ
յօնքերուն վրայ, անոր աչքերուն մէջ սրտնեղու-
թիւն ու ցասում կը յայտնուէին:

Նէտրէթ կատարելապէս Նէժատին նմանող, անոր
երիտասարդութիւնը ներկայացնող այս մարդուն ներ-
կայութեանը, ինքզինքը անօրինակ ընկճումի մը են-
թարկուած կը զգար: Բժիշկը Նէտրէթը կը զննէր:

Կանաչ շոճիներու ստուերներուն տակ, իր հա-
սակին շատ վայելող սպիտակ քթանէ նուրբ վերար-
կուին մէջ, ճերմակ ամպերու մէջէն յայտնուող
տժգոյն լուսնի մը նմանող այս գեղեցիկ աղջիկը,
այսօր, իր կեանքի աղջամուղջը փարատող, իր յոգ-
նած ու ծերացած հոգին ժպիտի ճառագայթներով
ողողող երկնառաք էակ մըն էր:

Մանկամարդուհին՝ հայրն ու որդին առանձին
ձգելու պէտքը զգալով՝ գործի մը պատրուակով բաժ-
նուեցաւ:

Փաստաբանը, միջոց մը անոր ետեւէն նայելէ
յետոյ, հօրը դառնալով ըսաւ.

— Չէք գիտեր թէ ձեր բացակայութիւնը ո՛րչափ
տխրեցուցած է Նիհալը... վաղը միասին կը վերա-
դառնանք, չէ՞:

Նէժատ, քիչ մը զգոյշ և մեղմ ձայնով, յարեց.

— Տակաւին վերադառնալու որոշումը չտուի-
ասով մէկտեղ, կը սպասեմ որ Նիհալ հոս գայ. այս
մասին Նէտրէթ հանր'ը շատ պնդեց, մասնաւորապէս
վէյսէլ պապան զրկել և Նիհալը հոս բերել կ'ուզէ...

Նիհատ քիչ մը վրդովուած ու ջլաշին.

— Նիհալ առանձին չկրնար գալ, ըսաւ. աւելի
ճիշդ, Մուսլլան մինակը չկրնար ձգել... մինչդեռ

ասոր ալ երկար ատեն հոս կենալը իր սիրտը պիտի
նեղէ, կը կարծեմ:

Այս խօսքին վրայ, բժիշկը չափազանց սրտնեղ-
ուած, շեշտակի նայուածք մը ուղղեց տղուն և
ըսաւ.

— Ուրեմն, հոս հրամմելու համար յոգնութիւն
յանձն առնելու պէտք չունին. իրենց քմահաճոյքնե-
րու ծառայելու պարտաւորութիւն մը չեմ զգար:

Փաստաբանը առաջը նայեցաւ ու ըսաւ.

— Խօսքերս սխալ կը մեկնէք. արդէն չեմ գի-
տեր թէ ինչո՞ւ համար խոր ատելութիւն մը ունիք
Մուսլլայի հանդէպ... ամէնուն համար կարեկցու-
թիւն յայտնող ձեր սիրտէն՝ անոր ալ սիրոյ փոքր
բաժին մը զատելու ինչո՞ւ կը զլանաք:

— Քանի որ Մուսլլան ձեզի պէս պաշտպան մը
ունի, այլեւս իմ սիրոյս ի՞նչ պէտք կրնայ ունենալ:

Այս խօսքերէն յետոյ, բժիշկը նեղացած, գլուխը
դարձուց ու մտածկոտ սկսաւ դիտել դիմացի լեռ-
ները, որոնք իրիկուան մթութիւնով կը սքողուէին:

Նիհատ խօսքի նիւթը փոխելու պէտքը զգացած
էր, որովհետեւ հայրը շատ ազդուած էր.

— Հինգ տասը օրէ վեր հոս ի՞նչպէս անցուցիք
ժամանակնիդ... չնեղուեցա՞ք... մինչդեռ մենք,
միշտ ձեր մասին կը մտածէինք, ըսաւ:

Նէժատ, առանց գուխը դարձնելու, պատասխա-
նեց.

— Ընդհա՛կառակն, շատ հաճելի անցաւ. նկա-
րագրով Նիհալին շատ նմանող այս հրեշտականման
աղջիկը, ամէն կերպով զիս զբաղեցնելու աշխատե-
ցաւ:

Փաստաբանը քիչ մը հեզնական՝ յարեց.

— Օ՛հ... հայրի՛կ... կարճ միջոցի մը տուած
վճիռովը ամէն մարդ մի նմանցնէք Նիհալի... :

Նէժատ, բարկութեամբ ուսերը ցնցելով:

— Երբեմն, մարդոց մասին կէս ժամէն անգամ կրնայ վճիռ տրուիլ, կարծեմ... այս ուղղութեամբ, դ՛ուք ինծի չափ փորձառութիւն չէք կրնար ունեցած ըլլալ:

Նիհատ թեթեւակի ժպտելով:

— Կը խոստովանիմ թէ ձեզի չափ փութկոտ չեմ:

— Ըսել է թէ հիմա Նէտրէթի մասին գաղափար մը կազմած չէ՞ք...

— Բնականաբար ո՛չ... պէտք էր որ անմիջապէս սիրահարուէի՞...

— Ո՛չ. միայն գնահատութեան զգացում մը...

— Դժբախտաբար, տակաւին այդ զգացումէն հեռու կը գտնուիմ:

Պաղ հով մը անցաւ բժիշկին ուղեղէն. Նիհատի խօսքերը կը ժխտէին իր բոլոր մտածումներն ու ցանկութիւնները. իր միտքը տակն ու վրայ ըրած էին. առաջին անգամ ըլլալով անոր, ուրիշ մէկը սիրելու հաւանականութիւնը անցաւ իր միտքէն և այդ ուրիշն ալ, Մուսլլան ըլլալը, իր վախերը բազմապատկեց: Այս աստիճան թեթեւամիտ, խենդուկ, շփացած աղջկայ մը, Նիհատի պէս լուրջ, ծանրագլուխ անձի մը հետ ընտանութիւնը անկարելի կը թուէր իրեն: Եթէ այսպէս է իրականութիւնը, ուրեմն ի՞նչ ուղղութիւն պէտք է բռնել...:

Այս ենթադրութիւնը զինքը կ'ապշեցնէր, իրեն մտածել կուտար. իր բոլոր քաղցր երեւակայութիւններուն դառն վախճան մը կուտար, իր հոգին ուժգին հարուածներով կը խորտակէր:

Այս միջոցին, Նէտրէթ հեռուէն ծառերու մէջէն կը նշմարուէր. ճերմակ կիսակօշիւներ հագած իր մանրիկ ոտքերովը արագօրէն կը մօտենար իրենց. վարդագոյն շրթունքներուն վրայ հոգեգրաւ ժպիտով մը ու քնքոյշ ձայնով մը:

— Այս գիւղական կեանքի զրկանքներու մէջ մեր ունեցած պակասները ներելու խոստումը տուէք... կ'ըսէր ու ժպտելով բժիշկին կը նայէր: Այս խօսքերս առաւելապէս մեր հիւրին կը պատկանին, քանի որ դուք այլեւս վարժուեցաք անհանգիստ ըլլալու...: Քիչ մը անդին, մեծ ծառին տակ սեղան պատրաստած ենք, հրամեցէք, ըսելով, ոտքի վրայ, յարգալիր կը սպասէր:

Այս անկեղծութիւնը շատ հաճոյք պատճառած էր Նիհատին, անոր գիմացը կեցած, այս անսեթեւեթ սեղանն ու այս դաշտային կեանքը նախապատիւ կը համարէր ամենաչքեղ ու զարդարուն ճաշասրահի մը պարգեւած հաճոյքներէն. իր յոգնած ուղեղը այսպիսի խաղաղութեան մը կարօտն ունէր:

— Հոգեկան զուարթութիւն մը կը զգամ, կ'ըսէր:

Քիչ մը առջեւէն քալող Նէժատ, տղուն խօսքերը մտիկ ընելով կը հասկնար թէ հինգ տասը վայրկեան առաջուայ իր մտածումները խեղդող մղձաւանջէ մը տարրեր բան մը չէին. իր նախորդ յոյսերով աւելի զօրացած, նայուածքներովը կը փայփայէր այս երկու երիտասարդները:

Ծառերուն տակ ճերմակ, մաքուր սեղան մը յարդարուած էր, հոն էին նախապէս պաճին ու վէյսէլ պապան: Այս աղջկայ ներկայութիւնը, կարծես թէ տարիներէ ի վեր անխնամ մնացած ագարակին կեանք, ցնծութիւն, երջանկութիւն կը շռայլէր:

Վէյսէլ էֆէնտին Նիհատը տեսնելով, ձեռքը երկարեց ու ժպտաղէմ ըսաւ:

— Էֆէնտի՛մ... փաստաբան պէ՛յ, բարի եկաք. ձեր ներկայութեան առթած գոհունակութիւնը բացատրելու անկարող եմ. հրամեցէք էֆէնտիմ, սեղան հրամեցէք. մեր թերութիւնները նկատի մի՛ առնէք,

գիւղի կեանք է այս... սակայն մեր ֆաթմա պաճին առանց մեզի լուր տալու, շատ բան բերած է հոս- ճիշդ է ըսուած թէ հին կիները հեռատես կ'ըլլան... :

Նիհատ Վէյսէլ էֆէնտի ձեռքը սեղմեց. ժպտե- լով մտիկ ըրաւ անոր միամիտ հոգին թարգմանող խօսքերը: Նէտրէթ շատ զուարթ էր... Իսկ բժիշկը, այս վսեմ, մաքուր կեանքի երջանկութեանը մէջ, մետաքս մազերով, տոգոյն գիմագծով կնոջ մը տե- սիլը կը փնտռէր:

Հիմա, այլեւս իրիկուան արծաթ շղարչները դող- դղալով կը թռչէին իրենց լեռներու վրայէն. անտառ- ներու խորերէն արծագանգող բուերու վայրենները կը լսուէին, ծառերը անտարբեր խաղաղութեամբ մը գիշերուան մութ գոյնին կը սպասէին: Ճաշէն յետոյ, երեքն ալ, դուռին առջեւի թէրասին վրայ իրենց սուրճերը խմած էին: Բժիշկը անկիւն մը քաշուած՝ իր խորասուզուած աչքերէն վիշտը կաթիլ կաթիլ կը հոսէր ու գիշերուան անվախճան մթութեանը մէջ կը թաղուէր:

Նէտրէթ ու Նիհատ կը խօսակցէին. վերջինս՝ կեանքի տաղտուկներէն կը պատմէր, իսկ մանկա- մարդուհին լուսթեամբ մտիկ կ'ընէր անոր ներդաշ- նակ ու թրթռուն ձայնը. հովը մեղմօրէն կը փսփօսը տերեւներուն մէջ. հանդիպակաց բարձր լեռներուն ստորոտը, խաւարի մէջ թաղուած փոքրիկ գիւղի մը խաղաղ մէկ անկիւնը, լոյս մը, գաղտնիքներու թա- փանցել ուզող աչքի մը պէս մերթ կը մարէր ու մերթ կը փայլէր. արտերէն գորտերու կռկոսքը կը լսուէր:

* * *

Նիհատի բացակայութիւնը երկու օր տեւած էր ու այս միջոցին Նիհալ և Մուալլա առանձին մնացած էին. մինչդեռ Նիհալ հօրն ու եղբորը միասին վերա- դարձին կը սպասէր, Նիհատի առանձին գալը տես- նելով՝ նեղուած ակամայ բացազանչեց.

— Հայրի՛կս ո՛ւր է...

Փաստաբանը յոգնած երեւոյթով մը երբ աթոռի մը վրայ կը տեղաւորուէր, Նիհալ միօրինակ կերպով կը կրկնէր.

— Հոգի՛ս, հայրս ինչո՞ւ չեկաւ:

— Բիչ մը սպասէ, մի աճապարեր. պիտի հաս- կըցնեմ... կ'ըսէր Նիհատ:

Նիհալ քիչ մը խոժոռ՝ գլուխը երերցնելով յարեց.

— Ըսել է այլեւս մեզ մօտնա՞լ կ'ուզէ. այո՛... :

— Ո՛չ... ընդհակառակն, միշտ քեզ կը յիշէ. արդէն գիտես թէ քեզ ինձմէ աւելի կը սիրէ...

— Սակայն, եղբայրս, չես գիտեր թէ որքա՛ն կարօտցած եմ գինքը:

Երիտասարդը ակնոցներու ապակին մաքրելով մէկտեղ, քիչ մը անտարբեր.

— Այո՛, ըսաւ, նախ ըսեմ թէ քեզ հոն կը հրա- լիրեն... Նէտրէթ հանրմ, Վէյսէլ էֆէնտին ինծի հետ ուղարկեց. ուրեմն, եթէ կ'ուզէք, վաղը կամ միւս օրը կրնաք երթալ... ահաւասիկ քեզի նամակ մըն ալ... :

Նիհատ նամակը յանձնած միջոցին քիչ մը յուզ- ուած՝ հարցուց.

— Մուալլան հոս չէ՞:

Մանկամարդ կինը նամակը կը բանար, միեւնոյն ատեն կը պատասխանէր.

— Վերն է... հաւանաբար ձեր գալէն լուր չունի տակաւին. մեր վաղուան թէյասեղանին հազնելիք զգեստներու պատրաստութեամբ զբաղած է, կարծեմ... :

Յանկարծ վիշտի բամպ մը անցաւ Նիհատի աչքերուն առջեւէն. կը յուսար թէ Մուալլան ակնկառոյց իրեն կը սպասէ :

Մինչ Նիհալ տակաւին նամակը կը կարդար, սենեակին դուռը բացուեցաւ. փաստաբանին ուրախութենէն ճառագայթող աչքերը կէտի մը յառեցան... Մուալլան, ձոխ արդուզարդով, երջանիկ ու ժրպտուն տեսնուեցաւ և ձեռքը իրեն երկարող Նիհատին գոչեց.

— Կը կարծէինք թէ ագարակի կեանքին երջանկութիւնը մոռցնել տուած էր մեզ... (Նիհալին նայելով) այնպէս չէ՞, հարս... կ'ըսէր :

Այս քաղցր կշտամբանքին հանդէպ փաստաբանին սիրավառ ակնարկները այս շէնչող աղջկայ ամբողջ մարմինը պարուրեցին, և ըսաւ.

— Երբե՛ք, երբե՛ք...

Մուալլան իր թեւին կրթնած.

— Ըսէք տեսնէք, հոն ի՞նչ ըրիք...

Նիհատ, անփութօրէն ուսերը ցնցելով պատասխանեց.

— Երկու օր գաշտային մաքուր օդ մը առի հօրս հետ տեսնուեցայ. պարտականութեանս բերումովը Նէտրէթ հանրմին ըսելիքներս խօսեցայ : Լայնատարած ու հաճոյալի տեսարանները գիտելով միշտ ձեզ մտաբերեցի... ահա, ա՛յսչափ :

— Խօսելիքնիդ շատ համառօտել կ'ուզէք, մինչդեռ մենք մանրամասն լուրերու կը սպասէիք... Օրինակ՝ Նէտրէթ հանրմի մասին ձեր կարծիքը...

Փաստաբանը հոգեկան երջանկութեամբ մը զուարթացած գոչեց.

— Նէտրէթ հանրմի մասին ո՛չ թէ իմ գաղափարը, այլ եթէ իմ տեսնութիւնս կը հարցնէք, ահա՛ համառօտակի, երկու բառով կրնամ ամփոփել. «Տժգոյն լուսնկայ մը» :

— Օ՛հ... ձեր բացատրութիւնը բանաստեղծութեան մը չափ հաճոյալի ու պատկերալից է... աղօտ անլոյս լուսնկարները կարգ մը հոգիներու վրայ տխուր սղզեցութիւններ ձգելը և առհասարակ բանաստեղծներու՝ ասոնց սիրահարիլը, ասոնցմով գրաւուիլը չէ՛ք կրնար ուրանալ, չէ՛ :

— Իրաւունք ունիք... եթէ բանաստեղծ ըլլալի, իմ ամենայուզիչ ու հոգեզմայլ բանաստեղծութիւններս՝ ակնախտիչ ու ճառագայթափայլ լուսնի մը լոյսովը պիտի գրէի. մարդոց բնաւորութիւնն ու ճաշակները այլազան են. ես՝ գունաթափ ծաղիկներէն, անփայլ գարունէն, վերջապէս, տժգոյն լուսնկայէն բան մը չեմ հասկնար... :

Նիհալ՝ գառնալով անոնց՝

— Սակայն, ըսաւ, աղօտ գոյները խորապէս կը հմայեն զիս. կարծեմ թէ այս բնաւորութիւնը հօրմէս ժառանգած եմ... խեղճ հայրս, որքան հակամէտ է տխրութեան, ըսաւ :

Ու ձեռքի նամակը Մուալլայի երկարելով յարեց.

— Ինչո՞ւ կը մտահոգուիք... ահա՛, կարդացէ՛ք. երիտասարդունհին՝ ուրախութեամբ բացագանչեց.

— Շիտակը, գեղեցիկ ճամբորդութիւն մը... շատ ուրախացայ :

* * *

Փաստաբանին մեկնումէն յետոյ, Նէժատ ու Նէտրէթ իրենց խաղաղ կեանքը շարունակեցին, բժիշկը քանի մը անգամներ, Նիհատի մասին անոր կարծիքը

առնել ուզած էր, մանկամարդուհին ալ միշտ շա-
ռագունելով:

— Ձեզի պէս զգայուն, ձեզի պէս ազնիւ...
բայց չեմ գիտեր թէ ձեզի պէս գորովագութ սիրտ մը
ունի՞: պատասխանած էր:

Նոյն միջոցին, բժիշկը, անոր խորազննին սեւ
աչքերուն մէջ գրաւականի մը ակնկալութիւնը նշմա-
րած էր. յետոյ, Մուսլլայի մասին երկար բարակ
հարցուփորձած էր զինքը. բժիշկն ալ այս խենդուկ
աղջկայ նկատմամբ իր զգացումները՝ առանց ծածկե-
լու, մանրամասնօրէն արտայայտուած էր: Կը հաս-
կընար թէ՛ իր խօսքերը նէտրէթ հանձմին գոհունա-
կութիւն կը պատճառէին և տարօրինակ հոգեկան
կացութեան մը մէջ, ասոր պատճառները վերլուծե-
լու կը ջանար:

Իրիկուն մը. կայարանի և ագարակի միջեւ եր-
կարող ճամբուն վրայ նշմարուեցաւ կառք մը, որ
գէպի ագարակը կուգար: Նէտրէթ, ձեռքի հեռադի-
տակը նէժատին երկարելով՝

— Տեսէ՛ք, կ'ըսէր, կառքին մէջ երկու կիներ
կան, ապահովաբար անոնք են... աճապարենք...:

Կառքին կը մօտենային, վէյսէյլ էֆէնտի թաչկի-
նակը կը շարժէր:

Բժիշկը՝ Նիհալի գալէն չափազանց գոհ էր, բայց
Մուսլլայի ընկերակցութիւնը քիչ մը սրտնեղութիւն
պատճառած էր իրեն. միջոց մը, նէտրէթին դառնա-
լով՝

— Հիմա խենդուկ, շփացած աղջիկ մը պիտի
տեսնէք ըսաւ, որուն՝ նէտրէթ քաղցր ժպիտով մը
պատասխանեց.

— Նիհալ հանձմի ներկայութիւնը ամէն ինչ հա-

ձեղի պիտի դարձնէ մեզի... սակայն միւսն ալ կ'ըն-
դունին այնպէս, ինչ որ է:

— Բնականաբար, ի՞նչ կրնանք ընել... քանի որ
իր ամուսնոյն քոյրն է, այլապէս, Նիհալը, անուղ-
ղակի կերպով պիտի վշտացնէինք:

Կառքը մօտեցած ու կեցած էր: Այդ երջանիկ
պահուն, ուղղակի իր կողմը վազող աղջկան երկա-
րեց ձեռքերը. հօրը և աղջկան ողջագուրումը հան-
դարտօրէն դիտող նէտրէթ՝ խորապէս ազդուած էր:
Նիհալի չափ՝ անոր մօտ չկրնալ ըլլալու վիշտն ու իր
անապատային չոփ չոր կեանքի ու անոքութեան
զգացումը կը քայքայէին իր էութիւնը. հազիւ կրցաւ
ինքզինքին գալ և գոհունակ ու զուարթ արտայայ-
տութիւնով մը ձեռքը երկարեց իր սիրելի հիւրին:

Մուսլլան, նոյն միջոցին.

— Օ՛հ, որքան կազդուրուած էք, պէյ էֆէնտի,
գժուարաւ կրցայ ճանչնալ ձեզ, կ'ըսէր:

Եղբօրը՝ «տխուր լուսնկայ» անուանած այս ման-
կամարդուհիի մասին Նիհալի առաջին տպաւորութիւ-
նը, գնահատանքի մը զգացումը եղած էր:

Գալով Մուսլլային, ան՝ ջղայնոտ ու լարուած
իր խուզարկու ակնարկները կը պտտցնէր այս հպարտ
աղջկայ վրայ:

Ներկայացուած ձեւակերպութիւններէն յետոյ,
նէտրէթ, նոյն հետաքրքրութեամբ Մուսլլան դիտած
ու շատ գեղեցիկ գտած էր զայն: Անոր կանաչ, խո-
չոր աչքերը, քիչ մը չարութիւն ու քիչ մը արհա-
մարհանք յայտնելով մէկտեղ, շատ գրաւիչ էին.
չրթունքները հաստ ու շատ վարդագոյն:

Վերջապէս, գունագեղ ու ձոխ գեղեցկութեան
մը տէր եղող այս աղջկայ արգուզարգն ալ իրեն չափ
չքեղ էր: Այնպէս հագուած էր որ կարծես թէ թատ-
րոն և կամ հարսնիքի կ'երթար և ոչ թէ գիւղ մը

կամ ազարակ մը: Չեռքը ոսկեհիւս գայուսակը, ճերմակ ձեռնոցները, նուրբ ու ճաշակաւոր կիսակօշիկները, իր արգուզարգին աւելի՛ չքեղութիւն մը, աւելի փայլ մը կուտային ու այս ազարակի կեանքին տարօրինակ հակադրութիւն մը կը պատճառէին: Նիհալ, ընդհակառակն, շատ պարզ, շատ վայելուչ հագուած էր. անզարդ, արծաթագոյն վերարկուի մը պարզութեանը մէջ, շատ նուրբ ու շատ լուրջ կ'երեւար. ան ալ փոխադարձաբար զննած էր Նէտրէթը ու զայն. արդարեւ լուսնկայի մը չափ բանաստեղծական կը գտնէր, անոր մէջ խոր ու ծածկուած բացառութիւններ կը տեսնէր:

Երկար, աղեղնածեւ թարթիչներով շրջանակուած խոշոր թուխ աչքերուն մէջ թափանցող, զինովցնող տրտմութիւն մը կար. զեղնորակ, բիւրեղի պէս լուսանցիկ մարմինը խիստ սրտազրաւ ներդաշնակութիւն մը կը կազմէր այտերու թեթեւ վարդագոյնին հետ. բաց չազանակագոյն մազերով զարդարուած գլուխը, կանացի ինքնապաշտպանութեան զէնքը եղող հպարտութիւնով մը տիրական երեւոյթ մը կուտար անոր ու այս կերպով անոր նրբութեան ու շնորհալիութեանը վրայ պատկառազգու գրաւչութիւն մը կ'աւելցնէր:

Նոյն միջոցին, երբ Մուսլլան զինքը հաւնելու չհաւնելու երկընտրանքի մէջ էր, Նէտրէթ ակամայ մղումով մը իր խուզարկու աչքերը չէր հեռացնէր այս թեթեւօղիկ աղջիկէն, որու մասին, այն գիշեր, Նիհատ խօսած էր իրեն: Արտաքնապէս շատ գեղեցիկ կը գտնէր զայն ու կը նմանցնէր հօտաւէտ ու վտանգաւոր ծաղիկի մը, որու թունալից թերթիկներու մէջէն մահացու հեղուկ մը կը հոսի:

Նէտրէթ այլեւս ամբողջովին Նիհալով զբաղուած էր... Մանկամարդ կինը տեղւոյն գեղեցկութեանը զիմաց, ակամայ կ'ըսէր.

— Աստուած իմ, ի՞նչ հրաշալի տեսարան, հիմա ա՛լ աղօտ կերպով կը յիշեմ այս տեղերը պտտած ըլլալս, ի՞նչ քաղցր, ի՞նչ հաճելի օրեր էին: Երեւակայութեանս պահած մանկական ամէնէն արժէքաւոր պահերը հոս անցուցած օրերս են... Դուք, այն ատեն, շատ փոքր մանկիկ մըն էիք. նոյն իսկ ձեր աղուոր ու նուրբ կառքը նստելու փափաքս մօրս յայտնած էի. հակառակ մօրս արգելքին, ձեր մայրը զիս գրկած, ձեր քով նստեցուցած ու այտերէս ալ համբուրած էր:

Անցեալին վերաբերնալ Նիհալի խօսքերէն շատ ազգուած Նէտրէթ, հառաչելով.

— Ա՛խ... ի՞նչ կ'ըլլար, գոնէ քիչ մը մայրս ճանչցած ըլլալի, վստահ եղէք որ կեանքի այս զըրկանքը ո՛չ մէկ բանով կրնայ փոխարինուիլ...: Պահեր կ'ըլլան. երբ պատիկ մանկիկի մը նման անոր կարօտը զիս կը լացնէ... Երբեմն երազներուս մէջ, շատ գորովագութ նայուածքով, գունաթափ դէմքով կին մը կը տեսնեմ... առանց երբեք ինծի մօտենալու՝ միշտ հեռուէն կը նայի...: Այնպէս կը կարծեմ թէ անպայման իմ մայրս է ան:

Նիհալ սրտին մէջ խոր դառնութիւն մը զգալով, հարցուց.

— Իր լուսանկարը չունի՞ք...

— Ո՛չ. հանգուցեալ մօրաքոյրս ունի եղեր, բայց ինծի երբեք ցոյց չտուաւ:

Բժիշկը այս խօսքերը լսած չէր, Մուսլլայի հետ խօսակցութեան բռնուած ըլլալով. իսկ Նիհալ, Նէտրէթի զգացած վիշտը փարատելու համար, յարեց.

— Ասկէ վերջ, այլեւս առանձին չէք. անա՛, հայրս՝ քեզի հայր, իսկ ես՝ մեծ քոյրդ... միշտ այսպէս, միսսին:

Մանկամարդուհին երախտագիտական զգացումներով ձեռքերը երկարեց.

— Արդէն ձեր հայրը տեսնելէս ի վեր, հոգիս բզբտող որբութեանս տառապանքներէն ազատուած կը զգամ. այլեւս կեանքը, կարծես թէ երջանկութեան խոստումներովը կը ժպտի ինծի...: Ա՛խ, գիտնայիք թէ այս վայրկեանիս որչա՛փ երջանիկ եմ...:

Երիտասարդ կինը, խոր և անկեղծ սէրով մը այս խեղճ աղջկայ խօսքերը մտիկ ըրած միջոցին, ցարդ զայն չփնտռելնուն ու անոր մասին մտածած չըլլալնուն համար խղճահարութիւն մը կը զգար. հայրը իրենցմէ աւելի անձնուէր կը նկատէր ու կը զայրանար եղբօրը դէմ թէ Նէտրէթի մասին ինչու մանրամասնութիւն չէր տուած իրեն...: Յետոյ, այս աղջըկայ գոյութիւնը՝ ի՛նչ կերպով կրնար կարգ մը յոռի մեկնութիւններու ծնունդ տալ. հօրը խանգարուած ու քայքայուած կեանքին մէջ, անիկա, մեղքի ի՛նչ բաժին ու մասնակցութիւն կրնար ունեցած ըլլալ... և արդէն, իր խիղճէն բարձրացող ապահովիչ ձայն մը այս վշտառիթ սիրոյն անմեղ, անբիծ ըլլալը միշտ չէ՞ր յիշեցներ իրեն: Վերջերս, իր եղբօրը՝ Նիհատի, այս մասին տարբեր համոզում ունենալը հասկնալով, շատ վշտացած էր:

* * *

Շոճիներու մութ կանաչ ստուերներու մէջէն գանդազօրէն քալող ու տարբեր տարբեր զգացումներ կրող այս երեք կիները անփութօրէն կը խօսակցէին. զուարթացած էին:

Նիհալ, իր հօրը՝ այսօրուան չափ ժպտուն ու երջանիկ արտայայտութիւնը տեսած ըլլալը երբեք

չէր յիշեր և այս պատճառով ալ Նէտրէթի հանդէպ մասնաւոր երախտագիտական զգացում մը անուցանել սկսած էր: Բիշկը, հոգիէն յորդող սիրով մը աղջկան հարցուց.

— Հոս չէք նեղուիր, այնպէս չէ՞, Նիհալ:

— Անկարելի է... սակայն չեմ գիտեր... Մուսալան...

Վերջինս, հարսին խօսքը ընդհատելով, ըսաւ.

— Գիտէք թէ ես հակառակ եմ անոնց, որոնք կեանքը վայրի վիճակի մը հասցնելէ հաճոյք կը զգան. լուութենէն ու առանձնութենէն շատ նողկանք կը զգամ. հետեւաբար, ձեր սիրոյն համար, հոս միայն երկու օրուան հիւր մնալու ձանձրոյթը յանձն կ'առնեմ:

Նէտրէթ, զարմացած ու ցաւելով նայեցաւ այս արհամարհոտ հիւրին և լուրջ ձայնով մը ըսաւ.

— Ներեցէ՛ք բայց, քիչ մը սխալ կը մտածէք, քաղաքակրթութեան առթած յոգնութիւններէն յետոյ, հանգիստ մը՝ մարդկային իրաւունքն է կարծեմ...:

Նէժատ, ջղայնոտ շեշտով մը խօսքի խառնուեցաւ.

— Մուսալա հանըմը, ամէն բանէ աւելի, ընկերական կեանքը կը նախասիրէ. արդուզարդը, շքեղութիւնը, ցոյցը զինքը շատ կը գրաւեն. հետեւաբար շնորհաւորելի է, քանի որ երբեք չյոգնիր, երբեք չձանձրանար...:

Մուսալա, զուարթ քրքիջ մը ձգելով, պատասխանեց.

— Այո, սակայն... քիչ մը կը չափազանցէք...

Այս խօսակցութիւնը՝ երկու բոլորովին հակադիր մանկամարդուհիներու միջեւ տիրող պաղութիւնը աւելի սաստկացուցած էր. ճամբան, հանդիպող դիւ-

դացի կիներու հանդէպ Մուսալլայի հեգնալից ու արհամարհոտ ժպիտները աւելի կը զզուեցնէին Նէտրէթը:

Ագարակը անցուցած առաջին գիշերը, Մուսալլային համար անհանդուրժելի ու տառապալից եղած էր. Նիհալի, Նէտրէթի ու բժիշկին միջեւ եղած խօսակցութեանց միշտ անտարբեր մնացած ու միջոց մը մրափած էր: Յաջորդ օրը, հարսին կը պաղատէր ու կ'ըսէր.

— Կը խնդրեմ, երթա՛նք, ասկէ մեկնի՛նք... ոչ ում հետեւ պիտի խեղդուիմ... այս գոռոզ ու պաղ աղջիկը իմ ամբողջ էութիւնս կը նեղէ... դեռատի մարմինի մը մէջ ծերացած հոգի մը կ'ապրի. եթէ ես անոր տեղը ըլլայի, անպայման կը մեռնէի... Աստուած իմ, զի՛ս ալ իրեն նմանցնել կ'ուզէ:

Նիհալ տալով այս խօսքերուն քիչ մը նեղսրտած պատասխանեց.

— Ո՛չ, Նէտրէթը այսպէս մի՛ գատէք... արդարեւ անոր՝ առաքինութիւններով ու առաւելութիւններով օժտուած բացառիկ անձնաւորութիւն մը ըլլալը անուրանալի է, իր անձնական արժանապատուութիւնը միշտ բարձր պահելու մտայնութեանը պատճառով ձեզի գոռոզ կը թուի:

Մուսալլա գէշ կերպով աւրուած, ըսաւ.

— Եթէ գիտնայի թէ այս աստիճան ուժգնութեամբ պիտի պաշտպանէիք զինքը, ձեր քննադատութեանց չենթարկուելու համար պիտի նախընտրէի լռել...:

Ասկէ վերջ անցուցած մէկ երկու օրուան ընթացքին՝ տառապանքներու, տանջանքներու ներքեւ կը գալարուէր ազգելով Նիհալի ու բժիշկին վրայ: Նէտրէթ շուարած, չէր գիտեր թէ ի՞նչպէս կրնայ զբաղեցնել զայն. գիւղական կեանքի մը բոլոր վայելքները բացատրած և սակայն զժբախտաբար չէր

յաջողած Մուսալլային հաճոյք պատճառել:

Յաջորդ օրն իսկ մեկնելու որոշումը տուած էր Նիհալ, երբ նոյն իրիկունն իսկ անակնկալ կերպով ժամանեց Նիհատ, որ քիչ մը ոգեւորութիւն ստեղծեց: Մուսալլան զինքը դիմաւորած էր խելայեղ ուրախութեամբ մը, մինչ Նէտրէթ ցաւ ու կարօտ փայլատակող իր ակնարկները անոնց ուղղած էր. իսկ Նէժատ՝ Մուսալլայի այս շփացածութիւնները անպատշաճ գտնելով, Նիհալին կը նայէր և դժգոհութիւն արտայայտող իր ակնարկովը ըսել կ'ուզէր. «Սակայն, այլեւս անտանելի է...»:

Խեղճ կին, խիստ տագնապալի դրութեան մը մէջ, ընելիքն ու ըսելիքը շուարած, եղբօրը դառնալով ըսաւ.

— Ի՞նչ եղաւ որ եկաք... օ՛խ... շատ ուրախացանք...:

Երիտասարդ փաստաբանը, գոհ ու երջանիկ պատասխանեց.

— Այս գեղեցիկ միջավայրին մէջ, ձեզի հետ երկու օրուան խաղաղ կեանք մը վայելելու հաճոյքին զոհեցի ամէն բան ու շոգեկառքը նետուեցայ...:

Յարգալիր ձեւով մը ձեռքը Նէտրէթին երկարեց. իսկ աղջիկը՝ այս հմայիչ մարդէն փախչիլ ուզողի, մշտնջենապէս անկէ հեռանալու պէտքը զգացնողի վիճակ մը կը ներկայացնէր. անոր ճնշող ու խորթ թափանց նայուածքներուն մէջ, իր ամբողջ գոյութեան վրայ իշխող գաղտնի ուժի մը ազդեցութիւնը կը տեսնէր. ասով մէկտեղ, իր լրջութեանը գերիշխող զգացումներու օժանդակութեամբ, յաջողեցաւ պահել իր պաղարիւնութիւնը: Հովանոցին յենած՝ Մուսալլայի խենթ ու շփացածի ձեքձեքումները կը դիտէր, ու շաղկապութիւնը առաւելապէս կեդրոնացնելով

Նէժատի պոստած յօնքերուն և խեղճ Նիհալի ժըպտուն զէմքին վրայ, ուր, իր տալովը անպատշաճ ընթացքէն, իր հօրը կրած տառապանքը կը կարգացուէր:

Գալով Նիհատին, անոր աչքերը ուրախութենէն կը փայլէին. ասիկա՝ առաջին անգամ իր տեսածէն բոլորովին տարբեր մարդ մըն էր... զինքը շրջապատողներուն առատ ժպիտներ կը բաշխէր. մինչդեռ, Նէժատի զէմքին վրայ նողկանքի արտայայտութիւնը աւելի կը շեշտուէր: Եւ այսօր, իր և տղուն միջեւ այս աներես աղջկան ներկայութիւնը ա՛լ աւելի կը զգուեցնէր զինքը:

Նիհատ բնաւ չէր նեղուեր Մուսալլայի իրերայաջորդ հարցումներէն. սիրուն ու չարաճճի տղու մը դիմացը գտնուողի մը պէս իր քաղցր ու փայփայող արտայայտութիւնը առանց ծածկելու պէտք տեսնելու, անփութօրէն «այո՛» կամ «ո՛չ» պատասխանը տալէ հաճոյք կը զգար:

Ջզայնոտած բժիշկին զէմքը կաս կարմիր կտրած էր երբ շեշտակի նէտրէթին կը նայէր: Վերջինս, ձեռքի հովանոցին կրթնած, աչքերը հորիզոնի անծանօթ կէտի մը յառած, խորասուզուած կ'երեւար: Նէժատ, անոր այսքան մտածկոտ վիճակը տեսած չէր. կամաց կամաց մօտեցաւ անոր. դեռատի աղջիկը զլուխը դարձուց և իր սովորական գեղեցիկ ժպիտով ժպտեցաւ: Երկու ակնարկներն ալ փոխադարձաբար նոյն բողոքն ու նոյն սրտնեղութիւնը կ'արտայայտէին: Բժիշկը կամաց մը ըսաւ.

— Խօսակցելու պատիւին չարժանացանք. ուրեմն պտտինք:

Նէտրէթ, անոր սաստիկ զայրացած ըլլալը կռահած էր. միւսներէն հեռանալու անհրաժեշտութիւնը ինքն ալ գնահատած ըլլալով, տարօրինակ հոգեկան կացութեան մը մէջ պատասխանեց.

— Պտտի՛նք, էֆէնտիմ... .

Նիհատի՝ այս անախորժ շփացածութիւններուն՝ ակամայ և ստրկօրէն ենթարկուած ըլլալը իր սիրտը նեղ էր... Մէկէն ի մէկ բժիշկին հարցուց.

— Նիհալ հանրմը, ի՛նչ պատճառով այս անհանդուրժելի կենցաղին կը տուկայ... իր տալովէն առանձին ապրիլը կարելի չէ՞ միթէ:

— Ո՛չ. որովհետեւ Մուսալլայի հայրը ծաղկատի կնոջ մը հետ ամուսնացած ըլլալուն, աղջկան հետ համերաշխ չեն. իսկ այդ մարդն ալ, ճիշդ աղջկան պէս, հաճոյամուլ մըն է և անփոյթ՝ իր զաւակներուն հանդէպ:

— Ծա՛տ վատ... դժբա՛խ աղջիկ... .

— Ո՛չ... վստահ եղէք, Մուսալլան բնաւ չազդուիր ատկէ. ընդհակառակը, հօրը իշխանութենէն անկախ ու ազատ ապրելու երջանկութեանը տիրացած կը զգայ ինքզինքը և այս պատճառով շատ ուրախ գուտրթ է:

Նէտրէթ՝ թեթեւակի խնդալով յարեց.

— Արդիական մտայնութիւն մը... .

Նիհալ, որ միջոց մը անոնց ետեւէն կը նայէր, եղբօրը դառնալով ըսաւ.

— Հայրս նեղուեցաւ... Նիհալին ձեզ այդքան զբաղեցնելը անպատշաճ էր կարծեմ... .

Փաստաբանը չպատասխանեց... Մուսալլայի և հօրը միջեւ գտնուած անջրպետն ու հակառակութիւնը իր երջանկութեանն ու ապագային համար մեծ սպառնալիքներ կը կազմէին:

Մուսալլա, ըմբոստ ձեւով մը ըսաւ.

— Ամա՛ն... Նիհատ պէյ, ձեր հայրը ո՛րքան հաճոյք կը զգայ այս պաղապուր, գոռոզ աղջիկէն... չէք գիտեր թէ քանի մը օրէ է վեր ինչե՛ր քաշեցի... մեր զաղափարները՝ բոլորովին ներհակ, խօսքերնիս՝

տարբեր... որովհետեւ պղտիկ հանըմը աղգային ի-
տէալներ ունի եղեր... Ի՛նչ հակասութիւն, Աստուած
իմ, ի՛նչ հակասութիւն...

Նիհալ միջամտելով.

— Կ'աղաչեմ, Մուալլա, կը բաւէ՛ այլեւս. այս
աղջկան հետ մի իյնար. թերեւս ան քեզի չափ զար-
դարուն ու վայելուչ սալօնի մը աղջիկը չկրնայ ըլ-
լալ, սակայն, յամենայն դէպս, լաւ տանտիկին մը և
գորովագութ մայր մը կրնայ ըլլալ... : Ասոնք ալ
կնոջ մը մեծագոյն նկարագիրն ու առանձնաչնոր-
հումը չե՞ն կազմեր միթէ... :

— Արդէն հոս գալէն ի վեր, ձեր գաղափարներն
ու տեսութիւններն ալ փոխուած են... ամէնքդ ալ
Նէտրէթին պաշտպան դարձած էք... Յետոյ խօսքը
Նիհատին ուղղելով հարցուց.

— Այս մասին ձեր կարծիքը ի՞նչ է... :

Փաստաբանին աչքերը հոգեկան յափշտակութիւն
մը կը ճառագայթէին, երբ մեղմօրէն Մուալլայի ըսաւ.

— Ամէն օր, յարաճուն ուժով մը իմ սրտիս իշ-
խող հրեշտակ մըն օս դուն:

Նիհալ նոյն միջոցին, առջեւէն դանդաղօրէն քա-
լող հայրն ու Նէտրէթը ձայնելով.

— Կը խնդրեմ, կ'ըսէր, անոնց մօտը երթանք...

— Հոգի՛ս, անոնք միեւնոյն տխուր յիշատակներ
ըուն կապուած են... երկուքին ալ սգաւոր, վշտոտ
մտածումներուն մէջ, մշտապէս, մեռած կնոջ մը
ուրուականը կ'ապրի... անոնք ի՛նչ պէտք ունին
մեզի, պատասխանեց փաստաբանը:

Մուալլան խօսքի խառնուելով, քիչ մը հեզնոտ.

— Խե՛ղճ բժիշկ, ըսաւ. աս ի՛նչ չհինցող սէր է,
որուն գերին եղած է... այնպէս չէ՞, Նիհատ պէյ...
հապա ձեր մայրը... ըստ իս, ա՛ն է աւելի կարեկ-
ցութեան արժանի... խե՛ղճ կին... :

Մուալլայի այս անպատշաճ խօսքերէն սաստիկ
ջղայնացած Նիհալը, ծանր ու լրջօրէն ըսաւ.

— Կ'աղաչեմ, փակեցէք այս նիւթը. որովհետեւ
հօրս չափ ես ալ անցեալին յարգանք ունիմ, հետե-
ւաբար ուրիշներէն ալ նոյն յարգանքը կը սպասեմ:

Մուալլան շրթունքը խածաւ, որովհետեւ հար-
սին այս աստիճան լուրջ ու ազդուած վիճակը տե-
սած չէր: Նոյն միջոցին, Նիհատ հօրը մօտեցած էր.
Նէտրէթ՝ իր ձայնի թրթռուն նրբութեամբ բաներ՝ մը
կը բացատրէր ու Նէժատն ալ ժպտուն՝ մտիկ կ'ընէր.
Նիհատի մօտենալուն վրայ, աղջիկը՝ առ ի քաղաքա-
վարութիւն, լռած ու իր թուխ աչքերը փաստաբա-
նին վրայ սեւեռած էր. այս խորաթափանց ակնարկ-
ներովը ըսել կ'ուզէր. «Ահաւասիկ, ես ձեր հայրը կը
զբաղեցնեմ. գուք ինչո՞ւ հեռացաք անոր մօտէն»:

Նիհատ մէկ երկու վայրկեան աշխատած էր այս
զննող նայուածքին մեկնութիւնը ըմբռնելու համար,
սակայն Նէտրէթ անփոյթ և հպարտօրէն իր գլուխը
դարձուցած էր, մինչ երիտասարդը, իրեն այսչափ
քիչ կարեւորութիւն տուող այս աղջկան դիմաց ան-
բացատրելի անկարողութեան մը մատնուած էր:

Նէժատ՝ տղուն գառնալով ըսաւ.

— Այլեւս խօսքին կարգը մեզի եկաւ. հիմա
կրնանք տեսնուիլ, չէ՞:

Փաստաբանը այս խօսքէն նեղուած և առանց
փոխադարձելու կեցաւ: Յետոյ, զսպուած զայրոյթի
մը ջղայնոտութեամբ.

— Քեռայրէս նամակ մը ստացայ, ըսաւ. վճռա-
կանօրէն Նիհալը կ'ուզէ. սակայն տակաւին քրոջս
բան մը չըսի. ձեր կարծիքը առնել կ'ուզեմ...

Այս խօսքը մեծ ազդեցութիւն գործեց Նէժատի
վրայ: Յետոյ յարեց.

— Իմ կարծիքս, Նիհալի երջանկութիւնն ու փա-

փաքն է. ամուսնոյն հրաւերին ենթարկուելու իլաւա-
ւասութիւնը միշտ իրեն կը պատկանի. այսուհանդերձ
իմ հանգիստիս համար անոր յանձն առած զոհողու-
թիւնները այլեւս կը բաւեն, չէ՞... ես՝ անոր ապա-
հովութեանը համար, կեանքի ամէն տեսակ տառա-
պանքներուն կրնամ ենթարկուիլ... պէտք է որ ը-
սածներս հիմա տեղեկացնես քրոջդ:

Նէտրէթ ողբազին շեշտով մը միջամտեց.

— Որքան շուտ մոռցաք զիս. ինչո՞ւ համար
չէք յիշեր թէ Նիհալ հանրմի մեկնումէն յետոյ որք ու
անպաշտպան աղջիկ մըն ալ կայ որ անսահման երախ-
տապարտութեամբ ու սէրով մը ձեզի կապուած է ու
իր կեանքը միմիայն ձեր հանգիստին կը յատկացնէ.
Ինչո՞ւ չէք մտածեր թէ իմ անտէր կեանքիս միակ
յենարանը դուք էք...

Բժիշկը, մէկ ձեռքը գաւազանին, իսկ միւսը
տղուն թեւին կրծնցուց. իր սրտի արիւնահոս վէրքը
ուժգնօրէն կը կոտտար... Դեփ գեղին կտրած՝ Նէտ-
րէթին նայեցաւ, գլուխը երերցուց ու խոր հառա-
չանք մը արձակեց:

Նոյն միջոցին, Նիհալն ու Մուալլան մօտեցած
էին. Նիհատ զրպանէն տոմսակ մը հանելով Նիհալին
երկնցուց, ըսելով.

— Կը ներես, Նիհալ, մոռցայ քիչ առաջ յանձ-
նելու. քեռայրէս ստացայ:

Երիտասարդ կինը տոմսը կարգաց, գունաթափ
ու ակամայ հօրը նայեցաւ... Բժիշկի գուրգուրոտ,
փաղաքըղ նայուածքը իր աղջկայ հոգին կը փայփա-
յէր... Նիհալ կամաց մը.

— Ձիւ կը կանչէ, արգեսք հիւսօնդ է, ըսաւ:

Նէժատ, անմիջապէս.

— Ինչ որ ալ ըլլայ, աղջիկս, անմիջապէս պէտք
է որ մեկնիս... այսքան ատեն ամուսինդ առանձին

ձգելու անիրաւութեանը զիս ալ մասնակից ընելդ
այլեւս կը բաւէ, չէ՞...

Մուալլան եւս խօսքի խառնուելով.

— Աստուած վկայ շիտակ է, հարս... ա՛լ բոլո-
րովին զանց ըրիք եղբայրս:

Նիհալ ազդուած գլուխը շարժեց.

— Ամուսնոյս սէրը զանց ընելու աստիճան հա-
ճոյամու կին մը չըլլալս գիտէք կարծեմ... հայրս
առանձին չձգելու մտածումս է միայն որ զիս դժուա-
րութեան կը մատնէ...:

Բժիշկին ակնոցներուն տակէն արցունքներ կը
գողգղային:

— Նիհա՛լ, գնա աղջիկս... ասիկա հայրական
ամբողջ իրաւունքովս կ'ըսեմ... ինձի հանդէպ ցոյց
տուած սէրդ որդիական պարտականութենէն շատ գե-
րազանց է. դո՛ւն, քու ամբողջ գոյութիւնովդ, իմ
այս խորտակուած կեանքը, իմ անդամալոյծ հոգին
նորոգելու ջանացիր ու մինչեւ հիմա զիս ապրեցու-
ցիր. ա՛լ կը բաւէ, զաւա՛կս, կը բաւէ...:

Նոյն պահուն Նիհալի աչքերը Նէտրէթին ուղ-
ղուած էին. երիտասարդ կինը հօրը ըսելիքը շարու-
նակել ու աւարտել ուզեց:

— Նէտրէթ, ըսաւ, ասկէ վերջ ա՛լ դուն պիտի
ապրեցնես իմ հայրս...:

* * *

Իրիկունը, սեղանը նոյն մեծ եղեւինիին տակը
շտկուած էր: Նէժատ երջանիկ կ'երեւար. Նիհալի
սիրտը հանգիստ էր. Նէտրէթն ալ երջանկութեանը
մասնակցելով կը խնդար, կը խօսէր, հիւրերը պատ-
ուասիրելու մէջ, երիտասարդ ու աշխոյժ տանօր-
րուհիի մը պարտականութիւնը կը կատարէր շատ

յաջողապէս... : Սակայն Նիհատ ընկճուած երեւոյթ մը ունէր. աչքերը տխրութիւնով մը համակուած էին... Մուսլլան յարափոփոխ էր. մերթ քրքջալիբ կը խնդար, մերթ լուռ կը նստէր: Նէժատ անոր բոլոր բաղձանքները կ'ոչնչացնէր. Նիհատ, հորը՝ այս աղջկայ մասին ունեցած զգացումները գիտէր և քնելիքը շուարած ու դժուար կացութեան մը մէջ, կը մտածէր... : Մինչդեռ Մուսլլան այսպիսի մտածումներէն հեռու էր. ան գիտէր Նիհատի իրմով տարուած ըլլալը, սակայն և այնպէս ասիկա իրեն համար անկարեւոր էր. այս մասին անփոյթ ու ինքնագոհ էր քանի որ վստահ էր թէ ինչպէս որ այսօր Նիհատէն կը սիրուի նոյնպէս վաղը կրնայ ուրիշ մը հրապուրել: Սիրելու, մտածելու, տառապելու զգացումները տեղ չունէին անոր ուղեղին մէջ... քանի որ գեղեցիկ էր, Նիհատի պէս ամէն ոք կրնար զինքը սիրել. մանաւանդ որ եւրոպական կեանքի մը հեռապատկերն ալ կար հիմա. զուարթ ու անհոգ, ապագայ կեանքը կ'երազէր... : Իր արգուզարդի ճոխութիւնը, իր զուարթութիւնը ո՛վ գիտէ որքան սրտերու վրայ պիտի իշխէին... այսպէ՛ս պիտի ապրէր:

* * *

Լուսինը, բարձր լեռան մը հեռաւոր մէկ թաքըստօցէն ելած՝ կեանքի նոր ցանկութիւններ կ'արթնցընէր. դաշտերու ու անտառներու յետամնաց ստուերները հոսուն լուսով մը կը ողողէր: Ագարակի հիւրերը, ճաշէն յետոյ, լուսաւորուած ճամբաներու վրայ, դանդաղօրէն կը շրջագայէին: Նէժատ տղուն թեւը մտած էր, երկուքն ալ շատ մտազբազ էին... Նիհալ, գլխու ցաւին պատճառով, ներողութիւն խնդրած ու ներս գացած էր, Նէտրէթն ու Մուսլլան իրեն ընկերացած էին: Փաստաբանը հորը հետ այս

առանձնութիւնը բարեպատեհ նկատելով ուրախացած էր, որովհետեւ անոր հետ այս գիշեր կ'ուզէր մասնաւոր ու վճռական տեսակցութիւն մը ունենալ:

Երկուքն ալ, դաշտին հանդիպակաց բլրակի մը ստորոտը նստան. ասկէ, յորդուն գետակին խօսուջը աւելի մօտէն կը լսուէր... այս գաղջ գիշերուան արբեցնող օդին մէջ լեռները, անտառները կը քնանային... :

Նէժատ ծառի մը կրթնած սիկարը կը ծխէր, մինչ Նիհատ խնդալով մը կ'ըսէր.

— Հանըմները մեզմէ փախան...

— Նիհալ գլուխի ցաւ ունէր, խեղճ աղջիկ, ամուսնոյն համար կը տանջուի...

— Այո՛...

— Սակայն ասոր պատասխանուն դո՛ւն ես:

— Ե՛ս:

— Այո՛... եթէ մինչեւ հիմա յարմար կնոջ մը հետ ամուսնացած ըլլայիր, այսօր այդ կինը Նիհալի բացակայութիւնը զգացնել չէր տար. մինչդեռ դուն այս ուղղութեամբ շատ անփոյթ կը գտնուիս...

— Այո՛, իրաւունք ունիք, չտեսած ու չսիրած աղջկայ մը հետ կենակցիլս անկարելի է... այսուհանգերձ, անոր դարմանումը կարելի է, կարծեմ, այնպէս չէ՞:

— Բնականաբար...

— . . .

Նէժատ, իր տղուն ըսելիք վերջին բառին սպասելով, անոր երեսը կը նայէր. բայց փաստաբանը կը լռէր: Անօրինակ անհամբերութեան մը մէջ գտնուող բժիշկը զսպուած ձայնով մը ըսաւ.

— Դուն մտային տառապանք մը ունիս, Նիհատ...

Երիտասարդը առաջքը նայելով, յարեց.

— Թերեւս այո՛, թերեւս ո՛չ... սակայն և այնպէս, ձեր ցանկութեան հակառակ ընթացքի մը մէջ պիտի գտնուիմ. ասոր համար մեծ ցաւ կը զգամ...

— Չարման սի՛ր բան... ձեր այս ընթացքին պատճառը ի՞նչ է... եթէ որոշում մը ունիք, ինչո՞ւ մինչեւ հիմա ինձմէ ծածկեցիք, ասոր ի՞նչ պէտք կար:

— Չծածկեցի ու չպիտի ծածկեմ... մինակ թէ անկէ գոհ չպիտի մնաք, կը կարծեմ... Թերեւս քիչ մը...

Վշտաբեւ: ու տառապած բժիշկը գլուխը շարժելով ըսաւ.

— Հասկցայ, սիրելիս, հասկցայ, կը բաւէ. ալ այս մասին ո՛չ բան մը հարցուցէք և ոչ ալ խօսեցէք... որովհետեւ ձեր ընտրութեանը դէմ ըսելիք բառ մը անգամ չունիմ... մինակ թէ զատուինք... այսքան:

— Չատուինք...

— Այո՛:

— Բայց ինչո՞ւ այդքան կը զզուիք Մուսլլայէն. գիտնայիք թէ ան որքան կը սիրէ ձեզ...

— Շնորհակալ եմ. զգացումներ կան, որոնք առանց մեր գիտակցութեան ինքնաբերաբար մեր սրտերուն մէջ կը տեղաւորուին...: Ես Մուսլլա հանրմի մասին բնաւ գէշ կարծիք մը չունիմ. սակայն անոր ներկայութենէն կը նեղուիմ. կրնաք ինձմէ հեռու ապրիլ, գաւազս:

— Չէ՞ք մտածեր թէ ձեզմէ հեռու ապրիլս որքան վիշտ կրնայ պատճառել ինձի. դուք պէտք չէ՞ր որ սիրոյ հանդէպ կարեկից ըլլայիք. տարիներէ ի վեր ձեր գոյութիւնը ճգմող քայքայիչ սիրոյ մը տառապանքներու ու վիշտերու մէջ հեծեցիք... նոյն իսկ

այսօր, հոս, նոյն հին սիրոյ յիշատակները վերակենդանացնելու ձեր ջանքերուն մէջ...

Բժիշկը հեծեծազին շեշտով մը.

— Լռէ՛... լռէ՛, ըսաւ. իմ թանկագին ու նուիրական յիշատակներս մէկ երկու օրուան քու սիրոյդ հետ մի բաղդատեր... այն, որուն սէր անունը կուտաս, զարդէ մը, զքօսանքէ մը, փոքր վրիպումէ մը տարբեր բան մը չէ. դուն շատ կը խաբուիս, ասիկա վերջը պիտի հասկնաս...:

Փաստաբանը ուժգնօրէն ցնցեց գլուխը. իսկ Նէժատ՝ թախծադէմ, վշտահար ու լուռ՝ առաջքը կը նայէր:

* * *

Նիհալ ներս մտնելուն պէս, անկողնի վրայ երկընցած էր. Նէտրէթն ու Մուսլլան թէրասին վրայ քիչ մը պտտեցան. քսան վայրկեանի չափ երկուքէն ոչ մէկը բառ մը արտասանած էր: Նէտրէթ երեւակայութիւններով տարուած էր... այս գիշեր, անոր հոգին խոր մտածումներու պէտք ունէր... բայց որո՞ւ, ի՞նչ բանի մասին պիտի մտածէր. ինքն ալ չէր գիտեր. ագարակ գալէն ի վեր, շրջապատը, այս գիշերուան չափ զեղեցիկ տեսած չէր. պատճառը անհասկնալի էր իրեն, ու ինքն ալ կը զարմանար. բոլոր լեռները նուրբ, կապոյտ շղարշով մը ծածկուած էին. գիշերուան խոր աղջամուղջին մէջէն՝ սիրերգութեան մը մեղմ ձայնը կը թրթռար. գետը աւելի վազուն յուզումով մը կը կարկաչէր. ծառերը՝ ցանկութեան քաղցր երազներով օրօրուելով, կը քնանային:

Մուսլլա, ակամայ ըսաւ.

— Ի՞նչ գեղեցիկ գիշեր...

— Այո՛, համակ բանաստեղծութիւն...

Թարմատի աղջիկը խնդաց.

— Սէրը մոռցաք... եթէ համակ սէր ըսէիք աւելի յարմար կ'ըլլար, չէ՞:

— Ան ալ գուք աւելցուցէք, այն ատեն համակ բանաստեղծութիւն ու սէր կ'ըլլայ...

Երկուքն ալ խնդացին: Մուսալլա զուարթ շեշտով մը հարցուց.

— Հիմա, սա վայրկեանին, ի՞նչ կ'ուզէք. ըսէք տեսնեմ:

— Ե՞ս... ի՞նչ կրնամ ուզել:

— Ա՛հ... այս խօսքը ձեր հոգիէն չի բխիր... երիտասարդ սիրտ մը ուզելիք բան մը չունե՞նար:

— Կրնայ չունենալ...

— Երեւակայութի՞ւն ալ չունենար...

— Ո՞վ գիտէ...

— Օրինակ, հին դղեակները յիշեցնող այս ազարակին մէջ առասպելական սիրային կեանք մը ապրիլը ցանկալի չէ՞, ըսէք:

— Այնպիսի հերոս ու հաւատարիմ սիրահարները ո՛ւր կը գտնենք...

Մուսալլա քրքջալիւր խնդաց.

— Կը կարծես թէ դժուա՞ր է գտնելը... քանի՞ հատ կ'ուզէք...

— Իրա՞ւ... այդքան հե՛շտ է գտնելը, սիրելը այդքան դիւրի՞ն բան է...

— Չորս հինգ օրուան մէջ...

— Յանուն Աստուծոյ, լռեցէք, կ'ազաչեմ, զիս կը սոսկացնէք...

— Ա՛հ... այս տեսակէտով որքա՛ն անփորձ էք եղեր, նէտրէթ հանրմ...

— Այո՛... ի՞նչ կ'ուզէք ըսէք, ես սէրը տարբեր կերպով կ'ըմբռնեմ:

— Սարսափազդո՞ւ կը գտնէք...

— Գիտեմ թէ սէրը ճիւղալ մը չէ, սակայն, կըրնամ երեւակայել որ սրտի վրայ քայքայիչ ազդեցութիւն մը կ'ունենայ և ասոր հետ մէկտեղ անհատականութեան ու նկարագրի, աւելի ճիշդ զգացումներու տարուբերութեանց համաձայն, զանազան ձեւերով կը յայտնուի. օրինակ, կրնաք մէկը սիրել քանի մը օր, ուրիշ մը գտնելնուդ պէս՝ կրնաք նախորդը մոռնալու մէջ դժուարութիւն չքաշել, ուրիշ մէկն ալ կը սիրեմ կարծելով մեծ սիրոյ մը հերոսուհին կը համարէք ինքզինքնիդ և այս կերպով կ'աշխատիք ինքզինքնիդ ինչպէս նաև դիմացինը խաբել. կրնաք յաջողիլ ալ: Լստ իս, այս խարդախ խաղին մէջ խաբուող կողմը շատ դժբախտ կ'ըլլայ: Ես՝ կ'ենթադրեմ թէ՛ վսեմ զգացումներով տոգորուած սիրոյ մը առթած տառապանքներն ու վիշտերը մեծ հաճոյք կը պատճառեն... այսուհանդերձ, ցարդ ոչ մէկը սիրած եմ, և եթէ սիրեմ ալ, կը խորհիմ թէ այս զգացումներովս շատ պիտի տառապիմ... :

Մուսալլան քրքիջ մը եւս արծակեց և ըսաւ.

— Ի՞նչ այլանդակ մտայնութիւն. այս ուղղութեամբ գնահատելի և շնորհաւորելի էք... սակայն ձեր այս զգացումները ուրիշներու, աւելի ճիշդ այդ մարդոց արտայայտելու զգուշացէք:

— Ինչո՞ւ համար:

— Կը խնդան վրանիդ...

— Կը ցաւիմ... իմ խօսքս նկարագրով ինկածներու մասին չէ. նոյն իսկ այսպիսիները պէտք է բարձրացնել ջանանք... : Ինչո՞ւ համար այդպէս կը խորհիք:

— Ո՛ւՖ... կ'ազաչեմ, այլեւս ձգենք այս խօսքերը, որովհետեւ մեր գաղափարները շա՛տ հեռու են իրարմէ... : Օ՛ն ուրեմն, քիչ մը պտտինք. ար-

դեօք ո՛ւր են բժիշկն ու Նիհատը, գտնենք զիրենք, չըլլա՛ր:

Երկուքն ալ թէրասէն իջնելով սկսան դանդաղօրէն յառաջանալ: Վէյսէլ էֆէնտին նստած էր դուռին առջեւ:

Լուռ ու հանդարտ կը քալէին... երկուքն ալ մտախոհ վիճակ մը ունէին. պզտիկ ծառերէ կազմուած ցանկապատի մը ետեւէն դառնալով՝ յանկարծ այնքան մօտեցած էին որ որոշակի կը լսէին բժիշկին և Նիհատին խօսքերը: Նէտրէթ՝ Մուալլան քաշելով, կամաց մը ըսաւ.

— Դառնանք, կ'երեւի թէ մասնաւոր խօսակցութիւն մը ունին. ամօթ է, անհանգիստ չընենք:

Մուալլան ուսերը տնկելով.

— Վայրկեան մը սպասեցէք. Նիհատ սաստիկ զայրացած է. բան մը կայ... կեցի՛ր կեցի՛ր, տե՛ս ի՛նչ կ'ըսէ... մտիկ ընենք... կ'աղաչեմ, քիչ մը սպասէ:

Նէժատ խեղդուկ հեծեծանքի նմանող կերկեր ձայնով մը կ'ըսէր.

— Կը հասկնամ, լըր անցեալի մեծ մեղք մը կ'ընդունիս այս խեղճ սէրը ու զայն միշտ երեսիս տալով կը սպառնաս: Վերջապէս, եթէ Նէտրէթը իրազեկ ըլլայ անցեալին, ինծի հանդէպ իր տածած սէրն ու յարգանքը պիտի անհետանան, որով ես ծայրայեղ յուսահատութեան մը պիտի մատնուիմ: Դո՛ւն, այս բաները լաւ գիտնալով կ'ուզես այս կերպով ինձմէ վրէժ լուծել, կը հասկնամ: Ի՛նչ առաջ, ըսի քեզի թէ հակառակ իմ բաղձանքներուն ու ենթադրութեանց, քու կառուցած երջանկութեան շէնքը փլցնելու գաղափարը չունիմ... ըրէ՛, ինչ որ կ'ուզես, մինակ թէ ինծի բան մը մի՛ ըսեր. ահա ա՛յսքան:

Նիհատի ճնշուած ձայնը քարձրացաւ.

— Խեղճ աղջկայ մը Կանդէպ այս աստիճան ատելութեանդ պատճառը ի՛նչ է... մի կարծէք թէ ձեր միտքը չեմ հասկնար...: Նէտրէթ՝ ձեր սիրած կնոջը աղջիկը ըլլալուն պատճառով, նախապատուութեան իրաւունքը անոր ընծայելնիդ շատ բնական է. սակայն ինչո՞ւ չէք մտածեր թէ անիրաւութիւն մըն է ասիկա. ի՛նչ պատճառով ձեր սրտին մէջ Մուալլայի համար ալ քիչ մը տեղ չէք յատկացներ... իմ իրաւունքս չէ՞ ասիկա: Եթէ, դուք ձեր զայրոյթովը զիս ձեր բաղձանքներուն ենթարկուած տեսնել և Նէտրէթի հետ ամուսնութիւնս պարտադրել կ'ուզէք, յաւիտենապէս ձեզի «ո՛չ, ո՛չ» պատասխանը պիտի տամ... որովհետեւ անցեալի այն աղիտալի օրերուն պատճառը եղող կնոջ մը աղջկան հետ ապրիլս, մօրս հոգին պիտի վրդովէ և մրեւնոյն ատեն իմ ալ զըժբախտութեանս պատճառը պիտի ըլլայ...: Այս մասին երբե՛ք մի խօսիք ինծի... կը վախնամ որ ձեզ բոլորովին կը վշտացնեմ...:

Վշտահար Նէժատը հեծկտուքներով խեղդուող ձայնով մը յարեց.

— Հաւանաբար, չես հասկնար թէ այս խօսքերդ ո՛րչափ կը վիրաւորեն զիս... այո՛, Ֆիքրէթի կեանքի յիշատակը եղող այս փոքրիկը, ինծի համար շատ թանկագին աւանդ մըն է. ասիկա չեմ ուրանար...: Իմ կեանքի խաւար ճամբաներու վրայ երջանկութեան լոյս ցանող, իմ դառնագոյն օրերուս՝ յոյսով ու մխիթարութիւնով հոգիիս վիշտերը փարատել ջանացող խեղճ աղջկայ մը հանդէպ սնուցած վրէժիդ ու ատելութեանդ համար, օր մը պիտի զղջաս...: Սակայն Նիհատ, այս գիշերը մի մոռնար. պատուոյս վրայ քեզի խօսք կուտամ որ, յետայսու, որեւէ կերպով այլեւս Նէտրէթի մասին չպիտի խօսիմ:

հապա . . . ի՞նչ քը ի՛նչ էր. «այն կնոջ աղջիկը . . .» մօրը սիրարկածին արգիւնքը զգուելի աղտոտութիւնով արատաւորուած մէկը . . .

Նէտրէթ, այս մտածումներու առթած սոսկու- մովը բռունցքը սեղմած .

— Աստուած իմ . . . Աստուած իմ . . . կ'ըսէր :

Այս վայրկեանիս, ճշմարտութեանը տեղեկանա- լու անկարելիութենէն յառաջացած կատարի ու քմ- բոստ զգացումներովը կը տանջուէր և յաւիտենապէս մութին մնացած խոր անյայտութեանը իր սրտին դո- հացում տալիք ամենափոքր նշանի մը անգամ անհետ ըլլալը, բոլոր գաղտնիքներու ու մեղքերու . . . այս սև նոճիներու ստուերներուն տակ, յաւիտենական մոռացումի դատապարտուած հողակոյտին հետ փճա- ցումի մասին կը մտածէր . . .

Այս մասին, Նէթատին ընելիք ու է հարցում անպատասխան պիտի մնար, հետեւաբար հասկնալ ուզած գաղտնիքն ալ՝ ծածուկ, անթափանց :

Մէկէն ոտքի ցատքեց, վանդակափեղկերու մէջէն մազուուղ լուսնի լոյսը, այս ընդարձակ սենեակի մերկ յատակին վրայ լուսաւոր գծագրութիւն մը կ'ընէր. ձեռքերովը գանկը սեղմած՝ սկսաւ պտտիլ. ամէն մէկ մութ անկիւնէն, շատ քը անտեսանելի ուրուական- ներ, կարծես թէ իր վրայ կը յարձակէին, սոսկումէն կը դողար. ուրուականները մասնաւոր ձեւ ու մար- մին կ'առնէին, շեշտակի իրեն կը նայէին, ասոնց մէջէն, նուրբ ու տժգոյն մէկը իր խոռոչացած աչ- քերուն մէջ, զայրոյթի ճառագայթ մը փայլատակե- լով գլուխը կը ճօճէր : Այս պահուն, Նէտրէթ, իր ինքնութիւնը կորսնցուցած, սրտակեղեք ճիչով մը «մայրիկս» . . . պոռացած էր. յետոյ գէպի պատու- հանը վազելով վանդակափեղկը բացած ու սենեակի սեւ օդը լուսնի տմոյն նշոյլներովը ողողուած էր . . . :

Յոգնած գլուխը պատուհանին կրթնցուցած կը դիտէր. Մուսլլան ու Նիհատը պարտէզը կը պտտէին. Նիհատին գլուխը դեռատի աղջկան գէմքին դպելու աստիճան մօտ էր : Այս տեսարանին հանդէպ Նէտ- րէթ ակամայ շարժումով մը, մէկ ձեռքով կուրծքը սեղմեց, կարծես թէ մայր երակը կը պայթէր. յետոյ վանդակափեղկը գոցեց ու անկողնին վրայ փռուե- ցաւ :

Այս դատարկ սենեակին պատերը, մանկամարդ աղջկայ մը վիշտի առաջին հեծեծանքները, իրենց գաղտնապահ ծոցին մէջ պահեցին :

* * *

Բժիշկը, առաւօտուն ուշադրութեամբ անոր ե- րեսը նայած միջոցին, անքուն անցուած գիշերուան ամբողջ խոնջէնքն ու տառապանքը նշմարած էր այդ գեղեցիկ գէմքին վրայ : Խեղճ մարդ, առանց հարց ու փորձի համարձակելու, միայն հեռուէն զննելով բաւականացած էր :

Հիւրերը, յաջորդ օրը մեկնելու որոշում տուին : Նէտրէթ, հակառակ իր կրած տպաւորութիւններուն, Նէթատէն բաժնուելուն պատճառով, խոր վիշտ մը կը զգար : Իր հօրը անկարեկիր մրցակիցը, անցեալի մեծազոյն մեղաւորը ըլլալուն համոզուած ըլլալով մէկտեղ, այս մարդը շատ սիրած էր. իր գոյութիւնը շրջապատող անոր գուրգուրոտ ու գորովալից նայ- ուածքներուն տակ, իր մենութեան վիշտը մոռցած էր. ան ալ տառապալից, ցաւակոծ ու անքուն գիշեր մը անցուցած էր. Նէտրէթ, առաջին իսկ ակնարկով նկատած էր. մէկ գիշերուան մէջ, անոր ինկած ու աւելի ծերացած ըլլալը զգալի էր . . . : Նիհատի վրայ ալ նոյն գունաթափութիւնն ու վիշտի հետքերը կը նշմարուէին :

Մուսալլան միայն անփոյթ էր ու զուարթ. յաջորդ օր Պոլլիս վերադառնալու որոշումը և աւելի վերջ Եւրոպա կատարելիք ուղեւորութեան երեւակայութիւնը զինովցուցած էին զինքը:

Նէտրէթն ալ, իր ներքին վիշտը ուրիշներու չզգացնելու ջանքով մը, զուարթ կ'երեւար այսօր...

Այս առաւօտ հօրը շատ ընկճուած, շատ յուսահատ վիճակը Նիհալի ուշադրութիւնը գրաւած ըլլալով, առանց վախը ծածկել ջանալու Նէտրէթին ըսած էր:

— Կը տեսնէ՞ք... հայրս գրեթէ հիւանդ է...

Մինչդեռ անոր այս վիճակը իր աղջիկէն առաջ տեսած, ան իր սրտի ամենագորովագութ զգացումներովը անոր կարեկցած և նոյն իսկ իր հօրը կողմէ, անցեալի անոր բոլոր մեղքերը ներելու վիճակի մը հասած էր: Իր խորաթափանց ակնարկները անոր վրայ կեղծոնացուցած՝ անոր բոլոր շարժումներն ու խօսքերը վերլուծել կը ջանար ու ասոնց մէջ, անցեալէն մնացած ամենափոքր բիծ մը գանազանել կ'աշխատէր: Սակայն... հակառակ այս բոլորին, իր խիղճէն բարձրացող ապահովիչ ձայն մը կը հաստատէր թէ անոնց սիրոյն մէջ, միշտ բանաստեղծական վստմութիւն մը, ցանկութեան անբժութիւն մը գտնուած էր. իր ուղեղը կրժող այս ցաւին հանդէպ այս ձայնը համբերութիւն ու խաղաղութիւն ներշնչող մխիթարութիւն մը կ'ըլլար իրեն:

Նիհատի ու Մուսալլայի միջեւ այսօր զգալի պաղութիւն մը կար. փաստաբանը այս առտու աւելի փափկանկատ կը վարուէր Նէտրէթի հետ. զէպի ջրաղաց կատարուած պտոյտի մը միջոցին, Նէտրէթի հովանոցը կրած, անոր քովէն քալած, հետը խօսած ու միշտ անով զբաղած էր. սակայն, այս ընթացքը անհանդուրժելի ստորնացումի մը կսկիծովը կը ճգմէր Նէտրէթի սիրտը: Մուսալլան, մրցակցութեան մը

զգացումով գրգռելու նպատակով իրեն շուսուած այս շնորհաբաշխութիւնը կ'ընդունէր իբր ողորմութիւն. հետեւաբար միջոց մը բաժնուելով Մուսալլայի մօտեցած ու հարցուցած էր.

— Ինչո՞ւ այդպէս անտարբեր կը կենաք... Նիհատ պէյին հետ քէնոտա՞ծ էք:

Մուսալլա ուսերը ցնցելով.

— Խե՛նթ... ըսած էր:

— Խե՞նթ...

— Այո՛, խենթ. եղբօրս, աւելի ճիշդ Եւրոպա երթալու առաջադրութեանս ծայր աստիճան հակառակ է: Այս գիշեր, առաջին անգամ ըլլալով, ամուսնութիւն առաջարկեց ինձի, և տարօրինակը այն է որ, ասոր ժամ առաջ գործադրութիւնը կը փափաքի. կարելի՞ է միթէ, էֆէնտիմ:

Նէտրէթ՝ հոգեկան անբացատրելի կացութեան մը մէջ կ'ըսէր.

— Շա՛տ լաւ... որքա՛ն յարմար... Ինչո՞ւ համար կը մերժէք...

— Չեմ մերժեր. տարուան մը արտօնութիւն կ'ուզեմ. այս գիշեր, գրեթէ մինչեւ առաւօտ լուսնի լոյսով պտտեցանք. կարելի չեղաւ զինքը համոզել. ես ալ իմ որոշմանս վրայ պնդեցի: Չեմ գիտեր, սիրոյ այս աստիճան ուժգնութիւնը մարդը տառապեցնելէ զատ, բանի մըն ալ չձառայեր եղեր...

Նոյն միջոցին, Նիհատ մօտեցած էր իրենց ու խօսքը Նէտրէթին ուղղելով ըսաւ.

— Մեզմէ բոլորովին զատուեցաք. շատ կարեւոր նիւթի մը մասին կը խօսակցիք, կարծեմ:

Նէտրէթ զուարթութիւն կեղծելով.

— Մուսալլա հանըմը մտիկ կ'ընէի... շատ ուրախացուցիչ լուրեր կը հաղորդէր ինձի... չեմ գիտեր թէ կը թոյլատրէք որ ձեզ շնորհաւորեմ:

Փաստաբանը քիչ մը կարմրած ու ազդուած պատասխանեց.

— Եթէ Մուսլլան ալ ձեր իտէալներուն մասնակից եղած ըլլար, որքան երջանիկ պիտի ըլլայի ես: Նէտրէթի շրթունքներուն վրայ թեթեւ ժպիտ մը կը թափառէր, ինչ որ քիչ մը հեզնանքի իմաստն ունէր:

Մուսլլա՛ քիչ մը ջղայնոտած ըսաւ.

— Ո՛ւՖ, Նիհա՛տ, այս նիւթը փակենք այլեւս: Իսկ փաստաբանը գոչեց.

— Քանի որ ամէն բան պատմած էք Նէտրէթ հանրմին, ինչո՞ւ համար հիմա ալ կարճ կապել կ'ուզէք: Զինքը իրաւարար նշանակենք, տեսնենք մեզմէ որո՞նք իրաւունք պիտի տայ:

Մուսլլայի այս արհամարհոտ ընթացքին և Նիհատի այս ազնոզական վիճակին հանդէպ, իր դիրքը պահել ջանացող Նէտրէթ, շատ լուրջ կեցուածքով մը ըսաւ.

— Երկու կեանքերու միացման որոշումին պէս կարեւոր խնդրի մը մասին, անշուշտ, Մուսլլա հանրմը մակերեսային մտածումով մը վճիռը չպիտի տար: Այս ուղղութեամբ, աւելի բան մը խօսելու իրաւասութիւնը չունիմ, հետեւաբար ձեր ներողամտութիւնը կը խնդրեմ:

Նիհատ, այս խօսքէն ընկճուած էր: Նէտրէթ, այս ապագայ ամուսիններէն հեռանալով մօտակայ ծառի մը տակ իր հօրը մօտ նստող Նիհալին քով գնաց: Մանկամարդուհին, անտովոր զուարթութիւն մը ունէր. հոն գտնուող մետաքսանման մազերով, ձերմակախառն մորթով հորթուկ մը բռնեց, կուրծքին սեղմեց ու անոր խոշոր սեւ աչքերէն համբուրեց քանի մը անգամ:

Նէժատ ու Նիհալ իրենց քաղցր նայուածքներով

կը դիտէին զայն: Բժիշկը՝ աղջկան ականջն ի վար փսփսաց.

— Ապերա՛խտ եղբայրդ, իր երջանկութիւնը իր ձեռքով փճացուց. բոլոր առաջագրութիւններս ու բաղձանքներս ոտնակոխեց, բզիկ բզիկ ըրաւ. Նէտրէթի պէս կ'ողջ մը ամուսինը ըլլալու բախտաւորութիւնը գնահատելու անկարող եղաւ. փոխանակ լուրջ սիրոյ, անկայուն ցանկութեան մը զօհը եղաւ: Մե՛ղք... շատ մեղք...:

* * *

Նէտրէթ, քժիշկն ու Նիհալ, նոյն օրը մինչեւ իրիկունքն բնաւ չզատուեցան իրարմէ. իսկ փաստաբանն ու Մուսլլան բռնագրօսիկ ուրախութիւն մը արտայայտելով կ'աշխատէին իրենց միջեւ տիրող անհամաձայնութիւնը չզգացնել: Նիհատ, կը փափաքէր որ Նէտրէթ այսօր աւելի հետաքրքրուի իրենցմով, Մուսլլայի գաղափարները ուղղէ, իր ունեցած առաքինութիւններէն քիչ մըն ալ անոր փոխանցէ. անկէ այս խնդրանքը ընելու աստիճանին հասած էր գրեթէ...:

Տասներկու ժամէ ի վեր դառն հիասթափութիւնով մը քայքայուած իր գոյութիւնը՝ աղիտալի տագնապի մը մատնուած կը գալարուէր: Ուժգին, սառեցնող և մահացու փոթորիկ մը կը ցնցէր իր ուղեղը, որովհետեւ ճշմարտութիւնը իր ամբողջ մերկութեամբ և ունայնութեամբ աչքին առջեւն էր, և իր սէրը կը փշրէր անխնայ հարուածներով:

Նիհալի մեկնումի պարագան առիթ մը եղաւ որ վերջ գտնեն իր սպասումները. Մուսլլայի այս անակընկալ ու անմեկնելի վերաբերումին ենթարկուած

այս պահերը ծանր փորձութեան մը շրջանը անցնել կուտային իրեն. կեանքի ամբողջ տառապանքն ու վիշտը կը ճնշէին իր ուսերը...

Միայն անցած գիշեր հասկցած էր թէ Մուսլլան իր ուղածին ու երեւակայածին պէս չսիրեր զինքը: Մինչեւ առաւօտ թախանձած, իր սրտին ամէնէն լուրջ ու ամենավերջին հարցումը ուղղած էր անոր.

— Սիրական Մուսլլա՛ս, հահ Նիհալը կը մեկնի. վճռական որոշումիդ կը սպասեմ. ճակատագիրս քու ձեռքդ է... ըսէ՛... պատասխանէ՛... ըսած էր:

Սրտակեղէք ու տառապագին սպասումներէ յետոյ, Մուսլլան հազիւ բարեհաճած էր անվրդով կերպով պատասխանել.

— Ներեցէք որ ձեզի ոչ մէկ խօսք կրնամ ըսել հիմա, որովհետեւ եղբորս պիտի երթամ, Նիհա՛տ:

— Պիտի երթա՞ք...

— Այո՛...

— Զիս հոս լքուած ու թշուառ ձգելով պիտի երթա՞ք:

— Կը խոստանամ կրկին վերադառնալ...

— Սակայն տառապանքներս երկարած գելնուդ մէջ ի՞նչ իմաստ կայ. եթէ քանի մը ամիս վերջ, իբր երջանիկ գոյգ մը, միասին երթանք ձեր եղբօրը, աւելի լաւ չըլլա՞ր:

— Ըստ իս, առայժմ առանձին երթալս աւելի յարմար է:

— Ինչո՞ւ համար, արգեօք կը վախնաք որ ձեր եղբայրը արգելք պիտի յարուցանէ մեր ամուսնութեան դէմ...: Չեմ կարծեր. ընդհակառակն, ան աւելի ուրախ պիտի ըլլայ որ իր քոյրը կ'ամուսնանայ իր կնոջը եղբօրը հետ և ասով աւելի կ'ամրապնդուին մեր ազգակցական ու բարեկամական կապերը:

— Այո՛, անկասկած...:

— Ո՛ւֆ... կը հասկնամ. Մուսլլա, կը հասկընամ. դուն իմ զգացումներուս չես փոխադարձեր:

— Ե՛ս, ընդհակառակն:

— Ո՛չ... զգացումներս զիս չեն խաբեր. ահա՛, ձեզի ենթարկուող ձեռք մը. երկարած հաւատարիմ ձեռքիս հանդէպ, դուք շատ անտարբեր կը գտնուիք:

— Փութկոտութենէ կը վախնամ, Նիհա՛տ:

— Զիս փորձե՞լ կ'ուզէք:

— Ո՛չ...

— Ուրե՛մն, աւելի ճիշդ չըլլա՞ր ըսել թէ այս բոլոր առարկութիւնները սոսկ պատրուակներ են:

Մուսլլա ոչ մէկ պատասխան տուաւ ասոր:

Նոյն միջոցին, փաստաբանը, իր երջանկութեան լոյսին յանկարծական մարիլը տեսնելով, հիասթափած, յուսավրէպ, վշտաբեկ պահ մը ապրած էր: Տակաւին կէս ժամ առաջ, իր խեղճ հօրը հանդէպ բռնած ըմբոստ ընթացքն ու սրտաբեկիչ խօսքերը, իր վիշտը աւելի զգալի կը դարձնէին:

Հիւրերը Պոլիս վերադառնալէն յետոյ, Նէտրէթ, իր ցաւալի լքումի ու անպաշտպանութեան զրկանքը աւելի շեշտակի զգացնող պանդխտութեան մը մէջ կ'ապրէր. առանձնութեան այս աստիճան վհատեցուցիչ ըլլալը ցարգ չէր ըմբռնած, որբութեան դառնութիւնը իր հոգին կ'ապրէր: Նէտատէն բաժանումը, անոր զուրգուրոտ ու հոգեպարար ակնարկներէն հեռու ապրիլը, կեանքի ամենամեծ զրկանքը, անդարձման իր կորուստ մըն էր իրեն համար: Հետեւաբար, հայրը դժբախտացնող այս մարդուն հանդէպ իր զգացած համակրութենէն ու հակումէն ծայր աստիճան տանջուելով մէկտեղ, անոր էութենէն զէպի իրեն երկարող անտեսանելի ու խորհրդաւոր ուժի մը կապանքներով կապուած էր, անխուսափելի, կախարդական ուժ մը:

Խեղճ հօրը ողբերգական վախճանը կ'երեւակայէր. անխոստովանելի յարաբերութեանց հետ սերտօրէն առնչութիւն ունեցող մահուան այս յիշատակութիւնը իր մազերը կը փշաքաղէր, իր ուղեղը կ'այրէր. անյայտ մնացած այս գաղտնիքը հասկնալու համար ինքզինքը կ'ուտէր:

Զգացած տառապանքները ծածկելու համար մխիթարական կէտ մը փնտռած ու գտած էր. լքուած ու անտէր հօրը գերեզմանը այցելել, անոր հողակոյտը թրջել իր արցունքներովը, անկէ ներուժ խնդրել: Աւերակ գիւղի մը ամալի գերեզմանատան մը մէջ, Նէտրէթ, ձեռքերը կուրծքին, կրօնական երկիւղածութեամբ մը հօրը գերեզմանին մօտ կեցած էր: Այս սեւ հողակոյտին տակ, յաւիտենական խաղաղութեան մէջ ննջող իր հօրմէն ներուժ խնդրող սրտին ամբողջ սուգովը կուլար, կը թախանձէր,

— Հայրի՛կս... հայրի՛կս...

Մօտակալ փայտաշէն մզկիթին կիսափուռ պատերէն դառն քրքիջ մը աւերակ գերեզմանատանը մէջ իր արձագանգը տարածեց: Փաթմա պաճին ինքնիրեն կ'ըսէր.

— Տէ՛ր Աստուած, ի՛նչ գէշ կը ծիծաղի:

Մինչ մանկամարդ աղջիկը, տարօրինակ սարսափէ մը բռնուած կը գողար: Այս վայելքը, կանաչ խոտերով ծածկուած գաղտնարանի մը խորերէն պոռթկացող անարգական ձայնի մը պէս, իր ուղեղին մէջ թունաւոր արձագանգը ձգած էր:

* * *

Երբ ագարակ վերագարձան, արեւը մարը կը մտնէր: Անսահման յուսահատութեան մը մշուշովը պարուրուած էին Նէտրէթի աչքերը. ամէն կողմ անձկութեան ու վիշտի արտայայտութիւն կը տեսնէր: Գերեզմանատան քրքիջը իր ականջներուն մէջ կ'արձագանգէր: Փաթմա պաճին, անոր այս մտայոյզ ու անխօս վիճակէն մտահոգուած, հարցուցած էր.

— Ի՛նչ ունիք, Նէտրէթ հանըմ, անհանգիստ էք...

— Ո՛չ... այն չարագուշակ թռչունին ձայնը ջիղերս գրգռեց. ասկէ հեռանալ կ'ուզեմ այլեւս և կը մտածեմ թէ այստեղի ամէն յիշատակի հետքը ջնջելու համար ի՛նչ պէտք է ընել:

Փաթմա պաճին, առանց այս խօսքերու թաքուն իմաստը հասկնալու, սոսկ պատասխան մը տուած ըլլալու համար, ըսած էր.

— Հիւրերու ներկայութեանը շատ լաւ ժամանակ անցուցիք. կարծեմ թէ ասկէ վերջ առանձնութենէ շատ պիտի նեղուիք:

Նէտրէթ տխուր և անյոյս պատասխանած էր.

— Երանի՛ թէ բնաւ չձանչնայինք զանոնք, աւելի լաւ պիտի ըլլար:

Փաթմա պաճին, այս պատասխանին վրայ, շուրտած իրեն կը նայէր:

Արդարեւ, Նէտրէթ, ալ կը հասկնար թէ հոս անցուցած իր նախկին կեանքի հաճոյքն ու խաղաղութիւնը անհետացած էին ձգելով վիշտ մը, որ ամէն օր աւելի կը թափանցէր իր հոգիէն ներս ու տառապազին գալարումներովը կը պրկէր ու կը ցնցէր իր

բովանդակ էութիւնը: Առանց երազի, առանց երեւակայութեան, անյոյս, մղձաւանջ մը զինքը կը խեղդէր, անձանօթ ու օրէ օր յարածուէն վիշտ մը կը կրծէր իր հոգին. ասոր հետ վրէժի ու ատելութեան զգացում մը նոյն համեմատութեամբ կը մեծնար, կը պայթեցնէր իր սիրտը:

Տասը օր վերջ, բժիշկէն նամակ մը ստացած էր: Պահարանը պատուած միջոցին սրտի բարախուսներէն ձեռքերը դողացած էին. առաջին անգամ ըլլալով զգացած էր անկարողութիւն մը որմէ իր սիրտը կը ճզմուէր: Առանց կարդալու, նամակը ափին մէջ ճմլած սենեակին մէկ անկիւնը նետած ու յետոյ իր սիրտը պայթեցնող անզուսպ զգացումը խեղդելու համար, բռունցքովը ուժգնօրէն սեղմած էր իր կուրծքը...:

Իր հոգիի խորերէն պայթած փոթորիկը խաղաղեցնելու, ամբողջ զգացումները թմրեցնելու, ինքզինքը խաբելու համար թէրասը փախած, անկէ ալ վէյսէլ պապային գացած էր և սակայն ոչ մէկ կերպով յաջողած էր մեղմել վրդովուած իր էութիւնը:

Վէյսէլ պապան ու Ֆաթմա պաճին, ատենէ մը ի վեր անոր նիհարնալն ու թարշամիլը կը տեսնէին. անոր մտածկոտ ու մելամաղձոտ վիճակը իրենց ուշադրութիւնը գրաւած էր:

Վէյսէլ պապան ուշադիր՝ նէտրէթին նայելով.

— Սիրունի՛կ հանրմս, ըսաւ, ա՛լ կը նեղուիս հոս, եթէ կ'ուզես, վաղը մեկնինք. հոն, հաճելի ժամանակ կ'անցնես անոնց հետ:

— Անոնք ըսածդ, նոր ազգականնե՞րն են, վէյսէլ պապա:

— Անշո՛ւշտ... հապա որո՞նք:

Նէտրէթին գէմքին վրայէն մութ ամպ մը անցաւ.

— Մէկը չեմ ուզեր ես... մանաւանդ ազգականէ հեռու փախիլ կ'ուզեմ...

— Սակայն, շատ լաւ մարդիկ են անոնք. մասնաւորապէս նէժատ պէյը, ի՛նչ ազնիւ, ի՛նչ քնքոյշ է, չէ՞:

Ֆաթմա պաճին խօսքի խառնուելով ըսաւ.

— Հապա եթէ անոր երիտասարդութիւնը տեսած ըլլայիք:

— Փաստաբանը ամբողջովին հօրը կը նմանի, այնպէս չէ՞, Ֆաթմա, հարցուց Վէյսէլ պապան:

— Այո՛... նէտրէթ հանրմը այնպէս կը նմանի իր մօրը, ինչպէս փաստաբան պէյը՝ իր հօրը... ի՛նչ տարօրինակ բան:

Նէտրէթ՝ շառագունած՝ խօսքի նիւթը փոխելու համար ըսաւ.

— Ա՛խ... ի՛նչ կ'ըլլար, մօրս մէկ նկարը ունենայի:

Ֆաթմա պաճին վէյսէլ պապային նայելով.

— Ունինք կարծեմ... մօրաքոյրդ՝ Սուատ հանրմը անգամ մը ցոյց տուած էր, սակայն անոր մահէն յետոյ ի՛նչ եղաւ, չեմ գիտեր...

— Ա՛խ... քո՛յրս... մարդ այսպէս արժէքաւոր բան մը չի՞ պահեր:

Կինը, քանի մը վայրկեան մտածելէն վերջ, աչքերը ամուսնոյն ուղղեց. բան մը ըսել ուզելու ձեւով մը նայեցաւ և կամաց մը ըսաւ.

— Էֆէնտի՛, տարիներէ ի վեր պահուած աւանդ մը ունիս քովդ. կարծեմ թէ Սուատ հանրմէն յանձնուած աւանդ մըն է որ նէտրէթ հանրմին կը պատկանի:

Վէյսէլ պապան, կնոջը այս թուրքերանութենէն սրտնեղած, յօնքերը պուստեց և տիրական ձայնով մը ըսաւ.

— Մեռած մէկուն կտակը գործադրելու պարտաւոր ըլլալս չգիտցող մը չեմ. սակայն նոյն աւանդը ես կրնամ յանձնել նէտրէթի իր ամուսնութենէն յետոյ միայն... որովհետեւ, Սուատ հանրմը մահամերձ եղած միջոցին, ա'յսպէս պատուիրած էր:

Նէտրէթ, անսահման հիացումով ու ապշութեամբ այս այր ու կնոջ բերաններէն կախուած էր. ինչ յայտնութիւններ կ'ընէին անոնք:

Վէյսէլ պապան, մանկամարդուհին դառնալով.

— Արդարեւ, աղջիկս, տարիներով պահած այս աւանդին ինչ ըլլալը չեմ գիտեր. հանգուցեալ մօրաքոյրդ, իր կեանքի վերջին օրերը, մահուան անկողնին մէջ, զիս կանչած էր. ուժասպառ ու արցունքոտ աչքերով, երկար բարակ պատմեց քու մասին. ըսաւ թէ՛ աչքերը բաց պիտի մեռնէր եթէ աշխարհի վրայ քեզ առանձին ձգէր. յետոյ անկողնին տակէն փոքր արկղիկ մը հանեց և ինծի երկնցնելով ըսաւ. «Երբ Նէտրէթը ծաղկատի կին մը ըլլայ, ասիկա իրեն կը յանձնես»: Արկղիկը առի ու խոստացայ իր կամքիս համաձայն կտակը գործադրել: Խեղճ կնոջ հոգին խաղաղած էր...: Աւանդը, տարիներով սնտուկս պահեցի. հեռու տեղեր դացած միջոցիս, միշտ հետս կը տանէի...:

Նէտրէթ խօր յուզումով մը ընդմիջեց.

— Ձեր խօսքերը երազի պէս կուզան ինծի, Վէյսէլ պապա: Ինչե՛ր կը խօսիք:

— Բացարձակ ճշմարտութիւնը... սակայն, դեռ ժամանակը չհասած ճշմարտութիւնը:.. եթէ Ֆաթմա պաճին այնքան անհամբեր եղած չըլլար, աւելի ուշ տեղեակ պիտի ըլլայիր ասոր, զա՛ւակս:

— Հիմա չէ՞ք ընդունիր թէ ասիկա ձեզմէ ուզելը իմ բացարձակ իրաւունքս է. ինչ ալ ըլլայ այդ աւանդը, չէ՞ք մտածեր թէ անկարելի է զսպել անոր

տիրանալու հետաքրքրութիւնս... կ'աղաչեմ, Վէյսէլ պապա, այլեւս մէկ վայրկեան իսկ զիս մի սպասցընէք:

— Ո՛հ... որքա՛ն անհամբերութիւն, նէտրէթ, հապա եթէ քովս չըլլայ աւանդը...:

— Մի՛ տանջէք զիս, քիչ առաջ դուք չէի՞ք ըսողը թէ միշտ միասին կը պատցնէք... եթէ ամուսնութեանս կը սպասէք, կարելի չէ անոր ժամանակը ճշգրել... եթէ մօրաքոյրիս հոգին հաճոյացնել կ'ուզէք, արկղիկը այլեւս պէտք է որ ինծի յանձնէք:

Վէյսէլ պապան ա՛հ... ա՛հ... ըսելով Ֆաթմային նայեցաւ. յետոյ մօրուքը շոյելով դանդաղօրէն ոտքի ելաւ ու ըսաւ.

— Ա՛խ, կին չէ՞ք միթէ, լեզունիդ պապանձուի...:

* * *

Շիշլիաբնակներու կեանքը անհամ կ'անցնէր: Ազարակէն վերադարձին, բժիշկը իր սենեակը քաշուած, հոգեկան տարօրինակ կացութեան մը մէջ, նէտրէթի մօտ անցուցած օրերու յուշերը կը խառնէր անցեալին. միքրէթի յիշատակներուն հետ, երջանկութեան ու վիշտի վերյիշումը իր միտքը կ'ալեկոծէր: Այն գիշերէն ի վեր ու է գանգատ յայտնած չէր տղուն. այնքան անտարբեր ու անհոգ կ'երեւար որ կարծես թէ այն միջապէսը մոռցած էր. սակայն իր ամենանուիրական ցանկութիւնները ոտնակոխող այս ինքնահաւան մարդուն հանդէպ, իր սրտին մէջ, զաղտնի և անսահման զայրոյթ մը կը պահէր: Այլեւս իր ամբողջ մտածումը՝ նէտրէթը երջանկացնելն ու զայն իրեն մօտ տեսնելն էր: Զայն անձանօթ երիտասարդի մը յանձնելը խղճահարութիւն կը պատճա-

ուէր իրեն: Ուշ կամ կանուխ, ան՝ ամուսնանալ հարկադրուած էր. անկէ չզրկուելու, անկէ հեռու ապրելու դառնութիւններուն չենթարկուելու համար ճար մը, միջոց մը կը մտածէր: Այս մտաւախութիւններով հոգեկան տագնապներ կ'անցնէր, երբ օր մը, իր զգացումները փայփայող, վիշտերը մեղմացնող, իր տառապակոծ էութեանը խաղաղութիւն պարգեւող գաղափար մը յղացած և անմիջապէս ցատկելով աղջիկը կանչած էր:

Նիհալ, սենեակէն ներս մտած միջոցին, հօրը զուարթ ու ժպտուն դէմքը տեսնելուն, ուրախութեամբ հարցուցած էր.

— Կարծեմ լաւ լուրեր ունիք, հայրիկ:

Բժիշկը աղջկան աթոռ մը ցոյց տալով.

— Նստէ որ քիչ մը խօսինք... այս տունը, քեզմէ զատ, ո և է մէկը չունիմ... պատասխանեց: Նիհալ, հօրը դիմացը նստած մտիկ կ'ընէր: Հայրը կը խօսէր.

— Նիհալ, խղճի պարտականութիւն համարուած նիւթի մը մասին պիտի խօսիմ քեզի նորէն այսօր. կը ներես, աղջիկս...:

— Ի՞նչ լիցի, հայրիկս... Նէտրէթի մասին պիտի խօսիք, կարծեմ. խօսեցէ՛ք, մտիկ կ'ընեմ...

— Այո՛, զաւակս... սակայն այս սիրոյս համար չես նախանձիր ինձմէ, չէ՞:

— Երբե՛ք:

— Գիտեմ, շատ վեհօգի ես, Նիհալ...: Այսօր կ'ուզեմ քեզի հետ գաղափարի փոխանակութիւն մը ունենալ. եղբորդ անարգանքով մերժած այս աղջիկը, ես կը մտածեմ կաթնեղբորդ տալ, ի՞նչ կ'ըսես:

— Իէնանի՞ն:

— Այո՛...

— Շա՛տ լաւ... ես ալ յարմար կը տեսնեմ,

որովհետեւ Իէնանը խոհեմ ու պարկեշտ անձ մըն է. ասով մէկտեղ կնոջ հոգին հասկցող և Նէտրէթի պէս յարգանքի արժանի ու արժէքաւոր աղջիկ մը նիւթապէս և բարոյապէս երջանկացնող մը կրնայ ըլլալ:

— Իմ համոզումս ալ այս է... ամէն պարտազայի, այս աղջիկը բախտաւոր տեսնելով, ուրախ պիտի ըլլամ: Հետեւաբար, առայժմ, ոչ ոք պէտք է լուր ունենայ մեր այս որոշումէն. կը խնդրեմ որ այս գաղտնիքը պահես, աղջիկս:

Մանկամարդ կինը, լրջօրէն ըսաւ.

— Կրնաք բացարձակապէս ապահով ըլլալ...:

* * *

Փաստաբանը, անախորժ տրամագրութիւններով տողորուած էր Մուսալլայի հանդէպ, մինչ վերջինս, բոլորովին անտարբեր էր ու Նիհալի հետ իր ճամբորդութեան պատրաստութիւններովը զբաղած: Նիհատ, ամէն օր, իր սեղմուած հոգիին մէջ նոր ձեռք մը, սրտի կապանքներու թուլացում մը, ցանկութիւններու սաստկութեանց նուազումը և երեւակայութեանց սահմանափակում մը կը զգար: Կը գիտակցէր թէ գանդաղ քայլերով զէպի փրկութեան ու խաղաղութեան նաւահանգիստը կը դիմէր:

Այլեւս, Մուսալլային «մի երթար»ի խնդրանքը, շատ ծանր հարուած մը կը թուէր իր արժանապատուութեանը տրուած. կախարգական մթնոլորտի մը ազդեցութենէն կը ձերբազատուէր, գինովութենէն կը սթափէր. իր ամենաջերմ, ամենաանկեղծ աղաչանքներուն ի պատասխան, զինքը արհամարհող այս անզգայ, անմիտ աղջկան բուն հոգիին կը թափանցէր ու աստիճանաբար կը հասկնար թէ ան գարգարուն խամաճիկէ մը տարբեր բան մը չէր. դառն ճըշ-

մարտութիւնը իր ամբողջ մերկութիւնովը կը յայտնուէր անոր աչքերուն: Այս հիասթափութիւնը կը խեղդէր իր հոգին և խղճահարութեան տանջանքը կը հետեւէր անոր:

Իր կեանքի ամենադժբախտ գիշերն էր եղած այն գիշերը, երբ անձնասիրութենէ, եսամոլութենէ յաղթահարուած՝ վիրաւորած էր իր այնքան ազնիւ, այնքան գորովագութ հօրը սիրտը, մերժելով իրեն առաջարկուած այն յարգելի, առաքինի էակը: Ու հիմա կը տեսնէր Նէտրէթի խոշոր, սեւ աչքերը, որոնք արհամարհանքը կը փոխադարձէին:

* * *

Անակնկալ դիպուած մը, լուր մը, ամէն մէկու կեանքին վրայ տարբեր տարբեր ազդեցութիւններ գործած էր: Նիհալի ամուսինէն առնուած վերջին նամակը, անոր մեկնումի յետաձգումը յանձնարարած էր: Նիհալէն աւելի, Մուսալլան ազդուած էր այս լուրէն: Մանկամարդ կինը, երբ այս լուրը կը հաղորդէր իր հօրը, Մուսալլան ալ ցարդ զլացած իր կեղծ ու բռնազբօսիկ ժպիտներովը կը ջանար փաստաբանին հաճելի թուել այս լուրը աւետելով անոր. մինչ երիտասարդը, առանց ուրախութեան և յուզումի արտայայտութեան, պարզապէս շրթունքի մը կծկումով պատասխանած էր, որուն Մուսալլան կ'ըսէր.

— Այլեւս բոլոր բաղձանքներդ գոհացում պիտի գտնեն...:

Մինչդեռ Նիհատ, նախապէս անսահման երջանկութիւն առթող այս խոստումներուն հանդէպ, այժմ սառն ու անզգայ դարձած էր: Պատահարներու ու պարագաներու համաձայն, իր զգացումներն ալ անմիջապէս փոխելու ընդունակ այս անվճռական ազ-

ջիկը կարեւոր ու վտանգաւոր քննութեան մը բովէն անցուցած էր զինքը: Կեանքի մէջ առաջին այս պատրանքը, իր ապագայ բարօրութեան լուսագոյն ազդակն ու ուղղութիւն տուողը եղած էր...:

Մուսալլան, հիմա իր զիմացը բոլորովին տարբեր մարդ մը կը տեսնէր. դժգոհ Նիհատին՝ անխօս, պարզ, անտարբեր, մարած, յուսալքուած մարդ մը յաջորդած էր, որ զզջուով կատարեալ գոհունակութիւն ու անտարբերութիւն կ'արտայայտէր:

Նիհատի այս ընթացքը Մուսալլայի ինքնասիրութիւնը կը վիրաւորէր, տագնապի կը մատնէր զայն: Վերջինս, առանց իր ըմբոստացող զգացումներու սաստկութիւնը մեղմել ջանալով, ահռելի նախանձով մը բռնկած, այս անստոյգ կացութեանը վերջ տալ կ'ուզէր. զայն ոտքի տակ կոխկրտել, ոչնչացնել կը մտածէր...:

Այս միջոցին, Նիհալի կաթնեղբօրը՝ Քէնանի յաճախակի այցելութիւնները, Մուսալլայի նպատակին կրնային ծառայել: Այս մարդը նախանձ շարժող յատկութիւններ ունէր. աչքերուն մէջ հոսուն ու այրող զբաւուրթիւն մը, ձայնին մէջ՝ հոգեզբաւ, թովիչ եւ աժշտականութիւն մը կար: Դեռ անոր աղջիկը սկսած էր իր արդուզարգի ճոխութեամբը, խօսքերու նրբութեամբը ու կանաչ աչքերու հմայքովը կախարդել այս երիտասարդը:

Նիհալ, շատ շուտ հասկցաւ. հեռուէն հանդիսատես կ'ըլլար թիթեռնիկի մը անվճռականութիւնովը դարձդարձիկ, կեանքի երջանկութիւնը անստուգութեանը մէջ փնտոող այս թեթեւամիտ աղջկայ արարքներուն: Նէժատ, առանց իր սղու հոգեկան կացութեանը տեղեակ ըլլալու, մեծ համբերատարութեամբ ու լուռութիւնով կը տոկար Մուսալլայի չափազանցուած խենդութիւններուն, սրտովին կը կարեկ-

ցէր Նիհատին. Բէնանի հանդէպ ցոյց տրուած անպատկառ վերաբերումը, երբեմն իր համբերութիւնը կը սպառէր և զայրոյթէն դողալով բռունցք կը սեղմէր այս յանդուգն աղջկան, որ Նէտրէթի արգար իրաւունքին մէջ սանձագութիւն կ'ընէր. զայն ճգմելու փափաքովը կ'այրէր, երբ վերջապէս, օր մը, իր տղուն ըսաւ.

— Կը խնդրեմ, Մուալլա հանըմին քիչ մը ուշադրութիւն ըրէք. պէտք եղածէն շատ աւելի մեծաբանք կ'ընէ Բէնանին. ասիկա իրեն ազգարարելը ձեր պարտականութիւնն է կարծեմ:

Փաստաբանը, վշտահար ու տառապակոծ, իր գլուխը կախեց. եթէ հայրը, վայրկեան մը աւելի կեցած ըլլար, ցաւագին զղջումով մը պիտի պոռթկար ու անոր ձեռքերուն փարելով «ներեցէ՛ք ինձի... խարուեցա՛յ, խարուեցա՛յ» ըսելով պիտի լար. սակայն բժիշկը, առանց տղուն պատասխանին սպասելու ծանր ու հպարտ քայլերով սենեակէն հեռացած էր:

* * *

Նէժատ, բուն ու վրդովիչ անհամբերութեամբ ազարակէն Նէտրէթի վերադարձին կը սպասէր. օրերը կը համրէր. իր նամակի պատասխանին յապաղումը մտատանջութիւն կը պատճառէր իրեն. անոր ապագայի մասին իր մտածումներն ու կարգադրութիւնները անոր յայտնելու կարօտը իր գիշերային քունը կը վրդովէր. երթալով, սէրը անոր սրտին մէջ կը կը մեծնար, մօր մը կուրծքէն փոխանցուած անսահման գուրգուրանքի մը պէս կը պարուրէր իր բովանդակ գոյութիւնը:

Նէտրէթ, Վէյսէլ պապային ղիմացը նստած, ան-

զուսպ անհամբերութեան մը մէջ կը գալարուէր: Ծախմա պաճին, քիչ մը ամօթապարտ ու զղջացողի մը երեւոյթով.

— Էֆէնտի՛, ըսաւ, անգիտակցօրէն բերնէս փախցուած բառ մը այսքան քաշքշելդ աւելորդ է. քանի որ եղաւ, ա՛լ ասիկա Նէտրէթ հանըմին չյանձնելը, զինքը տանջելէ, տառապեցնելէ զատ բանի մը չի ծառայեր:

Վէյսէլ պապան, նեղուած, խօսքը կնոջը ուղղելով ըսաւ.

— Ասո՛ր նայեցէք... ամէն բան կարգի դնելէն յետոյ, վրան ալ աղ պղպեղ կը ցանէ հիմա... է՛հ... դուն ի՞նչ կ'ըլլաս... ան իմ գիտնալիքս է:

— Ա՛հ, Վէյսէլ պապա, քոյրը իրաւունք չունի՞ այդպէս խօսելու, ասոր համար բարկանալու ի՞նչ պատճառ ունիս. քանի որ ինձի յանձնուելու համար տրուած այս աւանդը ձեր քով կը պահուի, անոր ուշ կամ կանուխ իմ ձեռքս անցնելու մէջ ինչ տեսակ պակաս մը կ'ենթադրէք. եթէ կարեւոր ու վտանգաւոր բան մը կայ վայրկեան մը առաջ ըսէք, հասկնալ կ'ուզեմ. այլեւս ակնթարթ մը անգամ չեմ կրնար սպասել, կ'աղաչեմ, Վէյսէլ պապա:

Վերջինս, դանդաղօրէն ներս մտաւ, մինչ Նէտրէթի նայուածքները անոր ծանր քայլերուն կը հետեւէին:

Տարամբօ իրիկուան ամայութիւնը ամէն կողմ պաշարած էր. լեռներու ստորտները դեզերող ստուերները խաւարին հետ կը խառնուէին. ոչխարները իրենց գոմերը, կովերը՝ իրենց ախոռները քաշուած էին. գիւղերու հաղուադէպ աղօտ լոյսերը կը պլպլաւային:

Նէտրէթ, դուռին առջեւ, խորհրդաւոր լռութիւնով մը Վէյսէլ պապային կը սպասէր: Տասը վայր-

կեան վերջ, ծերուկը, ձեռքը փոքր արկղիկով մը կուգար:

— Մինակ թէ, ըսաւ, բանալին քովս չէ, եթէ կ'ուզես կոտրէ:

Մանկամարդուհին, ակամայ կուրծքին սեղմեց արկղիկը, սենեակը վազեց, դուռը կղպեց. կը դողար... անկողնին վրայ նստաւ. վարանոտ դադարէ մը յետոյ, մկրատը առաւ ու փոքր կղպանքը կոտրեց... արկղիկին կափարիչը բացուեցաւ և թուղթի կտորներուն հետ մէկտեղ կնոջ մը լուսանկարը իր գոգը ինկաւ: Տառապագին սարսուռներով գողացող խեղճ աղջիկը մէկէն ի մէկ և ակամայ պօռաց:

— Մայրս... մայրի՛կս... ս'հ...:

Այս տխուր ձայնին ելեւէջները, մերկ սենեակի պատերուն մէջ, երկար ատեն կ'արձագանգէին: Յետոյ իր կարօտակէզ հոգիին ամբողջ պապակովը գրկեց այդ խաւաքարտի կտորը ու անկողին ինկաւ: Հիմա, խեղճուկ ու սրտակեղէք հեծկտուք մը կը վրդովէր ընդարձակ սենեակին լուսթիւնը: Երբ գլուխը վերցուց, անոր արտասուալից աչքերը անդիմադրելի կարօտով մը նկարին յառեցան: Ասիկա, տարիներով իր երեւակայութեան մէջ ապրեցուցած մայրը, երազներուն մէջ իրեն պահապանութիւն ընող կինը, նոյն ինքն էր, իր մայրը:

Նկարին հակառակ կողմը հետեւեալը գրուած էր. «Աղջկանս»:

«Ի յիշատակ քեզ համբուրած ու փայփայած օրերուս...»:

Մանկամարդուհին, ուժասպառ ու կարօտավար այս գիրերուն կը նայէր. ասոնք զրոզ ձեռքերը, արգեօք, ի՛նչ եղած են հիմա: Այս վայրկեանին, հսկայ նոճիներու անձայն ստուերներու տակ ապաստանած խոնաւ, մեծ ու սեւ հողակոյտ մը ուրուա-

գծուեցաւ իր աչքին առջեւ...: Խոր քնացողի պէս մը մտասոյզ, նէտրէթ ձեռքը դանդաղօրէն արկղիկին երկարեց. այս անգամ, կապոյտ կողքով մեծ տետրակ մը առաւ, որուն վրայ այսպէս գրուած էր.

«Յիշատակ աղջկանս»:
«Մեռած կնոջ մը յուշատետրը»:

Տետրակին մէջէն նկար մը եւս ինկաւ ծունկերուն վրայ: Նէտրէթ, անմիջապէս լամպի լոյսին մօտեցուց. իր զգացումներու սաստիկ բորբոքումէն մթագնած աչքերու ամբողջ ուժը սեւեռած մնաց այդ խաւաքարտի կտորին վրայ...:

Հոն էին իր հայրն ու մայրը, քով քովի նստած ու մէջտեղնին ալ սիրուն փոքրիկ մանկիկ մը, գլուխը մօրը կուրծքին կրթնցուցած:

Անցեալի շատ կարճատեւ այն երջանիկ պահերու յիշատակ մնացած այս նկարը թէեւ անոր անտէր ու որբ կեանքի դառնութիւնները աւելի սաստկօրէն կը զգացնէր, սակայն իր անյազ նայուածքները չէին կրնար բաժնուիլ իր կեանքին պատճառ եղող այս երկու տեսիլներէն: Ի՛նչ պատկառազոտ էր իր հօրը դիրքը... իր մօրը կուրծքը, որուն կրթնցուցած էր իր գլուխը, ի՛նչ բարձր զգացումներ կը պարփակէր, ի՛նչ գորով ու գուրգուրանք կը բխէր այդ սիրտէն. անմեղօրէն նայող անոր աչքերուն մէջ սրտապատառ վիշտն ու տառապանքը կը քնանային. երջանկութեան արժանի այս զոյգը խաւաքարտի կտոր մը ձգած ու հեռացած էին:

Տետրակին կը նայէր, ուղեղը ահռելի ալեկոծութեան մը բռնուած էր: Գլուխը ձեռքերու մէջ առած՝ պահ մը մտածեց. արդեօք մայրը ի՞նչ գրած էր. ակնարկները դարձեալ հօրը նկարին ուղղուեցան. անոր և իր միջեւ նմանութիւն մը կը փնտռէր, կը փափաքէր նմանած ըլլալ. երկար ու լուրջ զննութենէ մը

վերջ սեղանի վրայ փոքրիկ հայելին դիմացը առաւ ու նոյն ուշադրութեամբ սկսաւ քննել իր դէմքը: Տասը վայրկեան յետոյ կատարելապէս համոզուեցաւ թէ իրենց ճակատներու և ծնօտներու միջեւ նմանութիւնը բացայայտ էր. շրթունքին մօտեցուց զայն, համբուրեց ու առջին դնելով հիացումով ու կարօտով նայեցաւ, երկա՛ր նայեցաւ անոր:

Սրտին մէջ բանի մը այրիւր, թանձր մթութեան մը մէջ իր հոգիին նուազիւր կը զգար: Կամաց կամաց ելաւ պատուհանին առջեւ գնաց, վանդակափեղկը հրեց, ուրկէ փչող գիշերային զով ու մաքուր օդ մը իր դէմքը կը շոյէր: Երկնակամարին վրայ աստղերը կը փայլէին, լեռները խաւարի գիրկին մէջ կը քնանային. արագավազ գետը ողբազին կը հեծէր: Նէտրէթ, երկար ատեն, գլուխը պատուհանի եզրին կը թնցուցած, մտասոյզ ու անշարժ կեցաւ:

Արկղիկէն ինկած կարգ մը թղթիկներ անկողինին վրայ թափած էին. նէտրէթ, կարծես կը վախնար անոնց դպչելու, անոնց պարունակութեանց տեղեկանալու... վշտառիթ գաղտնիքի մը, ահաւոր պատահարի մը գիտակ ըլլալու իր հետաքրքրութիւնը կը յաղթահարէր իր ամբողջ հաստատակամութիւնը. այդ սեւ գիծերու՝ իրեն սորվեցնելիք ճշմարտութեանէն փախչիլ կ'ուզէր:

Յանկարծ մղձաւանջային քունէ մը արթնցողի պէս ցնցուեցաւ. ձեռքը ճակտին դրած բոլորտիքը նայեցաւ, լամպի աղօտ լոյսով լուսաւորուած սենեակին մէջ սկսաւ պտտիլ դանդաղօրէն. յետոյ յուզումաւ լից՝ կրկին նստաւ անկողինի եզերքը, ծունկերուն վրայ առաւ արկղիկը, թաւշապատ փոքր պահպանակներու մէջ ուր կարգ մը արժէքաւոր նուէրներ զետեղուած էին: Ասոնց մէջէն ամէնէն աւելի զինքը ուրախացնողը կանաչ կիտուածանկարի վրայ աղա-

մանդազարդ փոքրիկ շրջանակ մըն էր, բարակ ոսկիէ շղթայէ մը կախուած, որուն մէջտեղը մօրը փոքրիկ մէկ նկարը զետեղուած էր: Նէտրէթ, երկար բարակ քննեց զայն, այն սիրեցեալ կնոջ գեղեցիկ պարանոցը համբուրող այս փայլուն քարերը շրթունքներուն քսեց. կարծես թէ երկար տարիներով անոնց մէջ պահուած մօր մը հոտը կ'առնէր:

Շղթան վիզը անցուց... աս՝ այնպիսի յիշատակ մըն էր որ շարունակ իր կուրծքին վրայ պիտի կրէր, անոր երեւակայութեան հետ, նոյն իսկ գիշերը անով պիտի պառկէր. զայն հոտուրտալով պիտի քնանար: Այս անակնկալ հարստութեանց տիրացող նէտրէթ ընելիքը շուարած՝ նկարները ձգելով թուղթերը կ'առնէր, թուղթերը կը ձգէր տետրակը կը բանար. մերթ խորունկ քունով մը տարուած՝ երազներու մէջ կը կարծէր ինքզինքը:

Միջոց մը, մաթմա պաճին գուռը բախելով.

— Նէտրէթ հանրմ, ձաչ չգիտի՞ ընես, հարցուց:

Ասոր վրայ, քիչ մը ինքզինքը հաւաքեց, զգալով որ մութը շատոնց կոխած է, լամպին պատրոյգը քիչ մը վեր բարձրացուց, անկողին վրայէն տետրակն ու աթոռ մը առնելով լամպին մօտեցաւ ու առաջին էջը բացաւ: Իր ամբողջ էութիւնը ցնցող դառն յուզումով մը, տարիներէ ի վեր իր մօրը սրտին ողբերու արձագանգը պարփակող վշտալի այդ էջերու առաջին տողերը կարդալ սկսաւ:

Այս կնոջ կեանքը, մերթ խորունկ, զեղուն ու սեւ մշուշապատ հորիզոններու խառնուած ծովի մը պէս կ'ալեկոծէր. մերթ խորհրդաւոր պարապութեանց մէջ ապաստան փնտոող անշարժ ու աղօտ լուսնկայի մը պէս վատուժ ու երկչոտ կը գողգողար, մերթ ալ մացառներու, սեպ ժայռերու մէջ ինկած, յոգնած, ուժասպառ ու անկարող կը մաքառէր:

Նէտրէթ, ալ հիմա կ'ըմբռնէր թէ ան ինչ անհանդուրժելի կեանք մը անցուցած էր այս առաստաղին ներքեւ: Հոսող արցունքներուն հետ «մայրի՛կ... մայրի՛կ... խեղճ մայրիկս» կը հեծէր:

Նոյն միջոցին, երբ կուրծքի ահռելի հիւանդութիւն մը կը կրծէր իր մօր կեանքը, միեւնոյն ատեն ան քայքայող սիրոյ մը թաթերուն տակ կը զայտարուէր: Իսկ խեղճ հայրը, առանց անոր հոգիի ահաւոր դժբախտութեան ախտաճանաչումը կարենալ ընելու, զայն դարմանելու կ'աշխատէր. մինչդեռ այն հիւանդ սիրտը, իր ամէնէն շատ սիրած աչքերէն ու ձեռքերէն կ'առնէր ու կը խմէր մահացու թոյնը:

Այս յուշատետրին մէջ, յաճախ նիհալի ու նիհատի մասին գրուածներու կը հանդիպէր. մայրը, նիհատը շատ կը նմանցնէր հօրը: Այս պարագային, Նէտրէթ՝ իր զգացումներովը տարուած, կը զգար թէ իր սրտին խորերը յոյսի նման բան մը կայ որ գաղտնօրէն իրեն կը ժպտի: Նուրբ մետաքսահիւս և կախարհական ցանցով մը կը պատէր իր ամբողջ ինքնութիւնը, յաւիտենական ուժ մը անոր հանգոյցները կապելու համար, կ'օգնէր իրեն:

Այս վայրկեանին, Նէտրէթ, որբութեան և մեռութեան վիշտէն աւելի դառն գրկանքի մը տառապանքը կը զգար. հոգեկան անդիմադրելի պայքար մը կը մղէր. ուժասպառ, յոգնատանջ անյուսութիւն մը կար իր աչքերուն մէջ: Անցեալի մեռած, չորցած երեւակայութեանց տրտում ու տժգոյն ստուերները կը թափառէին անոր թարմ ու գեղեցիկ դիմագծերուն վրայ:

Տանջուած գլուխը յուշատետրին վրայ ծռեց ու ընթերցումը շարունակեց. կարգ մը տողերու վրայ կը յամենար, հոն, վիշտի ամպերով կը մթազնէին իր աչքերը. մերթ թեթեւակի կը շառագունէր, մերթ ալ յուզումէն իր շրթունքը կը դողդղար:

Մօրը կեանքի գաղտնիքներու ամէնէն սրտակեղէք էջերը, ամուսնոյն անարգանքին նշաւակ եղած օրերն էին: Անոր անմեղ ու անրիժ սէրը ոչ ոք կըրցած էր հասկնալ: Իր բովանդակ գոյութիւնը՝ այս քանդող սիրոյ սեւ պատանքովը փաթթած ու այնպէս թաղուած էր:

Նէտրէթ, նկարը կրկին ձեռքը առաւ, անոր անբարբառ աչքերուն ուշադիր նայեցաւ. անսահման սիրոյ զգացումով մը, երեսին, շրթունքներուն քսեց:

Խեղճ կին, իր հոգիին մէջ պարփակել չյաջողած, ոչ ոքի խոստովանիլ չհամարձակած իր վիշտերը, իր սրտէն գրիչին հոսող արիւնովը գրած էր:

Էջերուն մէջ, թուղթի կտորուանքներու վրայ, համառօտ նախադասութիւններ ալ կային.

— 1 —

«Աղջի՛կս, հայրդ ինձի ջներեր... դո՛ւն ներէ...»

— 2 —

«Այս գիշեր, ուժասպառ բազուկներուս վերջին ճիգովը կուրծքիս վրայ սեղմեցի քեզ. դէմքիդ վրայ կաթած արցունքներէս արթնցար. իմ թաքուն վիշտերուս տեղեակ ըլլալ ուզողի մը պէս ուշադիր երեսս նայեցար. ա՛խ, ես շատ ամէցայ քեզմէ»:

— 3 —

«Ո՛վ իմ գարնանս առաջին բացուած կոկոն Նէտրէթս, քու մեծնալը չտեսած, իր վախճանին մօտեցող կեանքիս ամենադաժան, ամենատառապալից օրերը կ'ապրիմ. աղիտալի բանտիս հաստ պատերուն միջեւ, վայրի ամայութեան մը տաղտուկի ովկիանին մէջ լքուած իմ գոյութիւնս, տխրասարսուռ ջախջախումով մը կ'անհետանայ...»:

«Անոր...»

«Այս գիշեր որչա՛փ կը կարօտնամ քեզ... այս օրերս, երբ անյուսուցիւնն ու անճարութիւնը զիս կը պաշարեն, սիրոյս ուժը, սրտիս կարօտն ալ կը բազմապատկեն. վերջին անգամ մը եւս քեզ տեսնելու համար ինչպէ՛ս կը դողայի. ա՛խ, եթէ գիտնայիր... Աստուած իմ, միթէ հնարաւոր է այս. մեզ իրարմէ անջատողը այս ձիւնապատ ու մշուշոտ լեռները եղան... գուցէ՛... աւա՛ղ... լեռները չեն, այլ մարդիկ... մարդիկ... մարդոց՝ հպատակութիւն պարտադրող կարգ մը օրէնքներ... ահաւոր, ծանր շղթայ մը... սակայն, ահա՛, ես իմ կեանքովս մըշտընջենապէս կը խորտակեմ այդ շղթան... մարդկային կարողութեան անհասանելի, անվախճան հեռաւորութեան մը, յաւիտենական անյայտութեանը կ'երթամ ես... այլեւս, երբեք, երբեք չպիտի տեսնեմ քեզ»:

* * *

Նէտրէթի ուժերը բոլորովին սպառած էին. գլուխը թեւերուն կրթնցուցած կուլար, կը հեծկլտար, երբ վէյսէլ պապայի ձայնը կ'ըսէր.

— Նէտրէ՛թ, Նէտրէ՛թ, ի՞նչ կ'ընես գիշերուան այս ժամուն. հիւանդ պիտի ըլլաւ. նայէ՛, առտու կ'ըլլայ. այս գիշեր, լոյսդ երբեք չմարեցաւ աղջի՛կս, ա՛լ քնացիր:

Ֆիքրէթի աղջիկը, հեծկլտուքներու մէջէն պատասխանեց.

— Կը քնանամ, վէյսէլ պապա... կը քնանամ...

Արդարեւ, հեռուէն ու մօտէն աքաղաղի ձայները կուգային. Նէտրէթ այսքան ուշ մնալը չէր զգացած: Ելաւ, վանդակափեղկը բացաւ. բոլոր գիշերներու նման այս գիշերն ալ կ'ունենար իր արշալոյսը, որ լեռներու գագաթները կը ճերմկցնէր. սպիտակ թեւերով մշուշը գիւղերու վրայ կը տարածուէր, ծառերու խոռոչներու և լեռներու անձաւներու մէջ պահուած խիտ ստուերները այգալոյսի ժպիտէն ծնած ցանկալի գոյնով մը կը ներկուէին. գիշերային խորհրդաւորութիւններն ու երեւակայութիւնները ցըրուած էին. լուսինը կը նուազէր, աստղերը երկնակապոյտին խորերը կը քաշուէին:

Մօտակայ գիւղերէն մէկէն առաւօտեան «էգան»ի ձայնը կը լսուէր. անշարժ օդի մը մէջ թրթռացող այս վսեմ ձանր, մերթ մեղմ, մերթ յուզուցնալար ալիքներով վեր կը բարձրանար ու իր երկնային արձագանգներու թեւերը ջերմեռանդ կրօնասիրութեամբ ու հաւատքով տողորուած Նէտրէթի հոգին կը պարուէին: Այս ձայնը, կարծես մարդկային սրտի դառնութեանց զովարար մխիթարութիւն մը, պաշտպանութիւն մը կը պարգեւէր: Իր այրող սրտի կրակին վրայ օրհնաբեր անձրեւի պէս կաթիլ կաթիլ հոսող այս ձայնին մէջ, յաւիտենապէս հեռացած իր մօրմէն յոյսի ու մխիթարութեան ճառագայթ մը բերող բարոյական ուժ մը կար:

* * *

— Օ՛... հրամմեցէք վէյսէլ էֆէնտի, բարի եկաք. ո՛ւր մնացիք... ձեր կարօտը քաշել կուտաք: վէյսէլ էֆէնտին, ուրախ զուարթ, փաստաբանին խօսքերը մտիկ ընելէ յետոյ, պատասխանեց.

— Երեք չորս օրէ ի վեր եկած ենք. այսօր,

հազիւ միջոց գտայ, լուր տալու համար, ձեզի գալու:

— Շատ գոհ եմ. բայց կ'երեւի թէ, այս մասին, նէտրէթ հանձնը մեզի լուր տալու դանդաղած է:

Վէյսէլ էֆէնտին քիչ մը կոտորուած.

— Ո՛չ, ո՛չ, ըսաւ, սխալ կը մտածէք. տնական գործերով ու կարգ մը անհրաժեշտ գնուածքերով շատ զբաղած է: Նէտրէթ՝ ձեզի, մասնաւորապէս բժիշկ պէյլին հանդէպ խոր յարգանքներ կը տածէ:

— Շնորհակալ եմ. . .

Փաստաբանը, ծերուկին սիկար մը հրամցուց, առջեւի թուղթերը հաւաքեց. յետոյ, մէկէն ի մէկ սրտէն բխող բաղձանքը առանց արգելել ուզելու, յարեց.

— Բան մը. . . եթէ արգելիչ պատճառ մը չկայ. . . կ'ուզեմ բարիգալուստի գալ իրեն և դատական գործերու մասին կարգ մը տեղեկութիւններ հաղորդել:

— Ի՛նչ ըսել է, էֆէնտիմ. շնորհ ըրած կ'ըլլաք. հրամանեցէք, երթա՛նք:

Փաստաբանին աչքերը ուրախութիւն կը ճառագայթէին.

— Տասը վայրկեան շնորհ ըրէք, Վէյսէլ էֆէնտի. ներսը մէկու մը հետ պիտի տեսնուիմ. . . Ինքնաշարժը դուռին առջեւ կը սպասէ, անմիջապէս կը մեկնինք, չըլլա՛ր, ըսելով քովի սենեակը մտաւ:

Վէյսէլ էֆէնտին, կռնակը թիկնաթոռին կրթընցուց ու հանձնքով մը դիտելով իր սիկարի մուկը, կը մտածէր. «Այս փաստաբանը, իսկապէս լաւ մարդ մըն է»:

* * *

Նէտրէթ, երեք չորս օրէ ի վեր, դեղձանիկի մը չափ սիրուն և նեղուցի կապոյտ ջուրերուն և կանաչ եզերքներուն վրայ իշխող իր տունը եկած էր: Ագարակ զացած օրէն մինչեւ այսօր, ամենակարեւոր նորութիւններով հարուստ շրջան մը եղած էր իրեն համար: Դիպուածը իր դիմացը հանած էր կարգ մը անսպասելի դէմքեր, որոնց հետ սերտօրէն կապ ունեցող շարք մը վշտառիթ և ողբերգական գաղտնիքներու տեղեկացած ու կեանքի խաղաղութիւնը, սրտի հանգիստը վրդովող զանազան վտանգաւոր ու դիւթիչ երեւակայութիւններու գերին դարձած էր. այլևս այս երեւակայութիւններէն ազատուիլ, զանոնք ջընջելու, մեռցնելու համար իր ջանքերուն անգորութիւնը, այսօր կը ջլատէր, կը քայքայէր իր հոգին. այս չարագուշակ երեւակայութիւնները, իր ապագան ու յոյսերը սեւերով կը պատանքէին. կ'ուզէր խուսափիլ վտանգներէ, սակայն, այս օրերս, բժիշկին հանդէպ սրտին մէջ անդիմադրելի կարօտ մը կը զգար. . . անոր դիմաց իր մօրը յիշատակը վերապրեցնել կ'ուզէր: Իր բոլոր տարակոյսները, բոլոր դառն ու սարսափելի կասկածները փարատող իրողութիւնը. . . այն մեծ ու յաւիտենական սիրոյ սրբաւորէք ողբերգութիւնը պարունակող յուշատետրը. . . իր բոլոր ցաւառիթ մանրամասնութիւններովը անմեղ, անբիծ և մաքուր սիրոյ մը անժխտելի վկայականներն էին: Ճշմարտութիւնը, մանաւանդ Նիհատին ապացուցանելու. իր մօրը նկատմամբ անոր սնուցած ատելութիւնն ու զգուանքը չէզոքացնելու և «այն կնոջ աղջիկը» եղած ըլլալուն համար իր զգացած հպարտութիւնը անոր հասկցնելու համար առիթի մը կը սպասէր:

իր սրտին մէջ, կարգ մը անդիմադրելի զգացում-
ներու հետ, տեղ մը գրաւած իր գաղտնի զայրոյթը
յայտնել կ'ուզէր անոր:

Ասկէ երկու երեք ամիս առաջ, այս տանջող ու
քայքայիչ մտածումներէն որքա՛ն հեռու էր... Ի՛նչ
հանգիստ, որքա՛ն խաղաղ կեանք մը ունէր: Վար-
ժարասէն ելած օրը այս պզտիկ օճախին միակ փոք-
րիկ տիրուհին եղած էր. տան կարգադրութիւնները
ի՛նչ քաղցր գրադում մը եղած էին իրեն. եթէ այս
անսպասելի պատահարը տեղի ունեցած չըլլար,
կեանքն ալ այնպէս պիտի շարունակուէր ու օր մըն
ալ իր հաւնած երիտասարդի մը հետ ամուսնանալով
պիտի ջանար երջանկութիւն մը ապահովել ու հա-
ճելի կեանք մը անցնել:

Նէտրէթ, այժմ սենեակին հաճոյալի անդորրու-
թեան մէջ, արշալոյսի ամպերը յիշեցնող շառագոյն
վարագոյրներուն վարդագոյն շողերու մէջտեղ, այս
վհատեցուցիչ մտածումներով տարուած միջոցին, կը
հասկնար թէ իր մօրը տարաբախտ սիրոյ ժառանգորդը
ըլլալուն հետեւանքով, այդ բարեյիշատակ մեռեալին
հին ու անցեալ սիրոյն ինքն ալ մասնակից էր...
Սակայն, անցեալի այս ժառանգութիւններէն ինք-
զինքը զրկելու աստիճան հաստատամիտ ըլլալ ջանա-
ցող Նէտրէթ կ'ըմբռնէր թէ չպիտի յաջողէր բնութեան
դէմ պայքարիլ, բնագոյն ու զգացումները չպիտի
կրնար մեռցնել:

* * *

Դուռին տրուած քիչ մը ուժգին հարուածները
ցրուեցին անոր երեւակայութիւնները: Յոգնած ու
ջղայնացած՝ ելաւ, դուրսը մտիկ ըրաւ. Վէյսէլ պա-
պայի ձայնն էր:

— Հրամայեցէք... Նէտրէթին լուր տամ... կ'ը-
սէր:

Սրտին մէջ ուժգին բաբախում մը զգալով պա-
տուհանը վազեց. դուռին առջեւ ինքնաշարժ մը կար:
կարծելով թէ եկողը բժիշկն է, ուրախացաւ. այսօր
իր մօրը մասին ամէն բան խօսելու որոշումը տուած
էր. իր հոգեկան վիշտերը այս կերպով յայտնելէ մեծ
հաճոյք ու հանգիստ պիտի զգար: Նոյն միջոցին,
սանդուղիներէն բարձրացող Յաթմա պաճին ըսաւ.

— Նիհատ պէյը վարը ձեզի կը սպասէ:

Նէտրէթին դէմքը ձեփ ճերմակ կտրեցաւ. մէկէն
սենեակը դարձաւ. զօրաւոր բաբախում մը ունէր.
սթափեցուցիչ դեղ մը առաւ, գլուխը շփեց անով ու
հայելիին դիմաց անցնելով դէմքը զննեց:

Յուզումի ամէն նշան ջանաց անհետացնել, մա-
կերը յարդարեց. հագուստը վայելուչ էր, փոխելու
պէտք չունէր. յետոյ ծանր քայլերով սենեակէն
դուրս ելաւ:

Հիւրասենեակին պարտէզի կողմի կանաչ վան-
դակափեղկը գոց կը մնար, միջոցներէն անցնող ա-
րեւին լոյսը, գորգը կը գունազարդէր. սենեակին օդը
զաղջ ու քնաբեր էր:

Նէտրէթ, Նիհատը դաշնամուրին քով ոտքի կե-
ցած գտաւ. երիտասարդը քաղցր սպասուումի մը պա-
հերը՝ այս ճաշակաւոր գոյքերը դիտելով անցուցած
էր: Նէտրէթը տեսնելուն պէս ձեռքը երկարեց. վեր-

Ղինս, նոյն ձեւով փոխադարձեց: Փաստաբանը, ափին մէջ առած այս գեղեցիկ ձեռքը առանց ձգելու, ոտքի վրայ, կը խօսէր:

— Եթէ գիտնայիք թէ... ինչպէ՛ս կը սպասէինք ձեզի: որքա՛ն բախտաւոր եմ որ այս բարի լուրը ես պիտի հաղորդեմ յօրս: Նիհալ որչա՛փ պիտի ուրախանայ:

Նէտրէթ, գլխու թեթեւ շարժումով մը ժպտելով պատասխանեց:

— Շնորհակալ եմ, շնորհակալ եմ...

Ձեռքը մեղմօրէն քաշեց փաստաբանին ձեռքէն. վանդակափեղկերը բանալու համար դէպի պատուհան ուղղուեցաւ: Առատ լոյս և ամառնային թմրեցնող օդ մը լեցուցին սենեակը:

Այս սենեակին օդը, ընտանի ջերմութեամբ մը կը գինովցնէր Նիհատին հոգին: Նէտրէթ, անոյշ ու ներդաշնակ ձայնով մը հայրն ու Նիհալը կը հարցնէր. երբ Նիհալի Եւրոպա մեկնելու մասին խօսք դարձաւ, փաստաբանը շատ հանդարտ ու պարզ կերպով պատասխանեց:

— Առայժմ յետաձգուեցաւ...

Նէտրէթ ներքին յուզումէ մը ընկճուած, յարեց:

— Նիհալ հանրմը նեղուած պէտք է ըլլայ, կարծեմ...

— Բնականաբար... սակայն, քոյրս իր ցաւն ու յուզումը յայտնող կիներէն չէ:

Փաստաբանը, վերջին բառերը արտասանած միջոցին, երկար նայուածքներով Նէտրէթը կը զննէր:

Երիտասարդուհին, այս նայուածքներուն ընդգիմանալ ուզեց... սակայն իր ամբողջ էութեանը տիրապետող ուժի մը ազդեցութեան տակ, պարտաւորուեցաւ իր աչքերը խոնարհեցնել:

Երկուքն ալ, մէկ երկու վայրկեան լուռ կեցան: Նիհատ, մինչեւ այսօր, անոր այս աստիճան գեղեցկութիւնն ու բանաստեղծական նրբութեան մը ամենակարկառուն գիծերը նշմարած չըլլալուն համար, սրտանց ցաւ կը զգար. անոր ձայնին մէջ քաղցրութիւն մը և հոգի գինովցնող ներդաշնակութիւն մը, նայուածքներու մէջ բնական ընթացքով մը դէպի սիրտ հոսող ջերմութիւն մը կար:

Անոր իսկական արժանիքները իր հայրը աւելի լաւ և նախապէս գնահատած, իսկ ինքը պարզապէս անոր թելադրութեանը ենթարկուած ու շատ ուշ հասկցած ըլլալուն համար, հիմա, դառնօրէն կը զըզջար. յանկարծ ըսաւ:

— Կ'ուզէ՞ք, այս իրիկուն, հօրս մեծ ուրախութիւն մը պատճառել... անակնկալ մը ընենք իրեն...

— Ի՞նչպէս:

— Հիմա, միասին ինքնաշարժը կը նստինք ու Շիշլի կ'երթանք, չըլլա՞ր:

Նէտրէթ, մտածկոտ երեւոյթ մը առած, մէկ երկու վայրկեան իր գեղեցիկ ու խորասուզուած ակնարկները Նիհատին ուղղեց... յետոյ, անվրդով ձայնով մը ըսաւ:

— Արդէն գիտեմ թէ փոխայցի պաշտականութիւն մը ունիմ, զոր փութացնել կը փափաքիմ. ուրեմն երթա՛նք:

Նէտրէթ, փաստաբանին վրայ ահագին փոփոխութիւն մը կը տեսնէր ու կը շուարէր. շատ զգալի տարբերութիւն մը կար ազարակի անոր վիճակին և ներկայ ընթացքին միջեւ. Մուսլլայի մասին խօսք մը իսկ չընելը խորհրդաւոր կը գտնէր. իրեն հանդէպ ցոյց տրուած այս մտերմութիւնն ու շնորհաբաշխութիւնը ապահովաբար արգիւնքն էր իրենց միջեւ տի-

րող անհամաձայնութեան. հետեւաբար ցոյց տրուած մօտիկութիւնը անհրաժեշտութիւն մը, աւելի ճիշդ մերժուած սիրոյն պատճառով, մրցակցութեան գաղափար մը արթնցնելու մտայնութիւնն էր: Յարդ, իր գոյութեան կարեւորութիւն չտուող այս հպարտ մարդուն ներկայ հաճոյակատար ընթացքը, ափին մէջ զրուած ողորմութիւն մը նկատեց. այս յամեցած շնորհը, նուաստացումի զգացումով մը կը ճնշէր իր հոգին. ուրիշի մը սէրը գրաւելու համար իբր գործիք ընդունիլ իր սիրտը և անոր միջոցով հասնիլ իր նպատակին. այս էր Նէտրէթի գաղափարը, որ կը մխուէր անոր ուղեղին մէջ ու կը պայթեցնէր զայն:

Նիհատ, ուշադրութեամբ կը հետեւէր, նոյն պահուն անոր անցուցած տազնապններուն. անոր սեւ աչքերը պարտէզի ստուերներուն յառած ու այտերը թեթեւ վարդազոյն մը ստացած էին: Նիհատ, հիացիկ ու մեծ հաճոյքով կը դիտէր զինքը:

Նէտրէթ, անոր սրտին հարուած մը տալու զիտումով, Մուալլայի մասին խօսք բանալ ուզեց ու ըսաւ.

— Ագարակի խաղաղ կեանքին վարժուած հոգիս, քաղաքի եռուզեռին քիչ մը անընտել պիտի մնայ, կարծեմ: Արդէն մանկութեանս յաջորդող ժամանակաշրջանը, դպրոցի հանդարտութեան ու կարգապահութեան մէջ, միօրինակ կերպով անցնելուս հետեւանքով, ընկերային կեանքին մասնակցելու տեսակէտով, սկսնակ մը կը համարուիմ. որովհետեւ վարժարանի հաստ պատերը, վայելչասիրութեան զօրաւոր արգելք հանդիսացած են: Հետեւաբար, այժմէն իսկ խոստացէք ինձի որ, ձեր մէջ եղած միջոցիս, վրաս նշմարուած թերութիւններուն աչք պիտի գոցէք և մինչեւ որ Նիհալ ու Մուալլա հանըմներու կենցաղագրութեան աստիճանին հասնիլս, իմ բոլոր

ընթացքիս ու կենցաղիս ներողամիտ պիտի գըտնուիք...

Նիհատ, յարգանքով խոնարհեցաւ. Նէտրէթի խօսքերուն մէջ շատ թաքուն հեզնանք մը կար:

— Երեւակայեցէք թէ ի՞նչ աստիճան անկարող կը զգամ ինքզինքս ձեր այսքան քաղաքավարութեան ու համեստութեան հանդէպ. քոյրս, ձեզի չափ բարձր զգացումներ ժառանգած չէ թէեւ, բայց սիրով ու գորովով բաղադրուած սիրտ մը կրելուն հետեւանքով, արդէն ձեր համակրութիւնը շահած էր... Գալով Մուալլային... ան... ձեզմէ և քրոջմէս զգուանք զգացող, բոլորովին տարբեր տեսակ մէկն է. ասիկա բացատրելու և մանրամասնելու պէտք չեմ տեսներ... մինակ ձեր ներողամտութեանն ու շնորհներուն կը վստահիմ:

Փաստաբանը, առաջը նայելով կը խօսէր, իր սրտի բոլոր տառապանքները կը միանային իր վշտաբեկ ձայնին ու կեցուածքին:

Նէտրէթ, շրթունքներու մէջէն կամաց մը ըսաւ.

— Եթէ բոլոր դեռատի աղջիկները Մուալլա հանըմին պէս սիրուն ու վայելուչ ըլլային...

Նիհատ, թեթեւակի հառաչելով.

— Եթէ կանացի բոլոր առաւելութիւնները այդ երկու բառերէն կազմուած ըլլային... Ես ալ պիտի կրնայի ձեզի «այո» ըսել, պատասխանեց:

Յետոյ, դանդաղօրէն ոտքի ելաւ ու ժպտադէմ աւելցուց.

— Խոստումնիդ չէք մոռնար, կարծեմ...:

Նէտրէթ, պատրաստուելու համար վեր ելաւ... առաջին անգամ ըլլալով մեծ խնամք տարաւ իր արգուզարդին: Բաց շագանակագոյն մետաքսանման մագերը ճարտարօրէն հաւաքեց զլիսուն վրայ. ամէնէն վայելուչ հագուստը զատեց, մօրը յիշատակը

փոքր պահպանակէն հանեց և ոսկի շղթան վրդէն անցնելէ առաջ շրթունքներուն մօտեցուց, աչքերը գոցեց ու հոգիի բովանդակ պապակովը ու կարօտովը համբուրեց... այսօր որքա՛ն կը նմանէր անոր: Իր ամբողջ կեանքի, զգացումներու, բոլոր անճարութեանց գառնութիւնները, այս վայրկեանին, իր հոգիին մէջ կրելով մէկտեղ մութ, փշոտ ու շատ հեռուներ տանող ճամբայ մը ինկաւ:

Մինչդեռ... ան խեղճ կին, իր արցունքներովը կազմուած կեանքին էջերը, իրենց բոլոր մանրամասնութեամբ, անոր աչքերուն առջեւ դրած, անոր սուգի ու վիշտի դիրք մը տուած էր:

Մանկամարդուհին՝ երկու ձեռքով զլուխը սեղմեց. այս ահաւոր ու քայքայիչ կախարդական հրապոյրին դիմադրելու իր անկարողութիւնը զգաց և ուժասպառ ու անյոյս՝ բազմոցին եզերքը նստաւ. թեւերը կախ, աչքերը սեննակի անորոշ մէկ կէտին յառած՝ հինգ տասը վայրկեան անշարժ մնաց:

* * *

Նիհալ դուռը բացաւ և նէտրէթը եղբօրը հետ տեսնելով, ուրախութենէն ու հիացումէն բացազանչութիւն մը ըրաւ: Այս ժամանման առթած ուրախութիւնը, ակնթարթի մը մէջ, ամբողջ տունը համակեց: Սանդուղներէն իջնող և դէպի դուռը ուղղուած ոտնաձայներ յտուեցան: Մուսլլա, կիսամերկ բաց գոյն վայելուչ հագուստներ հագած, ուրախ ու ժպտադէմ՝ երեւցաւ. առ ի քաղաքավարութիւն համբուրուեցան ու յետոյ, խոր ու ուշադիր նայուածքներով մէկգմէկ զննեցին:

Մուսլլա անոր արդուզարդը քննադատել կը ջանար. մինչ նէտրէթ գրեթէ հարսնիքի զգեստներով

հիւր ընդունող այս խենդուկ աղջկան պճնասիրութեան չափազանցութիւնները կը դիտէր: Այս ակնարկներու իմաստին թափանցող Նիհատ, գլուխը Մուսլլային դարձուց ու քիչ մը խորհրդաւոր կերպով հարցուց.

- Տե՛ղ մը պիտի երթայիք:
- Ո՛չ... Քէնան պէյին հետ նստած էինք:
- Հո՞ս է Քէնանը:

Նոյն միջոցին, բժիշկին տրտում ու տփոյն դէմքը տեսնուեցաւ, որուն ներկայութեանը ամէնքը լռեցին: Նէտրէթի մեծ ու խորին յարգանքը, անցեալի տխուր յիշատակներովը ապրող իր զգայուն սրտին սիրոյ զգացումներուն միացան:

Նէտրէթ, այլևս այսօր, յաւիտենական հաւատարմութեամբ մը տակաւին իր մայրը սիրող այս մարդը, անցեալի արատաբեր կասկածներէ զերծ կը տեսնէր ու կը զգար թէ հիմա աւելի շատ, աւելի բարձր սիրով մը կը սիրէր զայն:

Նէժատ, այս անակնկալ ուրախութեան առթած յուզումէն՝ տղուն դառնալով ըսաւ.

- Շա՛տ շնորհակալ եմ, Նիհա՛տ:
- Յետոյ խօսքը աղջկանը ուղղելով, աւելցուց.
- Քէնանը առանձին ձգեցիք վերը...

Նիհատ, հօրը նպատակը անմիջապէս հասկցաւ. ժպտադէմ մօտենալով նէտրէթին, ըսաւ.

- Կաթնեղբայրս Քէնանը ձեզի ներկայացնեմ, եթէ կը թոյլատրէք... ազարակ եղած միջոցիս, իր մասին խօսած եմ ձեզի, կարծեմ:

Նէտրէթ անտարբեր կերպով մը պատասխանեց.

- Չեմ գիտեր, չեմ յիշեր... սակայն հարցնելու ի՛նչ պէտք կայ. ձեզի մօտիկ եղողներուն հանդէպ նոյն յարգանքը ունենալս բնական է, չէ՞:

Հինգ վայրկեան վերջ, Քէնան սենեակը կը մտնէր:

Նէժատ, ուրախ զուարթ, օրերէ ի վեր սնուցած բազմանքներու նախատօնակը կը կատարէր այս երկու երիտասարդները իրարու ներկայացնելով և միանգամայն Նիհատէն մեծ վրէժ մը լուծած ըլլալու գոհունակութիւնը կը զգար:

Փաստաբանը, այս զուգարդիպութեան հանդէպ անօրինակ յուզման ու գայրոյթի ենթարկուած, ըմբոստանալ ուզեց: Այս վայրկեանին Քէնանի ներկայութիւնը բոլորովին աւելորդ էր. իրմէ ծածուկ նպատակի մը գոյութիւնը կուսեց, կարծես. հօրը յաղթական կեցուածքը դիտելով մէկտեղ կը մտածէր որ թերեւս ան, յառաջիկային, մրցակից մը ըլլար իրեն:

Նէտրէթ, իր լուրջ ու պարզ վարուելակերպով ամէնուն հետ կը տեսնուէր. մթամած գիշերուայ մը յաջորդող լուսաւոր արշալոյսի մը պէս, ուրախութիւն բերած էր հիւրասրահին:

Քէնան, ատենէ մը ի վեր, բժիշկին կողմէ շատ գովեստով խօսուած այս ազջկայ դիմացը գրեթէ ապուշցած, ինքզինքէն ելած էր:

Անոր այս վիճակը Նիհատին ուշադրութիւնը զբաւած ըլլալով, պատրուակով մը կամաց կամաց մօտեցաւ անոր և ուրիշներէն անխելի, մեղմ ձայնով մը հարցուց.

— Ի՞նչպէս կը գտնէք Նէտրէթը, կարծեմ թէ կը սկսիք հմայուիլ անով:

Քէնան, շրթունքներու վրայ յայտնուող թեթեւ ժպիտով մը, պատասխանեց.

— Արդարեւ տարօրինակ ազդեցութեան մը ներքեւն եմ. ձայնին մէջ երաժշտական տրամուծիւն մը, աչքերուն մէջ դիւթիչ և խորհրդաւոր իմաստ մը կայ, մարդ շարունակ լրեն նայիլ ու զինքը մտիկ

ընել կ'ուզէ... իսկապէս շատ հրապուրիչ, շատ վտանգաւոր է:

— Օ՛հ... Քէնան, պէտք է վախճալ քեզմէ:

— Ո՛չ, հոգի՛ս, պարզապէս տպաւորութիւնս ու ցիտոզութիւններս կ'ըսեմ. գուն չհարցուցի՞ր:

Մուսալլայի խոշոր կանաչ աչքերը մեծ ուշադրութեամբ, այս երկու այրերը կը հետապնդէին: Հասկցած էր որ անոնք կը հետաքրքրուէին Նէտրէթով. իր գեղեցկութեան հետ անբաղդատելի այս նուաղկոտ, տոգոյն ու մարելու մօտ եղող այս աղջկան տրուած նախընտրութեանը չկարենալով հանդուրժել, ոտքի ելաւ և մարմնոյն ու պերճանքի շքեղութիւնը ցուցադրող հպարտ նազանքով մը Նիհատին մօտեցաւ և թունալից հեգնանքով իր ակնարկները Նէտրէթին ուղղելով, երկու երիտասարդներուն փսփսաց.

— Հոգիով հիւանդ այս աղջկայ ամբողջ տրամուծիւնն ու թշուառութիւնը, համաճարակ ախտի մը պէս, նորէն սկսաւ բոլորիս վրայ ազդել. շիտակը ըսեմ, Նիհատ, այս քու նոր գարմուհիդ սիրտս կը նեղէ... կ'աղաչեմ, հօրդ հետ առանձին ձգէ զինքը. անոնք անցեալի յիշատակները քրքրելով՝ թող մոռնան մեզ:

Քէնան, զարմացած, Մուսալլային կը նայէր. մինչ Նիհատ կը զգար թէ այս անպատշաճ խօսքերու պոռթկումին հանդէպ իր համբերութիւնը կը սպառուէր:

Քէնան ակամայ կը հարցնէր.

— Ի՞նչպէս անցեալ, Նէտրէթ հանրմը և ձեր հայրը ի՞նչ անցեալ կրնան ունեցած ըլլալ:

Մուսալլան խորհրդաւոր ծիծաղով մը պատասխանեց.

— Գեղեցիկ վէպ մը, սիրոյ առասպել մը...

Փաստաբանը զսպել ջանացած զայրոյթի սաստկութենէն շրթունքը խածնելով պոռթկաց.

— Մուսլլա... Մուսլլա... հօրս անցեալին հանդէպ յարգանք կը պահանջեմ:

Երիտասարդունին, անտարբեր ու գոռոզ ձեւով մը ուսերը ցնցելով Քէնանին նայեցաւ. այս նայուածքովը՝ «եթէ այս աղջկան շատ կը հաւնիս, անոր ինքնութիւնը ինձմէ հասկցիր» ըսել կ'ուզէր:

Նէտրէթ, Նէժատ ու Նիհալ առանձնացած էին. Նէժատ կ'ոգեւորէր զանոնք բացատրելով ո՞ր, յետ այսու, միասին և երջանիկ կեանք մը պիտի անցընեն. կ'երեւակայէր այսպէս կեանքի մը իրեն պատճառելիք հաճոյքն ու բախտաւորութիւնը. սակայն խօսած միջոցին, աչքերը միշտ Նէտրէթի պարանոցին կառչած կը մնային. միջոց մը, աւելի ուշադիր նայեցաւ, խեղճ Ֆիքրէթի աղջիկը, ասոր պատճառը՝ հասկցած ըլլալով, խոր հառաչանքով մը և մեղմօրէն ըսած էր.

— Մայրս...

Յանկարծ գիշերային պաղ ու ձիւնախառն մրրիկ մը Նէժատի ուղեղը սառեցուց... այս աղջամղջային գիշերուան ահասփիւռ ծոցէն, կարմիր արիւնոտ թափ մը կ'երկարէր:

Կամաց կամաց գլուխը կը քեցաւ. արտեւանունքներու ծայրը երկու կաթիլ արցունք կը դողդղար: Դժուար դրութեան մը մատնուած Նէտրէթ, ձեռքը մեղմօրէն անոր ճակտին վրայ դրաւ. այլեւս կ'ուզէր հասկցնել թէ անոր յուզումներուն ու վիշտերուն պիտի մասնակցի: Այս հպումը ցնցելով խոր քունէն արթնցուցած էր զինքը. իր հոգիին խաղաղութիւն ու մխիթարութիւն պարգեւող զոյգ մը սեւ աչքերու գուրգուրոտ ակնարկներու իր վրայ դողդղալը տեսած և նոյն ատեն վշտագին ժպիտով մը անոնց մինչեւ խորերը նայած... նայած էր... կարծես թէ այդ վայրկեանին այս երկու սիրտերը նոյն ցաւերով, նոյն կսկիծներով իրարու կը միանային:

* * *

Շատ հաճոյալի էր այն գիշերը: Մուսլլան, դաշնամուրի վրայ շատ ընտիր կտորներ նուագեց. Քէնան ջուրթակով անոր կ'ընկերանար, Նիհատն ալ քիչ մը մանսօլին կը խառնչտկէր:

Նէտրէթ, լուռ ու ազդուած, գրաւիչ հոսանքով մը մերթ գոռացող, մերթ մարող ու լուծուող այդ երաժշտութիւնը կ'ունկնդրէր: Քիչ յետոյ, իր կարգին, հրաւիրող ազգարար ձայնը զինքը աթոռակին վրայ նստեցուցած էր. «Բափսօտի»էն կտոր մը նուագելու փափաքը կը յայտնէին. ասիկա մասնանաւորապէս Նիհատ կը փափաքէր, մանկամարդունին իր սովորական բնականութիւնն ու պարզութիւնը պահելով ուզուած կտորը աւարտելէ յետոյ աղուոր վալս մը նուագեց: Քէնան՝ Մուսլլային հետ, իսկ Նիհատն ալ՝ քրոջը հետ պարեցին:

Իժիշկը, թիկնաթուռի մը փափուկ բարձերուն վրայ ընկողմանած ու ժպտագէժ պարողները կը դիտէր: Ամէնքը նստելէ վերջ, միջոց մը ոտքի ելլելով ըսաւ.

— Ներեցէ՛ք, տղաք, ձեզմէ բան մը պիտի խնդրեմ, բայց չըլլայ թէ նեղուիք. ձերերու այսպիսի անպատշաճութիւնները ներելի և ընդունելի են չէ՛. հին երգ մը կարծեմ:

Ամէնքը մէկէն.

— Հրաման ըրէ՛ք... ըսելով լուռ, մտիկ կ'ընէին:

Նէժատ, խաւաքարտի վրայ գրած՝ երկարեց. «Չեմ գիտեր թէ հաճոյքն ու երջանկութիւնը ո՞րն է այս կեանքին»:

Նիհալ ոտքի ելաւ, խօսքը եղբօրը ուղղելով, ըսաւ.

— Արեւելեան եղանակներու մէջ փնտոենք, եղբա՛յր:

Բժիշկը այս անգամ Նէտրէթէն խնդրեց.

— Ասիկա դո՛ւն նուագէ, Նէտրէթ... Նիհատին ձայնը գեղեցիկ է, ան ալ քեզի թող ընկերանայ:

Մանկամարդուհին յարզանքով խոնարհութիւն մը ըրաւ. սրտին մէջ դառն կսկիծ մը կար. այս պահուն, ան՝ իր մայրը պիտի ներկայացնէր, անոր կրած ներքին տառապանքներու ամէնէն թունաւոր մասը իրեն բաժին ինկած էր:

Աթոռակին վրայ, դաշնամուրին ուղղուեցաւ, եղանակը գտնուած էր. Նիհատ, մանտօլինը առաւ. ծանր ու տխուր ձայնով մը սկսաւ երգել:

Նէժատի աչքերը հեռաւոր անցեալին մէջ խորասուզուած էին. անցեալ կեանքի ամենաերջանիկ, ամենաջերմ մէկ գիշերը վերապրեցնող այս երգը, խեղճ ֆիքրէթի աղջիկէն հիմա լսած միջոցին, ընդարձակ սրահի բանաստեղծութեամբ համակուած մթնոլորտին մէջ, կապուագոյն թաւիչ հագած, տըժգոյն ու նուրբ կին մը կը փնտուէր: Այս կինը... իր վշտաբեկ սրտի ամբողջ բողոքի, ճիչերու, ողբերու ամէնէն սրտակեղէք արտայայտութիւնը, թունաւոր յուսահատութիւններու, խորտակուած յոյսերու անհետացումներովը լի հեծեծանքները ձայնին կը միացընէր:

Նէտրէթ, երբ դաշնամուրէն հեռացաւ, շատ յուզուած էր. այտերուն գոյնը անհետացած, սեւ աչքերը խոր տրտմութիւնով մը ծածկուած էին. ամէնքը անորոշ ազդեցութիւններու տակ ճնշուած ու լռած էին: Նիհատ անոր մօտենալով կը հարցնէր.

— Ի՞նչ եղաւ ձեզի... Ի՞նչ ունիք... անհանգիստ էք արդեօք, Նէտրէթ հանրմ:

Մանկամարդուհին ինքզինքը հաւաքել ջանալով.

— Ո՛չ... կ'ըսէր, բան մը չունիմ, ընդհակառակն, այս գիշեր շատ երջանիկ եմ... այս երգը շատ յուզիչ վէպի մը մէջ կարդացած էի...

— Վէպի՞ մը մէջ:

— Այո՛... սիրտէն հիւանդ, մահուան դատապարտուած կին մը... իր կեանքի վախճանէն առաջ, իբր վերջին հրաժեշտ, այս կտորը դաշնամուրին վրայ կը նուագէ և իր սիրած, շատ սիրած այր մարդը, իր կնոջ ու երկու զաւակներուն հետ ունկնդրած միջոցին կուլայ:

Բժիշկը իրար անցած, դողդոջուն ձայնով մը կը պաղատէր.

— Շարունակէ՛, Նէտրէթ... շարունակէ՛:

— Յետոյ, այս կինը անհանդուրժելի տառապանքներու կը մատնուի. իր անբիծ ու մաքուր սիրովը զինքը կ'ամբաստանեն. այս մեղքը միշտ իր երեսին կը զսօրնեն: Յարաբերութենէ կը զրկեն. ոճրագործի մը պէս, ամայի լեռներու մէջտեղ, առանձին ու մեծ տան մը առաստաղին տակ, մահուան ճիրաններու դէմ մաքառելու... մաքառելու և իր սիրոյ ամենաբուռն կարօտովը ողբալու կը դատապարտեն զինքը:

Նէտրէթ վայրկեանի մը չափ լռեց. խօսելու կարողութիւնը սպառած էր:

Ամէնքը մէկէն.

— Շարունակութիւն... շարունակութիւն... ըսին:

Խեղճ աղջկայ աչքերէն սուգ ու կսկիծ կը հոսէր. մեղմ ձայնով մը ըսաւ.

— Վերջապէս... այս կինը երիտասարդութեան ամենափայլուն մէկ պահուն, կեանքին հրաժեշտ

կուտայ... սակայն իր ետին որք ու անպաշտպան
փոքրիկ աղջնակ մը կը թողու... :

Քէնան և Մուալլան, ակամայ բացագանչեցին.

— Վե՛րջը, վե՛րջը, աղջիկը ի՞նչ կ'ըլլայ:

Մանկամարդուհին, գլուխը կախեց ու հանդարտ
ձայնով մը ըսաւ:

— Վէպը ա՛լ կ'աւարտի հոս...

Խեղդող լուռութիւն մը կը ճնշէր սենեակը. ամէն-
քը սահմուկած էին:

Բժիշկը ինքզինքէն ելած ու աչքերը գոցած,
անցեալին նմանող այս պատմութեան պատճառած
յուզումներու մէջ թաղուած էր:

Մուալլա, մէկէն ի մէկ զուարթ քրքիչ մը ար-
ձակեց.

— Ա՛հ... աս ի՛նչ վիճակ է... կարծես թէ մէջ-
տեղը մեռել մը կայ. ամէն դէմքէն, ամէն նայուած-
քէն սուգ կը վազէ...: Օ՛ն ուրեմն, Քէնան պէյ,
ջութակդ առ. մահերգի նմանող Շօփէնի «Աէրէնատ»ը
նուագենք, ըսաւ:

Նէտրէթ, կամաց մը դուրս ելաւ. Նիհատ անոր
ետեւէն կը նայէր. հասկցաւ թէ Մուալլայի այդ ցա-
ւազար քրքիջը թունաւոր հեգնանքի մը պէս այս
վայրկեանի վիշտին մէջ մխուած էր:

Նոյն պահուն, բժիշկը զարմանքով ու ցաւով լի
իր ակնարկներովը Մուալլան կը զննէր. հօրը այս
յանդիմանական ակնարկին ենթարկուելու գաղափարը
խորապէս կը վիրաւորէր իր սիրտը, Նիհատ ծանր քայ-
լերով ու առանց զգացնելու խոյս տուած էր սենեակէն:

Նէտրէթ, հանդիպակաց պարապ սենեակը քաշ-
ուած, մետաքսահիւս վարագոյրներու մէջտեղէն
քամուող գիշերային խոնաւ ու զով օդին կարօտ իր
ուղեղը քիչ մը հանդարտեցնել կ'ուզէր: Գլուխը պա-

տուհանին եզերքը կրթնցուցած ու ինքզինքէն ելած,
երեւակայութիւններու մէջ թաղուած էր:

Իր կեանքին մէջ այս գիշերուան անմոռանալի
ըլլալը և սակայն այս գիշերներու, այս հաւաքոյթ-
ներու շարունակութիւնը իր սրտին սպառնացող ու-
ժին ալ աւելի սաստկանալուն օգնելէ զատ բանի մըն
ալ չէր ծառայեր:

Մուալլայի ատելութիւնը հրաւիրել, «անոր» սի-
րոյ ողորմութեանը զիջանել, ուրիշին պատկանող
այն սիրտէն փոքրիկ քաժին մը ակնկալել և այս կեր-
պով իր արժանապատուութիւնը անարգուած, ստոր-
նացած տեսնել... ահա՛, ասոնք էին իր մտածում-
ները, որոնք կը խեղդէին զինքը:

Յանկարծ ձեռքը կուրծքին տարաւ. կարծես թէ
անկէ բան մը փրցնել ու նետել կ'ուզէր, երբ նոյն
վայրկեանին քովէն մեղմ ձայն մը իրեն կ'ըսէր.

— Նէտրէթ հանրմ, այս գիշեր դուք շատ ան-
հանգիստ եղաք:

Դեռատի աղջիկը դարձաւ նայեցաւ...

Նիհատ ճիշդ քոֆէ էր. աչքերուն մէջ անհասկը-
նալի իմաստ մը կար. կարծես թէ յուզումէն կը դո-
ղար ձայնը:

Նէտրէթ, քիչ մը շուարուն անոր երեսը նայե-
ցաւ ու ըսաւ.

— Այստեղ շատ զով է...

Սակայն, ասիկա պատասխան մը չէր...: Յետոյ
մազերը յարդարելով աւելցուց.

— Հոֆէ ալ մազերս տարտղնեց...

Երկուքն ալ լուած էին... Նէտրէթ հայելիին առ-
ջեւ անցաւ. փաստաբանը թեւերը խաչաձեւած, հան-
դարտ նայուածքով մը կը դիտէր զայն. դեռատի
աղջիկը գլխուն յարդարանքը աւարտելէն յետոյ,
տակաւին նոյն դիրքին մէջ սպասող Նիհատին նայե-
լով ըսաւ.

— Ախ... ես շատ վշտահար եմ. իմ ներկայու-
թիւնս ձեզի տրտմութիւն ու թախիծ կը պատճառէ,
այնպէս չէ՛:

— Ընդհակառակն... մարդ ձեր ներկայութեանը
ամենաբարձր զգացումներու պարգեւած տենչերովը,
կեանքէն շատ վեր բարձրանալ կ'ուզէ:

Մէկէն ի մէկ նէտրէթի աչքերուն մէջ սեւ բոց մը
փայլատակեց և սակայն իր երկար թարթիչները ան-
միջապէս այդ լոյսը արգիւեց: Մէկ վայրկեանի մէջ
նորէն այս աչքերու ամբողջ լոյսերը մարած և գի-
շերուան մը պէս մութ ու առանց արտայայտութեան
մնացած էին. շրթունքին վրայ հպարտ ու անփոյթ
ժպիտ մը կար: Մեղմօրէն ըսաւ.

— Ձեր այս չափազանց համակրութեան համար
չնորհակալ եմ:

Այդ միջոցին, Բէնան ներս մտնելով կ'ըսէր.

— Սրահը շատ տաք է...

Նիհատ, իր զգացած սրտնեղութիւնը առանց
ծածկելու նէտրէթին նայեցաւ. վերջինս պատուհա-
նին առջեւն էր, աչքերը խաւարին ուղղած, լուռ ու
մտածկոտ:

Բէնան, միւս բաց պատուհանին մօտ գնաց և
մութը դիտելով տարուած, անշարժ և խորհրդաւոր
այս աղջկան նայեցաւ. անոր ներկայութիւնը դիմա-
ցինին յարգանք պարտադրող ծանր ուժով մը լե-
ցուն էր:

Երիտասարդը, քանի մը վայրկեան մութը դի-
տելէ յետոյ, կամաց մը ըսաւ.

— Ի՛նչ գեղեցիկ գիշեր...

Կարծես թէ խաւարը քնացնող խորհրդաւոր բա-
նաստեղծութիւն մը, երկինքէն հեղուկ մելամաղձո-
տութիւն մը կը հոսէր հոգիներու մէջ: Մանկամար-
դուհին, գլուխը անոր կողմը դարձուց. աչքերը տեն-

դոտ քունի մը երագներով ծածկուած էին. ակամայ
ըսաւ.

— Այո՛... այնպէս բանաստեղծութիւն մը որ ..
մինակ լեզու չունի:

Նիհատ պատասխանեց.

— Երբեմն լուութիւնը՝ ամենապերճախօս լեզուէն
աւելի որոշ, աւելի իմաստալից խորհուրդներ կը պա-
րունակէ, կարծեմ:

Նոյն պահուն, սենեակին մէջ ջղային, սուր ու
չոր ձայն մը բարձրացաւ.

— Ինչո՞ւ համար բոլորդ ալ իրարու հետեւելով
հոս հաւաքուեցաք. կ'երեւի չէք ըմբռներ թէ նէտ-
րէթ հանրմը անհանգիստ կ'ընէք:

Նէտրէթ շուարած, այս յիմար աղջկան կը նա-
յէր: Բէնան խնդալով յարեց.

— Կ'երեւի թէ Մուալլա հանրմը մեզ քաղաքա-
վարութեամբ կը վռնտէ ասկէ:

Նիհատին աչքերը ցատում կը ժայթքէին. խօսքը
նէտրէթին ուղղելու ձեւով մը ըսաւ.

— Մուալլան երբեմն իր խօսածը չգիտնալու աս-
տիճան կը ջղայնանայ, բանի տեղ մի դնէք:

Մուալլայի կանաչ աչքերէն բոցեր փայլատակե-
ցան. գլուխը աջ ու ձախ երերցնելով, ծանր ու խեղ-
դուած ձայնով մը ըսաւ.

— Նիհատ, խօսքերուդ նպատակը կը հասկնամ.
ասոր վրէժը պիտի առնեմ քեզմէ:

Յետոյ աթոռին վրայ նստաւ: Հիմա սենեակին
մէջ միայն երկուքը մնացած էին: Նէտրէթ, առանց
բան մը խօսելու կը նայէր անոր. տարակոյս չկար որ
Նիհատը իրմէ կը նախանձէր:

Մուալլա, բարկութիւնով հովհարը կը շարժէր.
կուրծքը ուժգնօրէն կ'ելեւէջէր. շրթունքին վրայ
հեգնական ժպիտով մը, մէկէն ի մէկ ըսաւ.

— Նէտրէթ հանրմ... այրերու մասին ի՞նչ է ձեր կարծիքը:

Այս հարցումը վայրկեան մը մտածել տուաւ Նէտրէթին. յետոյ անփութօրէն ուսերը ցնցելով պատասխանեց.

— Գրեթէ ոչինչ... որովհետեւ անոնցմով զբաղելու համար տակաւին յարմար ժամանակը չգտայ... Թերեւս ասկէ վերջ... ॥

— Ասկէ վե՞րջ... ուրեմն զէնքերուդ լաւ ընտրութեանը ուշագիր եղիր:

Նէտրէթ քրքջալիւր խնդաց:

— Ասոնք զէ՞նք են, ըսաւ. մինչդեռ իմ ամենապարզ պաշտպանս եղող կանացի արժանապատուութենէս զատ ու է բան մը չունենալս դուք չէ՞ք տեսներ:

— Ո...՛չ. այդ չի բաւեր. անոնք պայքարը շատ կը սիրեն... շարունակ անոնց հետ իյնալու է, անոնց սիրտերը կոխկրտելու է, անոնց զգացումները խաղալիկ դարձնելու է, անոնց նախանձը արթնցնելու է, բացարձակապէս կարեկցելու չէ անոնց. վերջապէս, ամէն բան ընելու է, աշխարհի ամբողջ տանջանքներու և տառապանքներու զգացումները անոնց հոգիներու մէջ լեցնելու է:

Նէտրէթ քրքիջ մը եւս ձգեց.

— Մեղք է, հոգիս, մեղք է, այսքան անգութ մի ըլլաք. ես անոնց հետ պայքարելու գաղափարը չունենալուս համար երբեք այդպէս չեմ մտածեր:

— Ա՛խ... դուք ինձի չափ փորձառու չըլլալնուդ համար այդպէս կը խօսիք:

— Փորձառու իսկ ըլլամ, նորէն այդպէս չեմ մտածեր. անոնց հանդէպ ցոյց տալիք թշնամութիւնս հպարտութիւնով ու անտարբերութեամբ կը ծածկեմ ու այլեւս երբե՛ք իրենցմով զբաղելու պէտք չեմ զգար:

— Օ՛ֆ... այսպէս մի՛ ըսէք, Նէտրէթ հանրմ, այսպէս մի ըսէք. դուք փորձառութիւն չունիք, չէք գիտեր:

Աչքերուն խորը նախանձի կայծեր կային... խօսքը շարունակելով, ըսաւ.

— Զեզի կը հարցնեմ, աս Նիհատը կարեկցութեան արժանի՞ է. դուք ալ տեսաք թէ այս մարդը ի՞նչ մոլեգին սիրով մը կը սիրէր զիս. եղբօրս երթալու նպատակէս զիս հրաժարեցնելու համար որչա՛փ արցունք թափեց, չէք գիտեր որչա՛փ աղաչեց... սակայն, յետոյ, այս ճամբորդութեան խընդիրը յետաձգուելուն վրայ, իրեն հանդէպ ցոյց տուած անտարբերութեանս աստիճանը մեղմացած օրը, այս մարդը, ինքնահաւան, դժուարահաճ մարդ մը դարձաւ այլեւս. ասոր ի՞նչ կ'ըսէք: Դիրքիս փոփոխութիւնը, աւելի ճիշդ վերաբերումիս չափազանցութիւնը սիրոյ արժէքը կորսնցնել տուին անոր աչքին ու սկսաւ ինձի գէ՛մ գոռոզ, ամբարտաւան դիրք մը բռնել. մինչդեռ, եթէ ես վաղը քիչ մը դժուարահաճութիւն ցոյց տամ, քիչ մը իրմէ հեռանալ ուզեմ, միեւնոյն քծինքներն ու ցոյցերը և անոնց յաջորդող տրտունջներն ու արցունքները դարձեալ երեւան պիտի դան: Եթէ Բէնանին աննշան մեծարանք մը, գաղտնի սիրոյ յոյս մը թելադրելու փորձ մը ընեմ, անմիջապէս նախանձ, անզուսպ պոռթկում մը, ամէն վայրկեան յարաձուռ սաստկութեամբ նոր սիրոյ մը կրակ ու բոց տեսարանները նորէն պիտի բացուին:

Զուարթօրէն թիկնաթողին կրթնեցաւ և ծաղրանքով ըսաւ.

— Ապո՛ւշ, կ'ըսէր, կը կարծէ թէ իրեն հանդէպ անզուսպ սէր մը ունիմ... իրեն պէս...:

Մուսլլայի դիմացը, թեւերը բազկաթողին կրթնցուցած, յուզումի, ցաւի ու զարմա՛քի տարբեր

տարբեր ազդեցութեանց ենթարկուած նէտրէթը, ա-
կամայ շարժումով մը ձեռքը ճակտին տարաւ. հո-
գին մէջ թուլութիւն մը կար:

Կը փափաքէր որ ան հոս եղած ըլլար ու լսէր իր
ցանկութեանց միակ նպատակակէտը եղող իր սիրած
կնոջ՝ իր մասին ըսածները... զգացումները կատաղո-
րէն ըմբոստանալ կը սկսէին. ըսել է, անոր ձեռքե-
րուն մէջ պատառ պատառ ըլլալիք սիրտը իր ափին
մէջ սեղմելով, ոտքերուն տակ ճզմելով ոչնչացնել ու
ազատել... այս կարճ միջոցին առթած երեւակայու-
թիւններէն նշան մը անգամ չձգել, իր կեանքի այս
դառն յիշատակէն իր սրտին մէջ ամէն հետք ջնջել ու
ամէն բանէ քաշուել, չէզոքանալ կը փափաքէր:

Գալով Նիհատին, ան, նէտրէթի վճիռին բոլորո-
վին հակառակ մտածումներով, ապաշաւի տաժանք-
ներով կը տանջուէր: Իր վիճակը ոչ ոքի չայտնելու
ցաւէն ընկճուած, այլեւս Մուսլլայի օրէ օր աւելի
շեշտուած ընթացքը, ամէն վայրկեան, երեսին ըն-
դունած զգաստացուցիչ ապտակի մը պէս, գլխու
պտոյտ կը պատճառէր իրեն. հօրը ծանր ու լուռ
նայուածքներուն ներքեւ անյոյս հեծեծանքի պահեր
կ'ունենար ու անոր այդ յաղթական նայուածքներու
տակ զղում յայտնելու իր բոլոր բաղձանքները կ'ո-
չընչանային, համարձակութիւնը կը չքանար:

Նէտրէթը այլեւս կը սկսէր անոր երեւակայու-
թեան քաղցր ու արբեցնող սղբերը դառնալ. ամէն
օր, իր աչքին, անխախտ ուժով մը բարձրացող անոր
գոյութիւնը, ցարգ իրեն անձանօթ մնացած կարգ մը
վեհ զգացումներով, իր սիրտը կը լեցնէր: Անոր
կողմէ ներում չստանալու մտատանջութիւնը, իր
միտքը քայքայող ահուելի տանջանքներու կ'ենթար-
կէր զինքը, որովհետեւ Մուսլլան, նէտրէթի մասին

հարկ եղած տեղեկութիւնները առած, այն գիշեր,
ազարակին մէջ հօրը հետ ունեցած վիճարանութիւնը
ամբողջովին լսած և բոլոր մանրամասնութեամբ
պատմած էր իրեն:

Եղելութիւնը, Մուսլլայէն հասկցած օրէն ի վեր,
Նիհատի սրտին մէջ ճեղք մը գոյացեր էր, որ երթա-
լով կը մեծնար, կոտտացող վէրքի մը կը վերածուէր
ու կը տանջէր զինքը. անդարմանելի սխալի մը ան-
հանդուրժելի տանջանք մը յաջորդած էր որ ամէն
վայրկեան թոյն կը կաթեցնէր նէտրէթի ներկայու-
թեան պատճառելիք հաճոյքին ու երջանկութեան:

Այս ամէնքէն անտեղեկ Մուսլլա, իր յարափո-
փոյս ցանկութիւններուն համաձայն դարձգարձիկ,
անկայուն, նախանձոտ, պճնասէր, հաճոյամու, թի-
թեռնիկի մը զուարթութեամբ Գէնանի սիրտը հրա-
պուրել կ'աշխատէր. մինչդեռ Գէնան, անոր այս սի-
րազեղումներուն հանդէպ հաստատակամութեամբ կը
տոկար. կաթնեղբօր ապագայ կնոջը յարդանքէ տար-
բեր զգացում մը սնուցանելու մեծագոյն ստորնու-
թիւնը միտքէն իսկ չէր անցնէր. կարելի եղածին չափ
անոր հետ դէմ առ դէմ խօսելէ կը զգուշանար. անոր
աչքերու մագնիսական զրաւչութենէն խուսափելու
համար հետը խօսած միջոցին կը ջանար երեսը չնա-
յիլ. անոր մարմինն մօտաւորութենէն. անոր շնած
օդին մէջ ապրելէն անորոջ զգացումով մը կը սոս-
կար. ասով մէկտեղ, նէտրէթը տեսած գիշերէն վերջ,
գինովցնող շոգիի մը պէս զինքը շրջապատող ու սեղ-
մող այս յուզումն ու վախը ցրուած էին:

* * *

Նէժատ՝ Նէտրէթի ու Քէնանի մասին իր ծրագիրը յետաձգելու կողմնակից չէր այլեւս. անմիջական գործադրութեան համար, նախապէս Քէնանի կարծիքն ու որոշումը հասկնալէ վերջ Նէտրէթի հետն ալ տեսնուելու վճիռ տալու սիրական օրհրէթի աղջիկը, այս կերպով բախտաւորուած տեսնելով կեանքի վերջին միտքարուածները գտնելու կը ցանկար:

Արդէն Քէնանը մանկութենէն ի վեր շատ կը սիրէր, պատկանած ընտանիքին հանդէպ ալ խորունկ սէր ու յարգանք մը ունէր: Քէնան լաւ մեծցած ու հասած, հիմնական դաստիարակութիւն ու կրթութիւն առած երիտասարդ մըն էր. միեւնոյն ատեն իր մօրը մէկ հատիկ զաւակն էր: Հայրը, շատ տարիներ առաջ մեռած, իր իսկական հօրը պէս զինքը սիրող Նէժատի հսկողութեան տակ մեծցած, շարունակ Նիհալի ու Նիհատի հետ միասին եղած էր: Նիհալի ու Քէնանի մայրերը, իրենց տեւական բարեկամութիւնը նուիրագործելու համար իրենց զաւակները փոխանակելու համաձայնած ու այս կերպով Քէնան ու Նիհալն ալ կաթնքոյր ու կաթնեղբայր եղած էին իրարու:

Օր մը, բժիշկը, իր առանձնարանը կանչեց Քէնանը: Դուռը գոցեց և հանդարտ ու զգուշաւոր ձայնով մը իր ամբողջ նպատակը պարզեց անոր: Քէնան՝ անակնկալ բարիքներով յանկարծ ողողուած մարդու մը նման ապշած մնաց պահ մը, յետոյ, խորին երախտագիտութեամբ մը իր կաթնհօր ձեռքերուն փարեցաւ:

Նէժատ, խնդալով աւելցուց.

— Խոստացիր որ յետոյ չպիտի յուսալքուիս, որովհետեւ տակաւին Նէտրէթի կարծիքին չեմ դի-

մած. առաջարկիս՝ հակառակ պատասխան մը առնելու հաւանականութիւնն ալ կայ, հետեւաբար, մի մոռնար թէ նախապէս քու քուէիդ ու կարծիքիդ դիմելս քնական անհրաժեշտութիւն մըն էր:

Նէտրէթ, զինքը ընկճող վիշտը ծածկելու համար, իր անվրդով տունը քաշուած էր. առանձնութեան պէտքը զգալի էր: Սէրն ու ցանկութիւնը իրեն համար, անհետացած էր աշխարհէն. անհուն պարապութիւն մը կը շրջապատէր զինքը. սակայն, իր կսկիծն ու վիշտը, որ և է կերպով ոչ մէկուն չյայտնելու համար իր ամբողջ կորովը կը գործածէր: Մուսալլայի հետ վերջին տեսակցութենէն յետոյ, անուելի պայքարի մը սկսած էր իր սրտին հետ. ասոր գերիշխանութիւնը տապալելու, զայն իր գաղտնի սրտոյն յաւիտենապէս լուռ գերեզման մը ընելու, և այս գաղտնիքը իր կեանքին մինչեւ վերջը ոչ ոքի չյայտնելու համար երդուած, ուխտած էր:

Շիշլիէն վերագառնալէ վերջ, Նիհալն ու բժիշկը յաճախակի այցելած էին իրեն. Նէտրէթ տաճաւին չէր յաջողած Նէժատի հետ առանձին տեսնուիլ. որչա՛փ կը փափաքէր իր մօրը մասին անոր հետ խօսիլ, իրենց միջեւ միշտ գաղտնի պահուած անցեալի գոց էջերը բանալ, արցունքով զրուած յուշատետրին էջերը միասին կարդալ: Անոր հետ միասին սուգի կսկիծով մը լալը իրեն համար միտքարուածներն մը կը թուէր:

Նէտրէթի այս իղձը իրագործուելու մօտ էր այլևս, քանի որ Նէժատը՝ վէյսէլ պապայի միջոցով հաղորդած էր թէ առանձին պիտի այցելէր: Ու Նէտրէթ, անոր կը սպասէր այսօր. տան ամէն մէկ անկիւնը անոր համար կը պատրաստէր, ծաղկանօթներու մէջ նոր ծաղիկներ կը տնկէր, սրահը խնամով կը մաք-

րէր, պարտէզը կ'աւելէր, կարծես թէ պաշտօնական ընդունելութիւն մը կատարել կ'ուզէր:

Առաջին անգամ ըլլալով, այսօր, մօրը նկարը մէջտեղ կը հանէր. պարտէզէն հաւաքած ձերմակ յասմիկներով պսակ մը շինած՝ անոր բօլորտիքը անցուցած ու զայն մասնաւոր երկիւղածութիւնով մը դաշնամուրին վրայ զետեղած միջոցին... առաջին անգամ, ի տես այս նկարին, բժիշկին յուզումն ու տպաւորումը կ'երեւակայէր ու կը սարսուար:

Արգարեւ, այդպէս ալ եղած էր. նէտրէթ դուռնէն զիմաւորած էր նէժատը, միասին սրահը մտած էին: Բժիշկը լայն նստարանին մէջ տեղաւորուած միջոցին զէմքը ժպտուն էր. շատ ըսելիքներ ունեցողի մը պէս նէտ էթին կը նայէր. նէտրէթ, շփացած տղու մը պէս անոր բօլորտիքը կը դառնար. զայն տեսնելու հաճոյքն ու բախտաւորութիւնը այս կերպով կ'արտայայտէր:

Միջոց մը, նէտրէթ տեսաւ որ անիկա դաշնամուրին առջեւ, ոտքի վրայ, աչքերուն ամբողջ կարօտովը, ձերմակ յասմիկներով շրջանակուած նկարը կը դիտէ: Սենեակը անձայն, համր տխրութեամբ մը համակուած էր. երկուքն ալ չէին համարձակեր խզել այս լուութիւնը: Նէժատ դանդաղօրէն կրկին իր տեղը նստաւ. զէմքը գունատած էր. ձեռքերը կը դողալին, շարունակ առաջը կը նայէր. իր յուզումը ծածկելու ճար մը կը փնտռէր:

Մանկամարդուհին, իր ձեռքերը մեղմօրէն անոր ձեռքերուն վրայ դրաւ. բժիշկը, լուռ ու տրտում անոր նայեցաւ ու ժպտեցաւ. այս ժպտին մէջ լացի մը դառնութիւնը կար. նէտրէթ, հառաչելով, ըսաւ.

— Այս վայրկեանիս, դուք շատ վիշտ ունիք...

Բժիշկը, իր յուզումը ծածկել կը ջանար.

— Ընդհակառակն, այսօր շատ գուարթ եմ, շատ ու կարեւոր ըսելիքներ ունիմ քեզի...

Նէտրէթ, զարմացած անոր նայեցաւ ու հարցուց.

— Ի՞նչ բանի մասին...

— Քու, իմ և ուրիշի մը մասին, պատասխանեց: Մանկամարդուհին, մէկ երկու վայրկեան խորասուզուած մնա է վերջ թեթեւակի ժպտեցաւ ու ըսաւ.

— Ի՞նչ տարօրինակ բան, երեք անձի վերաբերեալ կարեւոր նիւթ մը:

Թեւերը խաչաձեւեց և գրաւիչ կեցուածքով մը յարեց.

— Թոյլ կուտա՞ք որ առաջին անգամ ըլլալով, այսօր, հարցնեմ ու հասկնամ ինձի հանդէպ ձեր ցոյց տուած այսքան սիրոյ ու ինձմով այս աստիճան հետաքրքրուելնուդ պատճառը:

Նէժատ, անմիջապէս հասկցաւ իր դրութեան լիջութիւնը. ըսելիքը շուարեցաւ. ցարդ այսպիսի հարցումի մը առջեւ գտնուելու հաւանականութեանը մասին խորհած չէր. ուժգին բարախում մը կր պատրուէր իր սիրտը, կ'ըմբռնէր թէ այդ աղջկան գուհացում տալը զիւրին ալ չէ: Անոր մօրը և իրեն միջեւ տեղի ունեցած յարաբերութեանց համար, հօրը անունով իրմէ հաշիւ պահանջելու իրաւասու եղող այս աղջկայ ներկայութեանը, այսօր խեղճ նէժատ պէյ տազնապալի պահեր անցուցած էր:

Գլուխը կախած, տխրազին ձայնով մը ըսաւ.

— Ես՝ քեզի հիմա չէ որ... փոքրիկ մանկիկ մը եղած ատենդ կը սիրէի... յետոյ, կարգ մը աղէտներ պատճառ եղան երկար ատեն իմ այստեղէն հեռանալուս ու քեզ տեսնելէ ու սիրելէ զրկուելուս:

— Ի՞նչ աղէտ...

— Իմ երկարատեւ հիւանդութիւնս... և անոր յաջորդող կնոջս մահը...

— Ի՞նչ էր ձեր հիւանդութիւնը:

— Տեսակ մը ուղեղային անգործութիւն և զգայարկութիւն. աչքերուս առջեւ շարունակ սեւ հողակոյտ մը կ'ուրուագծուէր ու ականջներս փոթորկայի գիշերուան մը խժլտութեան վը կը խուլնային:

— Ի՞նչ պատճառով ենթարկուեցաք այդ վիճակին...

— Չեմ գիտեր, ձագ՛ուկս... ա՛լ բան մը մի՛ հարցնէր: Հիմա, ներկայի մասին խօսինք, չըլլա՛ր:

— Ո՛չ. կ'ուզեմ որ այսօր միայն ձեր... անցեալին... մօրս մասին խօսակցինք:

Խեղդուկ հառաչ մը բարձրացաւ բժիշկին սրտէն, կերկեր ու պաղատողին ձայնը շատ սրտաշարժ էր.

— Նէտրէթ, Նէտրէթ, կեանքիս ամենամեծ մեղքին պէս, շարունակ երեսիս նետուած իմ անցեալի մասին բնա՛ւ բան մը մի՛ հարցնէր ինձի. նայէ, դիմացինդ անկար և դժբախտ մըն է... մեղքցի ինձի, այս վիճակը մի՛ երկարաձգեր... շատ կը տառապիմ. վասնզի, հաւանաբար քու կասկածոտ նայուածքներուդ, թերեւս զգուանքիդ ենթարկուիմ:

— Զգուանք... ո՛չ... ոչ մէկ բան ինձի կը թելադրէ այդ զգացումը... ապահով եղէք ասոր:

Բժիշկը ձեռքերը երկարեց և պաղատագին ըսաւ.

— Ի՛նչպէս, ի՛նչպէս... պիտի համոզուի՞ս. Նէտրէթ, կեանքի մէջ անբիծ սիրոյ գոյութեանը պիտի հաւատա՞ս. խօսքերս ունկնդրած միջոցին, ներքնապէս վրաս չպիտի՞ խնդաս մտածելով որ քեզ խաբել կը ջանամ:

Նէտրէթ կուլար. արցունքոտ աչքերու ամբողջ տխրութեամբ պիշ պիշ անոր երեսը նայէր:

— Ո՛չ, ոչ, ըսաւ. ձեր խօսքերը ամբողջովին իբր ճշմարտութիւն պիտի ընդունիմ, ձեր սիրոյ սրբութեանը ես ալ ձեզի չափ վստահ պիտի ըլլամ:

— Ասոր համոզում գոյացնելու համար ի՛նչ փաստ

ունիս, Նէտրէթ, արդեօք ան խեղճ կնոջ հոգին է քեզ վստահութիւն ներշնչողը:

Նէտրէթ գլուխը երերցուց.

— Ի՛ր հոգիէն թափած դառնութիւններով, աչքերէն հոսող արցունքներով, սիրտէն կաթող արիւնովը գրուած յաւիտենական յիշատակ մը, ինձի տըրուելու համար տարիներէ ի վեր պահուած յուշատետր մը, խեղճ մայրիկիս օրագրութիւնը:

Բժիշկը գլուխը երկու ձեռքերու մէջ առած.

— Ի՛նչ կ'ըսես, Նէտրէթ, ի՛նչ կ'ըսես, ըսաւ ու հեծեց:

Սարսուղու լռութիւն մը տիրեց սենեակին մէջ. այս անդորրութեան մէջ կարծես թեւաւոր հոգիի մը թրթռուն փսփսուքը կար: Նէժատ իր արցունքոտ աչքերը Նէտրէթին ուղղելով ըսաւ.

— Ըսել է այս թանկագին յիշատակը ամէն բան հասկցուց ձեզի, այնպէս չէ՞...: Թոյլ պիտի տա՞ք որ ես ալ կարգամ զայն, Նէտրէթ:

— Բնականաբար... այլեւս ձեզի հետ միասին խորհինք, միասին զգանք, միասին խօսինք, միասին լանք ըսելու համար մեր միջեւ գտնուող գաղտնիքի վարագոյրը վերցնելու անհրաժեշտութիւնը կը զգայի. ես ամէն բան հասկցայ այլեւս, ամբողջ անցեալին տեղեկացայ. քանի որ ձեզ լացնող մշտնջենական սուգ մը կայ, ինչո՞ւ համար միասին չլանք, ինչո՞ւ մեր արցունքները իրարու չխառնենք, ինչո՞ւ միասին չվերջիչենք մայրիկս...

Բժիշկը, գլուխը ձեռքերովը սեղմած՝ կ'ունկընդդէր ու կուլար. մանկամարդունին կը շարունակէր.

— Երբ ձեր սրտին մէջ վիշտի մը ծանրութիւնը զգաք ու զայն փարատելու պէտքը ունենաք, ինձի եկէք. այդ միջոցին ինձի չափ կարեկից մէկը չէք

կրնար գտնել. ո՛չ ոք կրնայ ինծի չափ մխիթարող մը ըլլալ ձեզի:

Նէժատ գլուխը վերցնելով.

— Ճիշդ է, շատ ճիշդ է... ո՛չ մէկ բան կայ որ քու գոյութեանդ չափ զիս գրաւէ. դուն իմ պահապան հրեշտակս ես, դուն՝ ան նահատակ սուրբէն մնացած յիշատակն ես ինծի, դուն՝ փոխարինութիւնն ես իմ յուսավրէպ ու վշտաչարչար երիտասարդական սիրոյս ու բաղձանքներուս, գա՛ռնուկս. սակայն զիտնայիր թէ ի՛նչպէս կը վախնայի, ո՛րչափ կը քաշուէի քեզմէ: Ճշմարտութիւնը հասկցած օրդ իսկ, խոյս պիտի տայիր ինձմէ, պիտի անիծէիր զիս, կը կարծէի...: Կը վախնայիր որ մայրդ պիտի դատապարտես ու երբե՛ք չպիտի ներես անոր. հօրդ իրաւունքը պիտի պահանջես ինձմէ, իսկ ես ոճրագործի մը պէս ստորնացած, նուաստացած պիտի երեւայի քու աչքիդ, ու այս մտածումները զիս կը սարսափեցնէին... Մինչդեռ հօրդ իրաւունքը, անոր պատուոյ իրաւունքը, որ և է կերպով, առանց արատաւորելու շարունակուող մեր մեծ սիրոյն անմեղութիւնը ես ի՛նչպէս պիտի կրնայի հաստատել: Այդքան վեհ հոգիիդ այսպէս կասկածի թոյնը ներարկելով կեանքդ քայքայելը, զգուանքդ ու ատելութիւնդ հրաւիրելը, զրժբախտ մեռեալի մը յիշատակը աղարտելը ինչի՞ պիտի ծառայէր...:

* * *

Նէտրէթն ու բժիշկը վեր ելան. Նեղուցին ստուերոտ, խաղաղ ու կապոյտ աւազանի գիմացի փոքր սենեանի մը պատուհանին առջեւ նստան: Տասը վայրկեան վերջ, Նէտրէթի անուշ ու տրտմազին ձայնը յուշատետրի առաջին տողերուն վրայ թրթռալ սկսաւ:

Նէժատի գոց աչքերու թարթիչներուն մէջէն քամուող արցունքները, գլծեր կազմած, կը հոսէին այտերն ի վար: Ամբողջ գոյո՞թիւնովը, արեւը մշտնջենապէս մարած, համատարած խաւարի մը մէջ խորասուզուած ու մելամաղձոտ, անցեալի ձայնը միայն կ'ունկնդրէր: Մերթ ինքզինքէն կ'ելլէր, մերթ յուսահատութենէն կը գալարուէր. յաճախ, ընթերցումը կ'ընդմիջէր ու բացատրութիւն կուտար Նէտրէթին:

— Ահա՛ւասիկ, ասկէ յետոյ տեղի ունեցածներուն բոլորովին անտեղեակ եմ. այդ միջոցին, հիւանդութեանս առթիւ, Ֆիքրէթին տրուած հարուածներէն ամենեւին լուր չունիմ: Անոր՝ ինձմէ փախուստը և իր ամուսնոյն երթալով ամէն բան անոր խոստովանիլը, երբ պատմեցին ինծի, զարմանքէս և յուզումէս քարացած մնացի. իմ պատճառաւ՝ անոր կրելիք տանջանքներու մասին մտածելով շատ արցունք թափեցի. սիրոյս լուռ տառապանքներուն մէջ, անոր հետ հաղորդակցութենէ զրկուիլս, օրերով զիս անյոյս ու թշուառ վիճակի մը մատնած էր:

Օր մը, հօրդ կողմէ կնոջս ուղղուած նամակի մը մէջ «անոր» շատ հիւանդ ըլլալը գրուած էր: Մէտիհան ալ, ինձմէ վրէժ լուծելու նպատակով, այս գոյժը նոյնութեամբ հաղորդած էր ինծի: Այն ատեն ես ալ, հակառակ զանազան արգելքներու, ամէն բան աչք առած, կը մտածէի ագարակը երթալ ու զինքը տեսնել: Մակայն աւա՛ղ... այս ընթացքս անոր մահը փութացնելէ զատ բանի մը չպիտի ծառայէր...: Այս եզրակացութիւնս զիս անկարողութեան ու անյուսութեան կը դատապարտէր. բուռնջներովս զանկափ շրջել կ'ուզէի, քանի որ զինքը զգեանող մահացու հիւանդութիւնը առաջին անգամ, ես գտած էի անոր կուրծքին մէջ: Ա՛խ... զինքը ազատելու համար որչա՛փ աշխատեցայ... որչա՛փ տառապեցայ. ինչե՛ր...

ինչե՛ր մտածեցի... սակայն, ան՝ այնպիսի ակտ մըն էր... : Սիրոյ ցնցումները ամէն օր աւելի կը քայքայեցին, կը սպառէին զայն, նոր նոր վէրքեր բանալով հոն. զիս՝ անդէն, անկարող ու յուսահատ վիճակի մը կը մատնէին. կարծես թէ, նախախնամութիւնը՝ դժբախտ կնոջ մը տրուելիք ճակատագրական հարուածը այս խեղճ մօրդ յատկացուցած էր : Այնչա՛փ հնազանդ, ա՛յն աստիճան խոհեմ, այնպէ՛ս քնքոյշ էր որ... սիրոյ համբերութեամբ զեղուն իր աչքերուն մէջ, միշտ սէր, կարեկցութիւն ու վեհութիւն մը կը յայտնուէր. պահեր կ'ըլլային, ուր անոր այս վիճակին հանդէպ, իր ոտքը իննալու ու լալու պահանջը կը զգայի, աղջիկս... :

Նէժատ, ուժասպառ ու ընկճուած՝ լռեց :

Նէտրէթ ընթերցումը շարունակեց. ամէն մէկ էջ դարձուելուն՝ խեղճ մարդուն դէմքին վրայ նորանոր յուզումներու հետքեր կը տեսնուէին :

Կնոջը՝ մինչեւ փրքէթին տունը երթալն ու մօրեղբօր տեղեկութիւն տալը, տարիներէ ի վեր թաքուն մնացած ցաւառիթ գաղտնիքներ էին, որոնք հիմա կը յայտնուէին իրեն : Անցեալի այս ահաւոր ողբերգութիւնը մտիկ ըրած միջոցին, ակամայ դառն նայուածքով մը Նէտրէթին նայած էր :

Մանկամարդուհին, իրեն գառնալով ըսաւ .

— Սակայն, այս մասին ձեր տիկինը ամենեւին քննադատելի չէ, որովհետեւ աս՝ անոր բնական իրաւունքն էր :

Բժիշկը գլուխը երերցնելով .

— Այդ իրաւունքը կրնար տարբեր կերպով պաշտպանել : Այդ աստիճան կամազուրկ այդ խեղճին շատ կը կարեկցէի, որովհետեւ ան՝ երբեք տիրացած չէր իմ սրտիս. հետեւաբար, ամուսնոյն կողմէ չսիրուելու աղէտին ենթարկուած այս կինը, իր կեանքին մինչեւ

վերջը, իր հոգիին մէջ այս դառն գրկանքի ծանրութիւնը չզգաց. ինձմէ ու փրքէթէն առած իր վրէժի հաճոյքովը իր մարմինը երջանկացուց : Ես՝ անոր յարգալիր մոռուլին մը ըլլալէս զատ, անոր ամենափոքր բաղձանքներն անգամ իբր հրամայական պահանջ ընդունող ստրուկ մըն էի : Կրած հոգեկան այսքան տառապանքներու փոխարէն զինքը վիրաւորող ու է ընթացք մը չունեցայ. զաւակներուս մայրը եղող այս կնոջը նիւթական նախանձելի դիրք մը ստեղծած էի. սակայն բարոյական կապ մը չունէի իրեն : Այդ մարմինի հոգին, այն ուղեղին զգացումները իմ հորիզոններէս հեռու... տարբեր հորիզոններու տակ կ'ապրէիս. մինչդեռ, իմ երեւակայութիւններուս մէջ տարբեր աշխարհներ կային. այս տարբեր աշխարհներուն արեւներու, լուսնկաներու, աստղորու ու զարուհներու մէջ կ'ապրէր իմ բանաստեղծական երեւակայութիւնս : Անոր սեւ աչքերը՝ իմ սիրային գիշերներս, անոր ժպիտները՝ իմ առաւօտեան լոյսս, անոր տըժգոյն դէմքը՝ իմ տխրադէմ լուսնկաս էին... :

Բժիշկին կուրծքը վշտագին հեծեծանքով մը կ'ուռնար. կերկեր ու նուազուն ձայնով մը շարունակեց .

— Յաւիտենապէս արեւազուրկ մնացած իմ կեանքիս դարնան թարշամիլը, այն տխրադէմ լուսնկայի լոյսին մարիլը... ճիշդ տասնրեօթի տարի եղաւ, աղջիկս... : Ահա, ես այն ատենէն ի վեր առանց զարուհի, առանց լուսնկայի, առանց արեւի կ'ապրիմ... : Իսկ հիմա... կեանքս շրջապատող սուգի խաւարի մէջէն այլեւս կամաց կամաց յուսատու աստղ մը կը ծնի. ես՝ անոր լոյսին շնորհիւ է որ կրնամ կեանքը զանազանել... Նէտրէթ, ասիկա ալ դո՛ւն ես, դո՛ւն, խեղճ փոքրիկ... :

Բժիշկին ձայնը բոլորովին մարեցաւ. ընթերցումը շարունակելու համար ձեռքով նշան ըրաւ ու գլուխը ձեռքերուն մէջ առաւ :

* * *

Ծովեզերքը, իրիկուան թախծոտ ստուերներովը պաշարուած էր. կանաչագոյն սնդուսի մը պէս ծովը անշարժ էր ու փայլուն. Գուզկունճուքի բարձունքներն ու Չամլըճայի կանաչ սյուրակները, արեւամուտի վարդագոյն շղարշներու մէջ փաթթուած, նուազուն ու երազկոտ երեւոյթ մը առած էին:

Երկուքն ալ, ուժաթափ ու յուզումնավար, անցեալի ու ներկայի միջեւ կը տարուբերուէին. անվախճան ողբերգութեան մը երազէն ընկճուած, կեանքի իրականութիւնը կը զիտէին ապշած ու շուարած: Այդքան տարիներ ե՞րբ և ի՞նչպէս անցած էին... Իրենց սրտի խորերէն բխող լուռ վիշտի մը հարցականովը իրարու նայեցան... Նէտրէթ, իր վրայ ճնշող սուգի մղձաւանջը փանելու համար իր տխրամած դէմքը քաղցր ժպիտով մը սքողել ուզեց.

— Ո...չ, բաւ, չեմ ուզեր այսպէս անյոյս տեսնել ձեզ. եթէ կը փափաքիք, քիչ մը դուրս ելլենք, պտտինք... եթէ կ'ուզէք քիչ մը զուարթացընող նիւթերու մասին խօսինք. ալլեւս անցեալի այս սեւ ու սգաւոր էջերը փակենք, չըլլա՛ր...

Նէժատ, ինքզինքը հաւաքել ջանալով.

— Այո՛, քու այս թարմ գարուն կեանքդ աչլես արցունքներով շթուենաւորենք, ձագո՛ւկս... ասկէ՛ մօրդ հոգին ալ կը տանջուի... մեր կրած տառապանքներու փոխարէն քեզ երջանիկ տեսնելու կեանքիս ամբողջ զրկանքները կը մոռցնէ, կը կարծեմ:

Յետոյ ակնոցի ապակին մաքրելով շարունակեց.

— Այսօր, քեզի հետ կարեւոր նիւթի մը մասին խօսելու եկած էի. պիտի ըսէի թէ այլիւս քու առանձնութեանդ վերջ մը տալու մտածումը իմ պարտականութիւնս է:

— Ես առանձին չեմ որ...

— Սակայն մարդս կեանքի ընկերի մը պէտք չունի, աղջիկս:

— Չեմ ուզեր հիմա այդ մասին մտածել... հեռաւոր ապագայի կ'ուզեմ յետաձգել:

— Ո՛չ... այսպէս մի ըսեր. ուրեմն քու վրայ իմ ունեցած իրաւունքս ժխտել կ'ուզես:

— Ո՛չ մէկ ատեն...

— Հետեւաբար, պիտի թոյլատրես որ քու մասիդ իմ մտածումներս յայտնեմ. կ'ուզե՞ս մօրդ հոգին ուրախացնել. վստահ եմ որ այս պահուս ան ալ մեզի հետ է, խեղճ կ'ին...: Աշխարհիս վրայ, քու երջանկութեանդ մասին ինձի չափ մտածող մէկը չեմ կրնար երեւակայել. ասիկա ինձի հրամայողը իմ անսահման սիրոյս երկնային ձայնն է, Նէ՛տրէթ. վստահէ ինձի, քու երջանկութեանդ կ'աշխատիմ ու պիտի աշխատիմ. միայն ինձի խօսք տուր թէ պիտի ընդունիս:

Նէտրէթ, քիչ մը շուարուն ու զգոյշ անոր երեսը նայեցաւ ու հարցուց.

— Որո՞ւ մասին կը խօսիք, զո՞վ ընդունիլս կը փափաքիք.

Նէժատ, մեղմ ձայնով մը.

— Ինչ մասին կը խօսիմ, և շատ սիրելիւս պատճառով իմ քեզի յարմար դատած մէկը ընդունելդ կը փափաքիմ:

Մանկամարդուհին զեփ զեղին կտրած կը դողար. սարսափելի բաբախումի մը հարուածներէն սպառող իր սրտին վերջին ճիգովը ըսաւ.

— Ասիկա դո՛ւք կը փափաքիք թէ ոչ... ան:

Իժիշկը թեթեւակի ժպտեցաւ.

— Աղջիկս, բնականաբար անոր փափաքին ու պահանջին համաձայն ասիկա քեզի յայտնելու ու քու

քուէդ ստանալու արտօնուած եմ... ապա թէ ոչ, ամուսնացողը ես չեմ, ան է:

Նէտրէթ գլուխը ծռեց, շրթունքներուն վրայ հոգեգրաւ ժպիտ մը կար. կամաց մը հարցուց.

— Այսպէս ըլլալու պարագային ձեզի աւելի՞ մօտ պիտի գտնուիմ:

Այս միամիտ հարցումը նէժատին շատ հաճելի թուեցաւ.

— Անշուշտ... անշուշտ... Նիհատէն, Նիհալէն ինչ տարբերութիւն ունի ան: Այդ պարագային թէ հարսս և թէ աղջիկս կ'ըլլաս...

Սեւ ամպ մը պատեց Նէտրէթի աչքերը. թնկերը կտորած՝ վիրաւոր թոչունի մը պէս, գլուխը ուսերուն վրայ ինկաւ:

Ակնթարթ մը առաջ սնտախ յոյսերով տարուած երեւակայութիւններէ վեր թռած միջոցին, յանկարծ ուժասպառ ու ջախջախուած, դէպի մուկ անդունդ մը զահավէժ անկումը տեսնելով անսահման վհատութեան մը դառնութիւնովը խորտակուեցաւ. քանի մը վայրկեան անշարժ կեցաւ. սրտին հետ ահաւոր պայքարի մը կը սկսէր. ու երբ գլուխը վեր բարձրացուց, անձնագոհներու յատուկ անփութութիւն մը կար անոր ակնարկներուն մէջ:

Պահ մը առաջ, այս ամուսնական առաջարկը օրրայօժար ընդունելու տրամադիր եզրող Նէտրէթ, այս առաջարկը ո՛չ թէ Նիհատի այլ ուրիշի մը մասին ըլլալը լսելուն պէս մերժելու անկարելիութիւնը ըմբռնեց. քանի որ, հակառակ պարագային բժիշկին կասկածը համոզումի կրնար փոխել և Նիհատի հանդէպ ունեցած իր սէրը յայտնուելով մինչեւ անոր ականջը պիտի հասնէր ու այս կերպով Մուսլլայի ծաղրանքներուն նշաւակ պիտի դառնար: Մտածեց. յետոյ, խեղճ նէժատը անհաճոյ դրութեան մը պիտի մատ-

նէր. նախորդէն աւելի ծանր հարուածի մը պիտի ենթարկէր զայն. կրնայ ըլլալ որ իրեն համար ան իր տղուն սէրը զբաւելու զոնողութեանց ենթարկուէր. մինչդեռ պէտք էր որ իր սէրը յաւիտենապէս ծածուկ ու անյայտ մնար, քանի որ անոր կողմէ չսիրուիր ու պիտի չսիրուի, ուրեմն պէտք էր որ ան յաւիտենապէս իր սրտին խորը թաղուած մնար:

Նէտրէթ այդ տագնապալի պահը անցնելէ յետոյ բժիշկին նայեցաւ. վերջինս՝ տեղէն ելած ու աւելի մօտեցած էր իրեն. դէմքին վրայ կասկածի հետքեր գոյացած էին. իր աչքերովը՝ անոր աչքերուն մէջ կը նայէր. հոն, խոնաւ, սեւ ամպի մը ներքեւ ծածկուելու համար դողացող կաթիլի մը... և անհետանալու համար գալարուող խորտակուած բաղձանքի մը տխրատեսիլ ստուերը կար:

Այդ պահուն, իր մտքէն անցած ցաւառիթ գաղափարի մը ազդեցութենէն սարսափահար դողացող Նէժատ, դեռաւոր աղջկան ձեռքերը բռնեց ու ըսաւ.

— Ըսէ՛... ամէն բան ըսէ ինծի... մի գուցէ անգիտակցօրէն դժբախտացնեմ քեզ... խեղճ փոքրիկ. պատմէ՛, բան մը մի պահեր. եթէ ունիս ցանկութիւն մը, որ անիրականանալի կը կարծես, մի ծածկեր ինձմէ... քեզի համար ամէն բան ընելս, նոյն իսկ հայր մը ըլլալս մոռնալով, անկէ ամէն բան, ամէն իրաւունք պահանջելու կ'երդնում:

Նէտրէթ, վերջին դառն ճիգով մը ինքզինքը ժողվեց, հպարտ ու տիրական գլուխը ուսերուն վրայ բարձրացուց. դեղերը արհամարհող հիւանդի մը թուշաւոր ժպիտը յայտնուեցաւ իր շրթունքներուն վրայ:

— Դուք սխալ կը մտածէք ու սխալ կը դատէք, ըսաւ. չեմ հասկնար թէ ինչո՞ւ համար ձեր խօսքին ընթացքը փոխելու պէտք տեսաք...: Բիչ առաջ,

ամուսնութեան առաջարկը Գէնան պէյին համար չէ՞ր. կեանքիս մէջ ուրիշ մէկը գտնելուս հաւանականութիւն չկայ. մինչեւ հիմա, սիրտս՝ ամուսինս ըլլալիք անձին համար կը պահեմ. ինչո՞ւ չէք մտածեր թէ մօրս կեանքը կրնայ օրինակելի դաս մը ըլլալ ինծի. այս տեսակէտով կրնամ ձեզ ապահովցնել, վստահ եղէք... մինակ թէ երկու օր մտածելու պատեհութիւն տուէք ինծի... Այսուհանդերձ, ըստ իս, ձեր ընտրութեան դէմ ո՛չ մէկ արգելք կայ:

Նէժատ, բացարձակապէս ապահովուած չէր. անորոշ մտատանջութիւն մը, տանջանք մը... հոգեկան տարօրինակ ճնշում մը կը զգար. Նիհատի հանպէպ աւելի սաստկացած զայրոյթ մը, Մուալլայի համար աւելի խոր ատելութիւն մը ու զզուանք մը կը զգար:

* * *

Իրիկունը, ուշ ատեն, տուն վերադարձող Նէժատ, Գէնանը մտատանջ սպասումի մը մէջ գտած էր. երկու օր վերջ տրուելիք վճռական պատասխանը շատ երկար կը թուէր այս անհամբեր երիտասարդին:

Նիհատ, կը կռահէր թէ հօրը և Գէնանի միջեւ նշանակալից բաներ մը տեղի կ'ունենան. սակայն ասոնց՝ Նէտրէթի մասին ըլլալը մտքէն չէր անցուցած: Այդ գիշերը, Գէնանի սեւեռուն նայուածքը, մտածկոտ վիճակը իր ուշադրութիւնը գրաւած ու իր հոգին աւելի ճնշած էին: Հօրը՝ սովորականէն աւելի լուրջ ու իրեն հանգէպ անտարբեր ու պաղ վերաբերում մը ցոյց տալը՝ կը նկատէր:

Ազարակը անցուած վերջին գիշերուան միջադէպին առթիւ, անոր սնուցած զայրոյթին վրայ, այսօր անտարբերութիւն մը կ'աւելնար, իր հարցումները

չլսելու կուգար. Մուալլայի խօսքերուն առանց ու է կարեւորութիւն տալու, գլուխը կը դարձնէր. ասոնց մէջ ամէնէն աւելի նեղուողը խեղճ Նիհալն էր. իր տալովը պատճառով կը տանջուէր, էր մաղթէր որ օր առաջ, ան՝ ամուսնանայ Նիհատի հետ, որպէս զի ինքն ալ ազատի. գիտէր թէ եղբայրը ամուսնութեանէն վերջ պիտի հեռանար. մինչդեռ, վերջերս այս յոյսին ի դերեւ ելլելու հաւանականութիւնը կը տեսնէր. եղբայրը, այս յիմար աղջիկէն հեռանալու միտումներ կը յայտնէր և ասկէ կը հետեւցնէր թէ Նիհատ Գէնանէն կը նախանձի:

Այս գիշեր, Գէնանի և Նէտրէթի թեկնածութեան խնդիրը հօրմէն տեղեկանալով անսահման ուրախութիւն մը կը զգար. կ'ուզէր վազել Նէտրէթին ու խնդրելով ըսել. «Ընդունէ՛, ժամ առաջ վերջացուր»:

Պահ մը բժիշկը զինքը առանձին կանչելով պատուիրած էր որ ուրիշի վերաբերած կենսական խնդիրներու մասին պէտք չէ ու է մէկուն բան մը ըսել. ասոր վրայ, Նիհալ համարձակութիւն ստացած, հօրը ըսաւ.

— Դո՛ւք, եղբօրս ու Մուալլայի նկատմամբ շատ անփոյթ էք:

— Ես ձեր եղբօրը գործերուն միջամտելու իրաւասութիւնը չունիմ. ամէն կերպով ան աւելի լաւ կը մտածէ իր մասին, պատասխանեց:

— Ձեր ներողամտութեանը ապաւինելով կ'ըսեմ թէ անիրաւութիւն կ'ընէք, հայրիկ:

— Սխալ կը մեկնես, Նիհա՛լ, հայր մը իր զաւակը իր բոլոր բաղձանքներուն մէջ ազատ ձգելովը անիրաւութիւն ըրած կ'ըլլայ անոր:

Նիհալ այս հարցմանը առանց պատասխանելու, հեռացած էր:

* * *

ձաշէն յետոյ բժիշկը իր սենեակը առանձնացած էր. Մուսալլան դաշնամուրին առջեւը նստած, Նիհալ ձեռքը ձեռագործ մը առած մէկ անկիւնը քաշուած, Նիհատ լրագրի ընթերցմամբ զբաղած, իսկ Քէնան մտատանջ ու մինակը կեցած էր:

Մուսալլան ոտքի ելաւ ու նազանքով մը Քէնանին նայելով ըսաւ.

— Ի՞նչ ունիք, այս գիշեր ինչո՞ւ բնաւ չէք խօսիր. կարծեցի թէ նորէն Նէտրէթ հանրմը սենեակն է. դարձեալ ամէնքը թախծադէմ դարձած են:

Հանդարտ ժպտելով շուրջը նայեցաւ.

— Ի սէր Աստուծոյ, բժիշկ պէյը խօսքերս չլսէ, աշխարհը կը կործանէ, այնպէս չէ՞, Նիհատ պէյ:

Նիհատ չպատասխանեց: Նիհալ գլուխը վերցնելով.

— Մուսալլա՛... Մուսալլա՛... ըսաւ:

Մանկամարդուհին անհոգ քրքիջ մը արձակեց ու ըսաւ.

— Էֆէնտի՛մ, հրամայեցէք...

Յետոյ Քէնանի առջեւը կենալով.

— Կ'աղաչեմ, ըսէք, այս մեր բարերար վեհափառ Նէտրէթ հանրմ էֆէնտի մասին ի՞նչ է ձեր կարծիքը, սակայն շիտակ խօսեցէք:

Քէնան տարօրինակ սրտնեղ արտայայտութիւնով մը պատասխանեց.

— Կը յուսամ թէ այս մասին ինծի ներողամիտ կ'ըլլաք... սակայն կ'երեւի թէ չէք գիտեր թէ որքան վշտացուցիք Նիհալը... կը պաղատիմ... Նէտրէթ հանրմի մասին բան մը չխօսինք, չըլլա՛ր:

Մուսալլա կաս կարմիր կտրած, գլուխը երերցուց և դառն ու արհամարհոտ ժպտով մը ըսաւ.

— Օ՛հ... ըսել է թէ դուք ալ մեծամասնութեան կողմը անցաք, այնպէս չէ՞... շատ լաւ ուրեմն...

Իր կանաչ աչքերուն մէջ փրփրած ալիքներ կային:

Քէնան, դանդաղօրէն ոտքի ելլելով.

— Ինծի ներողամիտ կ'ըլլաք, չէ՞, ըսաւ... քիչ մը պիտի պտտիմ:

Նիհատ, զինքը մինչեւ դուռը ճամբու գնելէն յետոյ, առանց սրահը վերագառնալու իր սենեակը մտաւ: Այս գիշեր իր հոգեկան ճնշումէն չէր կրնար ազատուիլ: Սենեակին ամբողջ լոյսերը վառեց. պատուհանները բացաւ, հանուեցաւ. անկողինը մտնել չէր ուզեր: Պատշգամը շատ զով էր. հոն աթոռի մը մէջ տեղաւորուեցաւ, աչքերը մութին ուղղեց. իր ամբողջ մտածումներն ու զգացումները անըմբռնելի վիշտի մը ծանրութեանը տակ կը կքէին և միանգամայն չէր փափաքեր հեռանալ այդ ազդեցութեան շրջանակէն. իր հոգին խեղդող այդ տառապանքի ճնշումը քաղցրութիւն մը, հաճոյք մը կը պատճառէր իրեն... մերթ ասոնց կը խառնուէր կարօտի ու անյուսութեան նման խոր ու ծածուկ ցաւ մը:

Գաղտնաբար սենեակը մտնող Նիհալը զինքը այս անորոշ ու հոգեզմայլ երեւակայութենէն կ'արթնցնէր.

— Եղբա՛յր... դեռ չքնացա՞ր...

— Ո՛չ... քոյրս... քնանալ չեմ փափաքիր, գիշերը զով է ու գեղեցիկ:

— Քեզ անհանգիստ չընեմ:

— Ընդհակառակն, ուրախ կ'ըլլամ. սանկ հանգիստ նստէ, բարձին կրթնէ, ո՛հ... ի՛նչ լաւ. կ'երեւի թէ դուն ալ քուն չունիս այս գիշեր. խեղճ քոյրս, չեմ կրնար բացատրել թէ ո՛րքան կը ցաւիմ քու այս առանձին անցուցած կեանքիդ. հոգի՛ս, այս քեռայրս ալ որքան տարօրինակ մարդ է...

Նիհալը ընդմիջելով.

— Կ'աղաչեմ... Կիմա ասոնք ձգէ՛. ես ամէն բանի տոկալու վարժուած կին մըն եմ... ըսաւ. ուրիշ բան խօսինք: Ես, այս գիշեր քեզի հետ լուրջ խօսակցութիւն մը կ'ուզեմ ունենալ:

— Արդեօք, ի՞նչ բանի մասին...:

— Ամէնէն աւելի քու և տալոջս մասին...

Նիհատ քիչ մը շտկուելով.

— Խօսէ՛, ըսաւ, քեզ մտիկ կ'ընեմ, քո՛յրս. արդարեւ ես ալ քեզի հետ երկար խօսակցութեան մը պէտք ունէի:

— Ապահովաբար մեր ներկայ կեանքի նկատմամբ, չէ՞:

— Այո՛...:

— Ես կ'ուզէի քեզի ըսել թէ այս այսպէս չի կրնար շարունակուիլ, եղբայր... կը մոռնաս թէ ժամ առաջ պէտք է այս գործը ի գլուխ հանել, այլեւս որոշումդ՝ տալու ես. ասիկա երկարածգելուդ մէջ ի՞նչ իմաստ կայ:

— Ի՞նչ որոշումի մասին է ակնարկութիւնդ:

— Մուշալայի հետ ամուսնութեանդ որոշումի մասին:

— Ա՛հ... բան մը չգիտցողի պէս կը խօսիս դուն... այս որոշումը, ես սրտիս ամենագորաւոր բաղձանքովը չտուի՞... ես անոր չպաղատեցա՞յ... նոյնիսկ ամենածանր խօսքերովս հօրս սիրտը չվիրաւորեցի՞... կը տեսնե՞ս, այդ մարդը սրտին մէջ ինծի հանդէպ շարունակ գաղտնի զայրոյթ մը չպահեր...: Այս ամէնը Մուշալայի երեսէն չէ՞ միթէ. անոր գոհունակութիւն առթելու համար չէ՞: Մինչդեռ ան ոչ մէկ բան գնահատեց. բոլոր աղաչանքներու, նոյն իսկ արցունքներու անգամ արհամարհանքով պատասխանեց. եղբօրը երթալու իր փափա-

քին ամէն բան զոհելը հասկցուց. անոր նպատակը եղբօրը այցելել չէր... այլ Եւրոպայի մէջ իր անցնելիք հաճոյամու ու եսասէր ցանկութիւններուն արդեւքնեքն այս կերպով գլուխէն հեռացնելն էր: Այս բաները, հասկցած օրս, պահ մը անյոյս ու անճար՝ կեցայ իմ սրտիս բաղձանքներու աւերակոյտին առջեւը. հոգիս ճնշող ու բզբտող ցաւերուն մէջ, այս կնով ամբողջ իսկութիւնը ըմբռնեցի. անոր անդգայ սրտին մէջ մարդկային սէրը տեղ չունէր. այս գիւտս իմ բոլոր իղձերս չափաւորեց. անոր հանդէպ տածած սիրոյս, երեւակայութիւններուս ու յոյսերուս սրբութիւններուն կը մեղքնամ, շատ կը ցաւիմ...: Ուրեմն, կեանքիս այս անդրանիկ պատրանքի դառնութիւնը զգաստացուցիչ ապտակի մը պէս ուղեղս ցընցելէն յետոյ, ամբողջ գաղափարներուս ու զգացումներուս կատարեալ խաղաղութիւն մը պարգեւեց: Հիմա, կեանքի մեծ քննութենէ մը յաղթական ելլողի մը պէս, հանդարտ ու հանգիստ ինքզինքս մտիկ կ'ընեմ... այլապէս ի՞նչ կրնամ ընել:

Նիհալ, զսպուած յուզումով մը այս խօսքերը լսելէն վերջ ըսաւ.

— Շատ տաքնապալի դրութեան մը ենթարկուեցայ ես. անիկա բանէ մըն ալ լուր չունի... և քու կողմէ երկրորդ առաջարկի մը կը սպասէ, կարծեմ:

— Անշո՛ւշտ... կը սպասէ... որովհետեւ, անոր աչքին սիրտ ըսուած այս քնքոյշ ու զգայուն գործարանը պարզապէս անկարեւոր խաղալիկ մըն է, զոր ուզածին պէս կը կտորէ, կը բզկտէ, կը փրցնէ, կ'զբօսնու անով... յետոյ կը շինէ, կը նորոգէ, կը յարդարէ և իր քմայքին ծառայեցնելու համար քիչ մըն ալ կը շոյէ զայն... ահա՛, եղաւ, լմնցաւ, չէ՞. որչա՛փ դիւրին... որչա՛փ դիւրին բան: Արդ, եթէ այս պայմաններու մէջ, անոր հետ կենակցիլս կը

փափաքիս և դժբախտութիւնս կ'ուզես, ո՛չ թէ երկ-
րորդ, այլ երրորդ առաջարկն ալ ընեմ իրեն, քո՛յրս,
ի՞նչ կ'ըսես:

— Երբե՛ք, երբե՛ք...

— Ուրեմն... Մուսալլա հանըմը այլեւս նէտք է
գլխոնայ որ ատեն մը իր առջին վիզը ծռած Նիհատը,
այլեւս ազնիւ ու առաքիլնի մարդոց մէջ ապրելու
իրաւունքը կը պահանջէ...

— Օրինակ, Նէտրէթի պէս, չէ՞:

— Այո՛, այնպէս մաքուր, անոր չափ բարձր,
անոր էութեանը չափ բանաստեղծական՝ վեհութեան
մը մէջ, աշխարհը՝ բարձր, մարդիկ՝ բարձր, կեանքը՝
բարձր տեսնել կ'ուզէ, ըսաւ, ու ցաւով մը գլուխը
երեբցուց.

— Մեղք որ, երբե՛ք չպիտի ներէ ինձի: Մուսալ-
լայի անարգական ապտակին տակ ձգմուռած ու անոր
սիրոյ մնացորդ այս խեղճ սրտիս անկեղծութեանը
երբե՛ք չպիտի հաւատայ: Իրաւունք չունի՞ միթէ:
Ա՛խ, ես այն ատեն որքա՛ն ինքնահաւան, որքա՛ն
գէշ զգացումներով տոգորուած մէկն էի. մինչեւ հո-
գիս թափանցող անարկու թոյնի մը ազդեցութիւնը
այլասերական իմ բոլոր զգացումներս թմրեցուցած,
մեռցուցած էին, հաճոյասիրութեանս, ցանկութիւն-
ներուս ու քմայքներուս գերի դարձած, անմիտ ա-
պերախտ մը եղած էի: Նէտրէթ, այն գիշերը ամէն
բան լսելէ յետոյ, երեւակայէ Նիհալ, ես ի՞նչպէս
նայած եմ անոր երեսը, ի՞նչպէս...: Չայրոյթի ամե-
նափոքր իմաստ մը անգամ չմատնող անոր ազնիւ ու
խոհեմ ընթացքին հանդէպ ես ի՞նչպէս կրցած եմ
գլուխս վերցնել ու անոր հետ խօսիլ... մինակ թէ
ուշադրութիւն կ'ընեմ և կը տեսնեմ որ ինձմէ միշտ
խուսափիլ, փախչիլ կ'ուզէ... ինչո՞ւ. չեմ գիտեր...

— Օ՛հ... եղբայր, այս խօսքերդ լսողները պիտի
կարծեն թէ Նէտրէթին սիրահարած ես:

— Ի՞նչ կ'ուզեն թող կարծեն... ճշմարտութիւնը
կ'ըսեմ, Նիհալ:

— Եթէ կեանքի բնական մղումովը Նէտրէթ ու-
րիշ մէկու մը հետ ամուսնանալու ելլէ, ի՞նչ պիտի
ընես:

— Չե՛մ գիտեր... Թերեւս ոչինչ... Թերեւս...
չատ բան կրնամ ընել. պարագաներէն կախում ունի
այդ բանը. այսուհանդերձ, յոյս ունիմ որ Նէտրէթ
ամուսնութեան խնդրոյն մէջ աճապարանք ցոյց չպիտի
տայ:

Նիհալ շրթունքները սեղմելով ըսաւ.

— Ո՞վ գիտէ...

Նիհատի աչքերը դարձեալ մութին մէջ խորա-
սուզուեցան. դիմագիծերուն վրայ խոր յուզումի մը
հետքերը կը նշմարուէին: Նիհալ, անձայն, ոտքի
բլլելով ըսաւ.

— Մնաս բարով, եղբայրս...

Երիտասարդը գլուխը դարձնելով.

— Ի՞նչպէս... ա՛լ կը փախի՞ս, Նիհալ, ըսաւ:

Շրթունքներուն վրայ խորտակուած և անյոյս
ժպիտ մը կար, գլխու թեթեւ շարժումով մը բարե-
ւեց ու գլուխը ձեռքերուն մէջ առած լռեց:

* * *

Նէտրէթի ուզած երկու օրուան պայմանաժամը
աւարտելու մօտ էր: Այս քառասունըութը ժամուայ
ընթացքին Ծիբրէթի աղջիկը իր սրտի վերջին վճիռը
տալու համար շատ տառապած էր. վերջին գիշերը,
յուսահատ ու ջլայնոտած, երբե՛ք անկողինը մտած

չէր. դէմքի դեղնածուրթիւնն ու աչքերուն բոլորտիքը գոյացած սեւ շրջանակները նշմարող փաթմա պաճին ու վէյսէլ պապան հետաքրքրութիւնով ու մտատանջութեամբ մը անոր դէմքը զննած էին:

Նէտրէթ, նախապէս անոնց տեղեկութիւններ տուած էր իր կեանքի այս կարեւոր փոփոխութեանը նկատմամբ, իսկ այս առաւօտ, սիրական ծերուկին հաղորդեց իր վերջնական որոշումը: Աչքերը արտասուելից էին ու այրուող գլուխը անոր թեւին կրթընցուցած: Վէյսէլ էֆէնտին անոր մազերը շոյած միջոցին, խեղճ Նէտրէթ, կոկորդը խեղդող վշտագին հեծեծանքով մը ըսաւ.

— Վէյսէլ պապա, այս գիշեր ես այլեւս վերջին որոշումս տուի. քանի որ նէժատ պէյը կ'երաշխաւորէ, մտածեցի թէ պէտք է որ զիս ուրիշ ուզողներէն՝ ասոր նախապատուութիւն տամ, ի՞նչ կ'ըսես.

Ծերուկին աչքերէն հոսող արցունքները կաթիլ կաթիլ կը թափէին անոր մազերուն վրայ. անսահման ուրախութիւնով մը յարեց.

— Նէտրէթ, զաւակս, Աստուած բարին ընէ... շատ լաւ ըրիր, շատ լաւ ըրիր... ալ աչքս բաց չպիտի մեռնիմ. միշտ մտածումս այն էր թէ ուշ կամ կանուխ իմ մահովս քեզ առանձին կը ձգեմ:

Նէտրէթ գլուխը վերցնելով.

— Վէյսէլ պապա, ըսաւ. այս լուրը այսօր դուն պիտի տանիս հոն... բժիշկին ըսէ թէ իր փափաքին գոհացում կուտամ... սակայն չեմ գիտեր թէ նշանտուքի արարողութեանը քանի մը օր յետաձգումը յարմար կը տեսնէ՞ արդեօք:

Վէյսէլ էֆէնտին անոր նայելով ըսաւ.

— Դուն ինչո՞ւ համար այսքան վշտահար ես, սիրունիկ հանրմա... քեզ տեսնողը սգաւոր պիտի կարծէ. ի՞նչ ունիս:

Նէտրէթ դառն ծիծաղով մը պատասխանեց.

— Ասկէ վերջ, ամէն բան անցեալին պիտի յանձնեմ... նոր կեանքիս նոր մտածումներովը ուրախ գուարթ կին մը ըլլալ պիտի ջանամ. այս առաւօտէն մինչեւ իրիկուն տեւող օրը, մերթ կսկծագին, մերթ քաղցր երեւակայութիւններուս վերջինը պիտի ըլլայ:

* * *

Այսօր, բժիշկը առանձին էր տունը. Նիհալը իր տալոջը հետ դուրս ելած էին. կէսօրէն յետոյ Բէնան հանդիպած ու Նէտրէթէն տակաւին լուր մը առնուած չըլլալը տեղեկանալով տխուր ու մտատանջ վերադարձած էր:

Այն օրէն ի վեր մտածում մը կը կրծէր նէժատի ուղեղը. Անորոշ զգացում մը իրեն կը յայտնէր թէ իր սրտին շատ խորերը, ամէնքէն ծածուկ պահած վիշտով մը կը տառապի և դառն հրաժարումի մը ցաւովն ու կսկիծովը լի, ամէն բանի յանձնառու եղողի մը, ամէն բանի տոկացողի մը դիրքին մէջ կը գտնուէր ինքը:

Վէյսէլ էֆէնտիի գալը լսելուն պէս, անմիջապէս հիւրասրահը իջաւ. ուժգին բարախում մը կը զգար. սակայն ծերուկին աչքերուն մէջ ուրախութեան փայլ մը նշմարեց:

— Բարի լուրեր կը բերիմ ձեզի, ըսաւ:

Նէժատ անոր ձեռքը սեղմեց. երկուքին ալ աչքերը տամկացած էին. Նէտրէթը սիրող այս երկու սիրտերը միեւնոյն զգացումներովը կը բարախէին. դէմ դիմաց նստան. Բժիշկը կը հարցնէր.

— Ի՞նչպէս... ինքը ի՞նչպէս է... յուսահատ չէ, այնպէս չէ:

— Ո՛չ, ո՛չ, այնչափ ալ չէ... քիչ մը տխուր էր. բնական է, հարս ըլլալիք աղջիկները այնպէս կ'ըլլան. կ'երեւի թէ այս գիշեր մինչեւ առաւօտ քնացած չէր...

Նէժատ՝ կսկծագին.

— Խեղճ աղջիկ, ըսաւ. ո՛վ գիտէ ինչե՛ր մտածեց:

Նոյն միջոցին Բէնանը կրկին եկած էր. այս երկտասարդին աչքերը անհամբերութենէն կը պայթէին: Բժիշկը անոր ըսաւ.

— Տղա՛ս, քու երջանկութեանդ աղօթող այս երկու ծերունիներուն ձեռքերը համբուրէ՛ տեսնեմ...

Այս երեք սրտերուն ուրախութիւնը սենեակին մթնոլորտը կը թրթռացնէր: Վէյսէլ պապան շատ հաւնած էր փեսացուն ու նէտրէթին յարմար գտած:

* * *

Ո՛չ ոք այս գիշերուան չափ զուարթ տեսած էր Նէժատը: Ծաշի ընթացքին Մուսալլայի հետ կատակեց, տղուն հետ խօսեցաւ և նոյն իսկ գաւաթ մըն ալ գարեջուր խմեց:

— Ա՛խ, պէյ էֆէնտի, եթէ միշտ այսպէս ըլլայիք, ձեզի շատ աւելի պիտի սիրէի, կ'ըսէր Մուսալլան:

Բէնան աւելի լուրջ ու աւելի սակաւախօս դարձած էր: Մուսալլան ասկէ դժգոհելով.

— Ի սէր Աստուծոյ, ի՛նչ ունիք այս գիշեր. նոր փեսայի մը պէս ձեք ձեռքերուն կ'ունենաք:

Այս խօսքը շատ խնդացուց Բէնանը, որ հարցուց.

— Նոր փեսաները իմ ձեռե՛րս կ'ունենան: Ծաշէն վերջ, սրահը անցան. բժիշկը տակաւին

նստած չէր. տղուն, աղջկան ու Մուսալլային ուղղելով խօսքը, ըսաւ.

— Էֆէնտիմ, Բէնանը չէ՛ք շնորհաւորեր... մօտերս կ'ամուսնանայ:

Մուսալլան ու Նիհատ ահամայ բացագանչեցին.

— Կ'ամուսնանա՞յ... որո՞ւ հետ:

Նէժատ, հանդարտ ու լուրջ.

— Նէտրէթ հանրմին հետ... պատասխանեց:

Բէնանի երկարած ձեռքը, մէկ երկու վայրկեան առկախ մնաց. Նիհատի քիչ մը պաղ ու դողդղացող ձեռքը սեղմած միջոցին այս լուրին՝ երկու դէմքերու վրայ ձգած տպաւորութենէն զարմացած բժիշկին նայեցաւ: Մուսալլան դեփ դեղին կտրած էր. բժիշկը առանց զայն նշմարելու, իր տղուն՝ գլխուպտոյտով մը երեքալս նկատած էր. յետոյ այս երիտասարդին հմայիչ աչքերը պահ մը աչքերուն յառեցան: Այս նայուածքը կ'ըսէր. «Վրէժնիդ լուծեցիք, բայց շատ ահաւոր ու թունաւոր զէնք մը գործածեցիք»:

Մուսալլան սենեակը ձգած հեռացած էր, Նիհալ, իր տալիջը ետեւէն վազեց. աղջիկը՝ իր սենեակը գացած և բազմոցի մը վրայ ինկած էր, իր կեանքին մէջ առաջին անգամ ըլլալով սրտակեղէք տառապանքով մը կը գալարուէր. աշխարհի բոլոր յոյսերը մարած, խաւարին մէջ մնացած իր գոյութիւնը, ծանր բեռան մը պէս, իր գոյութիւնը կը ճնշէր:

Նիհալ, չափազանց զարմանքէն սառ կտրած կը նայէր.

— Ի՞նչ կ'ըլլաս, Մուսալլա... մէկէն ի մէկ ի՛նչ է այս վիճակդ:

Դեռատի աղջիկը կարծես կը խեղդուէր.

— Չէ՞ք տեսներ... կը մեռնի՛մ... կը խենդե՛նամ... կ'աղաչեմ, առանձին ձգեցէք զիս:

— Ի սէր Աստուծոյ... Ի սէր Աստուծոյ... Մուսալ-
լա՛, ի՞նչ կ'ըսես, ինչե՞ր կը լսեմ...

— Ա՛խ... այս պահուն, այլեւս բան մը չեմ
կրնար մտածել. գացէ՛ք... անոնց մօտը գացէ՛ք...
առանձին ձգեցէ՛ք զիս...

— Կ'աղաչեմ, ինքզինքնիդ քիչ մը կառավարե-
ցէ՛ք. եթէ հայրս այդ վիճակդ հասկնայ, այլեւս երե-
ւակայէ... ի՞նչ խայտառակութիւն... ո՛ւհ... պիտի
խենդենամ, Մուսալա...

Մուսալան, ա՛լ չպատասխանեց, գլուխը բարձե-
րու մէջ խօթելով լալ սկսաւ:

Նիհալ, կամաց մը ձգեց հեռացաւ. խնդրին երե-
ւոյթն ու անաւորութիւնը իր աչքերուն առջեւ պատ-
կերացաւ: Առանց հօրը բան մը զգացնելու Մուսալա-
յով զբաղիլը որքան դժուար, որչա՛փ կարեւոր պա-
րագայ մըն էր... երկու ձեռքերով գլուխը բռնած
գուրսը կը պտտէր:

Այս գիշեր, ասոնց մէջ ամէնէն երջանիկը Քէ-
նանն էր. երեւակայութեամբ երջանկութեան խորերը
մխրճուած, կուլէր որ յաջորդ օրը, Նէտրէթին առ-
նելիք իր նուէրը ամբողջ աշխարհ մը արժէր. նոյնիսկ
այս մասին Մուսալային հետ խօսիլ ու անոր ճաշա-
կէն օգտուիլ կը մտածէր:

Նոյն միջոցին, գունատ դէմքով մը ներս մտնող
Նիհալին ըսաւ.

— Մուսալա հանրմը ո՛ւր է... այս գիշեր, իր
մտքի նրբութենէն օգտուիլ կ'ուզէի...

Նիհալ, սրտնեղած պատասխանեց.

— Չեմ գիտեր, կ'երեւի թէ անհանգիստ է:

Քէնան յանկարծ սարսափելի գաղափարի մը թե-
լադրութեամբ դողաց:

Նիհատ, ուղեղին վրայ ստացած ծանր հարուածի
մը ուժգնութենէն թմրած էր ու բան մը չէր զգար:

Իրական եղբօր մը պէս իր սիրած Քէնանի ներկայու-
թիւնը, այս գիշեր, անտանելի փորձանք մը կը թուէր
իրեն. երանութիւն ճառագայթող անոր աչքերուն
նայած միջոցին, գիշատիչ մագիլներով իր հոգիին
պատուալը, իր ամբողջ կեանքին թշուառութեամբ
ու տաժանքով վարակուելը կը զգար, կը տեսնէր:
Այս գիշեր, անոր համար ամէն ինչ աւարտած էր.
Երկինքի բոլոր աստղերը, լուսինները, արեգակները
մարած էին. անօրինակ ախտէ մը կը վարակուէր ու
իր հոգին կ'անդամալուծուէր:

Նէժատ, իր տղուն տառապազկին վիճակին ուշա-
ղիր ըլլալով մէկտեղ, միջոց մը Մուսալան փնտռեց:

— Մուսալան գոնէ քիչ մը դաշնակ նուագէր մե-
զի, ըսաւ:

Նիհալ նեղուած՝ պատասխանեց.

— Չեմ գիտեր, Մուսալան քիչ մը անհանգիստ է
կարծեմ:

Բժիշկը, ակամայ Նիհատին ու Նիհալին նայեցաւ
և կարծես թէ ինքնիրեն խօսելով.

— Այս գիշեր, ամէնքն ալ տարօրինակ վիճակ
մը ունին, ըսաւ:

Մուսալան, արդարեւ այս գիշեր ահռելի տագ-
նապններու մէջ կ'այրէր. ամենակենսական մէկ ան-
դամը կորսնցուցածի պէս, խեղանդամ ու անյոյս կը
հեծեծէր: Իրեն հանդէպ միշտ կենցաղապէս, պարզ
ու հոգածու գտնուող այս երիտասարդը, վերջերս,
անոր ամենահոգեզբաւ ու ամենացանկալի նպատա-
կակէտը դարձած էր: Մեծ համբերութիւնով ու ինք-
նավստահ՝ կը սպասէր որ օր մը ա՛ն ալ իր ոտքը իյ-
նայ. և սակայն այս սպասումը, իր սէրերու վաղան-
ցուկ հաճոյքներէն աւելի քաղցր, աւելի ցանկայա-
րոյց զգացումներով իր բովանդակ գոյութեանը առջեւ
կեանքի նոր շրջան մը կը բանար:

կը զգար թէ զայն այսպէս ծածուկ ու հեռուէն սիրելու քաղցրութիւնը. ցարդ ու է կերպով ճաշակած չէր. տկար լոյսի մը պէս իր հոգիին մէջ թաքնուած յոյսի մը ճառագայթումովը աշխարհ ու կեանքը տարբեր կերպով տեսնել կը սկսէր:

Այս գիշեր, յանկարծ, ահաւոր անկման մը հարուածներուն տակ իր ամբողջ տեսիլներու, ամբողջ յոյսերու քայքայումը տեսնող, խեղճացած ու հեծկըլտացող Մուսլլան, մարդկային այսքան դառն ու այս աստիճան անմխիթար պահերու հանդիպելը երբեք միտքէն չէր անցուցած:

Քէնանի ու Նէտրէթի նշանտուքը շատ անչուկ ու պարզ կերպով կատարուեցաւ: Քէնանի մայրը, Նիհալ, Նէժատ և Քէնան ներկայ էին այս արարողութեան, ուր Նէտրէթ ջանաց անայլալ ու պաղարիւն երեւալ. շրթունքին վրայ սովորական անուշ ու գեղեցիկ ժպիտը կար: Սակայն, Մուսլլայի և Նիհատի բացակայութիւնը զարմանալի կը թուէր իրեն: Մուսլլայի հիւանդութիւնը կրնար արդարացուցիչ պատճառ մը ըլլալ, սակայն Նիհատ չկար. ըսին թէ կարեւոր դատի մը պատճառովը կը բացակայի, բնականաբար, ստիպուած էր ընդունիլ այս պատճառաբանութիւնը:

Իրիկուան դէմ, յանկարծ, փաստաբանը եկաւ, տժգոյն, յոգնած և ուժասպառ էր: Նէտրէթ՝ դուարթ արտայայտութիւնով մը դիմաւորեց զինքը. այս ժամէն սկսեալ վրէժխնդրական քաղցր ցանկութիւն մը ծնունդ կ'առ էր իր հոգիին մէջ. իր ամբողջ գեղեցկութիւնը, նրբութիւնն ու զուարթութիւնը ցուցադրել կ'ուզէր անոր:

Այս երկու խօսեցեալները շնորհաւորած միջոցին, Նիհատի շրթունքներն ու ձեռքերը կը դողդալին:

Նէտրէթ, դաշնամուրի վրայ շատ ընտիր կտորներ նուագեց անոնց: Փաստաբանը, պատուհանին առջեւ ոտքի կեցած, մտասոյզ, անձայն ու տխուր, իրիկուան հորիզոնի ներդաշնակ գոյներու համագրութիւնն ու խուսափող ամպերը կը դիտէր: Նէժատ չէր կրնար աչքերը հեռացնել իր տղայէն, կը տեսնէր թէ ան երեք չորս օրէ ի վեր ծանր մտատանջութիւնով մը կը տառապի և կը ջանայ իր տագնապին պատճառները չյայտնել. կ'ուզէր ասոր պատճառները վերլուծել և սակայն առանց իմաստ մը հանել կարենալու, շուարած էր:

Նէտրէթ, առաջին անգամ ըլլալով, այսօր, իր ներկայութեանը այսքան համարձակ կը խօսէր, կարծես թէ մեծ ամբաստանութենէ մը կամ կասկածներէ բոլորովին անպարտ ու մաքուր դուրս եկած, ազատ ու անփոյթ կծրպով երաժշտութենէ, բանաստեղծութենէ և նոյն իսկ քիչ մըն ալ տէրէ կը ճառէր, հաճելի ու գրաւիչ ճարտասանութիւնով մը Քէնանը պատասխանելու կը պարտագրէր. իր խօսքի սլաքները սակայն Նիհատի սրտին կ'ուզէր: Վերջինս, իր հոգիէն աչքերուն փոխանցուած գաղտնի հմայքով մը կ'ունկնդրէր... անոր այսքան կախարդական գեղեցկութիւնը չէր տեսած, անոր քաղցր ու մտերմիկ ձայնին այսքան առինքնող ըլլալը չէր երբեք չէր զգացած...:

Ուրեմն, եթէ ուզէ... ինչե՛ր ըլլալ կրնալու և ինչեր ըլլալու ընդունակ կնոջ մը հոգին կրելը մինչեւ այսօր չէր կրցած հասկնալու այս ինքնազատապարտութիւնը՝ ցաւագին զղջումի մը ահուելի կսկիծներովը կ'այրէր զինքը:

Նէտրէթ, միջոց մը, գնահատանքով խօսեցաւ Մուսլլայի, անոր գեղեցկութեան, նրբութեան, անոր

բացառիկ վայելչաձեւութեան մասին՝ ուշադրութեամբ նիհատի դէմքը զննելով:

Փաստաբանը կ'ըմբռնէր թէ հարուածները իրեն կ'ուղղուէին. այսուհանդերձ, այս խօսքերը իր հոգիին մէջ քաղցր հաճոյք մը արթնցնելով մէկտեղ, աւելիին կը փափաքէր. այլեւս Մուսլլայի մասին թող խօսէր ան, որովհետեւ անոր խօսքերուն մէջ ամբարուած, խորունկ ու զսպուած ատելութեան մը պոռթկումը կը նշմարէր. անոր թաքուն ակնարկութիւնները սփոփարար զովութեան մը պէս կը հօսէին իր սրտին մէջ:

Իրիկունը, տուն վերադարձած միջոցին, ջանաց անոր ամէն մէկ բառին իմաստը վերլուծել անոր հոգիին առեղծուածը, անոր աչքերուն գաղտնիքները՝ անլուծելի, անքննելի գտաւ. այս աստիճան զօրաւոր կամք ունեցող կնոջ մը սրտին գոյութեանը զարմացաւ:

Քէնան, այս գիշեր չափազանց գոհ ու երջանիկ էր: Մուսլլա, այն գիշերէն ի վեր առաջին անգամ ըլլալով սրահը մտաւ. անոր քիչ մը նիհարութիւնն ու տժգոհութիւնը ամէնքին ուշադրութիւնը գրաւեցին: Վիշտն ու անյուսութիւնը պատած էին անոր գեղեցիկ դէմքը, սակայն այս վիճակին մէջ աւելի գրաւիչ, աւելի հաճելի կը թուէր: Քէնան, այս գիշեր, սովորականէն աւելի կը զբաղէր անով. աս ալ, ճիշդ նէտրէթի պէս տեւական կասկածէ մը ձերբազատուողի մը նման՝ համարձակ էր:

— Մուսլլա հանրմ, կ'ըսէր, այսօր ձեր բացակայութիւնը բոլորիս ցաւ պատճառեց. միշտ ձեր մասին խօսեցանք:

Մանկամարդուհիին շրթներուն վրայ արհամարհոտ ժպիտ մը ծաղկեցաւ ու ցած ձայնով

— Ձեր այսքան թանկագին ու երջանիկ պահե-

րուն մէջ զիս յիշելնիդ, արդարեւ մեծ զոհողութիւն մըն է... շնորհակալ եմ, պատասխանեց ու գլուխը զարձուց:

Քէնան այս խօսքերուն կշտամբանքը հասկնալով ընկճեցաւ. նիհատի՝ անոր հանդէպ ցոյց տուած զանցառութեանը շատ բարկացած էր. տեղէն ելլելով մօտեցաւ անոր ու տրտնջելով ըսաւ.

— Սիրելիս, նիհատ, Մուսլլայի հիւանդութեան հանդէպ այս գիշեր այնքան անտարբեր ես որ... խեղճ աղջիկը որբացած է կարծես:

Փաստաբանը, իր խորագննին աչքերովը այս երջանիկ նշանածը չափեց և ուսերը ցնցելով.

— Ե՛ս ալ հիւանդ եմ, ըսաւ. ինձի հանդէպ ալ անտարբեր գտնուողներ կան. ի՞նչ ընեմ, ամէն մարդ իրեն վիճակուած տառապանքը կը կրէ...

Քէնան զարմացմամբ ըսաւ.

— Ա՛հ... այսպէս ըլլալ երբեք չէի գիտեր. շատ տարօրինակ բան, ըսել է Մուսլլա հանրմի և... ձեր միջեւ...

Նիհատ ընդմիջելով.

— Շատո՛նց... ըսաւ. չէի՞ր գիտեր:

Երիտասարդը, անորոջ տպաւորութեան մը ներքեւ բաժնուեցաւ նիհատէն:

* * *

Սէնան անձրեւոտ, մշուշապատ ու վշտոտ օդերը եկած էին: Բժիշկ նէժատն ու Քէնան, շարթուան երկու օրերը նէտրէթի տունը կ'անցնէին: Հարսնիքը որոշուած էր կատարել գարնան: Նէտրէթ, մտադիր էր ագարակի կարգ մը նորոգութիւնները կատարել տալ ու զայն իր նախկին բնակելի վիճակին վերածել: Քէնան, անհամբեր կը սպասէր այդ երջանկառիթ

օրերուն: Նէտրէթը առնելով հեռանալու գաղափարը միայն իրեն ապահովութիւն կը ներշնչէր: Տեւականօրէն անորոշ վախի մը, առանց պատճառի՝ մտահոգութեան մը մատնուած այս երիտասարդը, իր նշանածին մօտ գտնուած միջոցին, առժամեայ սրտի խաղաղութիւնով մը կ'ապրէր. իսկ անկէ բաժնուելուն պէս, զայն չտեսած օրերը զանազան անակնկալ ու ենթադրական պատահարներու սպառնալիքներով իր ուղեղը կը տանջուէր, կը տառապէր:

Մուսլլան օրէ օր կը փոխուէր ու իր այս մտավախութիւնները աւելի կը հրահրէր. Նիհատի վրայ նշմարած կարգ մը ծածուկ տպաւորութիւններն ալ իր մտատանջութիւնը սաստկացնելու համար տարբեր պատճառներ էին: Ասոնց ծագումը քննել, վերլուծել ջանաց, սակայն իր բոլոր ջանքերը ապարդիւն անցան:

Գալով Նէտրէթին, ան՝ իր սովորական պարզութիւնն ու լրջութիւնը կը պահէր. զօրաւոր հաստատակամութիւնով մը ինքզինքը համբերութեան կը վարժեցնէր:

Նէժատի ներկայութեանը, իր խօսեցեալին հետ բարդ ու լուրջ նիւթերու մասին խօսելէ հաճոյք կը զգար, իր ամբողջ պերճախօսութեանը ուժգնութիւն մը կուտար. կը խնդար, կը խօսէր, կը նուագէր. զիրենք զբաղեցնելու և մասնաւորապէս բժիշկը երջանիկ տեսնելու մէջ չափազանց հաճոյք կը զգար. սակայն Գէնանի հետ վերապահօրէն կը վերաբերուէր, անոր հետ մտերմիկ տեսակցութիւններէ չափազանց կը զգուշանար, առանձին գլուխ գլխի մնալէ կը խուսափէր. սրտին մէջ անոր հանդէպ ո՛չ ատելութիւն ունէր ոչ ալ սէր. ամէն տեսակէտով այս համակրելի ու կենցաղազէտ երիտասարդին հանդէպ իր բոլոր զգացումները սառած էին, բոլորովին անտարբեր կը մնար:

Կեանքը, եղածին պէս իր բովանդակ մերկութեամբ ընդունիլ պարտադրող իրականութեան դառն հեզնանքին հանդէպ իր ճակատագրին հետ կը պայքարէր. այժմէն կը ջանար իր հոգին սնուցանող քաղցր ու ջերմ երեւակայութեանց հրապոյրներէն ձերբազատել, ինքնազրկումի տոկալ, համբ ըլլալ ու իր սրտի ձայնը լռեցնել:

* * *

Մուսլլայի վրայ բարեփոխութիւն մը կը տեսնուէր: Կեանքին մէջ, առաջին անգամ ըլլալով, իր զգացած այս իրական սէրը, անոր հոգիին կատարեալ խաղաղութիւն մը, շնորհք մը պարգեւած էր: Այդ ըմբոստ, այդ կամակոր սրտին, այն շփացած ու խենդուկ ընթացքներու հակազդեցութիւնները կամքի ու ինքնանաւազման առաքինութիւններու կը վերածուէին աստիճանաբար. Նէտրէթին նմանիլը, այլեւս իրեն համար քաղցր մխիթարութիւն մը կ'ըլլար, անոր պէս խոհեմ ու համեստ խօսք խօսիլ, անոր նման պատշաճ արդուղարդով երեւալ, անոր պէս իր կանացիական արժանապատուութիւնը պահել, անոր պէս գնահատուիլ կը փափաքէր:

Այս ուղղութեամբ կատարած իր ջանքերը այնքան փոխակերպած էին զինքը որ, Նէժատ, այլեւս կը սկսէր զինքը զնահատել ու անոր զոյութեանը կարեւորութիւն ընծայել. կ'ուզէր նաեւ Նիհատին հարցնել ու հասկնալ թէ անոր հետ իր ամուսնութիւնը ի՞նչ պատճառով կը ձգձգէր:

Օր մը, սենեակ կանչեց Նիհատը, որ չորս հինգ ամիսներէ ի վեր առաջին անգամ ըլլալով կ'արժանանար այսպիսի հրաւերի մը. սենեակ մտած միջոցին կռահեց թէ կարեւոր պատճառ մը կար զինքը հոն

բերող. իր հօրը զննող ակնարկներուն ենթարկուած՝
աթոռի մը վրայ նստաւ ու ըսաւ.

— Զիս ուզած էք, հրաման մը ունիք:

Նէժատ ժպտադէմ՝ կը նայէր իր տղուն.

— Ո՛չ թէ հրաման... այլ արդարութիւն մը,
սիրելի՛ս, այս ի՛նչ ծոյլ մարդ ես... ե՛րբ պիտի ա-
մուսնանաս... քեզի կը սպասենք...:

Փաստաբանը մէկէն ի մէկ շուարեցաւ. հօրը, ա-
ռանց նախաբանի պէտք տեսնելու, ըրած շեշտակի
հարցումները մէկ երկու անգամ անպատասխան ձգելէ
վերջ, առաջքը նայեցաւ ու հարցուց.

— Որո՞ւ մասին է ձեր խօսքը:

— Մուսլլայի ու քու մասին...:

Փաստաբանը լուռ՝ առաջքը կը նայէր...:

— Ես անցեալը մոռնալ ու Քէնանի պէս քեզ ալ
երջանիկ տեսնել կ'ուզեմ. եթէ իմ անհամամտու-
թիւնս քու փափաքներուդ արգելք մը կը նկատես...
այժմէն իսկ ըսեմ թէ իմ նախկին գաղափարներս բո-
լորովին փոխուած են: Այսօր, Մուսլլան իմ տեսա-
կէտովս, ամէն ատենէն շատ աւելի լաւ աղջիկ մըն
է. ես ոչ մէկ կերպով արգելք կ'ըլլամ քեզի, զա-
ւակս:

Նիհատ գլուխը կախ, թրթռուն ու տառապակոծ
ձայնով մը ըսաւ.

— Վստահ եմ որ դուք շատ գորովագութ ու
գթասիրտ էք. սակայն, առայժմ ամուսնութեան
նպատակ չունիմ:

— Ի՛նչ կ'ըսես, Նիհատ:

— Ամբողջովին գաղափարս կը յայտնեմ...:

— Սէ՛րդ... հապա սէ՛րդ ինչ եղաւ...:

— Սէ՛ր... վրիպումի ու զղջման տանջանքնե-
րու տակ ճնշուեցաւ, ճզմուեցաւ. գնահատող ձեռ-
քերու մէջ պատառ պատառ եղաւ... մեռա՛ւ...:

Նէժատ մնաց բերանաբաց. դէմքին վրայ սրտնե-
ղութեան հետքեր յայտնուեցան. քանի մը վայրկեան
մտածկոտ լուռութենէ մը յետոյ, տղուն նայելով.

— Մե՛ղք... ըսաւ:

Նիհատ գլուխը շարժելով.

— Այո՛, շա՛տ մեղք... այլեւս ինձի բան մը
մի խօսիք ու հարցում մի տաք... որովհետեւ, «տա-
լիք պատասխանս» իմ կրած տառապանքիս սաստ-
կութիւնը չպիտի կրնայ արտայայտել:

— Կը տառապի՞ս, Նիհատ, հարցուց բժիշկը
ծանրօրէն:

— Այո՛... և թէ չափազանց:

Թախծագին լուռութիւն մը պաշարեց սենեակը:

Նիհատ, դանդաղօրէն ոտքի կ'ելլէր, երկու վայր-
կեան վերջ սենեակին դուռը կը գոցուէր: Սենեակին
մէջ ինքզինքը առանձին գտնող Նէժատ, այս խորհր-
դաւոր ու անորոշ խօսքերու իսկական նշանակու-
թիւնն ու մեկնութիւնը յայտնաբերելու համար խոր
մտածումներու մէջ թաղուած էր: Նիհատ, իր տուած
շատ համառօտ և սակայն շատ նշանակալից պատաս-
խաններովը զինքը ահաւոր դրութեան մը մատնած
էր, անկարող էր ու անյոյս:

* * *

Նոյեմբերի գեղեցիկ օր մը, Քէնան առաջին ան-
գամ ըլլալով, առանձին կ'այցելէր Նէտրէթին: Ման-
կամարդուհին, իր սովորական գրաւիչ ժպիտովը կը
զիմաւորէր գայն: Քէնան ոտքի վրայ կեցած իր սի-
րատենչ նայուածքներովը կը պարուրէր այս գեղեցիկ
խօսեցեալը:

— Նէտրէթիկս, կ'ըսէր, այս աղուոր օրը միա-
սին դաշտը անցնենք, չը՛լար... առաւօտուն, օդը

գեղեցիկ տեսնելուս պէս քեզ մտաբերեցի. արդէն աշխարհի բոլոր գեղեցկութիւնները՝ քեզ յիշեցնել կուտան ինձի:

Նէտրէթ, անոր խօսքերուն ու նայուածքներուն գոհացում տալու համար, միշտ ինքզինքը կը բռնադատէր. հետեւաբար, այս անգամ ալ, կեղծ ժպտով մը իր դէմքը զարդարել ջանալով:

— Ծնորհակալ եմ... արգարեւ օդը շատ գեղեցիկ է, պատասխանեց:

Յետոյ, իր ամբողջ կեանքին մէջ միշտ իր արուեստակեալ վերաբերումներովը զայն խաբել դատապարտուած ըլլալու մտածումը՝ ծանր բեռան մը պէս ձնչեց իր ուսերուն վրայ ու դանդաղօրէն աթոռին վրայ նստաւ: Քէնան ոտքի վրայ կեցած՝ զայն կը դիտէր, կարծես թէ անոր հոգեկան գաղտնիքը կորզելու համար աչքերը անոր աչքերուն յառած էր: Նէտրէթ, այս ակնարկներուն տակ ընկճուած՝ խօսելիքը շուարած էր... միջոց մը ըսաւ:

— Ի՞նչպէս է, բժիշկ պէյը...

Քէնան թեթեւակի ինդաց. սակայն այս խնդուքը ակամայ լալու պահանջքի մը նմանող թունալից խնդուք մըն էր:

— Նէտրէթ, ըսաւ, այս վայրկեանիս քեզ շատ մտատանջ կը տեսնեմ, մի՛ ուրանար... քեզի այս մտատանջութիւնը պատճառօրը իմ ներկայութիւնս է, այնպէս չէ...

Դեռատի աղջիկը դողաց. վարանոտ ու նեղուած գոչեց.

— Կը խաբուիք, Քէնան պէյ...

Երկտասարդը, այս անգամ աւելի դժգոհ՝ յարեց.

— Նէտրէթ, ինձի Քէնան պէյ մի՛ ըսէք... Հեմ կրնար բացատրել թէ ձեր հոգիին՝ միշտ օտար մնալս ազդարարող ձեր այս պաշտօնական խօսքերը ո՞րքան

կ'արիւնոտեն իմ սիրտս... պարզապէս «Քէնան» ըսէք ինձի, ի՞նչ կ'ըլլայ... Հեմ գիտեր թէ ասիկա ծափեր կուգայ ձեզի... երկար ատենէ ի վեր այս մտերմիկ արտայայտութեանդ կը սպասէի, մինչդեռ դուք... հազիւ կրցաւ ըսել ու չկրցաւ շարունակել, որովհետեւ շատ գրգռուած էր:

Նէտրէթ շատ ազդուած էր. անոր այս աստիճան ըմբոստացուցիչ հոգիով մը իր վրայ բռնանալը երբեք չէր կրցած երեւակայել. մեղմօրէն մըմնջեց.

— Այսօր շատ ջղախոտած եք...

Քէնան գլուխը շարժեց ու հառաչելով ըսաւ.

— Ո՛չ թէ ջղային... այլ ապերախտ ըսէք ինձի, Նէտրէթ, ապերախտ ըսէք... ներկայ դիրքիս արժանանալէս յետոյ, հիմա ալ ձեզմէ... անսահման սէր մը պահանջելու կ'ելլեմ... այս պահանջս չափազանցութիւն չէ՞, Նէտրէթ. խօսեցէք:

— Ինչո՞ւ համար այսպէս կը մտածէք, Քէնան պէյ. իսկապէս այսօր շատ յուզուած էք, ի՞նչ եղաւ, Հեմ գիտեր... արդեօք թերութեան մը մէջ կը գտնուի...

— Ո՛ւֆ... ո՛չ ո՛չ... ներէ ինձի, Նէտրէթ... արդարեւ, այսօր հոգիս կ'ալեկոծի... կը զգամ թէ քեզ կը նեղացնեմ. արժանացած չափազանց երջանկութիւնս՝ կարծեմ թէ զիս կը յիմարացնէ. միշտ, ձեր սրտին՝ ինձմէ հեռու ապրելու վճիռը տալու աստիճան ապերախտ կը գտնուիմ... այս գաղափարս, այս մտածումս կը մեռցնէ զիս, կը թունաւորէ իմ երեւակայութիւնս... Աստուած իմ, ես ձեզմէ դեռ ի՞նչ կ'ուզես... ի՞նչ կը սպասեմ ձեզմէ, Հեմ գիտեր որ...

— Ձեր զգացումները ձեզ կը խաբեն. պարապ տեղը կը մտատանջուիք, Քէնան պէյ...

Նէտրէթ, այս խօսքերը ըսած միջոցին, իր ամ-

բողջ ինքնութիւնը, իր ամբողջ կամքը կորսնցուցած էր. երակներուն մէջ հոսող կրակէ հեղուկ մը դէպի սիրտը և անկէ ալ դէպի ուղեղը կը խուժէր ու իր մարմինը անտանելի տանջանքներով կը ճզմէր: Փորձել սկսած այս կեղծ հաւաստիացումները, իր կեանքին մինչեւ վերջը պիտի շարունակուէին:

* * *

Կառքով երկար շրջագայութիւն մը ըրին. մինչեւ Քեաղըտհանէ իջան: Չմրան սպասող այս կարճ օրերու ամբողջ յոյզերն ու տխրութիւնները պաշարած էին զաշտերը: Տերեւազուրկ ձառերը իրենց սգակիր ճիւղերը օրօրած միջոցին, ամառուան զուարթ յիշատակներէն մնացորդ թուշուներու բոյներու լքուած ու ցրուած տեսքը, քանդուած ու աւերակի վերածուած երջանկութեան օճախի մը մոխրակոյտը կը յիշեցնէր: Բնութեան կեանքի վախճանը յատկանշող այս եղանակը, երկար ու մթին ձմեռուան մը ամբողջ թախիծը Նէտրէթի սիրտին վրայ կը բարդէր: Իրիկուան դէմ, հորիզոնի վրայ կուտակուած ամպերը կը սկսին զով ու խայթող հով մը տարածել ամէն կողմ: Երկուքն ալ մսած էին: Կառքին խորը քաշուած Նէտրէթ:

— Այլեւս երթանք... ըսաւ.

Քէնան, Շիշլիի ուղղութիւնը ցուցնելով կառապանին, Նէտրէթին դարձաւ ու պաղատագին.

— Ներէ համարձակութեանս, Նէտրէթ... առանց քեզմէ արտօնութիւն առնելու փափաքս կը կատարեմ. այս գիշեր Շիշլի անցնինք, չըլլա՞ր. ամէն պատահականութիւն կանխելով՝ Վէյսէլ պապային ըսած եմ. տունէն քեզի համար չեն մտահոգուիր... Ի՞նչ կ'ըլլայ, Նէտրէթ... կ'ըսէր:

Նէտրէթ քիչ մը նեղսրտած ու մտածկոտ, դարձաւ ու իր զննող աչքերը խօսնայրին վրայ յառելով ըսաւ.

— Ահա՛, կր տեսնէք թէ ձեր բոլոր բաղձանքներուն կը հպատակիմ... ուրեմն այլեւս բողոքելու իրաւունք մը չունիք կարծեմ, հէ՞:

— Անսահման երախտագիտութեամբ ու շնորհապարտութեամբ աչքերը լեցուած երիտասարդը ծաղկատի աղջկան ձեռքերը բռնեց ու շրթունքներուն մօտեցուց:

— Ա՛խ, գիտնայիր թէ որչա՛փ երջանիկ եմ, ո՛րչափ... այս երջանիկ օրը պէտք չէ՞ որ իր երջանիկ գիշերը ունենայ... Չէք կրնար երեւակայել թէ ո՛րքան ուրախութիւն պիտի պատճառէք անոնց ալ... մանաւանդ որ Նիհատն ալ քիչ մը անհանգիստ կ'երեւար:

Քէնան, նոյն վայրկեանին իր ափին մէջ զըտնուած ձեռքին թեթեւ դող մը անցնիլը զգալու պէս եղաւ. Նէտրէթ աւամայ հարցուց.

— Նիհատը հիւանդ է...

Քէնան, այս անգամ որոշապէս զգաց որ անոր ձեռքի դողէն՝ ձայնն ալ վարակուած է, զարմանքով մը անոր երեսը նայեցաւ:

— Այո՛, Նիհատ հիւանդ... սակայն անկարելորդ պաղառութենէ մը տարբեր բան մը չէ, մի՛ մտահոգուիք, ըսաւ:

Նէժատ, սանդուղին զլուխը զիրենք դիմաւորելով ըսաւ.

— Երկու նշանածներ այսպէս ուրկէ՞...

Նէտրէթ, դիմացի սենեակը բազմոցին վրայ Նիհատի պառկած ըլլալը տեսած և սակայն չտեսնելու զարնելով զուարթ ձայնով մը.

— Այսօր Քէնան զիս շատ յոգնեցուց, էֆէն-

տիմ... մինչեւ Քեաղըտհանէ գացինք, յետոյ ձեզի հիւր եկանք:

— Ո՛հ... ի՛նչ լաւ ըրիք, ըսաւ Նէժատ:

Ամէնքը սրահը հաւաքուած էին... Նիհատ քիչ մը դեղնած ու նիհարցած էր: Նէտրէթ զայն տեսնելով կարծես թէ շունչը կը բռնուէր, ուժգին բարախում մը զգաց ու ըսաւ.

— Ձեր անհանգստութիւնը Քէնանէն տեղեկացայ, մասնաւորապէս ձեր որպիսութիւնը հարցնելու եկայ: Քէնան, Նէտրէթի վրայ տեսնուած այս վայրկենական փոփոխութենէն զարմացած էր. տասը վայրկեան առաջ, իրեն հանդէպ խիստ պաշտօնական վերաբերում ունեցող այս խորհրդաւոր աղջկան՝ հիմա ամբողջովին փոխուած ըլլալուն ականատես կ'ըլլար: Օրինակ, միջոց մը «Քէնան, պայուսակս կուտամ» ի նման անոյշ հրամաններ, անհոգ ծիծաղներ ու նշանակալից շնորհակալութիւնները, զինքը գրեթէ ապշեցուցած էին, ու իր հոգին՝ սառեցնող զազափարի մը հոսանքի ազդեցութենէն կը դողար: Պահ մը Մուալլան իր ուշադրութիւնը գրաւեց. արդեօք Նէտրէթ այս աղջկան նոխա՞նձը գրգռել կ'ուզէր: Սկսաւ իր ամբողջ ուշադրութիւնը այս կէտին վրայ կեդրոնացնել: Արդարեւ, Մուալլան այս գիշեր չափազանց ազդուած էր. իրեն ուղղած ականարկներուն մէջ վիշտ և մրցակցութեան զգացում մը կը յայտնուէին: Մերթ բողոքի, մերթ ցաւի, մերթ ուժգնութեան ու համարձակութեան նշանակութիւն ունեցող անոր փայտակող աչքերը, տեւականօրէն իր հոգիին վրայ իշխել կը փորձէին: Քէնան, զգալով որ անօրինակ ու խորհրդաւոր պայմաններու մէջ կ'ապրի, իր տեւական մտասեւեռումը եղած էր Մուալլայի ականարկներու ազդեցութիւններէն ձերբազատուելու. այդ նայուածքները անոյշ ուարսուռ և երկիւղ կը պատճառէին իրեն:

Գալով Նիհատին, ան՝ նախանձի ու մրցակցութեան աւելի ծանր տանջանքներով կը տուայտէր, կը խեղդուէր:

Ուրախութիւն ու ցնծութիւն ճառագայթող Նէտրէթի գոյութիւնը, թունաւոր ասեղի մը պէս իր սիրտը կը ծակծակէր, արիւն կը հոսեցնէր անկէ. իր խօսնայրին այնքա՛ն քաղցրօրէն «Քէնան» արտասանութեան մէջ յայտնուած մտերմութիւնը, իր ուղեղը կը պայթեցնէր ու ըմբոստ զգացումներ կ'արթնցնէր հոն: Իր ձեռքով իսկ մերժած այսպէս թանկագին էակի մը՝ հիմա իր քաշած կարօտը, այս անվախճան զրկանքի պարտադրած վիշտն ու կսկիծը ապրելը՝ առանց ու է մէկուն բան մը զգացնելու, յետոյ, զայն միշտ այսպէս ուրախ ու երջանիկ տեսնելը, ամէն օր անոր յայտնաբերած զանազան նրբութիւններուն ու գեղեցկութեանց ականատես ըլլալը, կարծես թէ այս օրերուն վերապահած այս անդիմադրելի հրապոյրներով ու գրաւչութիւններով զինքը խենդեցնելու, սպաննելու համար անոր գործածած այս վրիժառու զէնքերուն տեսքը, անճար ու անկարող հանդիսատեսի մը վիճակին կը դատապարտէին զինքը, որոնց ստիպուած էր լռութեամբ տոկալ ու ականատես ըլլալ իր գոյութեան սրտակեղէք քայքայմանը:

Իժիշկը, այս գիշեր իր ամբողջ ուշադրութիւնը տղուն վրայ կեդրոնացուցած էր. ամէն վայրկեան տարբեր ազդեցութեամբ, տարբեր նշանակութեամբ անոր դեղնող, կարմրող զիմագծերուն վրայ կարեւոր ու խորհրդաւոր ստուերներ կ'անցնէին: Երբ Նէտրէթ Քէնանի հետ խօսէր, անոր զիմագծերուն վրայ սասաիկ սրտնեղութեան մը պրկումներ կը գոյանային. իր աչքերը յամառ փախստականի մը նման շարունակ զանոնք չտեսնելու համար ուրիշ բաներ կ'որոնէր. մերթ շրթներուն վրայ ջղալին ժպիտ մը կը

սառէր, մերթ ձեռքը ճակտին կը տանէր, կարծես թէ այնտեղ կուտակուած վիշտերը խել, նետել կ'ուզէր:

Այլեւս բժիշկ Նէժատի աչքերուն առջեւէն սեւ վարագոյրը կը բացուէր ու անոր ետին կը պարզուէր իրական տեսարան մը շատ ցաւազին, խիստ ողբերգական: Նիհալ, այս կացութեանը շատոնց տեղեակ ըլլալուն՝ թէեւ հօրը չափ չէր զարմանար, սակայն շատ մտատանջ էր. անոր համար միակ անլուծելի հանելուկը Նէտրէթի ընթացքն էր: Այս աղջկան զգացումները ո՛չ կասկած և ո՛չ ալ կատարեալ վստահութիւն կը ներշնչէին իրեն. միայն աւելի կամքի, աւելի դատողութեան տէր կը գտնէր զայն. հետեւաբար, ան ալ իր ամբողջ ուշադրութիւնը Նէտրէթի վրայ կեդրոնացուցած էր. աստիճանաբար կը համոզուէր թէ Գէնանին ըրած անոր շնորհաբաշխութիւններուն ներքեւ թաքուն նպատակ մը կար, անոր ուրախ զուարթ արտայայտութիւններուն տակ վրէժխընդրութեան հաճոյք մը կը պահուէր, մերթ ընդ մերթ անոր սեւ ու խորաթափանց աչքերէն ճառագայթող վիշտերը կը տարտղնուէին ու ի վերջոյ Նիհատի շուրջ կը կեդրոնանային. այլեւս մտահոգ լուութեամբ մը արդիւնքին սպասելէ զատ ճար մը չտեսնող Նիհալ, այս գիշեր կը ջանար ամէն ինչ լաւ վարել ու ինքնիրեն այսպէս կը մտածէր. «Այս՝ այսպէս չի կրնար շարունակուիլ»:

Նէտրէթ, գիշերը անքուն մնացած ու առտուն սենեակէն ուշ ելած էր: Սրահը իջնելով, տեղեկացաւ որ Գէնան կարեւոր գործի մը պատճառով կանուխ մեկնած էր. Մուսալան ակուաները դարմանել տալու համար Բերա գացած էր, իսկ բժիշկը սենեակին մէջ գրադած էր:

Նիհալը սրահին մէջ գտնելու յոյսով ու այս աղ-

նուասիրտ աղջկան հետ զլուխ գլխի խօսակցութեան մը հաճոյքը վայելելու մտածումով, ներս մտած ու հոն վառարանի հաճելի ու չափաւոր ջերմութիւնը գինքը դիմաւորած էր: Երիտասարդուհին, յանկարծ յուզումէն դողաց. փաստաբանը, վառարանին քով, ուժասպառ երեւոյթով մը, թիկնաթողին մէջ ընկողմանած ու լրագիրը ծունկերուն վրայ ձգած էր. Նէտրէթը տեսնելուն պէս ոտքի ելաւ. երկուքին նայուածքներն ալ, շուարուն ու զգուշաւոր՝ վարանքի պահ մը անցուցին: Նիհատ, կամաց մը «հրամայեցէք» ըսելով դիմացը թիկնաթող մը ցուցուց ու նորէն նոյն վատուժութեամբ տեղը նստաւ: Պատուհաններու մթագոյն մետաքս վարագոյրները մեղկ սիրոյ մը հրապոյրը կուտային սենեակին. հաճելի լուութեան մը մէջ, տկար ճարձատիւններով վառուող վառարանին արձակած ջերմութիւնը գաղջ ու դիւթական շունչի մը պէս կը տարածուէր:

Երէկ իրիկուընէ ի վեր անոր աւելի նիհարցած ըլլալը նշմարող Նէտրէթը, հոգիէն արձագանգող ձայնի քաղցր ու թրթռուն յուզումովը հարցուց.

— Այսօր, ի՞նչպէս էք, է՞Ֆէնտիմ...

Փաստաբանը առաջքը նայելով.

— Չեմ գիտեր... այսօր աւելի անհանգիստ կը զգամ, աւելի տաքութիւն ունիմ... վառարանէն հեռանալ չեմ ուզեր... շարունակ կը դողամ...

Նիհատ հանդարտօր՝ խօսեցաւ:

Նէտրէթի սեւ շարունակ մէջ գորովի շող մը փայլեցաւ. առաջին անգամ ըլլալով, անոր դիմաց տկար ու անճար վայրկեան մը կ'ապրէր, ձեռքերը դէպի կրակներու մէջ այրուող անոր գլուխը երկարելու վրայ էր, հազիւ ինքզինքը զսպեց:

Հաստատակամութիւնը յազթած էր իր անձին ու խաղաղ անտարբերութիւն մը տուած իր կեցուած-

քին. իսկ Նիհատը, նոյն վայրկեանին, կարեկցու-
թեան փոքրիկ բառ մը ակնկալող իր նայուածքը ա-
նոր ուղղած բան մը կը սպասէր անկէ: Մանկամար-
դուհին իր ամբողջ մարմինը պաշարող դողով մը,
այս ակնարկին ներքեւ պահուեցաւ. բան մը ըսած
ըլլալու համար.

— Անկողնէն ելլելու չէիք այսօր, Նիհատ պէյ...
ըսաւ:

Փաստաբանը հառաչելով գլուխը երերցուց. ջեր-
մին ազդեցութենէն քիչ մը ըմբոստ ձեւով.

— Ես երբեք չեմ սիրեր կեանքը, Նէտրէթ հա-
նըմ. ձեռքէս եկածին չափ հարուածել, բզքտել կ'ու-
զեմ զայն... Թերեւս ինծի խենթ ըսէք, թերեւս վրաս
խնդաք... սակայն ի՛նչ ալ ըսէք, միշտ դո՛ւք, միշտ
դո՛ւք իրաւացի էք...

Նէտրէթ առջին նայելով ըսաւ.

— Ձեր խօսքերուն իսկական նշանակութիւնը
հասկնալ չկրնալուս՝ չեմ կրնար պատասխանել. բայց
և այնպէս, կեանքին հանդէպ ձեր բողոքի պատճառ-
ները հարցնելու իրաւասութիւնը չունենալուս հետե-
ւանքով, լուռութիւնս՝ շատ բնական պիտի գտնէք
կարծեմ...

Այս ըոպէին, Նիհատ՝ իր սրտին մէջ ուժգին ու
անզուսպ բաղձանք մը զգաց... ամէն բան անոր
խոստովանելու ցանկութիւնը ունեցաւ... սակայն
Նէտրէթի ծանր կեցուածքը խորտակեց անոր համար-
ձակութիւնը. անոր աչքերուն մէջ, անմոռանալի
«այն գիշեր»ուան գաղտնիքներու մէջ թաղուած ա-
տելութիւնը կար:

Յանկարծ, ծանր մելամաղձոտութիւն մը ճնշեց:
Իր հոգին, վիշտի ամպ մը ծածկեց իր հօրը նմանող
գիւթիչ ու խորասուզուած աչքերը. ձեռքով սեղմեց
ձակատը ու մտազբաղ՝ Նէտրէթին նայեցաւ. այս

նայուածքը համակ պաղատանք ու հեծեծանք կ'ար-
տայայտէր: Մանկամարդուհին, անոր ակնարկներուն
տակ գլուխը ձեւելու պարտաւորուեցաւ. իր կեանքին
ամենատկար ու ամենատխուր վայրկեանը կ'անցնէր.
անոր ջերմ, մտերմիկ ու ազդու ակնարկներու ներ-
քեւ իր լրջութիւնը պահել ջանալուն համար՝ ընելիքը
չուարեցաւ. փոքր հետք մը իսկ անկէ ծածկելու հա-
մար իր սիրտը պատուել ուզեց:

Գարձեալ, այն անմոռանալի «գիշեր»ուան հոգե-
րուն խառնուած, ստուերներով ծածկուած դառն,
սրտաբեկիչ խօսքերը փորձեց յիշել. ո՛ւհ... անոնք
որքան թունաւոր, որքան քայքայիչ, որքան անար-
գական էին: Բոպէ մը առաջ, իր հոգին սարսուացնող
անկարողութեանը, այժմ, յանկարծ վեհութիւն մը,
խաղաղութիւն մը յաջորդեց. հպարտ ու յաղթական
ձեւով մը իր գլուխը վերցուց: Նոյն միջոցին, Նիհատ
պաղատագին ձայնով մը ըսաւ.

— Այս գիշերն ալ մնացէք... չըլլա՞ր...

Նէտրէթ, անտարբեր ու անհոգ ժպիտով մը պա-
տասխանեց.

— Ձեմ գիտեր... ի՛նչպէս կ'ըլլայ... քիչ մը
գործ ալ ունիմ...

Նիհատ, այլեւս անկարող էր իր զգացումները
զսպելու. պայթող յուզումէ մը դողդղացող իր ձայնի
դառնութիւնը Նէտրէթի սրտին վրայ թափեց.

— Գործ ունիք... այնպէս չէ՞... հարսանեկան
պատրաստութիւն... ի՛նչ լաւ... ի՛նչ քաղցր զբա-
ղում... սակայն, մէկ օրուան մը յապաղումը ձեր
երջանկութեան յետաձգումին պատճառ մը չէ կար-
ծեմ...

Քաղցր վրէժխնդրութեան մը հաճոյքէն զինով-
ցած Նէտրէթ, զայն աւելի հարուածելու նպատակով
ըսաւ.

— Ասիկա դուք Բէնանին ըսէք... ինձմէ աւելի անոր բաղձանքներուն գոհացում տալու համար, օրերով կարասիի ու արդուզարդի վաճառատունները կը թափառիմ. ես ամէն բանի պարզը կը նախընտրեմ, մինչդեռ ան՝ տարբեր ձգտումներ ունի:

Նիհատ, գրեթէ ինքզինքէն ելած ըսաւ.

— Բէնան... ձե՛ր Բէնանը... չէ՞...

Նէտրէթ՝ քրքիջով մը.

— Անշուշտ... իմ Բէնանս ըլլալու պատրաստուելը հիմա՞ կը զգաք, Նեհա՛տ պէյ...

— Օ՛խ... դուք շատ անողոք, շատ բռնակալ կնոջ մը հոգին կը կրէք...

Նէտրէթ նոյն քրքիջով.

— Դեռ նո՞ր կը հասկնաք այդ բանը:

Երիտասարդը, ցաւազին գլխու ճօճումով մը.

— Ո՛հ, չեմ գիտեր... չեմ կրնար հասկնալ... ամէն պարագայի եթէ կայ բան մը, այն ալ սա է որ դուք զիս ձգմելու, մեռցնելու շա՛տ իրաւունք ունիք:

— Տարօրինակ բան... ձեզ ձգմելու, սպաննելու իրաւունքը ի՞նչպէս կրնամ ունենալ... ինչհի՛ր կը խօսիք այսօր, Նիհա՛տ պէյ...

— Այո՛, գիտեմ թէ կ'ըմբոստանամ... յակայն գիտակցութեանս տէրը չեմ, ի՛նչ ընեմ... ներեցէք ինձի... թերեւս այսօրուան հիւանդութեանս հետեւանքն է... եթէ կ'ուզէք, ընդունեցէք ասոնք իբր հիւանդի մը զառանցանքը, եթէ կ'ուզէք... ամենասրտակեղէք զՂուճի մը զգացումներովը տառապող սրտի մը զսպուած հեծեծանքներս ունկնդրեցէք, Նէտրէթ հանրմ:

Նէտրէթի ուղեղին վրայէն կրակի հեղեղ մը անցաւ... ծանր ու հանդարտ ձայնով մը ըսաւ.

— Նիհատ պէյ, մեր կացութիւնը չմտնանք...

կեանքի պարտականութիւնները նկատի առնենք... ձեր սրտին՝ երիտասարդուհիի մը կապուած... իմ կեանքիս ալ՝ երիտասարդի մը յանձնուած ըլլալը յիշենք...

Նիհատ շտկուեցաւ. դէմքը կ'այրէր, աչքերը բոցեր կ'արձակէին.

— Ձեզ ի՛նչպէս կրնամ վստահացնել, ըսաւ. ձեր ակնարկած երիտասարդուհիին հետ, այսօր, բացարձակապէս առնչութիւն մը չունիմ... միասին հետեւիլ որոշած մեր կեանքի ճամբան շատո՞նց բաժնուած է... դուք լուր չունէի՞ք ասկէ, Նէտրէթ հանրմ:

Մանկամարդուհին, առանց զարմանք արտայայտելու, անոր երեսը նայելով ըսաւ.

— Ո՛չ... երբե՛ք...

Սակայն գոյնը ճեփ ճերմակ կտրած էր. իր սիրտը ուժգնօրէն տակնուվրայ ընող այս լուրը, իր զգացումներուն վրայ զօրաւոր ազդեցութիւն մը գործած՝ իր ամբողջ էութիւնը ցնցած էր. արդեօք ասկէ վե՛րջ պիտի սկսէր իր ներքին հաւաւոր ու խեղճ պայքարը: Բէնանի խաղաղ ու համակրելի դէմքը ուրուագծուեցաւ իր աչքերուն առջեւ: Այս խեղճ, անմեղ մարդուն տուած իր խոստման նշանակութիւնը իր մազերը կը փշաքաղէր:

Մուսլայէն անջատուած ըլլալու մասին Նիհատի խօսքերուն բնաւ չհաւատացող իր զգացումները, այս պահուն, վճռեցին թէ ինքը իբր խաղալիկ մը պիտի գործածուի անոր նախանձն ու սէրը գրաւելու համար: Պահ մը առաջուան իր գաղափարները բոլորովին փոխուած ըլլալով մէկտեղ մտածեց որ այս մարդուն կարեկցութիւն յայտնելու ժամը դեռ հասած չէ, որով զայն հարուածելէ զգացած հաճոյքը երկարաձգելու համար քաղցրօրէն ժպտեցաւ ու ըսաւ.

— Հիմա՛ կը հասկնամ. պահ մը առաջ, ձեր զըժ-

գոհութեան պատճառը այս է եղեր ուրեմն... այնպէս կը կարծեմ որ... կսկծեցուցիչ ու պարտադրուած հրաժարում մը, մարդը իր կեանքէն զգուեցընելու աստիճան հանելի է ու դժուար... չէ՞, Նիհատ պէյ... մինչդեռ դուք շատ յարմար զոյգ մը ըլլալու արժանի էիք...: Մուսալա հանրմը, իսկապէս զեղեցիկ ու շատ հմայիչ աղջիկ մըն է... ագարակ զըտնուած միջոցին, ձեր մասին որչա՛փ կը խօսէր. գիտնայիք թէ ձեր անսահման ու խորունկ սէրը ի՛նչ աստիճան հպարտութիւն կը պատճառէր իրեն...:

— Ո՛ւֆ... լոեցէք, Նէտրէթ հանրմ... դո՛ւք շատ անողոք էք, շատ... այն օրերէն մի խօսիք ի՛նչի...:

Նոյն միջոցին, սենեակին դուռը դանդաղօրէն բացուեցաւ, ծանր քայլերով ներս մտաւ Նէժատը: Նէտրէթի և Նիհատի նայուածքներուն այլափոխութիւնը ակնթարթի մը մէջ իր ուշն ու զարմանքը գրաւած ըլլալով մէկտեղ, առանց կարենալ անոր պատճառներուն թափանցելու, ոտքի վրայ կեցած, անստոյգ մտածումներու մէջ ընկղմած էր:

Նէտրէթի հրեշտակային դէմքին վրայ սովորաբար ծաղկող ժպիտներուն մէջէն, այս անգամ, կը յայտնուէին դառն յուզումի մը հետքեր, զորս ծածկել կը ջանար Նէտրէթ: Ատենէ մը ի վեր իր միտքը յոգնեցընող կասկածները, այլևս իրականութեան ձեւ ու մարմին առնել կը սկսէին. ասոնց ծնունդ տուած մտատանջութիւնով մը իր խորագննին ակնարկները յառեց Ծիքրէթի այս որբուհիին վրայ:

Վշտագին պատասխանատուութեան մը ծանրութիւնը իր ուսերը կը ճնշէր: Յետոյ, աչքերը տղուն ուղղելով, շատ կարեւոր ու նշանակալից նայուածքով մը անոր հասկցուց որ այս մեծ չարիքին միակ պատճառը ինքն է եղած: Բոլոր կասկածները փարա-

տող այս կացութիւնը շատ դժուար, շատ տաժանելի դիրքի մը կը մատնէր զինքը: Խեղճ Քէնանի հանգէպ ի՛նչ դիրք, ի՛նչ ընթացք պիտի բռնէր. անոր ենթարկուած այս չարիքը, այս աղէտը ի՛նչպէս պիտի չէզոքացնէր, ի՛նչպէս պիտի դարմանէր: Նիհատ, վայրկեմ ապէս հասկցաւ իր հօրը մտատանջութիւնը. սակայն մտածեց որ Նէտրէթի զգացումներուն մասնակցած չըլլալուն հետեւանքով, ամբողջ բարոյական պատասխանատուութեան ծանրութիւնը իրեն կը վիճակուէր, ու ինքը, Քէնանին բաժին ինկած երջանկութեանը իբր բռնագրաւիչ, միշտ իր հօրը քննադատութեանց պիտի ենթարկուէր. հետեւաբար, վճռապէս որոշեց ամէն կասկածի, ամէն ամբաստանութեան ենթակայ իր սրտին վրայ գերիշխող ուժին գերին ըլլալ, այս զգացումով ապրելու, այս զգացումով մեռնելու գերագոյն հաճոյքովը ամէն բանի տոկալ:

Նէժատ, Նէտրէթի մազերը շոյելէն յետոյ, խօսքը տղուն ուղղելով.

— Քեզ քիչ մը անհանգիստ կը տեսնեմ, Նիհատ, ըսաւ... բժիշկի մը դիմելու ես. (բազկերակը բռնելով) օ՛հ, շատ տաքութիւն ունիս... աս ի՛նչ անուշադրութիւն... աս ի՛նչ անհոգութիւն...:

Նէտրէթ ոտքի վրայ, հայրն ու զաւակը կը դիտէր: Բժիշկը կ'ուզէր իր գլուխը դնել Նիհատի յոգնած շընչառութեամբ ելեւէջող կուրծքին վրայ, սակայն Նէժատ խուսափեցաւ այս քննութենէն...:

Հինգ վայրկեան վերջ, փաստաբանին աչքերը ծանրօրէն կը գոցուէին... մանկամարդուհին, մեղմօրէն բարձ մը կը զետեղէր անոր գլխուն տակ. Նէժատ, հանդարտ նայուածքով մը զայն կը դիտէր ու նորէն անցեալի ու ներկայի միջեւ շատ կսկծեցուցիչ պահ մը կ'ապրէր:

* * *

Մուսալլան յոգնած ու աճապարանքով եկած, ուղղակի սենեակը ելած ու առանց հանուելու բազմոցին վրայ ինկած էր: Նիհալ, նրբանցքին մէջ անոր հանդիպած, զայն մինչեւ իր սենեակը առաջնորդած, զարմանքով ու ցաւով, դուռը մեղմօրէն գոցելէն վերջ անոր հարցուցած էր.

— Աս ի՞նչ վիճակ է, Մուսալլա:

Մանկամարդուհին, առանց պատասխանելու, աչքերը կը գոցէր. իր կուրծքը բզբտող հեծեծանքը, խօսիլը կ'արգիլէր: Նիհալ, անոր բուռն տագնապ մը անցնելը կը տեսնէր. իր միտքը ահաբեկող ենթադրութիւնը ահա կը սկսէր իրականանալ:

Մուսալլա, ումպ մը ջուրով իր կոկորդը թրջելէ յետոյ, սգաւոր աչքերը բարձրացուց ու դիմացը զարմանքի մատնուած Նիհալին նայեցաւ... այս աչքերուն մէջ, շատ վշտագին, շատ դառն խորհուրդներ կային:

— Բեռկի՛ն... ըսաւ, այս ըոպէիս՝ կատարելապէս տէրը չեմ գիտակցութեանս... չէի կրնար ըմբռնել թէ կեանքիս մէջ այսօրուան չափ դժբախտ պիտի ըլլայի: Զգո՛յ՛, ինծի բան մը մի՛ հարցնէր...

Նիհալ, ջղայնացած ու անհամբեր.

— Ի՞նչ ըրիր... ի՞նչ եղաւ, ըսէ՛, ըսէ՛ ինծի, թերեւս կրնանք զարմանել... չե՞ս տեսներ թէ ո՛րքան կը տանջուիմ. Մուսալլա, ի՞նչ ըրիր, շո՛ւտ ըսէ՛...

— Ինչ ընե՛լս կը հարցնես... Բէնանի գրասենեակը գացի...

— Վե՞րջը...

— Վե՛րջ... այո՛... գացի... զիս տեսնելուն

շուարեցաւ... ա՛խ... անոր դիմացը տղու մը պէս լացի՛... լացի՛... առանց բան մը ըսելու, յայտնեցի... բնականաբար ամէն բան հասկցաւ... շատ աղուած էր, ձեռքերը կը դողային, շրթունքները կը դողային, ձայնը կը դողար. չափաւորութիւն թելագրեց ինծի. չեմ գիտեր թէ դեռ ինչե՛ր ըսաւ: Միշտ, իմ դիմացս իր հաստատակամութիւնն ու լրջախօհութիւնը պահել կրցող Բէնանը, այսօր, անձար ու տկար տղու մը պէս կը դողար:

Նիհալ, գլուխը ձեռքերուն մէջ առած.

— Այս ի՛նչ յանդգնութիւն, Մուսալլա, այս ի՛նչ յանդգնութիւն. բնաւ չմտածեցի՞ր որ այս մարդը ամուսնանալու վրայ է... բնաւ միտքէդ չե՞ս անցներ որ ընտանիքի մը մէջ պատահած այս արարքները կրնան վտանգաւոր հետեւանքներ ունենալ:

— Բան մըն ալ չեմ կրնար մտածել... Կոյն իսկ չեմ գիտեր թէ ընթացքս լա՛ւ է թէ վատ. նէտրէթի կողմէ՛ անոր ցոյց տրուած մտերմութիւնն ու իմ զըրկանքս, ամբողջ գատողութիւնս, բոլոր ուժերս խլեցին ինձմէ՛ ու զիս խենթի մը վիճակին հարցուցին:

— Ամբողջովին զգացութեանդ գերին ես դուն, Մուսալլա... բայց և այնպէս աղէկ բան մը չըրիր. էրբե՛ք, երբեք աղէկ բան մը չըրիր:

— Օ՛խ... այնքան լաւ բան մը ըրի որ չեմ կրնար բացատրել... կը կարծէ եղեր թէ ես Նիհատին հետ պիտի ամուսնանամ... ամէն ինչ հասկցուցի իրեն. այս գաղափարը շատոնց լքած ըլլալնիս պատմեցի. ըսի նաեւ թէ անոր հետ երբեք երջանիկ չպիտի ըլլայի:

— Ո՛հ... Մուսալլա, արգարեւ շատ փոփոխամիտ, շատ ինքնամուլ ես եղեր... խեղճ Նիհատի ամբողջ յոյսերը կը փճացնես, բարոյապէս զայն մերժումի կը մղես... և հիմա ալ ելեր կը փորձես ու-

րիչ մէկն ալ նոյն վախճանին առաջնորդել, այնպէս չէ՞...

Մուսալլա, գլուխը վերցնելով.

— Ո՛հ, ո՛հ... ես այս զգացումով, այս խենթ կրակովը շփրեցի եղբայրդ. անոր ցոյց տուած սէրս պարզապէս ժամանց մըն էր ինծի համար, ահա այսօր... մինչդեռ ես՝ իրական սիրոյ հաճոյքը հիմա կը սկսիմ ճաշակել... այլեւս հասկցայ որ բնաւորութեանս մէջ, սիրուելի աւելի սիրելի հաճոյք զգացող, շողօքորթուելի աւելի տիրապետելի ախորժող հակասութիւն մը կայ... Բէնանի՛ զիս գրաւող, իմ գիտացս անոր չծռող, չընկճուող, չպզտիկցող եսի հպարտ տիրականութիւնն է:

«Ինչ որ ալ ըրի՛, չկրցի անոր հաստատակամութիւնը խախտել. այս պարագան սարսափելի և բուռն տիրապետութեան մը ըղձանքը արթնցուց իմ մէջս, այս բաղձանքը ամենաջերմ ու զօրաւոր սէրով մը կը համակէր իմ էութիւնս. օրէ օր այս զգացման ջերմ ու մտերմիկ մթնոլորտին մէջ մխրճուելէն հաճոյք կը զգայի. մինչեւ այն ատեն ինձ անձանօթ մնացած կարգ մը ազգականերու երեւակայական հորիզոնները բարձրանալ կ'ուզէի. կը հասկնայի թէ՛ զգացումս մը ազգեցութեանը տակ, ես այլեւս յարատեւօրէն գէպի վեր բարձրանալու, լաւ կին մը ըլլալու ընդունակութիւնն ունէի... Նէտրէթին նմանելու և այսպէս ինքզինքս անոր սիրցնել տալու մտածումներով կը մխրթարուէի: Եարունակ մարդոց ծառայութիւն, բարիք ընելու, ուղղամտութեան ու խղճմտութեան առաքինութիւններովը նկարագրիս ուղղել կը ջանայի և սկսած էի յաջողիլ ալ. սակայն, իմ ինքնութեանս մէջ, ասոր հակազգեցութիւնն ալ կրնայ յուսացուիլ... միայն այսքան կրնամ ըսել որ, անկէ շփրուելու հասկըցած օրս գուցէ... ես շատ գէշ, շատ ըմբոստ և գուցէ շատ ալ թշուառ կնոջ մը հոգին կրեմ...

Մուսալլայի կանաչ աչքերը կէտի մը յառեցան. լուռ ու մտածկոտ մնաց: Նիհալ, իր լսածներէն ապշած ու յուզուած՝ կը մտածէր. գլուխը երերցնելով, ըսաւ.

— Մուսալլա... դուն շատ յանդուգն, շատ ծայրայեղութեանց հակամէտ, շատ դիւրաբորբօք կին մըն ես... ա՛լ կը հասկնամ որ աղէտ մը կը պտտի մեր գլխուն վերեւ... ասիկա՛ հայրս լսած օրը, անկասկած, մեծ փոթորիկ մը պիտի պայթի, որովհետեւ այս ընթացքը ուղղակիօրէն Նէտրէթին գրկանք կը նշանակէ. այլեւս երեւակայէ թէ ինչն'ը կրնան պատահիլ... մտածելով՝ խենթութիւն կուգայ վրաս:

Մուսալլան ուսերը ցնցեց ու ըսաւ.

— Դուք շատ չափազանցել կ'ուզէք... ամէն ինչ իր բնականոն ընթացքին մէջ պիտի մտնէ...

Իրչ առաջ ըմբոստ տղու մը անառակութեամբ փայլատակող իր աչքերը երթալով իրենց ուժգնութիւնը կը կորսնցնէին. հիւանդ և ուժասպառ տրիստութեան մը ամբողջ անյուսութիւնը կը պատէր իր դէմքը... տխուր ու մեղամաղճոտ դարձաւ:

Սրահ գտնուողները, բնականաբար անտեղեակ էին Մուսալլայի և Նիհալի միջեւ տեղի ունեցածներէն: Նիհատի անհանգստութեան պատճառով, բժիշկ մը կանչուած և քննութեան արդիւնքէն հասկցուած էր թէ հիւանդութիւնը ծանր հանգամանք մը չունի, ինչ որ ուրախութիւն առթած էր Նէտրէթին ու Նէտրէթին. միայն ջերմի աստիճանը բժիշկին ուշադրութիւնը գրաւած ըլլալով, անոր՝ հոգեկան ու մտային հանգիստ մը յանձնարարած էր: Նիհալ, սրահը մտած միջոցին, ինքզինքը չմատնելու վախն ու մտատանջութիւնը ունէր: Եղբօր առողջութիւնը հարցուց, անոր կրակներու մէջ այրող ճակատը շոյեց: Նէտրէթի քաղցր ու գորովալից ակնարկները աղջկան գէմքին յառած, հարցուց.

— Առաւօտէն ի վեր ո՛ւր էիր, Նիհալ... :

* * *

Նէտրէթ, այսօր մինչեւ իրիկուն չբաժնուեցաւ հիւանդին քովէն: Նիհատի նայուածքներուն մէջ խորին երախտապարտութիւն մը ու գաղտնի վշտի մը արտայայտութիւնը կը թրթռար. Նէտրէթ այս արտայայտութեանց իմաստը չհասկնալու կուգար, ինչ որ Նիհատի իղձերը աւելի կը հրահրէր: Իրիկուան դէմ ջերմի աստիճանը իջած էր. Նէտրէթի ներկայութիւնը անոր առողջութիւն ու հանգիստ պարգեւած էր. այս մէկ օրուան երջանկութիւնը, ցանկալի երազի մը պէս, քանի մը օրուան համար անոր յոյսը կ'ապահովէր. կը մտածէր թէ՛ միշտ այսպէս հեռուէն՝ զայն սիրելով կրնայ երջանիկ ապրիլ:

Իրիկունը, Քէնանի ժամանումը մղձաւանջի մը պէս ճնշեց իր ուսերը... տխրատեսիլ ամպ մը ծածկեց իր դէմքը. առաւօտէն ի վեր անոր՝ միայն իրեն սեփական ըլլալու գաղափարովը գինովցած, հիմա, յանկարծ ցաւագին զրկանքի մը դառնութեամբ, միշտ անոր կարօտովը դժբախտ կեանք մը անցնելու տուայտանքը, մանկիկի մը պէս հեկեկագին լալու բաղձանք մը արթնցուց իր մէջ:

Քէնան, ծրարներով նուէրներ բերած էր անոր, ասոնք տեսաւ ու մանաւանդ անկիւն մը քաշուած Նէտրէթի խօսքերն ու անոնց հետ մէկտեղ անոր գալարուն ու սրտագրաւ խնդուքներու թրթռումը լսելով, ուշակորոյս ու ինքնամոռաց վիճակի մը հասած՝ «սակայն, սպաննե՛լ կ'ուզէք զիս» պոռալու ըղձանքովը կը տոչորուէր:

Նէտրէթ, այս վայրկեանին անոր կրած տառապանքը կը զգար. սակայն, անմոռանալի անցեալի

հարուածին՝ փոխվրէժի իր զգացած հաճոյքը երկարածագել կ'ուզէր:

Սրահէն ներս Մուալլայի մուտքը, շանթի մը ազդեցութիւն ըրած էր Քէնանի վրայ: Պատրուակով մը անմիջապէս Նէտրէթի մօտէն հեռանալու անհրաժեշտութիւնը ազգարարող այս տարօրինակ պարտաւորութիւնը, ենթադրութեանը չափ ծանր չթուեցաւ իրեն:

Այս երեկոյ, իր նուրբ ու պարզ արդուզարդովը շատ գեղեցկացած էր ան, տժգունութիւնը՝ տրտում անուշութիւն մը կուտար իր դէմքին, աչքերը նուազկոտ էին: Այս առտուան փոփրած, յանդուգն, հրացայտ Մուալլայէն բոլորովին տարբեր աղջիկ մըն էր. յոգնած և ուժասպառ՝ անկիւն մը նստաւ: Քէնան, այս գիշեր միշտ անոր կը նայէր ակամայ. շիկահեր բարձր գլուխը, շատ հրապուրիչ կը դառնար մութ գոյն հագուստներու վրայէն. երիտասարդը նոյն պահուն, անբացատրելի հրակէզ տառապանքով մը կը տուայտէր... իր վրայ սեւեռուած յամառ աչքերուն մէջ, պահանջկոտութեան, անյուսութեան և նախանձի շողերը փոխն ի փոխ կը վառէին:

Քէնան, այս պոռուար կացութեան մէջ, ընելիքը շուարած ու դատողութիւնը կորսնցուցած էր. այսուհանդերձ, ասիկա իրեն համար անակնկալ մը չէր. Մուալլայի աչքերը, այս ապստամբ սիրոյ ցաւի գիրքն էին, Քէնան ամէն օր անոնցմէ վիշտի ու տանջանքի նորանոր էջեր կը կարգար. սակայն Նիհատի հանդէպ իր ունեցած յարգանքն ու իր սրտի զգացումները տեւականօրէն զուգընթաց կ'երթային. այս երկու ուժերով կրնար անոր դիմագրաւել: Այն գեղեցիկ ու անկարեկիր աչքերու կանաչութեան, անոնց մթաստուեր անդունդին մէջ շիջալու համար, անոնցմէ, անոնց զիւթիչ հրաւերէն, անվախճան խոստումներ

րէն. . . Չերմ ու երազուն ակնարկներէն միշտ փախ-
չիլ, հեռանալ, ազատուիլ կ'ուզէր:

Նէտրէթ, իր լուռ ու անվրդով տունը քաշուած էր. քիչ անգամ կ'երթար Շիշի. օրեր ու շաբաթներ կ'անցնէին այսպէս: Մուսլլայի ու Քէնանի յարաբե-
րութիւնները իրենց ծայրագոյն աստիճանին կը մօ-
տենային: Երիտասարդը, ամէն անգամ որ անոր հրա-
վառ ու սիրաբորբ աչքերուն կը նայէր՝ կը զգար թէ անկէ ցուացող կայծ մը՝ իր սրտի ամէնէն թաքուն ու խոր անկիւնը կը մխրճի ու գայն կը հրգեհէ: Նէտ-
րէթի միշտ ծանր ու պաղ վերաբերումը, անոր հան-
դէպ իր սառն ու անիմաստ նայուածքները, իր սրտի պապակը յագեցնելու անբաւարար էին. հեռաւոր. . . մարած. . . համր տեսիլ մըն էր միայն: Այն պահուն, երբ անկէ սէր կ'ակնկալէր ու կը պահանջէր, ան խոյս կուտար. յամառ, օտար. պաղ, անընտել, անսիրտ ու անզգայ սառնարձան մը կը դառնար. մինչդեռ, Մուսլլան զինքը կը հրաւիրէր, կը քաշէր դէպի տաք ու մտերիմ աշխարհ մը, որ իր երակներուն մէջ հուր ու հմայք կը ներարկուէին:

Նէտրէթ, անոր շփոթ կացութիւնը ըմբռնել կը սկսէր, անոր ընթացքի անվճռականութիւնը, անոր աչքերու տարտամ արտայայտութիւնը ամէն օր նո-
րանոր փաստեր կուտային իրեն. իրենց յարաբերու-
թիւնները օրէ օր պաղելով կը վերածուէին սառնա-
կոյտի մը որ հաղորդակցութիւնը անհնար կը դարձնէ այլեւս: Նէտրէթ կը զգար, կը գիտակցէր և սակայն կ'ուզէր երկարածգել այս վիճակը: Այսպէս շարու-
նակելով կը մտածէր թէ կրնայ Նիհատի հանդէպ իր գիրքը ամրացնել և Նէժատի կասկածներէն, գէթ մա-
սամբ, զերծ մնալ. Մուսլլայի ամէն առիթով իր հո-
գիին մէջ հոսեցուցած զրպարտութեանց թոյնը, ա-
ռաւելապէս ուժ կուտար իր այս գաղափարին:

Սիրոյ տոչորող նախանձովը գալարուող ու ընե-
լիքը շուարած այս հրայրքոտ աղջիկը, կ'ուզէր Նէտ-
րէթի ուշադրութիւնը ցրուել ու իր սիրային շրջանա-
կին մէջ մինակ ու անմրցակից մնալ. այս նպատակին հասնելու համար միշտ Նիհատի հետ իր ունեցած յարաբերութիւններուն մասին խօսելով, գայն զբա-
ղեցնել կը ջանար.

— Նիհատ, կ'ըսէր, պարզապէս իր հայրը խա-
բելու նպատակով ինձի հանդէպ անտարբերութիւն կը
կեղծէ, և կեղծիքի այս հարկադրութիւնն է որ կը
թունաւորէ ու կը քայքայէ խեղճին կեանքը:

Ասոնք պատմած միջոցին, անոր աչքերը էգ-
վազրի մը վայրագ արտայայտութիւն մը կը ստանա-
յին: Նէտրէթ, այս խօսքերը լսելով կը զգար թէ իր
ինքնութիւնը կը հալի, իր հոգին կ'արիւնի: Ուրեմն,
Նիհատ զինքը կը խաբէ, առսնց խղճահարութեան իր
սիրտը իբր խաղալիկ գործածել կ'ուզէ. անոր պաղա-
տագին նայուածքներու իմաստը այս է եղած ու-
րեմն. ասիկա մարդկային սրտի ու զգացումի արա՛րք
է միթէ. . .

Այս մութ մշուշներով ծածկուած իր ուղեղէն
մերթ յոյսի ու իրականութեան նմանող լոյս մը կը
ծագէր, լոյսի այդ ճառագայթը մերթ իր սեւ մտա-
ծումները փարատելու չափ կը պայծառանար. սա-
կայն, յանկարծ մահացու վիշտի մը անբացատրելի
տառապանք մը զինքը կը թունաւորէր, կը բարո-
յալքէր:

Ամէն բանի անտեղեակ Նէժատը, շատ մտատանջ
էր ու նեղացուցիչ կեանք մը կ'անցնէր: Նէտրէթին
բան մը հարցնելէ, Քէնանի գաղափարը հասկնալէ,
իր վաւկին զգացումներուն գիտակ ըլլալէ կը քաշ-
ուէր. անորոշ վախի մը տպաւորութեան ներքեւ

կ'ապրէր: Քանի մը ամիսներէ ի վեր Քէնանը միշտ անտրամադիր ու մտածկոտ կը տեսնէր. անոր բերնէն իր հարսնիքի մասին որոշ բառ մը իսկ չէր լսեր ու միշտ իր զբաղումներուն շատ ըլլալը պատրուակելով ամէնքէն հեռանալու միտումներ ցոյց կուտար:

Գալով Նիհատին, ան բոլորովին այլամերժ և բոլորովին տարբեր մարդ մը դարձած էր: Քէնան այցելութեան եկած իրիկունները, անմիջապէս, առանց մէկէ մը նշմարուելու, իր սենեակը կ'առանձնանար: Վառարանի ու գաշնամուրի բոլորտիքը՝ Քէնանի, Մուսալլայի և Նիհայի մտերմիկ խօսակցութեանց ժամադրավայրը դարձած էր: Դեռատի Մուսալլան, Նիհայի ներկայութեանը իր ամբողջ սիրոյ պոռթկումը կը զսպէր ու զիշերային մտերիմ ու քաղցր պահերը իր սիրած երիտասարդին հետ կ'անցնէր. անոր նայուածքներէն, անոր էութենէն ամէն օր նորանոր մասնիկներ կը խլէր, կը գրաւէր ու իր կեանքին նըխադրանքներ կը խլէր, կը գրաւէր ու իր կեանքին նըխադրանքներ կը խլէր. երկու սրտերու միջեւ բացուած ճամբան ժամէ ժամ կը կարճնար. այդ միջոցը մագնիսական ուժի մը ազդեցութեան տակն էր:

Օր մը Նէժատը, հարսնիքի մասին Քէնանէն բան մը հասկնալ փորձած էր: Երիտասարդը, անակնկալի մը առջեւ գտնուելով շփոթութեան մատնուած էր. յետոյ ինքզինքը հաւաքելով.

— Ձեր հրամանին կը սպասեմ... ըսած էր:
Սակայն, բժիշկը, այս բառերուն ներքեւ անփոյթ, տժգոյն և քիչ մըն աւ անախորժ զգացումի մը պարտադրութիւնը նշմարեց: Այս ատիւ. կ'ուզէր նաեւ Նէտրէթի կարծիքը շօշափել: Յաջորդ օրը, մասնաւորապէս այցելած էր մանկամարդուհին ու գայն շատ անգոյն ու տիուր գտած:

Առանց որ և է յառաջաբանի պէտք տեսնելու, առաջին իսկ հարցումին, Քէնանի պէս անորոշ պա-

տասխան չտուող Նէտրէթ, իր գաղափարն ու որոշումը այսպէս բացատրեց.

— Նախապէս ըսածիս համաձայն, կը փափաքիմ հարսնիքը կատարել ագարակին մէջ. կարծեմ թէ հոն, միասին պիտի անցնենք գարունը. նորոգութիւնը աւարտած է. հոն, մեր հանգիստը ապահովելու շափ կարասի զրկել կ'ուզեմ: Մօրս յիշատակներովը տագորուած այդ միջավայրին մէջ ապրելս զիս շատ պիտի մխիթարէ... այս մասին Քէնանին հետ տակաւին չխօսեցանք. թէեւ այս պարտականութիւնը ամէնէն աւելի ձեզի կը պատկանի. պէտք եղածը խօսեցէք իրեն...:

Ասոնք ըսած միջոցին, իր ձայնին մէջ այնպիսի գառնութիւն մը կար որ Նէժատի հոգին կսկծեցուց. խեղճը կամաց ու անհամարձակ ըսաւ.

— Նէտրէթ, վերջին անգամ ըլլալով շատ կարեւոր և լուրջ հարցում մը կ'ուզեմ քեզի. պատասխանդ՝ զիս մեծ տագնապէ մը պիտի փրկէ. այս ամուսնութիւնը կարգ մը ցաւաւիթ պարտադրութեանց հետեւանքով ընդունած էիր:

— Ի՞նչպէս:

— Օրինակ, երիտասարդ սրտի մը սնուցած քաղցր յոյսերուն յանկարծ փոխադարձելով անձնագոհութիւն մը ընելու պէս...:

Դեռատի ազջիկը դողաց... սրտի ամբողջ ուժը հաւաքել ջանաց... քանի մը վայրկեան լուռութենէ մը վերջ գլուխը բարձրացուց.

— Կարծեմ թէ ուրիշ անգամ մըն ալ այս հարցումը ըրած էիք, ըսաւ... ահա, ինչպէս որ այն օրը ըսած էի, հիմա ալ կը կրկնեմ. ո՛չ... ո՛չ...:

— Շիտակ չես խօսիր, Նէտրէթ... շիտակ չես խօսիր... աչքերուդ խորերը ծածուկ վիշտ մը ու անյուսուցիւն մը կայ. ես կը տեսնեմ. դուն ասիկա

ինձմէ պահել կ'ուզես. կը վախնամ որ մօրդ հոգին կը վշտացնես ինձմէ:

Նէտրէթ, սրտատրոփ ու յուզուած ըսաւ.

— Կ'աղաչեմ, ի սէր ձեր նախնեաց գոցենք այս խնդիրը. ձեր նշանակած այս ազնիւ մարդուն հետ կենակցութիւնս կը յուսամ թէ ինձի գոհացուցիչ երջանկութիւն մը պիտի տայ. արդէն ապագայէն՝ ասկէ աւելի բան մը չեմ ակնկալեր, կամ շատ երջանիկ պիտի ըլլամ և կամ մօրս դժբախտութեան յաւիտենական ժառանգորդը. պայմաններն ու պարագաները պիտի յայտնեն: Ես ամէն բան իր բնական ընթացքին կը ձգեմ. առջեւս երկու ճամբայ ունիմ, մէկը մուտք է ու փշոտ, միւսը՝ լուսաւոր ու անվախճան... անասն ինքզինքս ճակատագրին յանձնած կ'երթամ... դէպի ո՞ւր... ո՞ր կողմ. չեմ գիտեր... չեմ կրնար գիտնալ... միայն թէ կ'երթամ: Եթէ զիս կը սիրէք, այս խնդրով այլեւս մի հետաքրքրուիք, չըլլա՞ր:

Բժիշկը չպատասխանեց. սակայն վճռապէս համոզուեցաւ որ անոր սրտին խորը խորհրդաւոր սէր մը անթեղուած էր:

Նէտրէթ, ա՛լ ազարակ երթալու որոշումը տուած էր. արդէն Փետրուարի վերջն էր: Իր հոգին վիրաւորող այդ միջավայրէն հեռանալ ու ամիսներէ ի վեր կորսնցուցած իր խաղաղութիւնը վերագտնել, հոն, առանձնութեան մէջ մխիթարութիւն ու կազդոյր գտնել կը յուսար:

* * *

Սալորենիներն ու նշենիները ճերմակներով պըճնուած՝ գարնան առաջին բոյրօքն ու շունչովը կը ժպտէին. այգալոյսերու և վերջալոյսերու վարդագոյնէն ծնած ջերմ ու արգասաբեր սոր կեանք մը, անուշաբոյր, քաղցր ու հոսոն օդով մը բնութիւնը կը գլխովընէր:

Կարմիրներով, կանաչներով ու գեղիններով ներկուած «Չամլը Ագարակ»ին լեռներն ու ձորերը ցնձուն օդով մը կը յորգէին ու դրախտային երազի մը բանաստեղծականութեան տեսիլը կը պատկերացնէին. անտառը կանաչ ու թարմ կեանքով մը կը խրոխտար, զմրխտագոյն դաշտերու մէջ ցանցնուած գիւղերը գործունէութեան ու կենսունակութեան մէջ էին. հոն, ծաղկատի աղջիկներու երգերն ու ձորերու մէջ արձագանգող գառնուկներու մայրենները գարնան զուարթ ու քաղցրալուր համերգը կը յօրինէին:

Ագարակը վերանորոգուած էր. Պոլիսէն անհրաժեշտ առարկաները հայթայթուած էին, նախկին ամայի ու աւերակ քարաշէն այս շէնքը կերպարանափոխուած էր: Նէտրէթ, հոս, ճակատագրական՝ դէպքերուն սպասելու՝ որոշումը տուած էր:

Քէնանի ցոյց տուած յարաճուն անտարբերութիւնը կրնար նոր պատահարներու ծնունդ տալ, սակայն Նէտրէթ անվրդով՝ կը սպասէր արդիւնքին: Բժիշկին տուած խօսքը չգրժելու և Նիհատի հանգէպ իր դիրքը ամրապնդելու համար, համբերատար կը սպասէր. ասով մէկտեղ, այս ակամայ աքսորը, ուրկէ մխիթարութիւն ու կազդոյր կ'ակնկալէր, այս անգամ շատ տխրազդու կը թուէր իրեն. մօրը ցաւերու ու արցունքներու բոյն եզող այս լքուած ու անտէր

օճախը իրեն ալ վիշտերուն յաւիտենական բնակարանը պիտի ըլլար. օր մը, ինքն ալ անոր պէս անձայն ու անբողոք պիտի անհետանար. այլեւս փրկութեան յոյսերը ամբողջովին պիտի ոչնչանային. ինչ միջոցի ալ դիմէր, կը զգար թէ անկարելի էր այդ երեւակայութենէն խուսափիլ: Ուր որ ալ երթար, ուր որ ալ պահուէր, ամէն տեղ նոյն դիւթող, նոյն փրակիչ ուժը. իր ուղեղը, իր սիրտը կրճող այն տանջող, ճնշող ու քաղցր վիշտը միշտ իրեն հետ էր. հակառակ իր կամքին այդ անդամներն իր ստը փակած էր անոր, անոր հետ ծնած էր, իր կեանքը անով շաղուած, անոր հետ անքակտելի կապերով կապուած էր, իր շնչած օդը անով տոգորուած էր, ու ինքը անդօր թողունի մը նման անոր ցանցին մէջ բռնուած կը թփրտար:

Նէտրէթ, գարնան այս զով ու խոնաւ իրիկունները պատշգամին վրայ կ'անցնէր վշտագին երեւակայութիւններով տարուած, լուռ ու անշշուկ. խաւարի գաղտնիքներուն մէջ իրեն ժպտող անուշ ու փրակիչ դէմքի մը հոգեկան յուզումները վերապրեցընել կը ջանար: Հակառակ Մուսալայի բոլոր հաւատարմութիւններուն, ինչո՞ւ համար այդ դէմքը զինքը տեսնելուն պէս կը կերպարանափոխուէր: Այս մարդը, ինչո՞ւ համար զինքը խաբէր. ինչո՞ւ իր սրտին հետ խաղալ ուզէր:

Նէտրէթ, խիղճ ըսուած այդ ազգար դատաւորին միշտ այս հարցումը կ'ուզէր. «Ինչո՞ւ անոր հոգին ցոլացնող նայուածքներու մէջ լացող կսկիծ մը, ինչո՞ւ անոր աչքերուն խորը զղջման պաղատագին տառապանք մը, ինչո՞ւ անոր ամբողջ ընթացքին մէջ անյոյս հիւանդի մը դեղ ու դարմանի սպասումը յիշեցնող տրտում հաւատք մը, անտրտունջ համբերատարութիւն մը կար...»: Խօսքը իրեն ուզղած մի-

ջոցին, ինչո՞ւ անոր ձայնին մէջ դառնութիւն մը և աղաչանք մը կար. յետոյ, Քէնանի հետ եղած միջոցին, ինչո՞ւ համար այս մարդը յանկարծ ըմբոստ ու վայրագ հոգեկան վիճակ մը կը ստանար ու կը կերպարանափոխուէր:

Խաղաղ կեանքի մը մէջ, այս բոլոր երեւոյթները վերլուծել փորձող անոր միտքը, այլեւս աստիճանաբար կ'ազատուէր այն մթամած մշուշներէն ու իրականութեանը կը մօտենար... յոյսին նմանող այն աղօտ լոյսը կը սկսէր պայծառանալ ու անոր ուղեցոյցը կ'ըլլար: Վերջին հրաժեշտի գիշերը որքան խորհրդաւոր եղած էր... Քէնան, հոգեկան տանջանքներու մէջ, միշտ իրմէ խուսափելու միտումներ ցոյց կուտար. իսկ Նիհատի աչքերուն մէջ յոյսի, վիշտի, մտատանջութեան, տառապանքի վերջին հանգրուանը հասնող մարդոց վրայ նշմարուած խոնջէնքի ու անհամբերութեան նմանող այլազան արտայայտութիւններ իրարու կը յաջորդէին: Ասոնց մէջէն, մասնաւորապէս իր հոգիին մութ անկիւնները թափանցող, սիրտը ծակելով իր էութեանը մէջ մխրճող սուր ու վերջին նայուածք մը կ'օր, զօր երբեք չէր կրնար մոռնալ...: Իր վերլուծումներու, երեւակայութեանց ու յոյսերու ստեղծած մտապատկեր մը, տեսիլ մը ըլլար թերեւս ան... սակայն իր ամբողջ կեանքին մէջ սիրոյ գինովութիւնը վայելելու համար կը բաղձար որ այդ նայուածքը իրականութիւն դառնար:

Նէտրէթի այս յարատեւօրէն լուռ ու մտածկոտ վիճակը սկսած էր իր շուրջիններուն մտահոգութիւն պատճառել. աչքերը հիւանդի մը յոգնածութիւնը ունէին. կոտրած սիրտին վիշտը իր միջավայրը կը համակէր. անշշուկ ու համբերատար կեանքի այս լուռ մենութեանը մէջ թաղուած, սրտի անսահման կարօտովը լի, առանձին ու անտրտունջ, կը պահուէր այս կանաչ լեւներուն մէջ:

կամաններու մէջ տեղաւորած ատեն, Գաթմա պա-
ճին, քիչ մը մտած բժիշկին թէյ կը պատրաստէր։
Նէժատի դէմքին տխրութիւնը կամաց կամաց կ'ան-
հետէր. Վէյսէլ պապան ուրախ արտայայտութիւնով
մը տարօրինակ պատմութիւն մը կը պատմէր անոր.
Նէտրէթի բերած թէյին պատճառած հաճոյքին հետ
գլուխը շարժելով մտիկ կ'ընէր։ Գաթմա պաճիի հա-
ճելի կատակները այս իրիկուան խօսակցութեանց
գուարթութիւն ու փայլ կուտային։

Նէտրէթ, այս իրիկուն իր կեանքի այս տաք ու
մտերիմ անկիւնը, զինքը սիրողներով շրջապատուած,
քաղցր խաղաղութիւն մը կը գտնէր. բոլոր հոգիովը
հանգիստի բաղձանքը կը զգար ու մեծ կարօտով մը
կը մտածէր թէ՛ ինչո՞ւ ամէն մարդու տրուած չէ
կեանքին՝ միայն մակերեսային կերպով նայիլ, անզգայ
ու անփոյթ ըլլալ։

Նոյն պահուն, ոտքի ձայներ ու շուներու զայ-
րացկոտ հաչիւններ լսուեցան պարտէզէն։ Վէյսէլ
պապան.

— Օտարական մը... ըսաւ։

Բժիշկը, գլուխը պատուհանին դարձուց. Գաթմա
պաճին, դուռը բանալու գացած էր. Նէտրէթ, սրտի
բաբախումով մը սենեակին մէջ կը քալէր ու դուրսը
մտիկ կ'ընէր։ Երիտասարդ ու հնչուն ձայն մը ար-
ձագանգեց պարտէզէն.

— Ճամբան մուրած գիշերուան մը հիւրը հոս
կ'ապաստանի, կ'ընդունի՞ք... կ'ըսէր։

Գաթմա պաճին, յանկարծ շուարուժէ մը վերջ,
բըքջալիւր ըսաւ.

— Տէ՛ր Աստուած, պէ՛յ... չկրցի ճանչնալ, ը-
սաւ, ու դուռը կոնակի վրայ բացաւ։

Նէտրէթին սիրտը ուժգին բաբախումէն կը պայ-
թէր. բոլորովին անակնկալ կերպով անոր գալը...

չատ կարեւոր կը գտնէր։ Վէյսէլ պապան ուրախու-
թեամբ պոռաց.

— Փաստաբան պէյը եկաւ...

Բժիշկը ժպտադէմ, յարեց.

— Օ՛հ... Նիհատ պէյ էֆէնտի, այս անակնկալ

գալուստդ, շիտակը ամէնքս ալ ուրախացուց։

Նէտրէթ, պահ մը ըսելիքը շուարած, այս յան-
կարծական այցելութեան առթած երջանկութեան գի-
նովութենէն կը դանդաղէր երբ իր ձեռքը անոր եր-
կարեց։ Փաստաբանը, այս ձեռքը իր ափին մէջ սեղ-
մած ատեն կը դողար. աչքերուն մէջ յոգնած վիշտ
մը կար. աթոռի մը վրայ նետուեցաւ։ Յետոյ շուա-
րած ու մտացիւր ըսաւ.

— Շոգեկառքը ուղեղս շատ ցնցեց...

Վէյսէլ պապան գոչեց.

— Հոգի՛ս, էֆէնտի՛ս, ի՞նչպէս եղաւ որ մեզ

յիշեցիր։

Փաստաբանը գլուխը օրրելով.

— Ձեմ յիշեր օր մը, ուր ձեզ մոռցած ըլլամ,
պատասխանեց ու իր աչքերը պահ մը Նէտրէթին
վրայ յանդիման յետոյ ըսաւ.

— Օ՛րս... շատ յոգնած եմ. միտքով, հոգիով
այնքան ուժասպառ եմ որ... հոս, երկու երեք օր-
ուան հանգիստի մը իրաւունքը ուղեղու եկած եմ
ձեզմէ. ասիկա ինձի կը շնորհէք, չէ՞...

Նէժատ զարմացած՝ տղուն նայեցաւ. այսօր զայն
չատ ջղային ու գրգռուած կը տեսնէր. իր սրտին
ծածուկ մէկ խորշին մէջ, անոր հանդէպ կարեկցու-
թեան զգացում մը կար։ «Անմոռանալի գիշեր»ուան
խօսակցութենէն իր վերջին խօսքերը յիշեց, «օր պի-
տի գայ որ այս խօսքերուդ պիտի զղջաս՝ սակայն
այս գիշերը երբեք մի մոռնար» ըսած էր։ Այս ատեն,
Նիհատ արհամարհոտ էր ու ինքնահաւան, մինչդեռ,

ան չէր գիտեր թէ, նոյն ինքն Ֆիքրէթին նմանող այս սեւաչուի աղջիկը, իր սրտի անսահման տեսլապատկերն էր. ան՝ անգիտակցօրէն այս տեսլապատկերը, այս հոգին կ'ուզէր... կանաչաչուի կնոջ մը ամայի հոգիին մէջ աննպատակ թափառող իր օտար մնացած եսը, անձայն ու անտրտունջ կարօտով մը սիրոյ ջերմ ու երազուն գիշերը կը փնտռէր:

Նէժատ, այս մտածումներովը տարուած՝ շարունակ իր տղուն կը նայէր. այս գիշերուան չափ անոր մեղքացած ըլլալը երբէք չէր յիշեր: Անոր ընկճուած դիրքն ու լուծթիւնը նէտրէթին ուղղած գաղտնի ու մտախոհ նայուածքը, այս երիտասարդին կրած տասապանքը, այլեւս որոշակի կը հասկցնէին իրեն:

Նէտրէթ, անուշ ժպիտով մը.

— Դուք չնեղուելէ՞ք յետոյ, ձեր ուզածին չափ կրնաք օգտուիլ այդ իրաւունքէն... պատասխանեց ու անոր դիմագծերը գաղտնօրէն գննելով, հոն, իրեն հետ առնչութիւն ունեցող հետքեր փնտռեց:

Ամիսէ մը ի վեր տեսած չէր զայն. այս երեսուն օրուան բաժանումի ամբողջ կարօտը անոր աչքերէն իր հոգիին մէջ կը հոսէր: Նիհատ, այս ակնարկներուն ներքեւ անզօր անձնատուութիւնով մը կը պատասխանէր.

— Ծնորհակալ եմ, շնորհակալ եմ...

Նէժատ, զայն զբաղեցնելու համար Նիհալի, Քէնանի և Մուալլայի մասին հարցումներ ուղղեց անոր: Նիհատի դէմքին վրայէն վիշտի ամպ մը անցաւ. անփոյթ ու ջղային.

— Պիտի գա՛ն... պիտի գա՛ն... կը պատրաստուին... պատասխանած միջոցին դառն ու արհամարհոտ ժպիտ մը կը թափառէր իր շրթունքներուն վրայ:

Իժիշկը կռահեց որ իր տղուն հոգին ալեկոծող

ահաւոր փոթորիկը պայթելու մօտ էր: Երկու օրէ ի վեր հեռացած էր տունէն, ուր արտակարգ բան մը պատահած ըլլալու նախազգացումովը մտահոգ ըսաւ.

— Նիհա՛տ, երկու օր առաջ հոս գալուդ մասին բնաւ բան մը չըսիր ինձի, կարծեմ...

Երիտասարդը ուսերը ցնցելով պատասխանեց.

— Երեւակայեցէք որ ձեր դիմացը կամքին տէրը չեղող խենթ մը կը գտնուի...

Նէժատ, առանց պատասխան տալու, ակամայ նէտրէթին նայեցաւ: Մանկամարդուհին շատ տժգունած, աչքերը՝ վարագոյրի մէջտեղէն թափանցող լուսնի լոյսին յառած, մտազբաղ ու լուռ էր:

Իժիշկը զգաց որ իր դիմացը նստող այս երկու երիտասարդներուն համբերութիւնը այլեւս կը սպառէր ու մեծ սիրոյ մը կապանքները կը սկսէին քակուիլ. անօրինակ յուզումով մը լրագիր մը առաւ ու սկսաւ անով ինքզինքը զբաղեցնել:

Գարունի մը զով, անուշաբոյր ու լուսաւոր գիշերուան ամբողջովին բանաստեղծական սէրը երգող սոխակներու ձայները, անտառի խորերէն երկար, կրկնուած ալձագանգներով կը բարձրանային ու ամայի ձորերու խաղաղ քունը կը փայփայէին:

Նիհատ, ճաչէն յետոյ, պատուհանին առջեւ քաշուած, ճակատը ապակիին յեցած, լուծեամբ սոխակները կ'ունկնդրէր:

Վէյսէլ պապան փաստաբանին նայելով ըսաւ.

— Սոխակներուն երգը մտիկ կ'ընէք, չէ՞... գիշերները, յաճախ, այդ անառակները այնքան ինքզինքնէն կ'ելլեն որ մարդուս քունը կ'արգիլեն... հոս գալէս ի վեր, ամէն առաւօտ ասո՛նք զիս աղօթքի կ'արթնցնեն:

Փաստաբանը լրջօրէն յարեց.

— Կը նախանձիմ ձեզի, Վէյսէլ էֆէնտի... մենք

այդ արթնութեան վեհութիւնը վայելելէ շատ հեռու ենք...

Նէժատ զարմացած՝ իր աչքերը տղուն ուղղեց. այս մարդուն հոգիին մէջ տեղի ունեցած մեծ ու արմատական փոփոխութեան մասին կը մտածէր:

Նիհատ, զգուշաւոր ու հանդարտ ձայնով մը խօսքը նէտրէթին ուղղելով, ըսաւ.

— Եթէ ապահով ըլլայի թէ չպիտի մսէիք, ձեզմէ պիտի խնդրէի որ լուսնի լոյսով քիչ մը պտտէինք. այնքան գեղեցիկ գիշեր մըն է, որ մարդ այսպիսի բաղձանք մը չկրնար յաղթահարել...

Նէտրէթ, անոր այս թախանձագին առաջարկին հանդէպ իր զգացած տկարութիւնը ընկճելու ուժը կորսնցուցած մէկ պահուն ըսաւ.

— Ո՛չ... հով չըլլալուն պատճառով, գուրսը մսեցնող օդ չկայ... լուսինն ալ շատ պայծառ է... սոխակները մօտէն լսելու համար կամաց կամաց մինչեւ պուրակը երթանք:

Նիհատ, երախտապարտութիւն ու չորհակալութիւն արտայայտող ակնարկներովը նայեցաւ անոր ու հաստ վերարկուն հագուեցուց: Թարմատի աղջիկը լուռ ու անտարբեր կ'երեւար: Բժիշկը, քսան տարի առաջուան իր կեանքին կենդանի պատկերը տխրագին նայուածքով մը կը դիտէր: Նէժատը երազի՞ մէջ էր թէ ոչ իրականութիւնը կ'ապրէր, շփոթած էր. իր տղան, քսան տարի առաջուան ինքը չէ՞ր միթէ, նէտրէթ՝ անմոռանալի միքրէթը չէ՞ր արգեօք: Նէժատ, կեանքի քաղցրութիւնը կորսնցուցած, անյոյս հիւանդի մը կեղծ ինքնամխիթարութիւնով ինքզինքը խաբելու նմանող հոգեկան վիճակ մը կ'ապրէր:

Դանաչ լերան ետեւէն բարձրացող լուսինը, կապոյտ մշուշներով ծածկուած սիրանոյշներուն վրայ իր արծաթ շողերը կը ցանէր. կանաչ եղէգներու հիւ-

րընկալ ծոցէն հոսող գետակը, այս գիշեր աւելի անդուսպ, աւելի յորդուն հոսանքով մը կը կարկաչէր: Նէտրէթն ու Նիհատը, խոնաւ ու անուշաբոյր օդի մը մէջ դանդաղ ու լուռ կը քայլէին: Երիտասարդին հոգին բոցերու մէջ կ'այրէր ու իր ուղեղը ջերմով վարակուած էր. երկինքի աստղերը իրար կ'անցնէին: Կեանքի մէջ սիրոյ տառապանքին այսքան քաղցր և սակայն այսքան սպաննող ըլլալը առաջին անգամ ըլլալով կ'ըմբռնէր. իր քովէն քալող լուռ ու բան մը չհասկնալ ձեւացնող այս հպարտ, այս անողոք աղջկան մեծ ուժով մը պահած լուսնի տեսքը հանդէպ իր երակներուն մէջ, իր սիրտին մէջ բռնկող զգացման մը հոսանքին յորդելով պոթկալը, ըմբոստ ըրձանքներու բովանդակ սաստկութեամբ պայթիլը մօտ էր:

Նէտրէթ, զգալով անոր հոգիին ալեկոծումը, ասոր առթած հաճելի վախէ մը կը դողար, ու զայն պատժելու իր որոշմանը մէջ աւելի համարձակ, աւելի հաստատամիտ ըլլալ կը փափաքէր:

Իէպի կանաչ բլրակ մը տանող ցած պատի մը եզերքը, ճամբուն վրայ, յանկարծ մանկամարդուհին կենալով ըսաւ.

— Դառնանք:

Երթունքին վրայ դառն ժպիտ մը կար. աչքերը վեհաշուք, պատկառագոյլ և երազկոտ պուրակին կողմը ուղղելով հարցուց.

— Մենք այն կողմը պիտի երթայինք... ինչո՞ւ հոս եկանք:

Լուսնի լոյսին ներքեւ աւելի սեւ երեւցող իր աչքերուն նայուածքը խոռովիչ էր ու տխրատեսիլ. Նիհատ այս նայուածքին տակ իր զլուխը խոնարհեցուց. իր բովանդակ եսը ոճրագործի մը զգացումներովը կը դողար. իր ձայնի պաղատագին թրթռացումովը գոչեց.

— Վայրկեան մը կենանք... այստեղ ինծի նե-
րած ըլլալնիդ խոստացէք, յետոյ կը դառնանք...

Նէտրէթ, ձեռքովը սեղմեց սիրտը և շուարած՝
անոր երեսը նայելով մըմնջեց.

— Ձեզ ներե՛ր...

Յետոյ ձեռքը ճակտին դնելով ըսաւ.

— Անցեալը մի՛ յիշեցնէք ինծի, Նիհատ պէյ...

Նիհատ, աւելի աղերսարկու վիճակի մը մէջ, իր
հոգիէն յորդող ամբողջ տանջանքովը հառաչելով.

— Վստահ եմ թէ դուք գերազանցօրէն կարեկից
սիրտ մը կը կրէք... մոռցէք այլեւս իմ խղճահա-
քութեան տառապանքին ծնունդ տուող այն դժբախտ
գիշերը... կեանք տուէք ինծի, Նէտրէթ...

— Ձեր խօսքերէն բան մը չեմ հասկնար, Նի-
հատ պէյ. դուք անծանօթ բանի մը մասին կը խօ-
սիք, կարծեմ...

— Ա՛խ... Աստուած իմ... ոչ մէկ ատեն չէք
ուզեր իմ վիճակս հասկնալ. քաշածներուս հանդէպ
աչքերնիդ կը գոցէք, կը փախիք... սակայն իրա-
ւունք ունիք, շատ իրաւունք ունիք. սիրոյս և
զզջմանս տաժանելի ծանրութեանը տակ ընկճուած
իմ էութիւնս, ձեր հպարտ ու անողոք անտարբերու-
թեամբ բոլորովին ճզմելէն, պատառ պատառ ընելէն
չյագեցող ձեր վրէժխնդրութիւնը որքան ալ խօր ըլ-
լայ, դարձեալ իրաւունք ունիք... հահ՛, այս բանը,
հո՛ս, այս ոճիւրի վայրը, կը խոստովանիմ... ես, այն
ատեն շատ կոյր էի ու ապերախտ, Նէտրէթ... այն
ատենէն ի վեր ձեր լուութեան, հպարտութեան ու
ցասուճի տուած զգաստացուցիչ դասը, հոգիովս ու
մարմովս ձեր հրամանին ենթակայ, ձեզի գերի ըլ-
լալուս անհրաժեշտութիւնը սորվեցուց ինծի. ապա-
գայիս ամէնէն քաղցր ըզձանքներս, այլեւս ձեր ոտ-
քերուն տակը կը տեսնեմ... Ձեր հաղորդած կրակէ

հոսանքէն իմ հոգիս այրած միջոցին, դուք, անողոք
ու յամառ վրէժխնդրութիւնով մը խոյս կուտայիք
ինձմէ... մինչդեռ, դո՛ւք իմ յաւիտենական սէրս
էք, Նէտրէթ... ձեր այս գեղեցիկ, այս կախարհող
աչքերը իմ երազներս, իմ երեւակայութիւններս ե-
ղան... իմ ամենատկար, ամենադժբախտ պահերուս
անձարութեանը միջոցին, անփոյթ ու համբերատար՝
ձեզի սպասեցի... միշտ ձեզի...:

Նէտրէթ, ծառի մը կրթնեցաւ, դէմքը արձանի
մը պէս տժգոյն էր ու անկենդան, տխուր ու նուա-
ղած ձայնով մը ըսաւ.

— Նիհատ պէյ, երիտասարդ սրտի մը ամենա-
զգայուն թելերուն հետ մի խաղաք. այլեւս մեր ներ-
կայ կեանքի մասին, ուրիշ բաներու մասին խօսինք:
Նիհատ անզուսպ յուզումով մը գոչեց.

— Մեր ներկայ կեանքի՞ մասին... այսինքն ձեր
ամուսնութեա՞ն մասին, Բէնանի՞ մասին խօսինք,
Նէտրէթ հանրմ. ըսէք, ասոնցմէ որո՞ւ մասին խօ-
սինք... (զլուխը երերցնելով) դժբախտաբար, միշտ
ձեր երեւակայութեան մէջ ապրեցուցած այդ երջան-
կութիւնը այլեւս անգործադրելի պիտի մնայ. դո՛ւք,
անորը չպիտի ըլլաք... որովհետեւ, ան՝ հիմա իր
սիրոյ երջանկութեան ցնծութեամբ նոր աշխարհի մը
մէջ կ'ապրի:

Նէտրէթ, առանց յուզման և զայրոյթի հետք մը
ցուցնելու, շատ բնականութեամբ ըսաւ.

— Ձարմանալի...

Լուսնի լոյսին մէջ անոր դիմագծերուն վրայ
յայտնուելիք ամենաթեթեւ յուզման մը նշանը փնտը-
ող Նիհատը, անոր ցոյց տուած այսքան պաղարիւ-
նութեանը հիացած ըսաւ.

— Կ'երեւի թէ ըսածիս չհաւատացիք...

Մանկամարդուհին ուսերը ցնցելով.

— Կեանքի մէջ ամէն ըան ընդունելու կողմնակից եմ ես... հետեւաբար, այս վայրկեանիս Քէնանը ինծի համար խիստ թշուառ ու շատ արգահատելի մէկն է. անոր հանդէպ ունեցած անսահման յարգանքներուս վրայ, այս անգամ արգահատանքի մը զգացումն ալ կ'աւելնայ:

— Նէտրէթ հանրմ... բոլոր կիներէն աւելի խորհրդաւոր ու առեղծուածային հոգի մը կը կրէք... Քէնանի հանդէպ ձեր կարեկցութեան պատճառը չեմ կրնար հասկնալ:

— Տարօրինակ բան... ինչպէս չէք հասկնար... Քէնանի անբիծ հոգին, բարձր ու մաքուր սիրտը, կրակի ու ցանկութեան յորձանքի կանաչ մամուռ պատ թոյներովը կը մահանայ, իր ամբողջ բարոյական ինքնութիւնը այս կանաչ մամուռներովը կը ցանցուի... խեղճ Քէնան... հոգիիդ անկման ու քայքայման դատապարտուելուն համար շատ կը մեղքընամ քեզի...

— Անոր մեղքնալնուդ չափ ինծի ալ մեղքեցած էիք, Նէտրէթ հանրմ...

Դեռատի աղջիկը տակաւին զայրոյթի սիրովը հրավառ, իր սեւ ու խոշոր աչքերը փաստարանին աչքերուն յառելով.

— Դուք երբեք կարեկցութեան արժանի չէիք, ըսաւ. որովհետեւ, ան խարուած է, մինչդեռ դուք գիտակցօրէն, կամովին կը սիրէիք զայն:

— Ամենաանիրաւ վճիռով մը կ'ամբաստանէք զիս. մինչդեռ Քէնան անոր սէրը գերադասեց ձերին:

— Իմ սիրտս Քէնանի սիրոյն երբեք չէր փոխադարձեր. անոր հոգին՝ իմ պաղ ու անգօր էութեանս մէջ չէր պարփակուեր, հոն չէր տաքնար. ան՝ անմեղադրելի ու անիրաւուածի մը գիրքին մէջն էր:

ի հարկէ, օր մը զիս լքելով պիտի ձգտէր դէպի այն աշխարհը, որ հուր ու հմայք կ'արձակէր, որուն ջերմութիւնն ու հրապոյրը փորձիչ էին:

— Ա՛խ... Նէտրէթ, գիտնայիք թէ ձեր այս խօսքերը ինչ մեծ ուրախութիւն կ'առթեն ինծի... ըսել է թէ դուք երբեք չէիք սիրած Քէնանը, այնպէս չէ՞:

— Ո՛վ գիտէ, Նիհատ պէյ:

— Այսպէս մի՛ ըսէք. այո՛ պատասխանեցէք:

— Քիչ առաջ ձեզմէ խնդրած էի, սրտիս հետ մի խաղաք... Մուսլլայի ձեզի տուած հարուածին վրէժը լուծելու համար իբր զէնք մի գործածէք զիս. մե՛ղք է. ա՛լ կը հասկնամ թէ... այս դառն աղէտներու վիշտերը մեղմելու համար հոս եկած էք:

Նիհատ, ցաւագին անյուսուցեան մը մատնուած, դառնօրէն հառաչեց. ծառի մը կոճղին վրայ նետուեցաւ ու գլուխը ձեռքերուն մէջ առած ըսաւ.

— Ա՛խ... այս վայրկեանին իմ զգացած դառնութիւնս արտայայտող բառ մը գտնելու այնքան անկարող եմ որ... չեմ գիտեր թէ ինչ ըսեմ... ինչպէս վստահութիւն ներշնչեմ ձեզի:

Նէտրէթ մեղմօրէն անոր քովը նստաւ. որովհետեւ ոտքի վրայ կենալու ուժը սպառած էր:

— Կը յիշէ՞ք, Նիհատ պէյ... անցեալ տարի ալ ձեր սիրոյ ամենաբուռն ու ամենատագնապալի գիշերը, հոս, այս բլրակին ստորոտը անցուցած էիք... ինչ գեղեցիկ յիշատակ մը, չէ՞... այն գիշերն ալ լուսնկան ձիւղ այսպէս պայծառ էր ու գեղեցիկ... հանդիպակաց գիւղէն լոյս մը դարձեալ աղօթ յոյսի մը պէս այսպէս նուազկոտ էր ու դողդօջ, կարծեմ: Մենք, Մուսլլային հետ ձիւղ այստեղն էինք. դուք, ձեր հօրը հետ, չեմ գիտեր թէ ձեզ տոչորող սիրոյ մասին կը խօսէիք. ամէն պարագայի ձեր ձայնը ուժ-

գին էր ու ջղային. ես հեռանալ ուզեցի. սակայն, ան, անառակ աղջիկը արգելեց... չթողուց... այն վայրկեանին որքան գոռոզ էր. ա՛խ, գիտնայիք, իր այս գոռոզութիւնը շատ արդարացի կը գտնէի. որովհետեւ նոյն պահուն, դուք զինքը ամէն բանէ վեր կը համարէիք, ձեր սէրը սխալ ուղղութեամբ կը պաշտպանէիք, ձեր հայրը կը վշտացնէիք, անոր նուիրական յիշատակները կ'արատաւորէիք, թշուառ մեռեալի մը հողի վերածուած սիրոյ մասին կը խօսէիք... ասոնք լսած միջոցիս, իմ վիճակս, ի՛նչ զգալս ու ի՛նչ տառապանքի մատնուած ըլլալս կըրնա՞ք երեւակայել, Նիհատ պէյ...

Նէտրէթ կուլար... Նիհատ, խելայեղ դարձած, ձեռքերը երկարեց ու պաղատագին ըսաւ.

— Կը բաւէ... կը բաւէ... ի սէր Աստուծոյ, լոնցէք... քայքայուած եմ ալ... զթացէք ինծի...

Նէտրէթ գլուխը շարժելով.

— Այն ատեն ինծի ալ կարեկցող մը չկար. մօրս այն ողբերգական գաղտնիքին տեղեկացած գիշերէն յետոյ ես որչա՛փ արցունք թափեցի, որքա՛ն հեծեցի, ի՛նչ ահաւոր, ի՛նչ սարսափելի տանջանքներ կրեցի, ա՛խ, գիտնայիք... իր դէմքն անգամ չտեսած խեղճ մօրս պատճառով իմ սրտիս մէջ ի՛նչ խոր, ի՛նչ կոտտացող վէրք մը վը բանայիք... հոն ի՛նչ աղտոտ, ի՛նչ աղիտաբեր կասկած մը, կրակ մը կը ձգէիք, Նէհատ պէյ... Ո՛չ մէկ բանով կրնայի միխթարուիլ, դժուարին դրութեան մը մատնուած՝ ո՛չ ոքի կրնայի բան մը հարցնել. բոլոր մարդիկ, բոլոր մեռելները զգուելի, գարշելի մեղաւորներ էին... հոգիս, գարշանքի զգացումներովը տոգորուած էր, ինքզինքէս անգամ կը զգուէի: Ինծի համար ծագումը յուսացած նոր արեւներուս լոյսերը ա՛լ յաւիտենապէս սարած էին սւ սրտիս թանձր խաւարի ու

դառն վհատութեան մէջ անոնց յաջորդած էին ստորնութիւններու, վատութիւններու վրայ լացող սուգ մը... վերջապէս... օր էր հոգիիս այս սեւ, տառապալից ամպերը կը ցրուէին յանկարծ, լուսաւոր արշալոյսի մը յօսոյ երփներանգ ճառագայթները նոր աշխարհ մը կը ծնէին. բարձր ճշմարտութեան մը գաղտնիքին վերահասու կ'ըլլայի, այդ աղտոտ կասկածներէն կ'ազատուէի. սակայն մօրս անցեալին յարգանք չունեցողներուն հանդէպ սրտիս մէջ խոր ատելութեան մը հետ միասին յաւիտենական բաժանման մը վէրքը կը մնար: Շատ ջանացի, Նիհատ պէյ, բայց ի՛նչ օգուտ, ժամանակը երբե՛ք չկրցաւ սպիացնել այս վէրքը...

Նիհատ, գլուխը ձեռքերուն մէջ առած կուլար:

Նէտրէթ, պահ մը խորազննին կերպով անոր նայեցաւ. իր սրտին ծածուկ մէկ անկիւնը կոտտացող վիշտ մը կար:

Երիտասարդը, յոգնած գլուխը դանդաղօրէն բարձրացուց, խոնաւ ու վշտալի աչքերը Նէտրէթի դէմքին ուղղեց. յետոյ տկար ու երբեք ձայնով մը ըսաւ.

— Նէտրէթ, ի՞նչ կրամ տառապանքս մեղքերուս համապատասխան չեն... քաւարանի կեանքը ապրիմ ուրեմն. ես պիտի ջանամ տղկալ անոր, և սակայն օր մը ձեր ներումին ու գթութեանը արժանանալու յոյսով, ամէն բանի կուրծք պիտի տամ, լքուած ու անարգուած՝ պիտի լամ, պիտի քաշքուտուիմ, պիտի հեծեծեմ... կեանքի խաւար ճամբաներու վրայ յոյսի շող մը փնտռելու համար օրերով պիտի սպասեմ. հետեւաբար, այլեւս զիս չպիտի տեսնես. փախտականի մը պէս, միշտ քեզմէ հեռու պիտի ապրիմ. այս գաղափարս թերեւս սին ու անպէտ կը գտնես. ամէն պարագայի, մշտապէս ձեր

ճամբաներուն վրայ իմ արցունքներուս, իմ բողոքներուս չհանդիպելու համար, առանց ձեզմէ տեսնուելու, իր հեռաւոր ուղեցոյցին հետեւող աղքատ ու թափառական տէրվիչի մը պէս իմ ապաշխարանքս պիտի կատարեմ...

«Կրածս ու կրելիք տանջանքս, կարօտս, տառապանքս, զղջումս, բաժանումի դառնութիւններս թերեւս օր մը ձեր հոգւոյն ցաւ մը առթեն... ձեր սրտի առեւտրութեանն ու վրէժխնդրութեան մէջէն քիչ մը կարեկցութեան ու ներողամտութեան զգացումներ արթնցնեն...» Ահաւասիկ, մինչեւ լոյսերուս վերջին աստղին մարիլը ես այս մխիթարութիւնովս պիտի սպասեմ... Նէտրէթ հանրմ, քեզի պիտի սպասեմ... հոգիիս լացող, կսկծալի, կոտտացող վէրքերովը անձայն, անտրտունջ ու համբերատար միշտ քու ներողամտութեանն ու յանիրաւի կրած պատիժիս վախճանին պիտի սպասեմ»:

Նեւրէթ, թեթեւակի ժպտելով ուսերը ցնցեց ու ըսաւ.

— Ի՞նչ պէտք կայ ասոնց... ես միշտ «այ՛ կնոջ աղջիկը» չե՞մ միթէ...

— Ո՛ւֆ... Նէտրէթ հանրմ, առանց իմ զգացումներս ամբողջովին վերլուծելու, զիս ամբաստանելուն մէջ շատ փութկոտ կը գտնուէք. ձեր մտքի գատողութիւնը տարբեր ուղղութիւններու կ'առաջնորդէք, ձեր կարծածին ու ենթադրածին չափ անխիղճ չըլլալս հաստատել չկարենալուս դժբախտութեանը մի՛ զոհէք զիս. փոքր տարիքի մը մէջ զրտնուելովս մէկտեղ, ձեր մայրը որքա՛ն մեծարանքի ու գնահատանքի զգացումներով կը սիրէի... իմ այդ փոքր սրտիս՝ չհասկցած շատ մեծ զգացումներս ներշնչողը անոր գոյութիւնը որքա՛ն խոր և որքա՛ն վսեմ առաքինութիւններ կը բովանդակէր... Մերթ

ընդ մերթ վրաս սեւեռուն ու քուկինիդ շատ նմանող իր գեղեցիկ աչքերուն մէջ ի՛նչ անսահման գորով ու սէր մը կը դողար... կ'ենթադրեմ թէ այն խեղճ կինը զիս՝ Նիհայէն քիչ մը աւելի կը սիրէր:

Նիհատ, մտածկոտ՝ վայրկեան մը լռելէ յետոյ շարունակեց.

— Երբեք չպիտի մոռնամ... օր մը իր ծունկերուն վրայ առաւ զիս. շատ տագունած էր, դէմքը երազկոտ աղօթող սրբուհիի մը վեհութիւնը զգեցած էր. ձեռքերս բռնեց, իր սեւ աչքերը յառեց աչքերուս. անոնց մէջ բան մը փնտաելու ձեւով, գեղեցիկ ու նուրբ ձեռքերովը մազերս շոյեց և յետոյ գլուխս ձեռքերուն մէջ առնելով երկար համբոյր մը տուաւ ձեզիս. «Նիհատ, ըսաւ, հայրդ շատ կը սիրե՞ս»: Բնականաբար, ըսի. «իսկ մայրդ...» երկուքն ալ շատ կը սիրեմ: Սիրտը բզբտուելու պէս հոգւոց մը հանեց. «Սիրէ, ձագուկս, սիրէ... երկուքն ալ սիրէ» ըսաւ. նշմամ բազկաթոռին կրթնցոց գլուխը մէկ ձեռքովը կուրծքը սեղմեց. կարծեմ թէ հոն ուժգին բաբախում մը և կամ սաստիկ ցաւ մը կը զգար: Գունատ դէմքը յանկարծ վարդագունեցաւ... դժբախտ կին... ես՝ այն ատեն իրեն շատ կը մեղքընայի. անոր կողմէ երկու անգամ այսպիսի հարցման մը ենթարկուելու չեմ գիտեր թէ ինչո՞ւ համար տալիս ինչպէ՞ս զգացումներ կ'արթնցնէին իմ մէջս. նոյն հարցումը, առաջին անգամ, հոս ըրած էր, ես միեւնոյն պատասխանը տուած էի իրեն... Այն օրէն յետոյ, իրերայաջորդ դէպքերը իմ փսքը ուղեղիս վրայ մեծ տպաւորութիւններ կ'ընէին... հօրս ու մօրս միջեւ մանր մուկը վէճեր ծայր տալ սկսած էին... անջեւ մանր մուկը վէճեր ծայր տալ սկսած էին... անբացատրելի վիճակ մը կը սկսէր տիրել մեր տանը մէջ. մօրս դժգոհ դէմքին ու խոնաւ աչքերուն տեսքը սիրտս կ'արիւնէին: Հօրս տրտում ու քարացած վի-

ճակը սիրտս կ'այրէր. վերջապէս, ասոնց անհասկը- նալի պատճառները նեղացուցիչ տպաւորութիւն մը կը ձգէին վրաս. մերթ մանկական զուարթութիւն- ներէ անգամ կը խուսափէի: Գիշեր մը, խեղճ հայրս զգայազիրկ ու իմացականութիւնը կորսնցուցած վի- ճակի մը մէջ գտած էին քարի մը վրայ ու տուն բե- րած էին. անկէ վերջ, անոր երկար տարիներ տեւող այդ վիճակը, իրեն հետ ապրելէ զրկած էր մեզ:

Նէտրէթ, ընդմիջելով.

— Նիհատ պէյ... երեւոյթները մօրս հանդէպ ուժգին ամբաստանութիւններ են և սակայն անոնց ներքեւ թաքնուած ճշմարտութիւնը շատ դառն, շատ սրտակեղէք, շատ ողբերգական է... ես, ասիկա ա- պացուցանել կ'ուզեմ ձեզի: Մեռած, մոռցուած, անցեալին խառնուած կարծուող այն օրերու մութը ցրուող յուշատետր մը, անցեալի խորհրդաւոր բա- նալի մը պէս ամբողջ ճշմարտութիւնը հրապարակող և իմ այսօրուան գիրքս լուսաբանող յուշագրութիւն մը, դժբախտ մօրս ձեռքերովը գրած այս երկար է- ջերը ինծի իբր յիշատակ ձգած է. զանազան տեղեր ձեր մասին մայրս երկարօրէն գրած ու ձեզի հանդէպ ունեցած իր սէրը արձանագրելու մոռցած է:

Նիհատ, շափազանց զարմացած բացագանչեց.

— Ի՞նչ կ'ըսէք, Նէտրէթ հանրմ:

— Այո՛, այսպէս... օր մը ցոյց պիտի տամ ձեզի... այն ատեն պիտի հասկնաք ամէն բան... մօրս որչա՛փ անմեղ ու որչա՛փ դժբախտ ըլլալը հաս- կընալով, թերեւս ձեր մօրը շափ անոր ալ մեղքնաք:

— Ասիկա փաստի պէտք ունի՞... եթէ ամենա- չնչին կասկածի մը հաւանականութիւնը ունենայի, ի՞նչպէս կրնայի սէրս յայտնել ձեզի, ի՞նչպէս կրնայի սիրել ձեզ, Նէտրէթ. ասիկա չէ՞ք մտածեր. իմ հօրս հետ յարաբերութիւն հաստատող կնոջ մը ազջկանը

եւ ի՞նչ խիղճով պիտի առաջարկէի որ կինս ըլլար. չէի յուսար որ զիս բարոյապէս այսքան ինկած մը կ'ընդունէիք:

Նէտրէթ, առաջը կը նայէր: Նիհատ, այս խօս- քերը կատարեալ անկեղծութեամբ ու ծայր աստիճան լրջօրէն կ'ըսէր: Երիտասարդուհին չպատասխանեց. Նիհատ անոր ձեռքերը բռնելով, իր սրտին վրայ սեղմեց:

Լուսինը, այս զոյգ գլուխներուն վրայ երկու լուսապսակ կը գնէր. հովը, ծաղիկներէն ժողված նուազուն ու արբեցնող օդով մը անոնց հոգին կը լեցնէր. տերեւները, այս հոգեկան տեսարանին առ- ջեւ երկիւղածօրէն անշարժ էին, սոխակները սիրոյ մեծ խորհուրդը կ'ունկնդրէին:

Նէտրէթ, ձեռքը մեղմօրէն քաշել ուզեց. Նի- հատ, քիչ մը համարձակ.

— Ո՛ւ... կ'ըսէր, զիս յուսադրող միակ բառի մը կը սպասեմ. այլեւս ըսէք թէ կատարելապէս ինծի կը պատկանիք, թէ՛ այս գեղեցիկ մատներդ ուրիշի մը մատանին չպիտի կրեն, և թէ՛ այսպէս անյոյս ու երջանկութեան կարօտ չպիտի թողուք զիս:

Նէտրէթ, կտրուկ ու յոգնած ձայնով մը ըսաւ.

— Ա՛յ երթանք, Նիհատ պէյ, մսեցայ...

— Շատ լաւ... երթա՛նք, Նէտրէթ. սակայն կը սպասեմ:

— Ի՞նչը կը սպասէք:

— Սոսկ բառ մը, թեթեւ ակնարկ մը...

— Ո՛ւհ, կը խնդրեմ, էֆէնտիմ... ալ այս խօս- քերը թողունք... առայժմ իրերահասկացողութիւնը կարելի չէ մեզի համար:

— Ինչո՞ւ... ինչո՞ւ համար, Նէտրէթ. ըսել է թէ տակաւին անվստահութիւն ունիս ինծի հանդէպ... ձեր վրէժխնդիր սառնութեամբ յարատեւող այս ա-

նողոք անտարբերութենէն կրած տառապանքս ու քայքայումս ինչո՞ւ չէք հասկնար: ինչո՞ւ համար չէք մտածեր թէ ձեր մարմնոյն մէջ կ'ապրի սիրտ մը հարազատօրէն նման ձեր մօրը սրտին, որ այնքա՛ն սէր ու գորով ունէր իմ հօրս հանդէպ: ինչո՞ւ չէք մտածեր թէ՛ ան հսկայական հարստութիւն մը ունի... մինչգեռ, ես իմ հօրս այս մեծ սիրովը ձեր մէջ այսպիսի սիրտ մը կը փնտռեմ, նէտրէթ... ասիկա, ինծի չպիտի՞ տաք:

Մանկամարդուհին, իր սովորական խնդուածքովը շարժեց:

— Ձեր հօրը սիրտը երկու տեսլապատկեր, երկու սէր պարփակելու չափ մեծ ու զօրաւոր չէր. հոն տիրողը միայն մայրս էր. իսկ ձեր ուղեղին ու սրտին մէջ երկու կնոջ տեսիլներ կ'ապրին... մէկը հարուստ գեղեցկութիւն մը, միւսը՝ տժգոյն լուսնկայի ծածուկ նրբութիւնն ու բանաստեղծականութիւնը ունի. մէկզմէկու հակադիր երկու գէմքեր, երկու կիներու նկարներ. ասոնք միշտ կը զբաղեցնեն ձեզ. մէկը շատ նախանձոտ ու չարսիրտ, որ ձեր հոգին կը հարուածէ ու կը տանջէ... իսկ միւսը, ձեր խաղաղութեան անհրաժեշտութիւնը կ'ապահովէ, կազոյր ու մխիթարութիւն պարգեւող ազատարար մը կ'ըլլայ, այնպէս չէ՞: Ո՛չ, Նիհա՛տ պէյ, դուք կը խաբուիք. ձեր հոգեկան յորդուն ու տառապալից նախանձներու, փոթորկումներու մէջ, իբր ազատարարի կառչիլ ուղածնիդ ես չեմ... դուք դարձեալ այն հին մեծ... սիրոյն ապաւինեցէք... ան, թերեւս կրնայ ազատել ձեզ... իմ մարած ու անկար գոյու-թենէս, աւելորդ տեղ, դարման ու մխիթարութիւն մի փնտռէք:

Փաստարանը, իր տխուր ու վշտատոյժը աչքերը նէտրէթ ուղղեց, մեղմօրէն ձգեց անոր ձեռքերն ու ըսաւ.

— Շա՛տ լաւ, ժամանակը ամէն բան պիտի պարզէ. ես պիտի ենթարկուիմ ու տոկամ:

Երկուքն ալ սկսան քալել... փաստարանը գերազրգիւս վիճակ մը ունէր: Նէտրէթ, վերարկուին լայն օձիքին մէջ ծածկած գէմքին վրայ, հոգիէն ցուլացող պայծառ ժպիտով մը, հանդարտօրէն Նիհատը կը զննէր. հոգեկան այս կատարեալ խաղաղութեան մէջ, զայն աւելի բուռն սիրով մը կը սիրէր ու իր զգացումները այլեւս չէր կրնար պարտկել:

Պատշգամին վրայ իրենց սպասող բժիշկը խնդալով ըսաւ.

— Չմտեցա՞ք, տղաքս...

Նէտրէթ, սենեակը առանձնանալով, անմիջապէս թուղթն ու գրիչը առաւ և հետեւեալ նամակը գրեց Նիհալին.

Նիհալ հանրմ էֆէնտի,

Մուալլայի և Բէնանի նոր սէրը իմ կեանքիս ամենամեծ ու անսահման երջանկութիւնը կ'ապահովէ. ասոր համար չափազանց երախտապարտ եմ իրենց. հետեւաբար, զիրենք ալ առնելով միասին եկէք. զիս, ինչպէս նաեւ ձեզ երկարատեւ մտատանջուր ենէ մը պիտի ազատեմ: Ո և է մէկու մը երբեք բան մը մի ըսէք ու մի մոռնաք թէ ձեզի կը սպասեմ անհամբեր:

ՆէՏՐԷԹ ՍԱՅԻՏ

Յաջորդ առաւօտ, Նիհատ, շատ զբաղած կը տեսնէր Նէտրէթը: Ծաղկատի աղջիկը զուարթ գործունէութեան մը մէջ էր. ամէն կողմը կը մաքրէր. սենեակներու ապակեփեղկերը կը բանար ու ամենուրեք թարմ ու լուսաւէտ օդով մը կը լեցնէր. ուրախ

զուարթ վեր վար կը պտտէր, հագուստները կը տեղաւորէր, դարակները կը յարգարէր... մերթ ընդ մերթ Ծաթմա պաճիին հետ կը կատակէր, կը խնդար, կը խօսէր: Նիհատ, այս վիճակին ի տես ապշած, վշտացած ու յուզուած, այս խորհրդաւոր աղջկան հոգիին առեղծուածը լուծելու իր անյաջողութենէն անկար ու խեղճ եղած կը պտտէր: Միջոց մը անոր մօտեցաւ ու այս ուրախութեան պատճառը հարցուց. դէմքը փրփրովուած էր ու ցաւատանջ:

Մանկամարդուն հին խնդալով ըսաւ.

— Ա՛հ... չէ՞ք հասկնար, հարսանեկան պատրաստութիւն... չորս հինգ օրէն հարս չպիտի՞ ըլլամ միթէ... :

— Ի՛նչ կ'ըսէք, Նէտրէթ հանրմ. արդարեւ զիս մեռցնե՞լ կ'ուզէք:

— Ինչո՞ւ մեռնիք, էֆէնտիմ, իմ խօսեցեալ ըլլալս հի՞մա կը հասկնաք:

— Սակայն, մոռցա՞ք թէ անիկա ձեզ դաւաճանեց. չէ՞ք մտածեր որ ձեզի հետ անոր ամուսնութիւնը ակամայ է:

— Լաւ, մեր զգացումները միեւնոյն կերպով իրարու կը փոխադարձեն... ի՛նչ կ'ըլլայ ատկէ...

— Ի սէր Աստուծոյ... աս ի՛նչ մտայնութիւն է, Նէտրէթ հանրմ. ըրածնուդ գիտակցութիւնը ունի՞ք...

— Ի հարկէ...

— Ի՛նչպէս... դուք արդեօք կրնա՞ք այսքան չարասիրտ ըլլալ:

— Ո՞վ զիտէ. կիները երբեմն գազանի մը չափ վայրագ ու չար, երբեմն ալ գառնուկի մը չափ հլու ու հնազանդ կրնան ըլլալ. չափազանց սէրն ու գուրգուրանքը այսպէս իր հակազգեցութիւնը կ'ունենայ, կարծեմ. աւելի ճիշդ, ասոնք մեզի ընդ տուողը դո՛ւք էք...

Նէտրէթ, այսպէս խօսած միջոցին քրքջալիւր կը խնդար: Նիհատ, անյոյս ու զարմացած մտիկ կ'ընէր երբ Նէտրէթ, տուփին մէջէն կը հանէր իր հարսանեկան զգեստներն ու կը քննէր. ժանեակէ երկար քօզը բանալով.

— Շատ գեղեցիկ չէ՞, ըսաւ փաստաբանին:

Երիտասարդը, յուզումէն դեփ գեզին կտրած, ըսաւ.

— Նէտրէթ, դուն ամենանուրբ ու ամենաքընքոյշ զէնքերով մարդ սպաննելու համար ստեղծուած կախարդական աննման գեղեցկութիւնն ու բանաստեղծութիւնն ես... այս ճերմակ քօղով ծածկուած օրդ. չե՞ս գիտեր թէ ի՛նչ պիտի ըլլայ... ասիկա, երկուքնուս պատանքը պիտի շինեն, կ'երդնում որ այսպէս պիտի ըլլայ... :

— Օ՛հ... դուք շատ անխնայ էք, Նիհատ պէյ... :

— Ո՛չ, ինծի յիմար ըսէք, յիմար... յուսահատութենէն ըմբոստ ու մոլորած հոգի մը կրող ինծի միայն «գժբախտ» մը ըսէք. Նէտրէթ հանրմ, այսքանը բաւական է ինծի, ա՛լ բան մը չեմ ուզեր ձեզմէ... ամէն օր իմ մահս դիտելով ձեր զգացած հաճոյքն մի զոհէք ինքզինքնիդ... մեղք է ձեզի... ուրիշի մը պատկանող օտար սրտի մը կեղծ սիրոյն մի հաւատաք. ան՝ երբեք չպիտի սիրէ ձեզ, Նէտրէթ հանրմ. Ձեր կեանքին մէջ միշտ պիտի խաբուիք... կը մեղքնամ ձեզի...

Նէթրէթ, քաղցրօրէն ժպտելով ըսաւ.

— Նկարագիրս տարօրինակ է. բան մը մինչեւ որ աչքովս չտեսնեմ երբեք չեմ հաւատար. հետեւաբար Բէնանի այս փոքրիկ անառակութիւնը, ըստ իս, աններելի յանցանք մը չէ: Մուսլաւ հանրմի պէս նուրբ ու զգայնիկ աղջկայ մը շնորհին, անոր առա-

տաբաշխ սիրոյն, ինքն ալ ձեռք երկարած է... ինչ կ'ըլլայ, ասկէ ինչ կ'ելլէ, կը կարծես:

— Ի սէր Աստուծոյ... դուք սարսափելի, անխիղճ կին մըն էք եղեր...

Նէտրէթ, քրքիջ մը եւս ձգելով.

— Զարմանալի՛ բան, ես ինքզինքս երբեք չեմ ձանձնար եղեր. առաջին անգամի մեր խօսակցութիւնն ու այսօրուան ձեր տեսութիւնը բազմատեղով կը հասկնամ թէ այն ատեն, ըստ ձեզ, որքա՛ն հանդարտ, որքա՛ն անփորձ ու ո՛ր աստիճան կամազուրկ աղջիկ մըն էի, այնպէս չէ՞. գլուխնիդ մի երերցնէք, այո, կատարելապէս այսպէս է, և թէ այսպէս ըլլալն ալ շատ բնական է...: Արդարեւ, այն ատեն մանկական պարզ ու մաքուր հոգի մը կը կրէի. մարդիկ հիմակուան պէս չէի հասկցած և կամ հասկնալ չէի սկսած. երբեք չէի մտածած թէ կին մը ինքզինքը այր մարդոց ինչպէս սիրցնել կուտայ, ինչպէս պէտք է սիրցնել տայ. ասիկա, ըստ իս, ինքնաբուրս բան մըն էր. այս տեսակէտով, իմ առաջին դասատուներս դուք և Մուսլլա հանրմը եղաք. առաջին անգամ ձեզ անոր հետ մէկտեղ տեսած օրս խորհեցայ որ բոլոր այրերը անպայման Մուսլլայի նման աղջիկներու հետ կրնան կապուիլ. այս տեսակէտով ձեզ արդարացի գտնելովս մէկտեղ, չեմ գիտեր թէ ինչո՞ւ քիչ մըն ալ կը մեղքնայի ձեզի... որովհետեւ անոր զգացումները ձեզի մօտ ըլլալէ շատ հեռու էին, նիհատ պէյ...:

Նէտրէթ վայրկեան մը մտածելէ յետոյ ըսաւ.

— Տարօրինա՛կ բան. չեմ գիտեր թէ հիմա այս բաները ինչո՞ւ կ'ըսեմ ձեզի...:

Նիհատի աչքերը յոյսի նմանող շողով մը փայլեցան.

— Կը խնդրիմ, խօսեցէք, Մուսլլայի ու իմ մա-

սիս քիչ մըն ալ խօսեցէք... ինծի մեղքնախնիդ անգամ մը եւս կրկնեցէք... այս խօսքերը կարծես թէ սիրտս վառող, սպաննող տառապանքները քիչ մը կը մեղմեն... որովհետեւ, Նէտրէթ, ես դժբախտ հիւանդի մը պէս կը սիրեմ ձեզ... կ'աղաչեմ, քիչ մը կեանք տուէք ինծի: Զեմ գիտեր ինչո՞ւ... ձեր կեանքին սեփականացնել ուզած այս ցաւապար գոյութիւնս անվախճան զրկանքներով հեծեծանքի կը դատապարտէք... ինչո՞ւ այս յարգալիբ սիրոյս պայծառութիւնը ստուերներով մթազնել կ'ուզէք... ձեր կեանքի հեռաւոր, նուազկոտ ու անտէր մէկ տեսիլն ըլլամ գէթ... անով ալ կը զոհանամ, Նէտրէթ... շնորհներու ամենափոքրն է որ ձեզմէ կը մուրամ, կ'ուզեմ. այս ողորմելի պահանջս գոնէ մի զլանաք ինձմէ...:

Նէտրէթ, խորապէս յուզուած.

— Դուք, ըսաւ, երկու օրուան սիրոյ մը տառապանքէն կը տրտնջաք... մինչդեռ ձեր խեղճ հայրն ու իմ մայրս... տարիներով անձայն ու համբերատար տոկացած են անվերջ զրկանքի մը... մենք այսպէս մեծ ու եղերական սիրոյ մը կեանքը ապրող երկու դժբախտներուն զաւակները չե՞նք միթէ...:

Նիհատ, զլուխը կախած.

— Այո՛, կ'ըսէր, երանի՛ թէ ամէն մարդ ալ յաջողէր անոնց պէս կեանքի այդ բարձրութեանը հասնիլ:

Նիհալ, Նէտրէթի նամակը ստացած օրը ծանր բեռան մը ձնշումէն ազատուածի պէս թեթեւցած էր. այլեւս ամէն ինչ իր բնականոն հունին մէջ կը մըտնէր... Նէտրէթի նամակը իրեն արդէն ծանօթ ճշմարմարտութիւն մը կը կրկնէր: Մանկամարդ կինը շատ ուրախացած էր ասոր: Արդէն ատենէ մը ի վեր եղբորը կրած վիշտերը նկատելով ինքն ալ առանձնա-

պէս կը տառապէր: Առանց Բէնանի և Մուսալլայի բան մը զգացնելու, նոյն իրիկունն իսկ, ընթրիքի միջոցին անոնց հաղորդեց թէ Նէտրէթէն ստացած էր նամակ մը, որով երկու օրէն անպայման իրենց կը սպասէր, և թէ այս հրաւերին՝ առանց այլևայլի պէտք էր պատասխանել:

Բէնան շատ մտահոգ էր ու վարանոտ. Մուսալլան ալ անմիտ պոռթկումներով ու նախանձով կը փոթորկուէր: Բէնան, այս դժուարին դրութեան մէջ ըսելիքն ու ընելիքը շփոթած՝ Նիհալին կը նայէր. երիտասարդ կինը, կաթնեղբօր այս թախանձագին նայուածքներուն հանդէպ ըսաւ.

— Մի՛ վախճար, Բէնան, ես ամէն բան աչքս առի. արդէն դուն Նէտրէթի հետ երբեք բախտաւոր չպիտի ըլլայիր... ասիկա առաջին օրէն գիտէի... հետեւաբար, ամէն բան ես կը խօսիմ հօրս, թերեւս ասկէ Նէտրէթն ալ գոհ կը մնայ...

— Ի՛նչ կ'ըսէք, Նիհա՛լ, եթէ ասոր ապահով ըլլամ, երբեք չպիտի տանջուիմ:

— Դուն չէի՛ր հասկնար որ Նէտրէթը քեզ չէր սիրեր, Բէնա՛ն:

— Կը հասկնայի... սակայն կնոջ սիրտը անլուծելի առեղծուած մըն է. ասոր համար վճիռ մը չէի կրնար տալ:

Մուսալլան ուսերը ցնցելով.

— Ըսել է կը յուսայիք ու կը սպասէիք որ օր մը կը սիրէ՞ ձեզ... կը ցաւիմ ձեր մտայնութեանը... Նէտրէթ ո՛չ մէկը կը սիրէ և ո՛չ մէկէ մը կրնայ սիրուիլ... անիկա սատանայի պէս է, ինքզինքը կը հաւնի կը կենայ... ո՛ւժ... քանի մը օր հոն, անոր մօտ ի՛նչ նեղացուցիչ, ի՛նչ տաժանելի օրեր պիտի անցնեմ, Աստուած իմ...: Բէնան, այլեւս ասոր վերջ մը տալու է, կը հասկնա՞ք... այս մասին ձեզմէ

աւելի համարձակ ըլլալս կը զգամ. մեր դիրքը կատարելապէս ճշգրտելու է. ամէն ոք իր կացութեանը համաձայն վարուելու է...: Ես, ալ չպիտի կրնամ համբերել... ձեր՝ անոր մօտ գտնուած միջոցին, իմ՝ շարունակ ձեզմէ հեռու և օտար մնալս կը խենդեցնէ զիս... այո՛, այլեւս Նէտրէթ հանրմը ձեր միջեւ, ոչ մէկ ատեն, ամուսնութեան տեղի չուեննալը պէտք է որ գիտնայ... ասիկա բժիշկ պէյին ալ ըսելու է, կը հասկնա՞ք...:

Մուսալլան կուլար:

Բէնան, ուժասպառ ու մտացիր.

— Մի՛ նեղուիր, Մուսալլա, ըսաւ. ուզածդ պիտի ընեմ. արցունքներդ սիրտս կը բզքտեն... սակայն, քիչ մը հանդարտէ... քիչ մը աւելի գատողութիւն ունեցիր... ասիկա այնքան դիւրաւ, այնքան արագ ըլլալիք բան մը չէ, աչքիս լոյսը... կաթնհօրս սիրտը կոտրել ու Նէտրէթը անարգել չեմ ուզեր... ամէն բան փոխադարձ հաճութեամբ կրնայ ըլլալ. մեր ապագայ երջանկութիւնը ապահովելու, քեզի յատկացուցած կեանքս սիրով, հաճոյքով ու խաղաղութեամբ անցնելու համար այս վերաբերումս աւելի լաւ է կը կարծեմ... լաւ չե՞մ մտածեր, ըսէ՛...:

— Հապա, եթէ բժիշկ պէյը հարսնիքդ փութացնել ուզէ, ի՛նչ պիտի ըսես...:

— Այդ մասին դուն մի՛ մտածեր... հարկաւ ես ալ գործի պիտի լծուիմ... ամէն բան աչքս պիտի առնեմ... աւելի յանդուգն պիտի դառնամ. վերջապէս ամէն բան պիտի ընեմ... աւելի ճիշդը, յանցանքս պիտի խոստովանիմ... պիտի ըսեմ թէ խենդի պէս կը սիրեմ քեզ...:

Նիհալ, խօսքի խառնուելով ըսաւ.

— Երկուքդ ալ պիտի լռէք... ամէն բան ե՛ս պիտի պատմեմ հօրս:

*
* *

Ագարակի խիստ փայլուն ու բացառիկ գիշերն էր այս գիշերը: Տարիներէ ի վեր խոր մութի մէջ նիհնող ու իր խարխուլ առաստաղին մէջ բոյն դրած բուերու վայրենովը լացող այս քարաշէն տան պատուհանները կրակ ու բոց կը ցանէին... վարք, սալալատակին վրայ ճոխ սեղան մը շտկուած էր. Նէտրէթ, իր ամենագեղեցիկ արդուզարգովը, Պոյսէն եկող հիւրերու մէջտեղը ուրախ զուարթ կ'երթեւեկէր: Քէնանի և Մուսլլայի գալուն վրայ, Նիհատ, տարօրինակ մտավիճակի մը մէջ, յաջորդ օրն իսկ Պոլիս մեկնելու որոշում տուած էր: Այս գաղափարը երբ Նէտրէթին յայտնեց, վերջինս, անփոյթ ու անհոգ կերպով «մի՛ աճապարէք, բարեկամ... վաղն առաւօտ ձեր ուզածին պէս կը շարժիք... այս գիշեր ամէնքս միասին անցնենք» բաւ անոր: Իրեն բոլորովին անկարեկիր նայուած քներուն տակ փոթորկող իր զգարումները իր համբերատարութիւնը խորտակելու աստիճանին հասած էին:

— Սակայն չէ՞ք հասկնար թէ այլեւս... մարդկօրէն անհանդուրժելի տառապանքներովը կը ջախջախուիմ... կ'ըսէր:

Քէնան, Նիհատի այս անհաղորդ ու լազ վերաբերումին զարմանալով մէկտեղ, այս գիշեր, իրեն հանդէպ Նէտրէթի ցոյց տուած շափազանց մեծաբանքներէն ընկճուած՝ կը պզտիկնար ու այս գիտատի աղջկան տրուելիք հարսածին ծախքութեանը մասին մտածելով ընելիք շուարած էր: Այս ցաւատանջ կացութեան գծուարութիւնը իր ուղեգր կը ցնցէր... իսկ Մուսլլան անհելի նախանձի մը նոպաներէն բըռնուած՝ կը գարարուէր, կ'այրէր:

Նէտրէթ, ամէնէն աւելի Նիհալով զբաղուած էր: Զուարթութեամբ ու երջանկութեամբ ճառագայթող իր դէմքը, այս գիշեր սովորականէն աւելի գեղեցիկ կ'երեւար: Նիհալ, անոր այսքան գրաւիչ ըլլալը երբեք տեսած չէր. համոզուած էր որ անոր այսքան կախարդական քնքշութիւնը կատարելապէս սիրոյ արգիւնքն էր, սակայն եղբօրը տխուր ու կախ դէմքը Նէտրէթի զուարթութեանը հետ հակապատկեր մը կը կազմէր. և որովհետեւ, այս հակադրութեան պատճառը տակաւին չէր հասկցած, պահ մը առանձնանալ կ'ուզէր: Գալով խեղճ Նէտատին, ան՝ իր շուրջը կատարուող իրագարծութիւններու միջեւ հոգեկան տարօրինակ վիճակի մը մէջ կը գտնուէր... Ի՞նչ կ'անցնէր կը դառնար... ամէն պարագայի կար բան մը... զոր ամբողջովին չէր կրնար ըմբռնել:

Նիհատի՛ Նէտրէթով տարուած ըլլալուն շատոնց տեղեակ էր, սակայն, Նէտրէթի վրայ չէր յաջողած մեծ բան մը նկատել. այս աղջկայ գաղտնապահ հոգին, միշտ իր տկարութիւնը կը պահէր, կը ծածկէր: Այս գիշերուան անոր զուարթութիւնն ու սրտագին քրքիջները սոսկ Քէնանի համար էին. այս նուրբ ու վայելուչ արդուզարգը, այս արտակարգ խնջովքը մի միայն անոր բախտաւոր խօսնայրին՝ Քէնանին ի պատիւ էր կը կարծէր ու ասկէ առաջուան իր ուղիղը ճզմող ծանրութենէն թեթեւացած կը զգար իւր գոյնքը, կ'ուրախանար սրտովին. սակայն իր գաւկին ներկայ վիճակը իր հայրական զգացումներու ամենակենսական պէտերուն կը դպէին, ու հոն, տանջանքի, դառնութեան ու տառապանքի նմանող յուզումներ կ'արթընցնէին: Անոր սրտին մէջ բացուած վտանգաւոր վէրքը, թերեւս իրենին պէս երբեք չսպիանար, երբեք չբուժուէր ու իր ամբողջ կեանքին մէջ մնար իբր անբաժան ու անզարման ցաւ մը, սխալ մը, որու

դարմանումի միջոցները անհետացած էին. իբր խաղալիկ նէտրէթի սրտին հետ խաղալու շրջանը անցած էր. ամէն ինչ վերջնական հանգամանք մը կը ստանար. իրերայաջորդ այս ահաւոր պատկերները, իրենց տրամաբանական հետեւութիւններով անցան նէժատի մտքին առջեւէն... յանկարծ ոտքի ելլելով՝ տղուն մօտեցաւ: Երիտասարդը կռահեց որ իր հայրը մօտենալով բան մը ըսել պիտի ուզէ իրեն, բռնազբօսիկ ժպիտով մը ջանաց ծածկել իր տխրութիւնն ու անոր երեսը նայեցաւ: Խնդճ նէժատ, այս ժպիտին կսկիծը, հոգիովը զգալով մէկտեղ, մեղմօրէն ըսաւ.

— Այս գիշեր բնաւ չե՞ս խօսիր... եթէ կ'ուզես, քիչ մը դուրս ելլենք, պտոյտ մը ընենք, չըլլա՞ր...:

Ան իր գլուխը կախած էր, հօրը կարեկից ակնարկները անոր հրատոչոր ուղեղին անուշ զովութիւն մը տուած էին. անկէ՝ յուսաբեր ուժի մը հօսանքը հաստատուած էր դէպի իր հոգին. քիչ մնաց որ հարցնէր. «Հա՛յր, դո՞ւք ալ այսպէս հեծեցիք... դո՞ւք ալ այսպէս տառապեցաք»: Կեանքին մէջ, այս գիշերուան չափ այս մարդուն մեղքացած չէր: Անսպառ կարօտի ու բաժանման օրերու ճերմկցուցած մաղերուն ներքեւ յայտնուող անոր տժգոյն ու տխուր դէմքը երբեք այսքան խոնջած, այսքան վսեմ տեսած չէր:

Մտազբաղ ու տխրադէմ ոտքի ելաւ ու ըսաւ.

— Մինչեւ անտաւը երթանք, եթէ կը փափաքիք...

Հայր ու որդի դէպի դուռը ուղղուած միջոցին, նէտրէթ քաղցր ու գրաւիչ ձայնով մը ըսաւ.

— Սուրճը պատրաստ է, եֆէնտիմ...:

Բժիշկն ու Նիհատ դարձան. նէտրէթ, իր սեւ ու գեղեցիկ աչքերը նշանակալից կերպով Նիհատի աչքերուն ուղղեց. այս նայուածքը մտերմիկ ու քնքոյշ

ջերմութիւն մը ունէր. երիտասարդը մէկէն շուարած՝ կարծեց թէ պայծառ գիշերուան մը ամբողջ լոյսերովը կ'ողողուէր:

Նէտրէթ, շրթունքներուն ամէնէն կախարդական ժպիտովը ըսաւ.

— Քիչ վերջ մինչեւ զագաթը կը բարձրանանք, չըլլա՞ր:

Նիհատ, անսահման ցնծութիւնով մը հօրը երեսը նայեցաւ. այս վայրկեանիս, անոր աչքերուն մէջ դարձեալ հին սիրոյ երազները կային:

Երկուքն ալ սրահը վերագարձան. նստարանին վրայ ընկողմանած էր Մուալլա, գոռոզ ու ամբարտաւան: Նիհա՛ն ու Բէնանը պատուհանին առջեւն էին: Սուրճերնին խմեցին: Նէտրէթ, իր աչքերուն բովանդակ վսեմ խաղաղութիւնովը մէկիկ մէկիկ զըննեց սենեակին մէջ եղողները: Նիհատ, հօրը մօտ ոտքի վրայ էր: Այս պահուն, թարմատի ազլկան դէմքը շատ լուրջ էր ու հանդարտ: Դուռին առջեւը կեցող սպասաւորին հրամայեց որ «Փաթօ» պաճին ու վէյսէլ պապան կանչէ: Նուրբ վարդագոյն մետաքս հագուստներու մէջ, իր հասակի գեղն ու վայելչութիւնը աւելի տպաւորիչ դարձնող նազանքով մը գնաց նէժատին մօտ նստաւ: Բոլոր ակնարկները իրեն ուղղուած էին:

Մէկ երկու վայրկեան առաջ մանկական զուարթութեամբ շէնչող այս աղջիկը, հիմա ծանր, հպարտ մէկը դարձած էր. խրոխտ գլուխը տիրականօրէն բարձրացած էր: Սրահին մէջ յուզումնաւար ու թրթրուուն ձայն մը բարձրացաւ, որ կ'ըսէր.

— Քէնան պէյ, շուրհաւորենք զիրար, ու իրարու աւետենք թէ սխալմամբ մէկզմէկու կապուելու, մութ ու անել ուղիներու մէջ մոլորելու վրայ եղող մեր կեանքերը, այսօր իրենց ապահով վախճանին կը

հասնին... Մուսալլային պատկանող մատիս մատանին՝ բժիշկ պէյ էֆէնտիին կը յանձնեմ: Չեզի հանդէպ ունեցած յարգանքի զգացումներուս վրայ, այսուհետեւ եղբայրական անվերջ սէր մըն ալ կ'աւելնայ. արդէն մինչեւ հիմա, ասկէ զատ ու է զգացումով մը տողորուած չէի բնաւ. ձեզ, ամենագորովալի քրոջ մը պէս սիրելովս ու այս հանգամանքը պահելովս, աւելի մեծ բախտաւորութեան մը տիրացած ըլլալս կ'ըմբռնեմ:

Սենեակին մէջ գտնուողներուն սիրտերը, ուղեղները, այս անակնկալ յայտնութեանը հանդէպ տակն ու վրայ եղած էին... Նէտրէթ, ոտքի ելլելով, մատանին նէժատին տուաւ ու լսաւ.

— Այս պարտականութիւնը ձեզի կ'իյնայ. ասիկա Մուսալլա հանրմին տուէք...

Քէնանի լեզուն բռնուած, կարկամած վիճակի մը մէջ Նէտրէթին կը նայէր. գէմքը դեփ գեղին կտրած էր: Նէժատ, բնազդական շարժումով մը, մատանին Մուսալլայի մատը անցուց: Մանկամարդուհին աչքերը երախտապարտութեան ու շնորհակալութեան զգացումներ կ'արտայայտէին. իր անսահման սիրոյ երջանկութիւնը պարզեւող Նէտրէթին երկնցուց ձեռքերը և յուզուած՝ ըսաւ.

— Նէտրէթ հանրմ, պիտի ջանամ կեանքիս մէջ ձեզի չափ բարձր էակ մը ըլլալ:

Նէտրէթ, իրեն երկարած այս ձեռքերը անկեղծօրէն սեղմելէ յետոյ, Քէնանի ձեռքին յանձնեց:

Նէժատ, հանդարտօրէն կուլար:

Նիհատ, տենդագին սպասումի մը մէջ, Նէտրէթին կը նայէր. իր տեսածներուն ու լսածներուն՝ երեւակայութիւն մը, պատրանք մը ըլլալէն կը սուկար:

Երիտասարդուհին, աչքերը, երկրորդ անգամ անոր աչքերուն ուղղեց. անոնց խորհրդաւոր սեւութենէն լուսաւոր գիշերուան մը յոյսերը կը փայլէին... գէմքին վրայ, հաստատակամութեանը վերջին պատուող ժպիտը կը ծաղկէր. յանկարծ, ինքզինքը բժիշկին թեւերուն մէջ նետեց. գլուխը, տարիներով իր մօրը համար բաբախող անոր սրտին կրթնցուց: Երկուքն ալ կուլային:

Նիհալի քաղցր ու բաբախուն ձայնը կ'ըսէր.
— Հայրի՛կս, եղբայրս քեզմէ ներողութիւն կը խնդրէ...

Նէժատ, մէկ ձեռքովը զայն իր մօտ հրաւիրեց և կուրծքին մէկ կողմը բանալով ըսաւ.

— Քու տեղդ հո՛ս է...
Մէկ թեւովը Նէտրէթին, միւսովը՝ իր զաւակին փաթթուեցաւ. երկուքն ալ իր կուրծքին վրայ սեղմեց... սեղմեց...

* * *

Այն գիշերը լուսնկան աւելի պայծառ էր. սոխակները յորգուն սիրոյ մը գեղգեղովը կուլային... Նուրբ մշուշի մը խաւին ներքեւ, մութ ստուերներու մէջ թաղուած երազկոտ ու վեհատեսիլ անտառին խորերէն սահակ թռչունի խորհրդաւոր հեծեծանքներ կ'արձագանգէին:

Նէժատ, պատշգամին մէկ անկիւնը քաշուած. առանձին ու մտասոյզ, լուսնի զովարար լուսին մէջ սիրային երազի մը պէս անչըռկ շրջագայող զոյգերը կը դիտէր: Քէնան ու Մուսալլան գէպի պուրակը, Նէտրէթն ու Նիհատն իւր գէպի բլրակը կ'երթային:

Մանկամարդունին, գլուխը իր սիրած երիտա-
սարգին ուսին կրթնցուցած՝ խիստ գրաւիչ ժպիտով
մը խնդացող շրթներուն մէջէն.

— Քանի մը օրերէ ի վեր իմ պատրաստութիւն-
ներուս՝ այս գիշերուան համար ըլլալը միտքերնէդ
չէիք անցներ, այնպէս չէ՞... մինչդեռ ես հարսանե-
կան զգեստներս ու ճերմակ քօղս ձեզի համար պատ-
րաստած էի... :

Պատշգամէն այս երջանիկ երիտասարդ զոյգը զի-
տած միջոցին, Նէժատ, հանդիպակաց բարձր լերան
սեւ ստուերներու մէջէն, թեւերը իրեն պարզող ճեր-
մակ տեսիլ մը կը նշմարէր։ Այս տեսիլը երթալով կը
մօտենար։ Անոր սքանչելի մարմինը ծածկող ճերմակ
ծածկոյթի ծալքերուն տակի մերկ ուսերու, սպիտակ
թեւերու, սեւ ու անուշաբոյր մազերու փայփայող
հպումը զգաց... յանկարծ թեւերը գիշերուան ամա-
յուլթեանը երկարեց... աւա՛ղ... անոնք՝ մութ պա-
րապուլթեան մը մէջ վար ինկան։

Այն ատեն, իր սիրոյ այս դառն պատրանքին
հանդէպ յուսավրէպ ու լքուած՝ իր հոգին, իր սիրտն
ու իր բովանդակ գոյութիւնը համակող անվախճան
վիշտերու կարօտովը հեծկտաց.

— Ճիւրէ՛թ... Ճիւրէ՛թ... :

300

ՍՈՒՐԲ ԵՆՐԱՅ ՇՆՈՐՀԱԼԻ
ԳՐԱԴԱՐԱՆ
ST. NERSES SHNORHALI
LIBRARY

23383
23384
2013

<< Ազգային գրադարան

NL0354949

<< Ազգային գրադարան

NL0354948

